

جیم گانز

GAMECAN

جيم كان

الكاتب: أحمد غنيم

إخراج فني: الباشا عبدالباسط

رقم الإيداع: 2020 / 8405

الترقيم الدولي: 6 - 111 - 844 - 977 - 978

Facebook Page: دار الزيات للنشر والتوزيع

E_mail: bentelzayat1@gmail.com

Website: www.bentelzayat.tk

مجلس الإدارة / د. شاهنדה الزيات

المدير العام / أ. محمود محروس إبراهيم

01066736765 - 01011122429



جميع حقوق الطبع والنشر محفوظة ©

لدار الزيات المشهورة قانوناً بسجل تجاري رقم / 49351



G A M E C A N

چشم کا

مِنْ رَحْمِ الشَّدَائِدِ يُولَدُ الْإِبْدَاعُ

أحمد غنيم



سأجعل عقلك يبحر في عالمي ليشعر بما أشعر به.. لا تطلب خيلاً من
الواقع، ولا منطقياً من خيال خصب.



عندما يصبح كل شيء غير منطقي سيتوقف العقل وتبدأ الفوضى..

رسمت سيلاً من الدخان في شكل حلقات متوازية قد خلجها شعاع نور
باهت بالكاد عبر النافذة خلف السرير.. لا شيء أفضل من أنفاس لهذه
السيجارة -pop marley-

-لعنة الله على سيد- ذلك الديلر الذي لا يتوانى عن إعطائي خليطاً من
الحشيش الذي يعالجه.. الطقس باهت كزجاج سيارة أمامي عبر توأ ضباباً
كثيفاً.. لا يهم قدر النوم ما دامت اللذة تأتي.. الهاتف ينادي كعادته.. وجوم
وصمت متدفق قاطعه رنين الهاتف..

جلست على حافة السرير متصنّعاً الشرود، قبل أن ألتقط الهاتف، مجيئاً
بصوت مبحوح استيقظ توأ ويقاوم نعاس أهل الكهف..

- خير؟!

- إزيك يا فارس؟

- تمام.

- حبيت أظمن عليك. يا ترى فكرت في اللي اتكلمنا فيه؟

زفرت بقوة ثم أطفأت السيجارة، والتقطت سيجارة أخرى أشعلتها
بقداحة بالكاد ما زالت متحفزة من إشعال سيجارتي الأولى. انتظرت صامتة
بداخلها بركان متوهج أكاد أستشعره.

- صدقيني مش هاعرف أكمل.

تابعت بصوت اختلج بنبرات حزينة:

- عشان بنتنا يا فارس.

- أنت لا تصلحي كأم أو زوجة. أنت إنسانة مهملة. أنا باحملك موت
رحيم، ومش هاسيب البنت تموت كمان بسبب إهمالك..

- فارس....

أغلقت الهاتف وألقيته على سريري، بعد أن أفسدت ما فعله مخدر
بوب مارلي توأ برأسي.. دائماً ما يأتي الاتصال في ذلك الوقت. هي لم تستطع
أن تنسى ما فعلته.. الوحدة التي أحياها خير من العيش مع امرأة سأموت
لحظياً عندما أراها..

أن تقاوم لتحيا حياة بائسة خير من أن تحيا كمن مات. يكفيك أن تحيا..
انتعلت "شيشباً" وغادرت الغرفة باحثاً عن شيء لأتناوله.. الصالة
فوضوية والوضع يشي بأن الشقة مملوكة لشاب عازب ولكن قد تجاوز
الأربعين خريفاً.. ملابس ملقاة فوق الأرضية، وسيل من الأوراق بكل أهلة..
ما زال الـ laptop على حالته منذ أمس فوق الترابيزة الصغيرة..

تقدّمت نحو المطبخ لأفتح الثلاجة.. لا شيء لأتناوله.. ربما نسيت من
قبل أن لا طعام في البيت.. ولم يفرق المطبخ عن الصالة؛ بل زاد فوضوية..
أطنان من القمامة.. الأطباق المتسخة.. رائحة عفن مصدرها من كل شيء في
مطبخي.. تقدّمت بوهن أقاوم غياهب التفكير، ودلفت الحمام لأفتح صنوبر
المياه، وأطفئ لهيب أفكار المتواردة بسيل من الماء.. لكن لا ماء هناك
كعادة كل يوم، وكان ذلك كافياً لأطلق زفرة حانقة تتذكر مأساة أحياها دوماً
وأعود إلى الصالة مرة أخرى..

جلست أمام شاشة الـ laptop لأرى ما قد أرسل لي.. لا جديد هناك غير رسائل زوجتي التي لا تكف عن ملاحظتي.. تناولت زجاجة بها قليل من الكحول وتجرعتها بسرعة ويأس.. أتصفح مواقع السوشيال ميديا لعلي أجد بها ما يفيد، ولكن لا رسائل..
أصدر البريد جرس تنبيه يخبرني بأن هناك رسالة جديدة.. فتحت الإيميل وكان حساباً مجهول المصدر لي..

* * *

الإثنين 7 يناير 2019..

من : gamecan88@gmail.com

إلى : fareshussienoff@gmail.com

العنوان: سري جداً.

" أستاذ فارس إزيك؟.. أتمنى تكون بخير، على فكرة أنا تقريباً عارف كل حاجة عنك، وعن معاناتك بسبب موت ابنك، بس مش عيب صحفي مشهور زيك كدا يضيع مستقبله ويفضل قاعد في البيت.. أنت مش أول واحد يحصل له كدا في حياته.. يا ريت تفهم إنك دائماً كنت سبب في نصرة المظلومين بتحقيقاتك وكشفك للفساد.. ما تحاولش ترد على الإيميل دا لأني مش هافتحه تاني.. ومش مهم تعرف أنا مين دلوقتي.. كل حاجة هتبقى واضحة لما نتقابل.. أنا معايا مستندات مهمة جداً هتكشف قضايا فساد كبيرة في البلد.. لو لسا أستاذ فارس زي ما أنت هتقابلني النهار دا بعد نص الليل الكيلو 70 طريق مصر إسكندرية الصحراوي، ويا ريت ما حدش يعرف حاجة عن الموضوع".

* * *

الشك بدأ يعبث بنفسي كفأر حائر يهرب من الموت، هذا البريد هو شخصي ولا أحد يعلم عنه شيئاً.. كيف توصل هذا الشخص له وماذا يريد.. لا بد أنه يعرفني جيداً.. وعندما كان اليأس يسبب موتي بالبطيء كان هذا البريد أملاً لي.. لكن الشك ما زال يساورني ولم أعتد الخوف من قبل.. فماذا سيحدث لي ومن سيتربص بي؟! ليس لي أعداء وإن كان فالיום قد تملك مني القنوط والضجر وفقدت ابني الوحيد وعائلتي.. لا عمل أذهب إليه، ولا أفيق من سكرات الخمر.. أنفاسي متهدجة ومتقطعة، والوحدة تلازميني كرفيق أبدي.. فهل يضر الشاة سلخها إن نُحرت؟!

الفضول هو السبيل، وهو سبب كل العلوم البشرية..

أنا فارس حسين صحفي ومُعد برنامج في إحدى الجرائد ذائعة الصيت.. تجاوزت الأربعين عاماً ولكن لا يبدو علي تقدّم العمر.. قاومت بالأمل والتفاؤل.. قاومت بهالي التقدم في العمر ودنوت من الخلود في عقلي.. تصورت أن كل شيء دائم.. وتأمّلت الحياة الوردية التي أحيها ونظرات الحسد التي تلاحقني حتى تبدّل كل شيء.. مات رحيم ابن السبعة أعوام بإهمال من زوجتي ثم انقلبت حياتي رأساً على عقب.. لم أستطع الصفح وظللت أتذكر لما كنت أعمل والآن بات علي أن أفقد أملي في كل شيء.. ريماس ابنتي لم تحبني مثل زوجتي.. لقد غرست بها الكراهية لي.. هي عادة النساء وإن أخطأن حاولن الهرب مما فعلن..

أغلقت الـ laptop وجلست أتفحص صالة الشقة، نظرات يأس من الفوضى تنعكس من عالمي.. أرحت رأسي على الكرسي وتأمّلت سقف الصالة.. شباك، عنكبوت، زواحف.. حديقة حيوان مصغرة.. العيش بلا امرأة معاناة، والعيش معها موت حتمي.. لكن دائماً الغريزة تدفعنا لنقع في برائن امرأة.. موت لذيذ وطريق محفوف بالخطر، ومن ثم يأس وزهد.

الحيوان بداخلنا ينتصر وعندما يفكر العقل يصرعه ذلك الحيوان أيضاً. الغريزة
لعنة والشهوة قاتلة.

قمت ودخلت غرفة نومي.. تأملت الدولاب، جميع ملابس رسمي.. لا
ضير من القليل من التأنيق، وإن كنت أهدع نفسي بتلك اللحية التي زاد
طولها وكست وجهي.. تناولت حلة رسمية وهممت لأرتديها أمام المرأة..
نظرت إلى وجهي وشعراتي الداكنة.. غزت بعض الشعرات البيضاء رأسي
ولحيتي.. على أعتاب الكبر والشيخوخة.. ربما موت ابني منذ عام قد أثر بي
كثيراً.. انتهيت وهندمت ملابسني، ثم تناولت فرشاة شعر ومشط شعري
لتظهر بعضاً من الوسامة التي توارت عن ناظري قبلاً، وكأن شيئاً ما يدفعني
لتفاؤل مصطنع..

ارتديت حذائي وتوجهت ناحية باب الشقة ثم خرجت وأغلقت خلفي
بصفعة قوية، ترجلت على الدرج بخطوات شاب يافع بما لا يناسب خريف
عمري.. لا حاجة لاستخدام المصعد؛ فأنا أسكن بالطابق الأول.. وعندما
اقتربت من باب العمارة وجدت "عم سالم".. رجل طيب لا يتحدث كثيراً
كأغلب البوابين.. عجوز قد عاصر الكثير، وعيناه تومضان بالحب.. ما إن رأني
حتى قام من كرسيه الخشبي وهندم جلبابه الأسود..

اقترب مني وسلّم عليّ بحرارة وودّ قبل أن يردف:

- أستاذ فارس. وحشتنا والله، أخيراً قررت تنزل تشوف شغلك..

- شغل إيه؟! الساعة 2 يا راجل يا طيب. أنا كويس ما تقلقش. قُلت
أنزل عشان أرحمك من طلباتي شوية.

فقال بود:

- دا خدمتك شرف ليّ يا أستاذ فارس يا محترم. وأنا أنسالك عملت إيه
مع بنتي ومعايا.

ربت على كتفه:

- ما تقولش كدا يا عم سالم أنت أبويا.

- عربيتك قدام العمارة في مكانها. كل يوم كنت باغسلها لك.

- حبيبي يا عم سالم.

ودسست يدي في جيبي ثم ناولته بضعة ورقات فئة العشرة جنيهاً

- روح ربنا يكرمك يا فارس بيه ويوفق مقاصدك.

* * *

صفت سيارتي على جانب الطريق أمام أحد المقاهي بمنطقة وسط البلد.. الساعة الآن تجاوزت الثالثة عصرًا والطقس ضبابي.. قليلٌ من البرد يثلج أنفاس سيل البشر الذين يعبرون الأرصفة الجانبية وبخار الماء يتصاعد كدخان كثيف.. السيارات تسير ببطء.. الرطوبة عالية وتقلبت الأجواء لتبدأ السماء تكشر عن أنيابها بسيل من المطر.. الجميع يقترب من حافتي الطريق ليستتر عن هذا المطر الساقط أسفل البنايات، لكني ما زلت أقف بالقرب من الباب الأمامي لسيارتي.. أتشمم رائحة المطر وأنغامه العذبة. هي لي كميلاد طفل قد أتى إلى الحياة...

من لا يعشق المطر لا يعشق الحياة...

تحركت ببطء ألتقط أنفاسي بسعادة عامرة، وكأنني أمضي لحفل عشاء برفقة فتاة لاحقتها سيل سنوات عمري.. قد ابتلت حلتي وغمرها الماء.. المقهى لا يبتعد عني سوى خطوات لكنني انتظرت حتى أحتضن المطر وأشم رائحة نداءه..

اقتربت من باب المقهى على اليسار.. كانت الطاولات متناثرة كصفيح تصنع ممرًا نحو الداخل.. أكثر من رأيتهم couples وهذا لا يناسب مقابلة صديق طفولتي المستشار عمر مكرم.. كان عمر صديقي منذ الصف الأول الابتدائي، وكان مهملاً دراسياً من أسرة متواضعة أتت من الريف لتشق طريق كفاحها بالعاصمة.. وظل هذا الطفل منبهراً بالعاصمة حتى تخرج من

كلية الحقوق بتقدير مقبول، والمحصلة لدينا ذات الاهتمامات.. سكير وعرييد يعشق النساء.. لم يتزوج قط، غير أنه أنجب ذات مرة من إحدى فتيات الليل اللواتي يدافع عنهن، لكنه دائماً ما يجد حيلة لكل شيء.. عمر هو شخص سوي منقسم كأغلب الرجال الشرقيين.. يرى بعضهم منه الوقار وغيرهم يقولون بلا مبدأ، إلا أنه حاول أن يعيد كل شيء بيني وبين زوجتي لما كان عليه.. لكن الرفض قاطع، فباشر عمله ويحاول بين الحين والآخر..

ما زلت أتفحص الطاولات حتى أقي صوته من آخر المقهى:

- فارس، تعالي.

رمقته مبتسماً.. ما زال يبدو كشاب ذي عشرين ربيعاً متأنق الملبس ومهندماً.. شعره متوسط الطول.. قمحي البشرة.. حليق اللحية.. حواجه غليظة فوق عينين حادثين.. ليس وسيماً لكن من النوع صاحب الكاريزما الساحرة..

اقتربت منه فقام وسلّم بود:

- إيه يا عم فارس! هو إحنا ما نشوفكش غير عشان مصلحة.

قلت مبتسماً:

- ماعلش يا عمر أنت عارف الدنيا تلاهي.

ثم أضاف عندما جلسنا:

- ولا يهملك يا فارس. تشرب إيه؟

- مش مهم. قضية إسقاط الحضانة وصلت لفين؟

قال بجدية:

- بص يا فارس، إحنا صحاب من زمان، بس حابب أقول لك إن موقفنا

ضعيف بجد. أغلب اتجاهات القضاة في القضايا دي بتبقى رفض. غير إن

حادثة موت ابنك بالنسبة لأي قاضي مش إهمال من الأم، ولا تعد قرينة

على حالة الإهمال الجسيم، ففكرة إننا بنستند لدا في حد ذاته مش كفاية.

أردفت غضباً:

- أنت اللي بتقول كدا يا عمر! أنت عارف إنها سبب موته.
- أنا مقدر اللي أنت فيه، لكن أنا باحاول مش ساكت.
- أنت عارف إنها سبب موته. يعني إيه أم تدخل مول وتسبب ابنها لحد ما عربية تقتله؟! واللي قتله ما أخذش يوم واحد!!
- قال بأسى:
- دا قضاء وقدر.
- عمر أنا هاخذ البنت. بالقانون هاخذها. بالعافية هخذها، ولو حصلت إني أرتكب جناية.
- اهدا يا فارس.
- فصحت غضباً:
- مش هاهدى، أنت لازم تتصرف، أتعبك هتاخذها يا أخي.
- كانت النظرات تلاحقنا فقال بهدوء:
- فارس اهدا، فرجت علينا الناس. أنا من إمتى حسبتها معاك كدا؟!
- أنا ماشي.
- وقمت من الكرسي ثم أضفت:
- عايز أسمع أخبار كويسة.
- ثم تحركت تجاه باب المقهى مغادراً...

* * *

الثلاثاء 8 يناير.

الساعة 1 صباحاً.

طريق مصر إسكندرية الصحراوي.

قدتُ سيارتي بتربص وخوف بسرعة منخفضة وكأنني مقبلٌ على موت حتمي.. وما زلت أجهل ما دفعني للذهاب لملاقاة ذلك المجهول.. بطريق مصر الإسكندرية الصحراوي، بعد خمسة وخمسين كيلومترٍ تقريباً.. السيارات قليلة والطريق على مرمى بصري خالٍ تماماً؛ فكل السيارات كانت تسبقني عندما قدت كأنني أركب سلحفاة تجاوزت المائة عاماً.. سرت بالحارة الأخيرة أقصى اليسار بجانب الفاصل الخرساني بين الطريقين.. الإضاءة خافتة ومصابيح السيارات من الجهة الأخرى تعمي عيني.. بدأ النوم يداعب جفني، فيومي كان ممتلئاً ببعض الأحداث، لكنني قاومته خوفاً من أن يتغلب علي..

أستمع لأغنية رومانسية حزينة تركية تأثرت بها كثيراً، ورغم أنني لا أجد التركية bana birak أو اتركه لي.. الطريق هادئ كهذا اللحن.. وأسير بما يقرب من ستين كيلومتر في الساعة، لكن كان علي أن أزيد السرعة قليلاً.. رنُّ الهاتف من رقم غير مسجل، التقطه وأجبت بتوجس فأتى صوت من الجهة الأخرى يقول بود:

- أستاذ فارس، إزيك. كنت عارف إنك جاي. هتلاقيني مستنيك ومولع النور على الهادي. خد أول ملف وتعالى. عربيتي جيب رينجلر.
أجبت بصوت يقاوم الخوف وقلت بحزم:
- آها، شُفتك، هاخذ أول دوران وأجي.

بعدها أغلقت الهاتف كنت بالفعل قد رأيت سيارة على جانب الطريق من الجهة الأخرى.. زدت من سرعة المحرك حتى قمت بالدوران متجهاً إليه.. اقتربت من سيارته وصدفت سيارتي خلفها، ثم ترجلت ومضيت نحو سيارته بحذر حتى اقتربت من الكرسي الأمامي، وكان يجلس أمام عجلة القيادة.. ما إن رأني حتى ابتسم وقال بود..
- اركب يا أستاذ فارس.

لقد كان يبدو في الخمسين من عمره.. أصلع الرأس وحليق اللحية.. له شارب غليظ.. لم أتبين كافة قسماته لخفوت الإضاءة أمامي.. فتوجهت إلى الجهة الأخرى وركبت بالقرب منه.. حتى تبينت ملامحه.. لا شيء يذكر في تفاصيل وجهه غير ندبة كبيرة في رقبته.. عينان تلمعان.. حواجب عريضة وأنف مستقيم.. صمت لبرهة قبل أن يصفحني ببلادة.

- آسف على الطريقة دي. الحقيقة أنا قابلتك هنا لأني عندي طيارة بكرة الصبح في الإسكندرية. أنا متراقب وقدرت أهرب منهم. كنت قاعد في مزرعة واحد حبيبي هنا.

قلت ببلاهة:

- مش فاهم!

- أعرفك بنفسي. أنا دكتور إبراهيم محيي عالم بيولوجي. كنت شغال في مركز أبحاث كبير جدًا برا مصر بدون تفاصيل، وكانت مهمتي واضحة. إني أحاول أشوف الجينات المسؤولة عن الضعف وأعمل لها عملية تصبيت، وكان في مجال شغلي برا التجارب ممنوعة على البشر. الحقيقة التجارب اللي كنا بنعملها كانت هتمثل طفرة كبيرة جدًا في الحياة البشرية. تخيل إنسان كامل لا بيمرض ولا يبحصل له شيخوخة! إنسان كامل، تقدر تقول كنت باحاول أصنع إكسير الخلود. وفضلت أكثر من 15 سنة بأعمل تجارب. لكن للأسف..

- إيه؟!

قال بأسى:

- الحقيقة إني اتخذت طول الفترة دي، وكنت فاكّر إني باقدم خدمة لبلدي. أنا ما كنتش إنسان كامل، وغريزة العلم دفعتني إني أصحي وحش جوايا. إحنا كنا بنستخدم الأطفال في التجارب دي. التجارب كان ليها شقين. شق كان هدفه البحث عن الجينات المسؤولة عن الشيخوخة والشق الثاني كان عن طريق تحفيز الجينات دي. بمعنى إن كان جزء من الأبحاث هدفه

تسبب شيخوخة مبكرة للمتلقي. وبالفعل تطور العقار دا FD11 وهو عقار
ييسبب تدمير الميتاكوندريا في الخلية، ويؤدي زي ما قُلت لك لظهور أعراض
الشيخوخة بعد فترة قليلة من التلقي.
قلت بريية:

- لكن إيه الهدف من التجارب بتاعة تسريع عملية الشيخوخة؟
- الهدف كان بسيط؛ عشان نتأكد من إن الجينات المستهدفة دي هي
فعلاً المسببة للشيخوخة، ونقدر نعمل لها عملية تصبيت ووقف. والغريبة
إننا قدرنا نوصل للعقار دا قبل ما نوصل للهدف اللي اتعملت التجارب
عشانه، وهو الإنسان الكامل. لأن ببساطة التجارب دي كان الهدف منها
وصول للعقار FD11 في وقت ما كان فريقى بيشتغل على البحث عن
الجينات دي كان في فريق تاني بيطور العقار دا، واكتشفت إني أهديتهم
سلاح فتاك يقدر يعمل كتير.

- قصدك إيه؟!

- أستاذ فارس العقار FD11 يقدر يخلي طفل عمره خمس سنين يوصل
لمرحلة الشيخوخة في فترة أقل من ست شهور. يعني تقدر تقول عجوز عمره
ما يفوق سبعين سنة في جسم طفل. صعبة مش كذا؟! الفكرة هنا في مدى
الانتشار وقدرة العقار دا على إبادة مجتمعات كاملة. الحرب ما بقتش
بسلاح زي الأول؛ الحرب بقت حرب بيولوجية.

قلت بجديية:

- إيه المطلوب مني؟

- أنا عرفت عنك كتير. عرفت أنت إزاي قدرت تكشف فساد مجموعة
مهران وتبين الصفقات المشبوهة ليها. عرفت إنك قدرت تكشف فساد كتير
من رجال الأعمال وتواطؤهم مع المسؤولين الفاسدين. وعرفت إنك فقدت

ابنك وطلقت زوجتك. أستاذ فارس أنا بالنسبة لي أكثر صحفي مشهور
وعنده مبدأ واتكوى من وجع موت ابنه هو أنت. فيه أطفال كثير ماتوا
بسبب تجاربنا دي. ليهم أهل وماتوا زي ما أنت فقدت ابنك كدا، وأكد
حاسس بألم الفراق. حتى أطفال الشوارع اللي مالهمش أهل كانوا مادة
خصبة للتجارب.

وأردف بحكمة:

- انحراف المبدأ لا يميز، وأسوأ إنسان ممكن يكون بلا رحمة هو عالم
انحرف.

ثم تنهد وأردف ثانية:

- أنا عايزك تتكلم عن الموضوع دا في الجريدة عندك. وتوصله للأجهزة
السيادية في الدولة. أنا ما أقدرش أعمل دا بنفسى؛ لأني متورط في الشيء دا
وما عنديش قدرة إني أواجه.

فكرت قليلاً وأردفت:

- لكن الكلام اللي قُلته دا خطير جداً...

قاطعني بيأس:

- إيه؟ خايف؟ لو قُلت لك إن لسا فيه أطفال بتموت كل يوم!!

أومأت رأسي فناولني دوسيه وأردف:

- الملف دا فيه الحكاية كلها، وأسماء الناس اللي اشتريت معايا. فيهم

جنسيات ثانية ومكان الأبحاث وكل شيء عن الموضوع، يا ريت....

صمت إبراهيم وحرك رأسه يميناً ويسرة بعينين متوجستين.. غزت أمارات

الخوف قسماته، ثم نظر لي بعين ثاقبة وقال بخوف:

- شايف العربية اللي واقفة على الناحية الثانية دي؟!

- لأ.

أشعل محرك السيارة وقال:

- لازم نهرب.

- فيه إيه؟! طب نزلني.

فنظر لي بأسى وقبل أن يتحدث اخترقت رصاصة غادرة رأسه لم تضل طريقها وكأنها برمجت حاسوبيا حتى لا تضل الطريق في هذا الظلام الحالكة.. تناثرت دماؤه على ملابسي.. مخ مفتت لقطع صغيرة.. موت وشيك بدأ مع سيل الطلقات التي انهمرت علي كأمطار رعديّة وسحب كثيفة.. تملك الرعب مني وارتعدت خوفاً.. الخيالات تدور في عقلي وذكرياتي جميعها برأسي الآن.. لا شك أن الموت أصبح أقرب مما أعتقد.. فتحت باب السيارة مختبئاً في جثة إبراهيم ثم ألقيتها أرضاً وجلست أمام عجلة القيادة.. أغلقت الباب وأطلقت العنان للسيارة.. أسير بسرعة جنونية.. وأنظر في المرآة لأرى ثلاث سيارات جيب تلاحقني وتقرب مني.. تبا لك إبراهيم، لماذا أنا؟.. لماذا لم تحدث الشرطة بالأمر؟! لقد تورطت والآن الموت خلفي.. اقتربت مني الثلاث سيارات من الجانب الأيسر.. حتى أصبحت إحداهن تسير في محاذاتي ورأيت سلاحاً ألياً موجهاً إلي.. زدت سرعة السيارة بفزع وزاد خوفي مع الطلقة التي اخترقت السيارة من الخلف لكن لم تصبني.. أصبحت بالحارة الأخيرة جهة اليمين.. وما زالت تلاحقني السيارات.. اقتربت مني ثانية.. ثم أطلق أحدهم طلقات أصابت عجلة السيارة الأمامية ثم الخلفية.. لم أستطع التحكم في مقود السيارة.. انقلبت السيارة بعنف مع سرعتي الزائدة، وظلت تنقلب وتتدحرج ككرة لتستقر على جانب الطريق..



من لم ير الموت بأم عينيه لن يقدر قيمة الحياة، ومن اعتاد النعم كان ناقماً وإن ملك الخلود..

كانت الغرفة وثيرة شاسعة، بيضاء الجدران وسرير معدني بمنتصفها.. على الجانب الأيسر من السرير كومود صغير عليه بعض شرائط وأقراص دواء.. أسلاك متصلة بجسدي كثيرة وصوت جهاز ضربات القلب يصدر طنيناً يسبب الصداع.. إبرة المحلول متصلة بيدي اليسرى ومعلق على عامود بالقرب من السرير.. نظرت إلى المحلول فوجدت زجاجته فارغة.. تفحصت الغرفة ثم نظرت إلى ساعة الحائط أمامي وكانت الثانية عشرة مساءً.. النافذة على يمين سريري تأتي بهواء بارد.. جسدي يرتعش من البرد والأمطار كثيفة بالخارج.. باب الغرفة مغلق والتلفاز أمامي معلق على جدار في مواجهة السرير، لكن لم أملك القوة لأقوم بفتحه ولا أرى أين الريموت؟! فُتح باب الغرفة بهدوء.. كان شاباً ثلاثينياً يرتدي عوينات طبية ومعطف الأطباء الأبيض.. اقترب مني ورسم على وجهه ابتسامة باردة أقرب ما يكون لابتسامة طبيب لا يهتم سوى بعمله.. ما إن اقترب حتى رأيت لافتة اسمه على المعطف الأبيض مكتوبة بالإنجليزية.. شارة ذهبية بداخلها كتابة سوداء (محمد علي).. وقف أمام جهاز قياس ضربات القلب، وسرعان ما تحدث وهو يتفحص الأسلاك في جسدي..

- حمد الله على السلامة يا أستاذ فارس.

- الله يسلمك يا دكتور محمد.

فقال مازحاً:

- لا دا أنت كدا عال. احتمال كبير تقابل النقيب تامر النهار دا ياخذ أقوالك عشان يقفل المحضر ويبعته النيابة.

توجست نفسي فقلت بقلق:

- أقوال إيه؟ أنا مش فاكِر حاجة.

قال بجديّة:

- يعني مش فاكِر الحادثة ولا أي حاجة؟!

- لا صدقني مش فاكِر.

قال في حيرة:

- إشاعة مخك سليمة يا أستاذ فارس. عموماً ممكن يكون فيه فقدان

جزئي في الذاكرة من صدمة الحادثة. هابقي أبعت لك دكتور سلامة

اختصاصي المخ والأعصاب عشان يطمنا أكثر. بس أنا كدا كدا لازم أكلم

النقيب تامر عشان ياخذ أقوالك في المحضر.

ثم أضاف وهو يعبث ببعض الأسلاك:

- هنكلم أستاذ عمر ونبلغه إنك فُقت.

أومأت برأسي فأردف وهو يتجه نحو باب الغرفة:

- هابعت لك الممرضة تشوفك لو محتاج حاجة.

ثم استدار وقال مبتسماً:

- أستاذك يا أستاذ فارس، وحمد الله على سلامتك تاني.

- الله يسلمك.

* * *

اقترب الغروب وزادت الأمطار المتساقطة.. أقلّب في قنوات التلفاز بيأس

وملّل بعد أن اعتدلت في السرير.. أنفحص الغرفة بهدوء وشرود.. الوجبة

التي تناولتها قبلاً سببت لي ألماً معوية وتقلصات.. طعام المستشفيات بلا

طعم كحالتها ولكن الجوع قد دفعني لأتناوله بشراهة أسد جائع.. الساعة

الآن الخامسة والنصف والغيوم ما زالت على حالها منذ الصباح وكأن

الشمس لم تشرق اليوم.. فُتح الباب وتقدّم عمر. بدا عليه القلق والتوتر

- ولكنه كان مبتسماً.. اقترب مني وسحب كرسياً من أمام الجدار ليضعه بالقرب من السرير ويسلم علي بلهفة..
- حمد الله على السلامة يا فارس. إيه اللي حصل؟
- الله يسلمك يا عمر.
- ثم جلس وأردف:
- أنت كنت رايح إسكندرية تعمل إيه؟
- والله دا موضوع طويل يا عمر.
- مش فاهم.
- حد كلمني بخصوص شغل وفجأة انضرب علينا نار في عربيته فمات ورميت جثته وسقت العربية، فضلوا ورايا وبعدين مش فاكر !
- قصدك إبراهيم محيي.
- آها.
- وأنت إيه علاقتك بدكتور إبراهيم؟
- مش مهم تعرف دلوقتي.
- أنت عارف إن العربية اللي كنت فيها اتفحمت ولقوك مرمي بعيد عنها بحوالي 30 متر تقريباً. يعني حد أنقذك.
- قصدك إيه؟
- قصدي تخلي بالك في التحقيقات؛ لأنك كنت قدامهم، لو كانوا عايزين يقتلوك كانوا عملوها.
- قلت بقلق:
- تفنكر إن ممكن يتهموني بحاجة؟!
- أفنكر جدًّا؛ لأنك سقت عربية إبراهيم قبل تنفجر. فتح مخك أنت. أنا هابقي أحفظك تقول إيه.
- أنا قُلت إني مش فاكر.

- تمام خليك كدا لحد ما نشوف التحقيقات هتوصل لفين. أنت ممكن تخرج بكرة، بس فيه حاجة كنت عايز أقولها لك.

- إيه؟

قال بودّ:

- يا ريت ما تخرجنيش.

ثم قام توجه نحو باب الغرفة وأشار:

- تعالي يا ملك.

صحت فيه:

- أنت إيه اللي هببته دا؟!!

نظر بضيق وغادر الغرفة عندما كانت ملك تعبر الباب وتتمايل بخطواتها بعذوبة أنثوية.. ما زالت كما هي، تصغري بعشر سنوات.. ترتدي الكعب العالي الذي علا دبيبه.. أكانت تثير غرائزي أم تثير غيرتي عليها؟! ترتدي فستاناً أسود عاري الصدر، برز منه نصف صدرها، عليه بالطو مفتوح.. كان فوق الركبة بقليل.. لا أعلم ماذا حدث بعدما ابتعدت عنها؟! هل تحولت لعاهرة أم إنها لا تزال تريد أن تشعر بأنوثتها! ملك هي فرس جامح.. غزال ضلّ طريقه والصيد لا يبالي به.. صبغت شعرها باللون الأشقر وارتدت عدسات طبية زرقاء.. زادت أنوثتها وترعرعت بفراقي.. نظراتها بين الحب والشهوة والهيام والعتاب.. أنفها دقيق مستو.. حواجبها عريضة كأن فنائاً رسمها بدقة بارعة.. شفتاها بارزتان والجسد مثلهما.. منحنيات إفرست وهضبة التبت.. ملك شيطان بارع هرولت منه خوفاً.. تملك الحيل لكل شيء.. اقتربت ورمنتني بنظرات حزن مصطنعة.. لم أمالك نفسي وأنا أعنفها بسخط كمن أنهى توا ليلة حمراء ولم يعط عاهرته الأجر..

- إيه القرف اللي أنت لبساه دا؟! أنا كنت صح لما قُلت لازم آخذ بنتي

منك. بزمتك دا منظر أم محترمة؟! أنت هتفضلي زبالة كدا لحد إمتى؟!!

قالت بغضب:

- لو سمحت يا فارس.

ثم صمتت واقتربت تجلس على كرسي بجواري وتابعت بخبث:

- لسا بتغير علي؟

- خايف على بنتي. أنت إيه اللي جابك؟

قالت بعدما سقطت دمعات من جفنيها كدموع التماسيح:

- جاية أشوف أبو ولادي.

ثم مسحت عينيها برفق وأردفت:

- ولا أنت عايز الناس تاكل وشي؟!؟

- طب يا ستي متشكرين. أديك اطمنت، ممكن بقى لو سمحت

تتفضلي؟

وقفت وقبضت على يدي اليسرى:

- فارس أنت ليه مش قادر تفهم إنه ما كانش ذنبي. فارس أنا بحبك. ما

تسيينيش كدا. يا فارس بجد أنا مشتتة ومش عارفة أعمل أي حاجة في

حياتي. فارس أرجوك ادبني فرصة واحدة وشوف أنا اتغيرت ولا لأ.

سحبت يدي بقوة ثم دفعتها فسقطت أرضاً حتى برزت مفاتنها وصحت

بغضب:

- يا عمر.

- يا عمر.

فتح عمر الباب بعجل ودلف الغرفة وهو يحاول تحاشي النظر إليها

ولكنها لم تستر ما ظهر من ملابسها عندما كان الفستان قد ارتفع كثيراً

وأظهر فخذيها ثم قال بتوجس..

- ما لك يا فارس؟ خير يا ملك؟

قالت برعونة:

- اسأل صاحبك.

اقترب منها وساعدها على النهوض، نظرت إليها محتقراً ردة فعلها لأنها
لم تحاول ستر جسدها ثم أردفت:
- مش باقول لك هتفضلي زبالة.
ثم صحت في عمر:
- لو سمحت خرجها برا.

* * *

الليل له عواء كعواء الذئاب وطين كطين الذباب.. الليل سرمدي خاشع
أمام المتأملين وباطش أمام المنعزلين.. الليل همهمات وصمت وغياب
تفكير.. لا يأتي سوى بأفكار سوداوية حمقاء حتى لمن تأمل.. الساعة الثامنة
والنصف مساء.. هدوء في الممرات.. هدوء خارج المستشفى.. صمت مطبق..
أشعلت التلفاز على محطة إخبارية وشردت أتفحص كل شيء حولي.. لماذا
أنا؟! ولماذا ذهبت؟! تورطت بشيء ليس لي به طاقة ولم أحصل على ما
يفيد.. تبا لفضول البشر.. هل سيتكونني أم سيحاولون قتلي؟! ربما لم يريدوا
ذلك وأنقذوني من الموت وهذه هي نهاية الأمر..

ما زالت صورتها أمامي على حالها.. ملك السهم الفتاك الذي يعصر
قلبي.. ربما لا أحد يعلم أنني ظللت أشك أنها تخونني منذ يوم زواجنا
الأول.. كانت متحررة ومنتفحة لا تريد أن أضيّق عليها الخناق بغيرتي..
وسواس قهري بالخيانة ولدي عذر لذلك.. أهملت كل شيء غير الحفلات
الصاخبة وزميلات الدراسة.. المال كان في جعبتي وأغدقت عليها ببذخ.. كل
شيء يمكنها الحصول عليه.. ابنة اللواء أمين خيري بالطبع كانت تحيا حياة
الملوك وعائلة خيري المرموقة التي تمتلك الجاه والمال لا بد لبناتها أن يحيين
بذات الشاكلة.. ملك لقد مللت منك ومن عائلتك.. فلتذهبوا للجحيم
جميعاً..

عمر غادر بقليل من السباب واللعنات.. يتحمل حماقتي ولكن هذا
جزء فعلته.. الصداقة مريضة وأنا لست ذلك الصديق طيب القلب.. هو
ليس كذلك أيضاً بل يحاول أن يظهر دوماً في دور المُصلح، وهذا جانب من

غروره الأزلي منذ صبانا.. عمر صديق جيد لكنه عبد للمال ويعشق النساء، بلا قلب أو رحمة.. ومن عشق النساء لا يؤمن كثيراً وهكذا نظرت إليه.. أحبه وأثق به لكن ليس لذلك الحد أن أعطيه سائر أسراري وربما أنني لا أعطي سري لأحد أيضاً..

الباب فُتح تَوّاً دخل الدكتور محمد وبصحبه شاب حليق اللحية.. مفتول العضلات ومهندم الملابس.. عيناه ثاقبتان حادثان.. حواجب خفيفة وأنف معقوف.. شارب خفيف عريض خبأ شفته العليا.. ابتسم بخبث لتظهر أسناناً صفراء تخبرني بإدمانه للتبغ.. يرتدي بنطالاً جينز وقميصاً أبيض.. ويحمل جاكيت جلدياً فوق ساعده الأيسر.. وسيم بقدر كافٍ وذو كاريزما. ما إن دخل حتى أشار للدكتور محمد وقال:

- شكراً يا دكتور. تقدر تتفضل أنت.

فأوماً محمد رأسه وقبل أن يغادر قام هذا الشاب بإشعال سيجارة. فأردف محمد بخجل:

- التدخين ممنوع يا تامر بيه.

قال تامر بحزم وهو يشير لباب الغرفة:

- شكراً تقدر تتفضل.

غادر محمد الغرفة فاقترب تامر حتى وضع الجاكيت على السرير وجلس

على كرسي بالقرب مني ثم قال بود:

- تدخن؟

- كنت محتاجها جيت في وقتك.

ناولني سيجارة وقال وهو يشعلها لي:

- يا أخي الدكاترة دول تحسهم عالم مريضة. على فكرة لا باحبهم ولا

باحب أدخل مستشفيات. يعني أكيد طبعاً مش هتخليني أرجع من المشوار دا من غير ما أطلع بفائدة.

ابتسمت فتابع:

- عايز ندردش سوا بشكل ودي كدا. أنا طبعاً من أشد معجبينك يا أستاذ فارس، وهنا ممكن تعتبرني صديق مش ظابط شرطة.

أومات رأسي:

- تحت أمرك.

- إيه علاقتك بدكتور إبراهيم؟

- صديق.

فسحب نفساً عميقاً من السجارة وزفره بقوة:

- لكن إبراهيم ما كانش له صحاب خالص.

- وسيادتك عرفت مين؟

- بيقولوا.

قلت ببلادة:

- تحرياتك غلط.

فأوماً رأسه ونظر لي بعين ثابتة:

- صلح لي !

- كان له صحاب.

قال بسخرية:

- كنتوا بتعملوا إيه في الوقت دا على الصحراوي؟! هو مش أنت متجوز برضه. ألا هو مراتك سابتك ليه؟! ثم صمت وهلة وتابع بخبث:

- عشان علاقتك بإبراهيم؟! قلت بغضب:

- سيادتك واضح إنك جديد في الشغل. وطريقتك دي تعملها مع الجنائين. أنا هنا مش متهم ولو تعرف مين فارس حسين هتتكلم معايا كويس.

ألقى سيجارته على الأرضية وفركها بقوة ثم قام وتوجه نحو النافذة وتنفس بعمق ثم التفت لي قائلاً:

- الجو برد قوي. تعرف يا أستاذ فارس العيال عندنا في الحجز بيناموا على الأرض في عز البرد دا. بس هما جنائين يقدروا يستحملوا. بصراحة ما جربتش أشوف صحفيين كبار في الحجز قبل كدا.
- قلت بتوجس عندما رميت سيجارتي على الأرضية:
- أنت عايز إيه؟!
- قُلت لك ندردش بشكل ودي.
- أنا مش متهم بحاجة.
- تقدّم بهدوء وجلس على الكرسي:
- ممكن تبقى متهم! إلا لو فهمتني إيه اللي حصل.
- أنا مش فاكر حاجة.
- ضحك بسخرية وتابع:
- آها قُلت لي. فاقد الذاكرة يعني. الأفلام بيحصل فيها كدا بس للأسف ما باحباش، فيا ريت ما تفرجنيش على فيلم قديم.
- طب ولو حكيت.
- يبقى وفرت علي وعلى نفسك كتير.
- أو مات رأسي وقلت بثقة مصطنعة:
- أنا جالي إيميل مجهول حد بيقولي تعالى عند الكيلو 70 لأن معايا مستندات بتكشف فساد كبير في البلد وما حدش يقدر يعمل دا غيرك. بصراحة الفضول شدي ورُحت المكان دا لقيت دكتور إبراهيم واداني ملف قال لي إن فيه كل المستندات اللي قال عليها. مافيش دقايق وانضرب علينا نار. فرصاصة فجرت مخه أنا من الرعب زقيته من قدام الدرکسيون وجريت بالعربية. فضلوا ورايا لحد ما العربية اتقلبت ومش فاكر أي حاجة بعد كدا.
- ابتسم بخبث:
- طبعا المستندات دي مش معاك.
- العربية اتفحمت.

- ولا حتى ادالك كارت ميموري؟
- تفتكر لو كانوا أنقذوني كانوا هيسيبوني عادي كدا من غير ما يفتشوني!
لامس أرنبه أنفه بسبابته وأردف:
- وطبعاً الإيميل دا موجود.
- أكيد.
فقام من الكرسي وقال:
- ابقى قول لهم الكلام دا في النيابة. دا لمصلحتك. الكلام الي قُلته دا هيبعد أي شبهة عنك.
- أفهم من كدا إنك بتساعدني؟
رمقني بعين واثقة:
- أنا وظيفتي أحقق العدل.
ثم تناول الجاكيث وتوجه نحو باب الغرفة مغادراً دون أن ينبس ببنت شفة

* * *

ترجلت من سيارة الأجرة أمام باب العمارة مبتعداً عنها بضعة مترات.. كانت السحب رعدية والرياح عاصفة، ولكن لم تكن هناك أمطار.. ما زلت أرتدي حلتي الرسمية.. الضوء خافت في الشارع إلا ضوء المصابيح بمدخل العمارة.. الساعة الحادية عشرة مساءً، وطوال اليوم كنت برفقة عمر في النيابة بشأن أقوالي.. كان يوماً مليئاً بالأحداث والمنعطفات.. كل شيء مر على ما يرام، ولم يبق لي سوى الراحة بعد هذا العناء..
تقدّمت نحو مدخل العمارة، كان عم سالم يجلس على الكرسي أمام المدخل يلتحف بطانية رديئة، وكعادته يدخل النرجيلة ويدندن لحناً لأمر كلثوم.. كلمات من الطرب الأصيل.. هو لا يأبه بشيء، دائماً يشعر بالسعادة.. في بعض الأوقات تمنيت أن أصبح مثله أعيش اليوم بيومه ولا أفكر.. اقتربت منه فوقف من الكرسي احتراماً وقال بود:

- أستاذ فارس، حمد الله على سلامتک. وحشتنا والله.
قلت مازحاً:
- إيه الروقان دا يا عم سالم؟ ما كنتش أعرف إنك مزاجك عالي كدا.
ضحك وتابع:
- آدينا بنتسلى يا أستاذ فارس.
- طب أنا طالع أرتاح شوية. ناقصك حاجة؟
- ربنا يخليك.
ثم ضرب جبهته براحة يده اليمنى وقال:
- آها نسيت، فيه حد ساب لك حاجة.
- إيه؟!
دس يده في جيب الجلاب وأخرج فلاشة:
- البتاعة دي، ما اعرفش اسمها.
تناولتها منه وأردفت:
- طب شكراً يا عم سالم، تصبح على خير.
- وأنت من أهله يا فارس يا ابني.

* * *

أصدر باب الشقة صريراً حدّاً زاد مع خفوت الصوت في العمارة وكأنه يخبرني أنني ضيف غير مرحب به.. ليالِ صماء وبرد قارس.. لوحة مكتملة لحالة من الرعب الهيستيري لرجل شارف على الموت.. تأملت سلة القمامة أمام الشقة.. رائحة عفنة أسفل قدمي على يساري تشي بأن لم يعد أحدهم يهتم لأمرى حتى عم سالم.

دلفت أتحمس موطأ قدمي نحو الداخل في هذا الظلام الكئيب.. أغلقت باب الشقة قبل أن أشعل مصباح الصالة الذي كان بالقرب من باب الشقة لكن لم أستطع رؤيته.. أخرجت هاتفى وأشعلت كشاف الضوء.. ها هو وجدته فسعدت كمن كان تائهاً في صحراء ورأى بئراً من الماء العذب..

أشعلت المصباح ونظرت في الصالة الفوضوية.. شعرت بالاشمئزاز والفوضى
اللذين يلازماني منذ انفصالي عن ملك..

تقدمت خطوات أركل زجاجات الخمر الفارغة والملابس الملقاة على
الأرضية لتفصح لي المجال نحو هدفي الذي كان أمامي مباشرة.. اللاب توب
رافدٌ على الترابيزة هناك في نومته الأزلية.. الصالون متسخ ببقايا أعقاب
السجائر والتبغ المخترق.. الرائحة كريهة لكننا اعتدنا أن نحيا معاً دون
تطفل.

اقتربت من الترابيزة أخرجت سجائري ووضعتها برفقة الهاتف بالقرب
من اللاب توب على الترابيزة ثم جلست أتهدد بعمق.. ضغطت زر التشغيل
في لوحة المفاتيح وتناولت سيجارة أشعلها بين أنامل يدي اليسرى.. بين
الوسطى والسبابة جلد اصطبغ لونه بالأصفر من بقايا التبغ، وظللت أنتظر
هذا المييت أن يستيقظ من ثباته بعد فراق دام لأربعة أيام.

أخرجت الفلاشة من جيب بنطالي ودستها بمدخل اللاب توب.. انتظرت
حتى تم تعريفها.. كان بداخلها ملف فيديو يحمل اسماً بالإنجليزية ما إن
رأيته حتى تذكرت الإيميل الذي أرسله لي دكتور إبراهيم..

* * *

اسم الملف: gamecan..

الحجم: 7 جيجا بايت..

ضغطت على الفيديو فظهرت شاشة سوداء، وبعد عدة ثوانٍ ظهرت
كلمة gamecan مع ارتفاع صوت موسيقا ناي أم آلة أخرى.. موسيقا غريبة
لم أسمع بها قبلاً.. تعالت الموسيقا وخفضت في بعض أوقات.. لحن بين
الجنون والحزن واليأس والأمل.. صراع بداخلي يستعر ونار توقد.. آلات
أخرى تداخلت مع صوت هذه الآلة ثم صمتت ليبدأ العرض الذي معه
أطلقت صرخة شاهقة.. صرخة رعب وفزع.. صرخة دهشة لم أر مثلاً في

حياتي.. لم أتهالك نفسي وأغلقت شاشة اللاب توب.. ارتجفت بقوة حتى اقتربت من البكاء.

تناولت هاتفني ولم أدرك أن السيجارة شارفت على نهايتها إلا عندما صدمت بتلك النار التي لامست أصبعي فألقيتها على الأرضية فوق السجادة.. أدركت خطئي ففركتها.. بسرعة جنونية بحثت في دليل الهاتف ثم ضغطت على زر الاتصال.. انتظرت حتى سمعت صوتها كأنها استيقظت تواء..
- ملك.

- فيه إيه يا فارس؟

قلت بخوف وبنبرات متقطعة:

- أنت كويسة؟

- أنا كويسة.

ثم أضافت بلهفة:

- ما لك يا فارس فيه إيه؟

- متأكدة إنك كويسة!؟

ثم تابعت بغضب مكتوم:

- أنت بتقابلي عمر؟

- ما لك يا فارس؟! أنت مش طبيعي خالص.

قلت بحزم:

- خلي بالك من البنت يا ملك.

لم أنتظر ردها وأغلقت الاتصال.. فركت عيني بكلتا يدي محاولاً الاستيقاظ.. حاولت تهدئة نفسي بجملته ربما تأثير الخمر بدأ العبث في عقلي.. من السهل لمدمن كحول مثلي أن يرى مثل هذا.. كل شيء سيكون على ما يرام.. أهدأ وسيصبح كل شيء على ما يرام، لكن الفضول دفعني ثانية..

أشعلت اللاب توب ثانية وضغطت على الفيديو.. حدث نفس الأمر.. مقدمة الموسيقى والكلمة والشاشة السوداء وأعيد العرض ثانية..

المكان شقتي التي تركتها مُلك..
الزمان غير محدد..

الفيديو عرض حصري لأسوأ مخاوفي.. فيديو خارج حدود المنطق
والعقل.. فيديو لم أتخيل أن أراه.. ربما تخيلت أن يحدث لكن أين المنطق في
هذا العرض؟!

أصوات تأتي من غرفة النوم.. ملك ممددة فوق السرير شبه عارية برزت
مفاتها.. تتغنج بعدوية وتتأوه.. تقلبت على جانبها الأيمن في مواجهة كاميرا
الفيديو وكأنها تعلم أنها يتم تصويرها، ثم ظهر عمر الذي لم يفرق عنها
بشيء.. اعتلى جسدها عندما نامت على ظهرها وقبلها بشوق وهيام..
تلفظت باسمه مرات وهي تردد "حبك يا عمر"، ثم ظهرت في الفيديو
أحمل سكيناً وانهلت على ظهر عمر بالطعنات.. سألت الدماء منه حتى
فارق الحياة.. ملك توسلت وبكت وتأسفت.. حاولت ستر جسدها العاري
عندما دفعت جثته بعيداً عن جسدها.. اعتليت جسدها وظللت أكيل لها
اللحمات في حالة هستيرية.. أطلقت العنان لقبضتي حتى سألت الدماء على
وجهها ثم أحكمت قبضي على رقبتها حتى جحظت عيناها وفارقت الحياة
هي الأخرى.. قمت ونظرت لكاميرا الفيديو مبتسماً حتى تناولت الكاميرا ثم
اختفى المشهد.. شاشة سوداء ثم ظهور الكلمة gamecan وانطفأ مشغل
الفيديو دون فعل أي شيء..

مسدت لحييتي بخوف هستيري.. حالة من الرعب اعترت جسدي
لأرتجف.. فركت عيني بقوة دون توان.. أغلقت شاشة اللاب توب وظللت
أنفحص زجاجات الخمر الفارغة على الأرضية كأنني أعاتبها على ما آل إليه
حالي.. الوحدة قاتلة لها برائن وخطايف وقد أصبحت أسيراً.. تأملت في ما
حدث في هذا الفيديو.. ليس هناك تفسير منطقي سوى أنه لا شيء.. نظرت
على يميني لزجاجة كحول بالكاد بها رشفتين تناولتها وتجرعتها بسرعة ثم
قذفها أمامي بقوة لتستقر بين رفيقاتها على الأرضية..

عينان مثبتتان تنظران أمامهما وشروء أسر في كل شيء.. تناولت سجائري وأشعلت واحدة ثم وضعتها فوق التراييزة وأخذت نفساً عميقاً أطلقت معه اليأس والخوف، وكأن السجائر ستخرج مخاوفي الأزلية من صدري.. صنوبر المياه تتدفق منه نقط وترتطم بالحوض المعدني في المطبخ كأنها أصبحت ساعة ثوان.. الوقت لا يمضي مع هذا التأمل والتوجس.. نظرت لسقف الصالة وشعرت بالاشمئزاز من هذا المستنقع الذي أعيش به..

- إيه لسا بتحبها؟!

نظرت أمامي جحظت عيني خوفاً.. تقطعت أنفاسي وارتعدت مرتعباً.. زادت ضربات قلبي بقوة.. تأملت هذا الواقف أمامي.. رجل ضعيف الجسد.. أشيب الشعر واللحية.. دقيق الأنف والتجاعيد كست وجهه.. عينان خبيثتان تلمعان بالشرر وملامح عجوز شرير.. يبدو وقد أتم الستين عاماً.. يرتدي حلة رسمية تشبه التي أرتديها.. كان واقفاً مثبت العينين علي يتعد بضعة خطوات.. يحملق في ويتسم بخبث لتظهر أسنانه الأمامية التي فقد أغلبها..

تمتت بخوف:

- أعود بالله من الشيطان الرجيم.

ضحك ثم قال ساخراً:

- أنت مش واخد بالك إن نفسك كله كحول. المفروض تتكسف إنك

تقول اسم ربنا على لسانك.

تابعت التمتمة بياس وخوف فأعاد ما قاله:

- إيه؟! لسا بتحبها؟

قلت بصوت متقطع:

- أنت مين؟

لم يعرني اهتماماً وتابع:

- بس هي ما تستاهلش. أكيد شُفت بنفسك في الفيديو إيه اللي حصل؟

صرخت بقوة:

- أنا باهلوس.

ثم أغضت عيني وفتحتها بعد عدة ثوانٍ لأجده يقف أمامي مباشرة،
قال بسخرية:

- ما تخافش، أنت مش بتهلوس.

- أنت مين؟

استند على الترابيزة وقرب وجهه مني ثم أردف:

- بص كويس كدا، ما تعرفش وش مين دا؟!!

جحظت عيني وقلت بصوت مبحوح متقطع:

- أنت أنا!!

اعتدل وصفق بقوة:

- برافو يا فارس.

صحت بخوف وظللت أتمتم بفرع وهو يردد:

- الطريق اترسم يا فارس.

دستت رأسي بين ركبتي في خوف وظللت أبكي كطفل لقيط.. كنت في
حالة هستيرية ولم أستيقظ إلا وعم سالم والجيران أمامي يحاولون إغاثتي
بعدهم كسروا باب الشقة.. صرخاتي أيقظت كل سكان العمارة.. شعرت بمن
يربت على كتفي. فنظرت بعين نحل من الخوف والبكاء..

كان عم سالم الذي حاول تهدئتي قائلاً:

- أعود بالله من الشيطان الرجيم. اهدا يا فارس يا ابني.

نظرت في أعين الجيران بين الهمهمات ونظرات الشفقة التي لازمتهم
والكلمات التي تحاول تهدئتي بين الحين والآخر..

* * *

الأحد 13 يناير...

الساعة العاشرة صباحاً..

رهاب الأماكن المغلقة ونقص الأكسجين متلازمة فارس حسين.. كان
المصعد متجهاً نحو الطابق الخامس في مبنى الجريدة.. وقفت أمام مرآة
المصعد أهدم ملابسي لأبدو متأنقاً.. نفاق المظهر الخارجي يخفي مكنون
المعاناة الداخلية.. ارتديت حلتي الرسمية ذات اللون الكحلي.. قميص أبيض
مفتوح الأزرار العلوية.. شعر مهندم مصفف إلى الوراء، ولحية كثة مهذبة
بقليل من الشعرات البيضاء أسفل الذقن..

عطري النفاذ hugo boss قد طغى على رائحة العرق التي علقت
بالمصعد لأيام.. أحمل في يدي اليمنى السجائر والهاتف ومفاتيح السيارة..
وباليد اليسرى أرثدي ساعة rado ..

نظارات ريبان شمسية aviator معلقة في القميص..

وصل المصعد الطابق الخامس ووثان حتى فتح باب المصعد لأمضي في
الممر الطولي بخطوات واثقة وبسمة مصطنعة نحو الباب الزجاجي المفتوح
على مصراعيه آخر الممر.. تقدّمت من الباب ناظراً أمامي بعين واثقة تخفي
بين طياتها رعباً وألماً دفيناً.. أمضي في الممر الطولي وعن يساري قسم الفن..
دائماً الفن أولاً كما كان يقول أستاذ عاطف رئيس التحرير.. القاعة تظهر من
النافذة الزجاجية الكبيرة.. الزملاء يجلسون على مكاتبهم المتوازية أمامهم
أجهزة كمبيوتر كثيرة.. اختلست النظر لهم ولكنهم شعروا بوجودي فتحوّلت
النظرات ناحيتي، وجميعها كانت نظرات عطف وودّ مصطنع.. أشار لي
بعضهم فأومأت برأسي وابتسمت بهدوء.. تقدمت نحو قسم الحوادث بعد
بضعة مترات على ذات الصف، ولم يفرق كثيراً في وصفه إلا أن الزملاء لم
يلحظوا عودتي لانشغالهم بالعمل، وهذا أفضل لي؛ لأن قسم التحقيقات

الذي أراسه يعمل مع قسم الحوادث في قالب واحد، ولدي الكثير من الأصدقاء المتطفلين.. أسرعت الخطى حتى لا يلاحظني أحدهم وتقدمت متزات لأصل لقسم التحقيقات.. لافتة كبيرة تحمل اسم قسم التحقيقات.. الزملاء يظهرون من النافذة الزجاجية في حالة من الكساد والكسل عن العمل.. عدد الموظفين في قسم التحقيقات لا يتجاوز عشرة موظفين؛ لأن العمل كنت أقوم به بنفسي، وأغلب الزملاء في القسم تلاميذي.. لا يتعلمون ولا يفقهون شيئاً.. شعرت بقليل من الغضب عندما كنت واقفاً أمام الباب ولم يلحظ أحدهم وجودي لبلادتهم، وكما يقال إن غاب القط. من لا يعرفني فأنا حازم في العمل سليط اللسان، لا يتحمل العمل معي إلا من كانت لديه فطنة وذكاء حاد..

فتحت الباب بقوة ليث مفترس.. القاعة من الداخل صغيرة، تحتوي على خمسة مكاتب تقرب من جدرانها ثلاثة مكاتب على الجانب الأيسر ومكتبين على الجانب الأيمن.. وقف الزملاء احتراماً وخوفاً فرمقتهم بنظرات واثقة لثوانٍ قبل أن أردف بغضب:

- الله على الشغل الجميل. يعني أنا آخذ شهرين مرضي أرجع ألاقي حضراتكم بتلعبوا في الموبايلات.

اقترب مني محمد بود وهو ممتابة ساعدي الأيمن.. شاب مكافح أتى من الريف ليحقق حلمه ويصبح صحفياً وكنت أشفق عليه. شاب هادئ الطبع قليل الكلام وخجول ومهذب.. يرتدي الزي الرسمي للعمل قميص وبنطال وبلوفر ماركة رديئة تنم عن مستواه المادي المتواضع..

مدّ يده لمصافحتي بخجل ثم قال:

- حمد الله على سلامتك يا أستاذ فارس.

فصافحته برود:

- إزيك يا محمد؟ تقدر تقول لي إيه الي أنا شايفه دا؟!!

أردف بخجل:

- والله القسم من غيرك باظ خالص، وتقريباً مافيش شغل.
- مافيش شغل! مافيش حوادث! إزاي طيب؟ هو البلد فيها غير
الحوادث والتحقيقات! خلاص الناس ربنا هداها؟! أقعد يا محمد، حسابكم
معايا لما آجي. أنا داخل لأستاذ عاطف وجاي.

غادرت وصفعت الباب خلفي بقوة تارگًا أمارات الترقب في أعينهم..
ومشيت خطوات متحفزة ثم اتخذت الممر على يساري وفي نهايته مكتب
أستاذ عاطف.. دلفت ردهة الاستقبال في نهاية الممر لأجد السكرتيرة تجلس
على مكتب اليمين.. تعبت بالأوراق وتتظاهر بالعمل.. عينة النساء اللواتي
يهواهن أستاذ عاطف.. ممشوقة القوام.. بارزة الجسد.. لا تتمتع بقدر عال
من الجمال ولكن لديها مواصفات جسدية كفيفة بأن تصبح سكرتيرة
عاطف.. ميرفت كاللهيب والنار المستعرة.. لديها امتيازات تفوق كل
العاملين بالجريدة.. تقربت مني من قبل لكنها ليست نوعي المفضل
فأصبحت علاقتنا كنديين.. لا تبتمس لي ولا تملك إيدائي وإن ملكت طردها
لفعلت اليوم مع تلك النظرات الثاقبة والعينين اللتين تلمعان بالترقب الذي
بادرتني به بعد أن شعرت بوجودي..

تقدمت من باب الغرفة فقالت بحزم:

- أستاذ فارس، لو سمحت أستاذ عاطف معاه مكاملة شخصية. ممكن

تستنى شوية؟

فرمقتها بثبات وقلت:

- أنتِ عرفتِ إزاي؟ هو أنتِ كنتِ معاه جوا!

قالت بغضب:

- قصدك إيه؟

- قصدي ركزي في شغلك.

ثم فتحت الباب بقوة تاركها تتمتم.. كان عاطف يجلس على المكتب لا
يفعل شيئاً كعادته.. رجل أصلع قصير القامة.. ممتلئ الجسد ومترهل..

يرتدي نظارات طبية.. متأنق الملبس دائماً ويحب الماركات.. منتفع منتفع
منتفع.. من النوع الذي ليس لديه مبدأ سوى التقرب من السلطة.. يفعل
أي شيء لأجل أن يحصل على تذكرة عبور في إحدى الفضائيات.. لعل
شخصيته هذه ساعدته ليصبح في هذا المكان.. لا يملك أدنى موهبة ولا رؤية
في إدارة الجريدة؛ بل كان يعمل بتوجهات مني.. لذلك لم يستطع رفض
طلب الإجازة.. لديه علاقات قوية بكبار الشخصيات وربما هذا نفعه
الوحيد.. كان يتقرب مني دائماً ويفعل أي شيء ليحظى بمحبتتي لما قدمته
من إسهامات جعلت الجريدة تحقق مبيعات ضخمة مع قرب اختفاء
الصحافة الورقية..

رأني فابتسم ببلادة وود مصطنع.. تقدمت خطوات من المكتب حتى
اقتربت منه فقام وصافحني بحرارة ثم جلس مرتطمًا بقوة بالكروسي الجلدي
الوثير وأشار لي بالجلوس.. لاحظت أن اللافتة التي تحمل اسمه وتتوسط
المكتب وضعت بشكل مقلوب، فعدلت وضعها مبتسمًا ثم أخرجت سيجارة
أشعلتها بعد أن جلست..
قال بود:

- أظن كذا نخلي بالننا من شغلنا بقى يا فارس.

فأردفت بسخرية:

- أنت مش واخد بالك إن اليافتة اللي عليها اسمك محطوبة غلط يا
عاطف. هي ميرفت مش بتاخذ بالها منك ولا إيه؟
- هو أنت كل ما تدخل لي تقول الكلمتين دول! بعدين دا شغل عم
عوض الساعي والراجل كبر ونظره ضعف.
فأضفت بسخرية:

- وأنت ما اخدتش بالك برضه؟ إيه كبرت أنت كمان؟

- أنا صحتي حديد لكن مشغول بموضوع كبير قووي وكويس إنك جيت
عشان كنت هاكلمك عليه.

قلت بلا مبالاة وأنا أزفر الدخان بقوة:

- إيه؟ جايب لي عروسة؟!

ابتسم وأردف:

- لا مش باهزر. نور رحال.

- الممثلة؟

- آها.

- ما لها؟!

فقال بأسى:

- جا لي خبر إنها انتحرت النهار دا الفجر.

قلت بضيق:

- لا حول ولا قوة إلا بالله. أنا أعرف رشاد عبد التواب جوزها بشكل

شخصي.

- عندي علم، عشان كدا عايزك تروح تستفهم إيه اللي حصل لأن أنا

عندي معلومات غريبة عن الموضوع دا.

أردفت بتحفز بعد أن أطفأت السيجارة:

- غريبة ازاي؟!

- نور قبل ما تنتحر بكام شهر دخلت في مود اكتئاب حاد. كانت بتشوف

خيالات غريبة. وتحس إن فيه ناس بتراقبها، وبعد كدا اتطور الموضوع

وظهرت عليها أعراض غريبة، شعر راسها بيقع. ظهرت تجاعيد في وشها

وجلدها كله. ضررها اتقوس وضعفت جدا وسنانها وقعت كلها. الحالة

الغريبة دي ما كانش حد يعرف عنها حاجة لحد ما راحت لدكتور تكشف،

ما عرفش يحدد إيه اللي حصل. كل الدكاترة الكبار اللي كشفوا عليها قالوا

إن مافيش أي مرض ولا فيرس في جسمها. كانت حالة غريبة جدًا بالنسبة

لهم. التفسير اللي قالوه تقدم في السن بس بطريقة سريعة جدًا، كأن الكام

شهر دول مروا عليها وكانهم 40 سنة.

جحظت عيني من الدهشة وأردفت:

- وبعدين؟!

- لا طب نفسي عرف يوصل لتشخيص للحالة ولا طب عضوي، وانتهى الموضوع إنها رمت نفسها في بسين الفيلا وغرقت.

تناولت سيجارة أخرى أشعلتها ثم تابعت:

- طب انت عرفت المعلومات دي ازاي؟!

- عصام تيمور مدير أعمالها قال لي كل الأخبار دي، وبعدين الكلام كتر وفيه ناس كتير عرفت القصة. اللي ما حدش يعرفه بقى أنت اللي هتجيبهولي من رشاد جوزها.

تذكرت ما قاله دكتور إبراهيم عن العقار ..FD11 قمت من الكرسي وغادرت الغرفة بينما كان عاطف ينادي لكن لم أعره اهتماماً..

* * *

الساعة 9 مساءً..

قبل ساعتين تحدثت إلى رشاد في الهاتف لواجب العزاء وأخبرته أنني أريد التحدث معه بشأن مرض زوجته.. كان الرفيض قاطعاً في بادئ الأمر حتى وجدت حيلة لإقناعه بأن لدي أحد الرفقاء يمر بهذا الأمر.. وافق بتردد وكأنه أراد أن يسألني هو.. أراد أن يعلم سر هذا المرض مني.. وتمنى أن يجد الأطباء له علاجاً أو تشخيصاً للمرض.. مدة الإصابة بالمرض لا تسمح بإجراء التجارب على المريض لقصر فترة الإصابة ثم الموت الحتمي كما قال عاطف.. هذا إن اعتبرناه مرضاً.. أظن أن العقار له دور فيما حدث..

رشاد شخص هادئ وقور.. إعلامي محترف يملك أحد برامج talk show ذائعة الصيت التي ينتظرها الجمهور يومياً بعد العاشرة مساءً.. عملنا معاً لعام كامل وكنت مسؤولاً عن إعداد الحلقات اليومية.. دفعته ليحقق نجاحات عدة وشعر بالجميل، ربما لذلك وافق على مقابلتني.. وسيم

ورياضي.. واثق ومهذب.. قليل الكلام.. عيناه تلمعان ببهجة مصطنعة كإعلامي اعتاد ذلك.. رشاد صاحب كاريزما من نوع خاص يجذب الفتيات كمغناطيس ولكنه لا يأبه بأمرهن لإخلاصه لزوجته..

أدرت عجلة القيادة بانسيابية ورفق يساراً ورفعت قدمي قليلاً لأخفف الضغط على البنزين لتهدأ سرعة السيارة في هذا الملف.. بعد أن عبرته عدلت وضع عجلة القيادة وزدت السرعة.. الطريق مستقيم، مكون من أربع حارات في أطراف مدينة الشيخ زايد.. صف مليء بالفيلات عن يميني وعن يساري الطريق العكسي.. زدت السرعة مع خلو الطريق من السيارات.. الفيلا تبتعد مسافة قليلة، ربما أقل من كيلومتر.. أبطأت سرعة السيارة ونظرت عن يميني حتى وجدت الفيلا.. الفيلا رقم 18 ولافتة كبيرة على يمين الباب الحديدي الضخم "فيلا رشاد عبد التواب"..

صفت السيارة على جانب الطريق وترجلت بخطوات مسرعة متحفزة بعد أن أغلقت باب السيارة.. اقتربت من الباب وطرقت الباب بقوة ففتح رجل يرتدي جلباباً ويحمل سلاحاً ألياً روسياً سريع الطلقات.. لون بشرته داكنة وله شارب غليظ.. قسماته غليظة لم تناسب طريقة حديثه عندما تحدث قائلاً..

- أيوة يا أستاذ.

- أستاذ رشاد موجود؟ أنا عندي ميعاد معاه. قل له فارس حسين.

فابتسم بود:

- اتفضل أستاذ فارس هو في انتظارك جواً.

فتح الباب الحديدي ودلفت نحو الداخل عابراً الحديقة.. كان رشاد يجلس على تراييزة بالقرب من البسين.. يرتدي ملابس الخروج، بنطالاً جينز وجاكيت جلدياً.. علت الإضاءة وزادت مع أعمدة النور المتناثرة في الحديقة.. يجلس وحيداً يحملق في الماء بثبات.. اغرورقت عيناه بالدموع

المتحجرة.. عيناه حمران من البكاء.. لم ينتبه لوجودي حتى اقتربت منه
وقلت بود وحزن مصطنع:

- أستاذ رشاد.

ثبت عينيه عليّ ثم أردف:

- اقعد يا أستاذ فارس.

ثم أشار لي بالجلوس على كرسي في مواجهته فجلست وأخرجت سجائري
لأشعل واحدة ثم ناولته واحدة رفضها بشدة فوضعت أغراضها على الترابيزة
وأردفت بود:

- أنا آسف على اللي حصل. الفنانة كانت من الشخصيات المحترمة..

- الحمد لله إنها ماتت، ما كنتش قادر أشوفها كدا.

ثم صمت لثوان وهو يحاول تمالك نفسه من البكاء وتابع:

- تشرب إيه؟

- لأ مش جاي أشرب. هو الكلام اللي اتقال عن حالتها دا حقيقي؟

انفجر بالبكاء وأردف:

- عملنا كل حاجة يا فارس، لدرجة إني صدقت إن ممكن دجال يشفيها.

مش معقول! اشمعنى هي؟! في 100 مليون في مصر، ليه مراقي دوناً عن

الناس اللي يحصل لها كدا؟ الفلوس ما كانش ليها أي لازمة ولا قدرت

أعالجها.

أومأت برأسي في أسي وأردفت:

- هو إيه اللي حصل؟

- من حوالي أربع شهور صحيت في يوم لقيت كام خصلة من شعرها

وقعت، طبعا راحت لدكتور اداها علاج، ومع الوقت الحالة بدأت تزيد.

التجاعيد بدأت تظهر في وشها....

قاطعته وأنا أطفئ سيجارتي في العشب أسفل قدمي:

- هي كانت بتعاني من حاجة نفسية؟
- من سنة وهي دخلت حالة اكتئاب حاد، وكانت بتاخذ أدوية كتير كلها ما جابتش نتيجة.

- طب مش ممكن يكون دا فيروس؟!
- ما حدش قدر يكتشف أي حاجة. لما عجز الطب رُحِت لعرافين ودجالين وما حدش عرف يفيدني برضه، كله بص للفلوس.

ثم تابع:

- أنت قُلت لي إنك تعرف حد مر بنفس الحالة؟
- آها، بس هو للأسف مش في مصر، فكنت عايز أفهم منك أبعاد الموضوع. هو حقيقي الدكتور فسرُوا دا إنه حالة متقدمة جداً من التطور الجيني سببت سرعة ظهور أعراض الشيخوخة؟
أوما برأسه فتابع:

- طب أنا مضطر أستأذن دلوقتي. هاكلمك قريب لو اكتشفت حاجة.

- آجي أوصلك؟

قلت مبتسماً:

- خليك زي ما انت، أنا عارف الطريق. البقاء لله، ربنا يعينك يا رشاد.
قمت من الكرسي متوجهاً نحو باب الفيلا.. زاد الرعب بداخلي وتذكرت ما قاله إبراهيم كأنه أمامي.. شعرت بأن الدائرة تضيق حولي وهناك مسؤولية فرضت علي..



جميع الحبيكات محاكاة للقدر، والعقل قاصر على كناية الحبكة الكاملة.. سترك
جزءاً لصدف تخالف القدر..

شفتان يابستان كينبوع ماء جفّ وتحجرت أرضه.. عينان زائختان
شاخصتان.. أنامل مرتعشة ويد أثلجها البرد القارس.. ما زال العطر يقاوم
رائحة الكحول، والعفن ويتصارع لكنه خسر أخيراً بعد معركة دامت بقدر
ارتداد الطرف.. أصدرت صفيراً بصوت عذب محاولاً تقليد تلك الموسيقى التي
سمعتها في الفيديو وكانت تتردد في أذني طوال اليوم.. قدماي تؤلماني بشدة
وأكاد لا أستطيع الوقوف عليهما..

حمدت الله أن عم سالم لم يرني في مدخل العمارة ولا أحد الجيران..
شعرت بالخجل مما حدث البارحة، لذا تعمدت أن أتأخر كثيراً حتى تنام
الأعين وتخفت الهمهمات.. الساعة الآن الثانية صباحاً وأقف أمام باب غرفة
نومي متكاسلاً بعد أن أشعلت جميع مصابيح الشقة..

أدرت مقبض الباب برفق ثم دلفت الغرفة العفنة الغارقة في ظلام
حالك.. تناسيت ما حدث البارحة، بل التعب أنساني لأعقد العزم على
الخوض في غمار النوم العميق.. عبرت نحو الداخل بجفنين مثقلين يقاومان
النوم.. اقتربت من مفتاح الضوء وأشعلته.. استدرت لأنظر إلى سريري القابع
في منتصف الغرفة وخلفه نافذة مفتوحة يعبر منها تيار هواء وبرد قارس..
جحظت عيناي ونسيت أمر النوم عندما نظرت له.. ممدد فوق السرير،
يضع قدماً فوق قدم.. ما زال يرتدي ذات الحلة الرسمية.. لم يعتدل عندما
علم بقدمي واكتفى بكلمات مقتضبة..

- حمد الله على السلامة يا فارس. مستنيك من بدري.
 - تمالكت رعيي وأردفت بتحدّ:
 - أنت مش موجود أنا عارف.
 - فاعتدل وجلس على حافة السرير:
 - مع إن مصلحتك إني أبقى موجود.
 - ليه؟!
 - فقام ووقف بجانب السرير ينظر لي بشفقة:
 - لأن نور قبل ما يحصل لها كدا كانت بتشوف خيالات وناس بتكلمها.
 - يبقى أفضل إني أكون موجود عشان تظمن على نفسك.
 - ثم تقدّم خطوات وأردف:
 - وبعدين مش عيب واحد صحفي كبير وغني زيك يسكن في الشقة
 - الحقيرة دي؟!
 - قلت بضيق:
 - أنت عايز إيه؟
 - شُفت؟ اعترفت إني موجود أهو.
 - كررت ما قلته بصياح:
 - أنت عايز إيه؟
 - لو عُزت تشوف تطور الحالة قدامك على الطبيعة وتعرف إيه اللي
 - حصل لنور روح شغل الفيديو حالاً.
 - قلت متحدياً:
 - مش هاشغل حاجة.
 - ولا تزعل نفسك، أشغل أنا.
 - ثم تقدّم نحوِي ببطء فابتعدت واقتربت من الجدار. أردف وهو ينظر لي
 - بخبث:
 - إيه خايف؟ هتصوت زي امبارح !!

عبر الباب وبعد عدة ثوانٍ اقتربت من باب الغرفة أختلس النظر، لكن لم يكن أحد في الصالة.. خرجت من الغرفة وتوجهت ناحية اللاب توب.. جلست على الترابيزة وضغطت زر التشغيل.. شغلت الفيديو لتبدأ المقدمة ويظهر فيديو آخر لنور..

المكان غرفة نوم وثيرة، يتوسطها سرير ضخم فرش بعناية، على الجانب الأيسر منه كومود والأيمن كذلك.. دولا ب ضخم في المقابل يقترب من الجدار، وتسريحة أمام السرير على يسار الكاميرا.. الكاميرا تظهر الغرفة من أعلى بمنظور أفقي واسع، وعلى يسارها السرير ويمينا التسريحة وخلفهما الدولا ب.. جلست نور أمام المرأة على كرسي وتحملق بثبات في وجهها.. تحركت الكاميرا وكأنها تصور أحد مشاهدها حتى رأيت صورة وجهها في المرأة، لكن لم أر انعكاس الكاميرا خلفها..

ارتدت قميص نوم شفاف أظهر جسدها شبه العاري الذي بالكاد لم يختفي منه سوى موضع عورتها.. كانت جميلة كبدر مكتمل.. عينان زرقاوان تشعان غروراً أنثوياً، وبشرة بيضاء كالثلج.. أنف مستقيم وحواجب خفيفة طويلة رسمت بعناية.. وجه متناسق الملامح ومكتمل الحسن.. جسد نحيل لكن برزت مفاتنه.. جسد عارضة أزياء وفنانة مشهورة..

بعد ثوانٍ ظهرت بوجهها التجاعيد وجسدها أيضاً.. أسنانها تختفي ببطء.. خصلاتها الداكنة تحولت للون الأبيض وسقط أغلبها.. تقوس ظهرها وهزل جسدها.. حملقت في المرأة وبكت بقوة.. أطفئ الفيديو دون فعل أي شيء..

رنَّ صوت في أذني:

- كانت طيبة، ما فهمتس الحكمة من الحياة!

تفحصت بعيني الصالة. لا شيء يذكر غير الهدوء حتى عاد الصوت:

- الحكمة اللي ما حدش عارف يفهمها، إننا اتخلقنا عشان نتأقلم.

للأسف ما قدرتش تتأقلم مع اللي حصل لها زيك يا فارس بالظبط.

صمت الصوت تاركني بعين ثاقبة شاخصة شاردة.. أشعلت سيجارة
حشيش وأخذت أنفاساً متتابعة منها..

* * *

الساعة الثانية مساءً..

وقفت أمام باب المكتب ولكن هذه المرة لم أكن متأنقاً بعد أن نمت
بملابسي البارحة.. وصلة من السباب واللعنات انتهت توّاً بيني وبين أستاذ
عاطف كانت نهايتها أنني ذهبت لموعد مهم بشأن موت نور.. انتهى كل
شيء وتودد لي كما يفعل.. لم أستطع النوم جيداً ولازمتني الكوابيس،
واستيقظت متخذاً قراراً أعجب ما يكون، ألا وهو مقابلة تامر.. دخل
العسكري المكتب منذ ثوان ليخبره أنني أتيت لزيارته.. ظللت أقف أمام
المكتب ونظرات الأمانء تحمق في بفضول أثناء عبور البعض لصعود السلم
على يساري الذي يبتعد بضعة خطوات.. خرج العسكري وأشار لي أن أدخل
وهو يقف قابضاً على الباب.. دلفت الغرفة وأغلق الباب خلفي.. غرفة
متواضعة بيضاء الجدران بها مكتب خشبي صغير تتوسطه لافتة تحمل اسم
"تامر همّام الرفاعي" وبأسفلها ضابط شرطة.. دولاب قرم على يسار
المكتب.. ونافذة مفتوحة على مصراعها يمين المكتب..

جلس تامر أمام مكتبه المتواضع يتناول سيجارة بشراهة.. ما زال على
حالته يرتدي القميص الأبيض.. وضع يُنبئ بأنه ضابط شرطة شريف.. ولا
يهتم بالمظهر بقدر اهتمامه بعمله.. لكن اهتمامه بنوع سجائره هو جزء من
العمل -ماركة -Marlboro أعقاب سجائر كثيرة أمامه في المطفأة تشي
بإدمانه للتبغ..

ابتسم لي بود وخبث ثم قام من المكتب عندما اقتربت منه وصافحني

بود:

- اقعد يا أستاذ فارس.

وأضاف ونحن نجلس:
- أنا آسف على طريقيتي معاك. أنا هاشرب قهوة، العيال بتوع البوفيه
بيعملوا قهوة كويسة هنا. نخليهم اتنين زيادة؟
أومات برأسي وقلت ساخرا:
- هو فيه ظابط شرطة بيعتذر؟!
ضحك ببلادة وأردف:
- لو كان لسا جديد زيي كدا. خير فيه إيه؟
- بص أنا مش هاطول عليك. أنا عايز أعرف تحرياتك وصلت لإيه عن
إبراهيم؟

قال بسخرية بعد أن زمّ شفّتيه:
- وسيادتك وكيل نيابة ولا عايز تعمل سبق صحفي على قفايا؟!
- لأ، أنا لا دا ولا دا.
ثم نظرت له بعمق وتابعت:
- تعرف حادثة نور رحال؟
- ما لها؟!
- أكيد سمعت عن اللي حصل لها قبل ما تموت.
قال بلا مبالاة:
- وإيه علاقتها بإبراهيم؟
- بص يا تامر بيه. أنا هافهمك كل حاجة بس توعدي إنك تساعدني. لو
فعلاً عايز تخدم البلد.
ضحك وقال بسخرية:
- لا شكل الموضوع كبير، إحنا نشرب القهوة، بس يا ريت ما تطولش لأن
عندي شغل.

- من غير ما أطول، اللي حصل إن إبراهيم اتكلم معايا عن عقار بيسبب
حالة الشيخوخة اللي حصلت لنور دي. وانهم كانوا بيجروا تجارب على
أطفال كثير، وإن العقار دا موجود فعلاً دلوقت. عشان كدا أنا جيت أسألك

عنه؛ لأنني عايز أعرف حد من قرابيه أو حد بيثق فيه يكون كلمه في حاجة.
عشان نلحق الكارثة قبل ما تحصل.

حملق في بذهول:

- إحنا كانت أكثر البلاغات الفترة اللي فاتت عن اختفاء أطفال وللأسف
لا لقينا جثث ولا لقيناهم.

- دا بياكد لك كلامي. أنا عايز أعرف كل حاجة عن إبراهيم.

فأشعل سيجارة وناولني واحدة ثم أردف بعد أن اتكأ على المكتب وزفر
نفساً بقوة:

- لكن إبراهيم ما كانش له حد غير أخ، وما كانش يعرف حاجة عنه
فعلاً؛ لأن علاقتهم انقطعت من أكثر من عشر سنين.

- عايز أقابله.

قام وهو يقول:

- يلا بينا.

- طب والشغل؟

أردف بحزم:

- دا شغل يا أستاذ فارس. لو ما جيتش معاك مش هتاخذ منه لا حق ولا
باطل. أصل دا راجل مش سهل.

* * *

طرق الباب بقوة ثم نظر لي مبتسماً.. بعد ثوانٍ فتح الباب وظهر رجل
أصلع أربعيني.. يرتدي ملابس منزلية متواضعة. بيجامة سوداء.. ما إن رأى
وجه تامر حتى جحظت عيناه بخوف.. عيناه غائرتان وكث اللحية.. لا يمتلك
أدنى معايير الوسامة بذلك الجسد المترهل.. ظل يرمقنا بعينيه بثبات لعدة
ثوانٍ حتى قاطع تامر الصمت.

- مش هتقول لنا اتفضلوا يا منتصر؟!

فأردف بخوف:

- هو مش القضية اتقفلت وحضرتك اتأكدت إني ما اعرفش حاجة؟

قال تامر بسخرية:

- وحشتني، جيت أشوفك.

قال وهو يفسح الطريق بتردد:

- اتفضلوا.

دلفنا داخل الشقة، وكان صالون استقبال متواضع ومنعزل عن الشقة خلف الباب.. تقدمنا وجلسنا على أريكة ثم أغلق الباب وجلس على كرسي في مواجهتنا..

لم ينظر لنا وظل يتحاشى النظر حتى أردف تامر:

- جاوب على اللي أستاذ فارس هيسأل هولك.

- أنا قُلت ما اعرفش حاجة.

قلت بود:

- بص يا أستاذ منتصر. المرحوم كنت سايب معاه حاجات مهمة. هو ما

سابلكش حاجة أو كلمك في أي حاجة؟

أردف بضيق:

- يا بيه أنا والله ما شُفته من عشر سنين. الله يرحمه كان نابه أزرق وما

كانش له عزيز.

صاح فيه تامر بغضب:

- منتصر، عايز تبات في الحجز النهار دا؟ اتكلم عدل.

قال بغضب وتوسل:

- هو ما كانش بيبجي من وراه غير المشاكل. أنا عايز أربي عيالي.

أردف تامر بغضب:

- لا أنت كدا لازم آخذك معايا.

تابع مستعطفًا:

- يا تامر بيه. أقسم بالله أنا ما أعرف حاجة عنه غير حاجة ما اظنش إنها

هتكون مفيدة.

قلت بتحفز:

- إيه؟

- الله يرحمه كان في مدرسة داخلي لذوي الاحتياجات الخاصة، كان عنده توحّد واضطرابات في السلوك. بعد كذا خرج وبقي متفوق في الدراسة. أبويا الله يرحمه كان يبغبه أكثر مني، والموضوع دا منع إننا نتكلم فيه.

ثم صمت وهلة وأردف بنبرات باكية:

- أنا عندي عيال عايز أربيها.

تبادلّت مع تامر نظرات الحيرة وأردفت:

- يعني المرحوم كان عنده توحّد واضطرابات نفسية وربنا شفاه؟

- والله دا اللي حصل يا باشا، حتى هو أحياناً كان بيتصرف تصرفات

غريبة.

قلت بتحفظ:

- زي إيه؟

- أحياناً كان يخاف من الناس ويقعد أيام قافل أوضته عليه. يكلم ناس مش موجودة. يبكي زي الأطفال أحياناً وأوقات تانية كان يبقى في قمة العقل والهدوء.

قال تامر بغضب:

- وانت ما قُلّتش الكلام دا في التحقيقات ليه؟!

- ما كانش هيفيد يا باشا.

فتابع تامر غاضباً:

- يعني مش مخبي حاجة تانية؟!

- والله دا كل حاجة.

ثم قام وقال بغضب:

- يلا يا أستاذ فارس.

قمت وتوجهنا مغادرين الشقة بعد أن تملكّت مني الحيرة.. تامر كان مثلي لكن قسمات ضابط الشرطة وملامحه الجامدة لم تظهر شيئاً.. بعد أن خرجنا من الشقة، ونحن ننزل درجات السلم قال دون أن يلتفت لي..

- الواد دا ما يعرفش حاجة تاني، بس أنا مش هاسكت.

قلت بفضول:

- أنت مصدقني؟

- الكلام اللي قُلته مع البلاغات اللي شُفتها يخلوني أصدقك.

* * *

صمت الشارع إلا من أصوات مواء القطط والهمهمات الخافتة.. الإضاءة بالكاد تكفي لرؤية مدخل العمارة.. صفت سيارتي في موضعها وتقدمت نحو مدخل العمارة بخطى مثقلة.. كان المدخل خالياً وعم سالم لم يجلس مثلما اعتاد ذلك.. سعدت السلم بهدوء حتى وصلت باب الشقة.. سلة القمامة خالية أسفل قدمي، ورائحة معطر قوي غزت الطابق الذي أسكن فيه.. ربما عم سالم قد فعل ذلك وشعر بالتعب لذا نام على غير عادته.. الساعة الآن الواحدة صباحاً.. كان لدي يوم حافل من مقابلة منتصر، ثم الذهاب للجريدة والجلوس برفقة عمر على المقهى..

أدرت مقبض الباب برفق.. كانت مصابيح الشقة مشتعلة والصالة منظمة تخلو من الفوضى.. تعجبت قليلاً والتعب أنساني أي تفسير لأدلف وأغلق الباب خلفي.. رائحة عطر نفاذ ملأت أنفي.. السجاد منظم جيداً والصالون أمامي كذلك.. اللاب توب مغلق وموضوع على الترابيزة.. أضواء غرفة نومي مشتعلة وهناك صوت بالداخل.. ظهرت أمامي تستند على باب غرفة النوم.. زمت شفيتها برفق.. عيناها تلمعان بالشوق.. ابتسمت ثم مسحت على خصلاتها برفق..

تأملت جسدها وهي ترتدي قميص نوم أسود فوق الركبة بقليل.. برزت مفاتها.. الكثير والكثير من مساحيق التبرج.. تقدمت تتمايل في مشيتها لتظهر أنوثة تذيب جبال القطبين الجليدية.. أنوثة عاهرة وجسد ينحني كأغصان أشجار العنب يتمايل ويتراقص.. حاولت التحدث قبلاً لكنني تأملتتها حتى تماكنت ما بقي من أعصابي المترعشة وقلت بصوت مبوح متقطع:

- أنت دخلت هنا ازاي؟! اتفضلي البسي وامشي.
اقتربت مني حتى لامس جسدها جسدي ثم وضعت يدها على صدري
بعد أن فتحت أزرار قميصي:

- مش وحشاك؟

ابتلعت ريقى بتوتر:

- ملك لو سمحت الي بيحصل دا غلط.

فضمتني بقوة وأردفت:

- بقالك قد إيه ما لمستش ست؟!

قلت بتحد:

- أكيد مش هابقي مخلص لوحدة زيك.

تشبثت بي أكثر وأضافت:

- حد فيهم كان زي ملك؟!

ثم تابعت وهي تقرب شفيتها وتهمس في أذني:

- أنت مش عايز تفهم ليه إني بحبك؟ الي حصل كله ما كانش لي دخل

فيه. دي إرادة ربنا.

ثم قبلتني بقوة، حاولت التماسك لكن الصوت الذي رنَّ في أذني جعلني
أستسلم لها وأقع في براثنها.. فح لذيذ وسقوط في بئر العسل.. تذكرت كل
أيامي معها.. تذكرت أنني ما زلت أحبها.. وهذا الصوت يدوي في أذني
"أتأقلم يا فارس".

* * *

أطقت بالإبهام والوسطى بيدي اليمنى فوق سطح مكتبي في الجريدة..
غرفة صغيرة ذات ألوان قائمة تبعث الكآبة في النفس.. على الجدار يساري
مكتبة ملفات ضخمة بطول الجدار، مغلقة بمفاتيح وحدي أملكها.. وعلى
يمينى أريكة جلدية كانت تكفي جسدي لأخذ قيلولة، وأحياناً لجلوس بعض
الزملاء عليها للتشاور بشأن العمل.. حزمة ملفات ضخمة فوق المكتب على

اليمين.. يساراً شاشة كمبيوتر ضخمة قد جار عليها الزمن.. سيل من الدخان ملاً الغرفة قليلة التهوية.. التكييف لا يعمل بحجة التقشف وتدبر النفقات.. أشعر بأن جسدي يعتصر عرقاً رغم جلوسي بقميص وبنطال والجاكيت ألقيته على الأريكة أمامي..

أخذ نفساً بعمق وأزفره بقوة.. أفكر فيما حدث البارحة.. تناولت جرعة نبيذ فتكت بي ما زلت لم أفق من سكراتها، وعدت شاباً يافعاً بعد أن نسيت أمر النساء.. ملك استطاعت أن تفعل ما كانت تصبو إليه.. فرس جامح يركض في دمائي.. تملك مني بطرفة عين، ولا أزال أنذكر كلماتي لها قبل أن أحضر لمبنى الجريدة.. قلت أنني أحبها.. تناسيت أمر رحيم وكل شيء وتذكرت أنها أمامي.. ما زلت أحبها رغم ما حدث.. تسري في دمائي ولم أكرها حتى الآن.. التأقلم على عاداتها كان الخطأ، ولكن التأقلم يجعلنا نحيا مثل الزومبي.. موتى أحياء عصفت بهم الحياة وقادتهم نحو القدر الحتمي.. الحياة قادرة على أن تنسيك ما تصبو إليه، وتبحر في محيط التأقلم لتعيش كدابة لا نفع لها.

فُتح باب المكتب بقوة.. صفة قوية أصدرت صوتاً عالياً عندما ارتطم الباب بالحائط.. كان عاطف وعيناه تشعان غضباً.. غير مهندم الملبس ورائحة عرقه نفاذة.. حمق في بغضب وتنمر ثم دلف ببطء وأغلق الباب.. تقدم بوهن بفعل جسده المترهل.. شحوم متراكمة وكومة من اللحم تقترب مني.. شعرت بقليل من القلق لكنني نظرت له بثبات وقلت بغضب:

- إيه الطريقة دي يا عاطف؟!

أردف وهو يجلس على كرسي أمام المكتب:

- اتفضل شغل الميموري دا. طبعاً أنت أكيد مش هتوصل لحاجة بخصوص نور. بس أنا بقى عندي سبق ممتاز هيعمل مبيعات هائلة للجريدة.

قلت غاضباً وأنا أطفئ السيارة:

- فيه إيه؟ أنا مش فاهم حاجة!

- اتفضل شغل الميموري.

وضعت الميموري في الجهاز أمامي بعد ثوانٍ فُتح الميموري وظهر ملف فيديو.. قمت بتشغيله وفغر الفاه من الدهشة.. جحظت عيناى وحركت رأسي يمناً ويسرة بتعجب.. صمت وظللت على حالتي أراقب الفيديو. المكان غرفة نوم نور التي ظهرت من قبل..

ترتدي ذات القميص ولكنها فوق السرير هذه المرة.. كنت ممدداً بالقرب منها أرتدي بيجامة نوم.. نضحك وأحضنها بهيام وشوق ثم قبلتها.. لم أستطع النظر أكثر من ذلك وأغلقت الفيديو وما زالت قسمت وجهي على حالها حتى سمعته يقول:

- حلو الري أكشن دا. أكيد علمتك التمثيل. صعبانة عليك ومش عايز تعمل تحقيق عن حالتها، طب ورشاد جوزها ما صعبش عليك؟! حركت رأسي يمناً ويسرة نافيةً ونظرت لعينيه:

- الفيديو دا متفبرك.

قال بسخرية:

- لا بجد؟ دا أنت حتى صحفي كبير وأكيد عارف إنه حقيقي.

- أنا مش فاكر.

ثم صمت وهلة وقلت متحدياً:

- أنت عايز إيه؟

- أنا عايزك تكتب كل اللي تعرفه عن نور. انتو كنتو مترافقين، يعني أكيد

تعرف كل حاجة عنها. وإلا الفيديو دا لو نزل على النت...

قاطعته:

- لا اسمع، مش فارس حسين اللي يتهدد. أنا قُلت مش فاكر أي حاجة في

الفيديو دا، وأنا فعلاً ما كنتش أعرفها..

ثم وقفت وأشرت محذراً بيدي:

- لو فيديو زي دا اتنشر. عندي ليك مجلدات مع ميرفت. نسيت أقول لك إني عندي وسواس قهري منك وحاطط لك كاميرا في المكتب. تحب أقول لك بتبقى عامل ازاي؟! ولا تخيل حد زيك، رئيس تحرير جريدة مشهورة زي دي الناس تعرف...

ثم أضفت بخفوت:

- إنه مازوخي.

جحظت عيناه من الدهشة ثم تابعت:

- الطريقة دي مش معايا. أنا قُلت إني مش فاكِر، والتحقيق اللي طلبته هيتعمل، مش علشان خايف منك. لأن دا شغلي اللي باعرف أعمله كويس من غير نصايح واحد فاشل زيك.

قام من الكرسي ونظر لي بودّ:

- ماشي يا فارس.

ثم غادر المكتب بهدوء وأغلق الباب خلفه.. ظللت واقفاً في موضعي مندھشاً مما حدث، لكني ابتسمت بخبث لانتصاري عليه.. بعد لحظات جلست على كرسي المكتب.. تنهدت بعمق وزفرت زفرة حانقة.. تناولت الهاتف من سطح المكتب وبحثت في دليل الهاتف ثم ضغطت زر الاتصال.. ليأتي صوته مشوشاً وهناك الكثير من الصخب أيضاً..

قلت بضيق:

- عمر أنت فين؟

- عندي جلسة لسا مخلصها.

- ممكن أشوفك كمان ساعة كدا؟

- ماشي أنا فاضي.

أغلقت الهاتف وألقيته على سطح المكتب وأرحت رأسي على الكرسي وبعد سويغات قمت والتقطت الجاكيث من الأريكة الجلدية وغادرت..

* * *

الساعة تجاوزت الثانية ظهراً وانتصف النهار.. الجو مشمس قليلاً رغم الريح الهادئ الذي يحمل برودة خفيفة.. جلست على إحدى الطاولات في إحدى العبارات على النيل بالطابق الثاني.. فنجان قهوة أمامي اقترب من نهايته بعد عدة رشقات متتابة.. والطاولات أمامي كصفيين متوازيين تصنع ممراً به سجادة طويلة من الترتان الأخضر.. أجلس في الصف الأيمن على النيل مباشرة.. خلا هذا الطابق من الرواد إلا أربع طاولات كانت طاولتي واحدة منهن.. فضلت أن أجلس آخر الصف وحيداً.. أدت الكرسي تجاه النيل ووضعت قدمي فوق السور الحديدي بلا مبالاة.. أشعلت سيجارة وظللت على تلك الحالة أفكر فيما يحدث لي وأتأمل هدوء مياه النيل لعلها تصيبني بعدوى الهدوء وتهديء أعصابي..

سمعت صوت عمر يقول بسخرية مازحاً:

- عبارة على النيل. ممكن تفهمني طبيعة علاقتنا إيه بالظبط؟!

نظرت له مبتسماً ثم اعتدلت وأشرت له:

- اقعد يا عمر.

جلس عمر ونادى بصوت جهور على النادل أن يحضر له فنجان قهوة

فأضفت بلوم:

- أنت فاكِر نفسك في قهوة بلدي؟ يا ابني إحنا في مكان محترم، بلاش

طريقتك دي؟ دا حتى عيب ع البدلة السينييه اللي انت لابسها.

أردف ساخراً:

- نسيب الموضوع اللي عايزني فيه وبتكلم في أسلوبي. قول كنت عايزني في

إيه عشان عندي ليك أخبار حلوة ووحشة في نفس الوقت.

- عمر إحنا صحاب من إمتي؟

أجاب بتعجب:

- من زمان.

- عمري شيلتك مشاكلي؟

- قال في حيرة:
- فيه إيه يا فارس؟!
- أنا ما بقيتش قادر أسكت. لازم أفضفض.
ثم تنهدت وأضفت:
- باشوف خيالاتٍ غريبةٍ وحد بيطلع يكلمني في الشقة، والنهار دا عاطف وراي فيديو لي مع نور واحنا مع بعض.
- مع بعض ازاي؟!
فقلت بضيق:
- مع بعض يا عمر.
- أنت كنت على علاقة بيها؟
حركت رأسي نافيًا:
- مش فاكِر.
- صمت عندما كان النادل يضع فنجان القهوة وعندما غادر أشعل سيجارة وناولني واحدة رفضتها ثم أردف:
- فارس انت بتهزر صح؟!
- والله يا عمر دا اللي بيحصل.
زفر الدخان بقوة وقال قبل أن يرتشف قليلًا من القهوة:
- أنت لازم تروح لدكتور.
ثم وضع الفنجان على الطاولة وتابع:
- أعرف دكتور كويس...
قلت بضيق:
- أنا مش مجنون يا عمر.
- مين قال كدا؟! نطمئن عليك بس ممكن يكون شوية توتر.

ثم تابع بجديّة:

- ملك امسكت من تلت أيّام بالليل. كانت سهرانة في كباريه وساقت العربية وهي سكرانة طينة واتعمل لها محضر سكر. أنا عرفت بالصدفة لما شُفتها في النيابة
قلت بتعجب:

- وسيادة اللوا ما عرفش يعمل لها حاجة؟

- من حسن حظنا إنها ما فاقتش من اللي هي فيه غير في النيابة الصبح، ووقعت في إيد ظابط نبطشية ما يعرفش أبوه. طبعا النيابة أخلت سبيلها بكفالة وأنا قدرت أصور القضية. هنحضر الجلسة الجاية ونقدّم صورة المحضر للقاضي ونطلب حجز الدعوى للحكم.

ثم تنهد وأردف بتردد:

- لكن فيه حاجة.

أردفت بتحفز:

- إيه؟!!

- أستاذ رمضان المحامي بتاعها كلمني وقال لي بالحرف يا نسيب الدعوى تتشطب يا إما مش هتشوف بنتك تاني.

هززت رأسي:

- كدا عرفت ليه هي قابلتني امبارح.

نظر لي ببلاهة وأردف:

- مين اللي قابلتك؟!!

- ملك.

تمتم بخفوت ثم قال:

- ملك من ساعة ما مشيت من النيابة وهي مش في القاهرة أصلاً، أبوها سفرها تقعد عند عمها في اسكندرية.

جحظت عيني وأردفت:

- انت بتقول إيه؟!!

قال وهو يطفئ السيجارة:

- اللي سمعته.

- أنا لازم أمشي.

ثم غادرت بخطوات مسرعة وعمر يحاول اللحاق بي بتوتر وخوف..
أخرجت هاتفي وضغطت زر الاتصال عندما كنت أتقدم وأسرع خطواتي
حتى وقفت في الجهة الأخرى من العبارة قبل سلّم النزول بخطوات.. أتى
صوتها خافتاً يحمل أطناناً من اليأس والمعاناة..

- إيه يا فارس؟!

- ملك أنت كنت نائمة معايا امبارح؟!

قالت بضيق:

- فارس أنا في اسكندرية من يومين.

ثم انفجرت في بغضب:

- طول عمرك شايفني واحدة شمال من الزبالة اللي كنت بتعرفهم.
متصل بي عشان تستفزني. أنا عشت معاك مستحيلة قرفك. ريحتك مقرفة
وكل يوم في حضن واحدة شكل. كنت عارفة خيانتك وساكته.
ثم بكت بقوة:

- أهلي بقوا شايفيني وحشة. أنت اللي وصلتني لكدا يا فارس. ما
عرفتش تسامحني على غلطة واحدة وأنا طول عمري باعدي. فارس أنت
مش هتاخذ البت مني. دي الحاجة الوحيدة اللي ممكن تديني أمل إن
الدنيا ممكن تتغير للأحسن.

ثم زاد نحيبها وبكت بصوت عال حتى سمعت صوت جرس انتهاء
المكالمة.. استدرت ونظرت لعمر الذي وقف مبتعداً بضعة خطوات ثم قلت
بشبات مصطنع..

- عمر أنا مش عايز البننت.



ليس هيناً أن ترى القبح بداخلك لأنك ستراه في كل شيء... أنت تخلق
عالمك قبيحاً كان أو حسناً..

سيل من الماء المتدفق الساخن ينساب بعذوبة على جسدي.. بخار ماء
كثيف في الحمام.. أقف أسفل الدش مستنداً برأسي على الحائط تاركاً الماء
يطفئ لهيب ما مررت به.. أحلم بأن كل شيء عاد كما كان.. أحلم بأن رحيم
لم يمت.. بأنني لم أفقد ملك.. أتمنى أنني لم أكن ذلك الشخص الذي أخبرتني
عنه ملك.. أنا خائن وسكير.. زير نساء وبلا مبدأ.. أنا فارس حسين المخادع
بين المبادئ ولذة الأكاذيب..

أقف الآن أسفل سيل الماء متجرداً من ملابسني.. من آثامي وأكاذيبي..
أوجه جسدي إلى الحائط وأصدم رأسي به بقوة لعلمي أتذكر أي شيء من
هذا.. الحمام متواضع كئيب كالشقة.. تساقط دهانه بفعل الرطوبة العالية..
صغير الحجم كقبر.. المرأة في مواجهة الدش تقريباً.. مرت خمس عشرة
دقيقة من الوقوف هكذا.. أغلقت الدش برفق وتقدمت نحو المرأة لأقف
أنظر لوجهي وكأنني أراه لأول مرة.. أتأمله وأشرد به.. الشعرات البيضاء
غزت أسفل ذقني.. لحيتي كثة وشعري قصير.. قليل من التجاعيد بالقرب
من عيني.. لا داعي للمقاومة جميعنا نهرم..

الساعة الآن الخامسة صباحاً.. استيقظت باكراً بفعل الكوايس المرعبة
التي لازمتني طوال رحلة نومي.. تناولت منشفة بالقرب من المرأة وجففت
جسدي برفق.. التحفتها حول جسدي وتحركت مغادراً الحمام.. خرجت
لأجده يجلس في الصالون أمامه تراييزة اللاب توب.. يرتدي ذات الحلة..
يعبث ببعض أعقاب السجائر.. نظر لي مبتسماً وهو يتناول سيجارة ويضعها
في فمه دون أن يشعلها ثم تحدث بود..

- مش كدا أحسن بزمتك؟ باحاول أقلدك بس أنا باخاف على صحتي.
أنت عارف إن السجاير دي هتقتلك ومع ذلك بتشربها. منطق غريب
يخليك عارف إن الموت قدامك وبتروح له. مقابل نشوة لحظة تدفع عمرك
كله!

وقفت ثابتاً أنظر له بعين ثاقبة فتابع:
- تعالى يا فارس عشان تشوف نفسك على حقيقتها. تشوف أنت قد إيه
كنت حقير.

صحت به:

- أنت وهم.

- وهم!

- أنا الحاجة الحقيقية الوحيدة اللي باقية في حياتك.

ثم أضاف وهو يشير بيده:

- تعالى يا فارس.

تقدّمت مسرعاً غاضباً واقتربت منه محاولاً الانقضاض عليه لكنه اختفى
من الأريكة عندما ألقىت جسدي عليها.. اعتدلت فوجدت اللاب توب
مفتوحاً على الفيديو.. الموسيقى تعلو وتزيد.. ضربات قلبي متتابعة بقوة..
تتداخل الآلات الموسيقية ويبدأ العرض..

المكان: بداخل شقة لم أراها من قبل.

الزمان: غير محدد

زاوية الرؤية أفقية واسعة..

في صالة شاسعة بشكل مستطيل.. انقسمت لجزء به سفرة كبيرة دائرية
حولها ستة كراسٍ على يسار الكاميرا.. والجزء الثاني يمين الكاميرا به صالون
استقبال مودرن من أريكتين وأربعة كراسٍ بشكل دائري.. جلست نور على

الأريكة أمامها ترابيزة مستطيلة، والكاميرا تقترب منها.. أظهر حاملاً بيدي فنجانين كبيرين.. أردتي بيجامة نوم بيضاء.. أقترب من نور وأجلس بالقرب منها بعد أن أضع الفنجانين على الترابيزة.. نور بكت ونظرت لي بعينين ذابلتين تفصحان عن التوسل والألم..

بشرة عجوز ويدٌ ترتعش.. جسد هزيل فقد جماله.. فقدت أغلب أسنانها
قالت بتوسل:

- فارس أنت هتسييني؟!!

أردفت بلا مبالاة:

- أنت مش بتشوفي نفسك في المرآة؟ ربنا يستر وما يكونش القرف اللي عندك دا معدي.

- فارس ما تسيينيش، أنا بحبك.

قلت بضيق:

- ما أنا بحبك. بس هنكمل سوا ازاوي؟ صدقيني أنا تبت وبطلت القرف اللي كنا بنعمله دا، وبصراحة ضميري معذبني.

قالت بصوت متقطع وهي تقبض بيديها على يدي اليمنى:

- نتجوز. ها موافق؟

أزحت يدي مقشعراً وصحت بها:

- أنت إيه القرف اللي بتعمليه دا؟ قلت خلاص، تبت.

قامت وهي تحمل حقيبتها ونظرت لي بعينين اغرورقتا بالدموع:

- تبت! سامحت نفسك؟ أنا لا مسامحة نفسي ولا مسامحك. بس اللي

زبي ما لهوش توبة، طريقه ونهايته معروفين، لكن اللي زيك لو الشيطان تاب ما يتوبش..

ثم تقدمت واستدارت تنظر لي بسيل من الدمع يتدفق من عينيها:

- سلام يا فارس.

- سلام يا نور.

أرحت رأسي للخلف وتناولت فنجان القهوة، أرتشف منه ببطء.

أغلق الفيديو.. الزمن دقيقتان وأربع وخمسون ثانية..
لم أشعر بضيق مما رأيت وكأنني اعتدت أن أرى القبح بداخلي..

* * *

الأربعاء 16 يناير ..

الساعة 2:56 مساءً..

وضعت الهاتف تَوَّافٍ فوق سطح مكتبي في الجريدة.. أنهيت مكالمة مع
رشاد أسأله بشأن أخباره وما جد من معلومات عن نور.. غصة في حلقي من
تأثير السجائر.. ألم في قلبي مما رأيته بشأن نور.. أشفقت على رشاد مما
فعلت معه.. ما زلت لا أصدِّق أن ما رأيته حقيقة.. أرحت رأسي مستنداً
على الكرسي.. فركت عيني اليمنى ثم اليسرى.. أحاول مقاومة النعاس..
طين حاد كتأثير تناول سيجارة عتيقة من مخدر الحشيش.. أشعر بصوت
دقات عقارب الساعة على الحائط أمامي.. لامست برأسي المكتب محاولاً
النوم.. اعتدلت ثانية أطقق فقرات رقبتي.. ملل يكفي لجعلي أنام
كصريع.. يزيد النعاس ويصيب الأطراف بالخدر.. نظرت لشاشة الكمبيوتر
ومن ثم أشعلت سيجارة وسحبت نفساً تبعه سعال كاد أن ينتزع رئتي من
صدري..

فُتِحَ الباب برفق ومحمد يقبض على الباب ويقف بجواره تامر.. أشرت
له وقاومت النعاس فربت على كتف محمد، ثم دلف وأغلق الباب خلفه
وتقدّم ليسلم علي بقوة تناسب عضلاته المفتولة.. شعرت بأن أنامل يدي
اليمنى تتهشم من قبضته.. ابتسم وعلى ما يبدو أنه لا يقصد لكن أنا من
أصبحت ضعيفاً.. جلس وقال وهو ينظر لي بشفقة:

- عينك حمرا قوي يا أستاذ فارس.

ثم أضاف بعدما تفحصني ببصره:

- وإيه السواد اللي تحت عينيك دا؟ أنت بتشرب مخدرات؟!

قلت بسخرية:

- هو فيه حد مش بيشرّب في البلد؟

ضحك وأردف مازحاً:

- يعني دا اعتراف إنك متعاطي. كدا أنا أقدر أحبسك.

- دا لو عرفت تكتب محضر. واحد صاحبي محامي بيقول لي إنكم مش

بتعرفوا تكتبوا محاضر كويس.

زَمَّ شفّتيه:

- المحامين آها. ما علينا، كنت جنب الجريدة قُلت أعدي أشوفك.

- شرف لي يا تامر بيه. أجب لك إيه؟

- مش هاطول، أشكرك. عرفت أوصل لشقة كان إبراهيم غالباً بيقتعد

فيها.

قلت بتحفز بعدما سحبت آخر نفس وأطفأت السيجارة:

- فين؟

- مصر الجديدة، أرض الجولف.

ثم أدخل يده في جيب البنطال وأخرج ورقة ناولني إيها ثم أضاف:

- دا العنوان. ورقمي في الورقة معاك. هتعرف تروح لوحدك؟

- أكيد هاعرف.

- تمام، تخلّص وتكلمني.

ثم قام ومدّ يده ليصافحني وأردف:

- هاستنى تليفونك.

قمت وصافحته ثم قلت بود:

- أنا مش عارف أشكرك ازاي.

ابتسم ببرود وغادر المكتب تاركاً الباب مفتوحاً خلفه..

* * *

الساعة 11 مساءً..

صفَّ عمر السيارة على جانب الطريق الأيسر أمام العمارة التي تحمل ذات الرقم في العنوان.. الطريق بعرض عشرة أمتار مزين ببعض الأشجار على جانبيه كصفين.. سيارات صُفت بعناية على جانبي الطريق.. ظللنا نراقب مدخل العمارة لبعض من الوقت.. هدوء وسكون لا يقطعه سوى أنفاسنا وتبادل بعض كلمات مقتضبة بين الحين والآخر.. عمر أطفأ محرك السيارة وظل يعبث بمقود السيارة ويدندن لحن أغنية شعبية رديئة.. صوته يفجر رأسي ويزيد التوتر.. أشعل سيجارة وزفر أنفاسها.. رنَّ هاتفه وأجاب وبعد سويعات انفجر بالسب واللعنات على محدثه حتى أصابني بالصمم.. أغلق الهاتف ثم ترجل من السيارة ومشى خطوات كليث متحفز ثم استدار لي وقال بثقة..

- فارس يلا.

نزلت من السيارة وأغلقت الباب برفق ثم تبعته بخوف حتى اقترب من مدخل العمارة.. تقدّم قليلاً وتفحص الداخل بنظره.. باب خشبي صغير مفتوح في مواجهتنا يبتعد مترات والأسانسير على الجانب الأيمن وبجواره السلم.. تقدّم ببطء وتبعته حتى ظهر البواب وخرج من الباب الخشبي.. رجل أسود البشرة يرتدي ملابس نوم رثة.. عينان تلمعان بالطمع والفضول وحواجب بيضاء لرجل بلغ الكبر.. خمسيني متطفل.. كئيب وحاد كنصل سيف..

قال بقسمات جامدة:

- خير يا بهوات. أي خدمة؟

قال عمر بثقة:

- أنا أخو الله يرحمه دكتور إبراهيم.

- أهلاً يا باشا. البقاء لله.

فأضاف عمر وهو يدس يده في بنطاله:
- أنا عايز علبة سجائر ميريت وإزاتين بييسي.
وتابع بعدما ناوله ورقة فئة مئتين جنيه:
- عارف هتجيبهم فين ولا نسيت الشقة؟
- طبعاً يا باشا الدور الثاني شقة ستة.
- جدع، وخلي الباقي معاك هات حاجة للعيال.
غادر البواب فابتسم عمر لي بخبث، توجهنا نحو السلم ثم قال ونحن
نصعد:

- لازم تلقطها قبل ما تطير. اتعلم بقى حاجة مني.
قلت مازحاً:

- واحنا نيجي جنبك إيه؟
وصلنا الطابق الثاني الذي انتهى بطريقة بها ثلاث شقق وكل واحدة تحمل
لافتة عليها رقم.. توجه عمر نحو شقة تحمل رقم 6 في آخر الطرقة وتبعته
بهدهوء.. أخرج قطعة معدنية مدببة واقترب من موضع المفتاح.. ظل يعبث
قليلاً حتى قاطعته بخوف..

- أنت بتعمل إيه؟

- باطفش الباب واهدا شوية عشان أركز.

قلت بضيق بصوت هامس:

- أنت محامي ولا حرامي يا ابني؟!

- لازم أتعلم حاجة من الجنائين.

فُتح الباب ودلفنا نحو الداخل ثم أغلقت الباب خلفي.. أخرج عمر
الهاتف وأشعل كشاف الضوء.. ظل يتفحص الصالة به حتى وجد مفتاح
النور بالقرب مني جهة اليمين.. مددت يدي وأشعلته لنرى صالة خالية إلا
من كرسي خشبي طويل ولوحات كثيرة وتراييزة صغيرة تحمل عدة رسومات
بالقرب من الكرسي..

قال عمر بسخرية:

- الله يرحمه شكله كان فنان.

تقدّمت لأنظر إلى أول لوحة على اليسار.. صورة رسمت بألوان مائية.. الخلفية حمراء داكنة.. شخص عاري الصدر يجلس في بركة دماء يحتضن طفلاً لم يظهر وجهه ويبدو أنه فارق الحياة تواء.. ينظر إلى السماء كأنه يتضرع بعينين تنزفان دموعاً حمراء.. خلفه شخص ممسوح الوجه بلا تفاصيل يشير بسبابته اليمنى نحوهما.. اقتربت أكثر من اللوحة.. نظرت بدهشة قطعها صوت عمر بصوت فاق دهشتي..

- فارس دا أنت! إيه دا!!!

تملكني الصمت وظللت شاردًا بهذه اللوحة حتى سمعت صوت عمر ينادي بتعجب..

- فارس تعالي بسرعة. مش دا إبراهيم؟!

تقدّمت حيث يقف عمر أمام أول لوحة جهة اليمين.. لوحة غريبة وغير نمطية.. الخلفية حمراء داكنة وبها رجل يجلس على كرسي ويرسم لوحة يظهر بها إبراهيم حاملاً اللوحة التي رأيتها من قبل في يده.. تعجبت كثيراً مما رأيت وظللت شاردًا بها ثم قلت..

- عمر واضح إن دي رسايل بس مش فاهم معناها.

أردف بلا مبالاة:

- واضح إنه كان عنده فراغ بس تصدّق.

ثم مدّ يده يتحسس اللوحة وأضاف:

- كان بيعرف يرسم. خليك أنت مع اللوح دي وأنا داخل أفتش جوا في

الأوض.

ظللت شاردًا في اللوحة وغادر عمر ليفتش في الشقة حتى عاد وهو يتقدّم ببطء ويحرك رأسه نافيًا..

- للأسف ما فيش حاجة الشقة كلها على البلاط.
- يلا بينا. أنا هاخذ اللوحتين دول
ثم حملت اللوحة وأشرت لعمر أن يحمل الأخرى فاقترب منها وحملها...

* * *

الخميس 17 يناير..

الطريق كان عاصفًا بالرياح القوية التي أرهقتني أثناء القيادة.. الرمال تطايرت بعنف في طريق الواحات وبالكاد استطعت أن أصل إلى مدينة الإنتاج الإعلامي لمقابلة رشاد.. لم أتم جيدًا البارحة وظللت أتفحص اللوحتين طوال الليل.. لم يأت ذلك العجوز البارحة لكن لم أتم أيضًا وكأن النوم أصبح خصمًا لي.. ما زلت محتارًا في أمر نور وما رأيته في ذلك الفيديو.. مقابلة رشاد كمقابلة قطار أوشك على الإقلاع.. وقته ضيق لا يسمح.. عملي من الدرجة الأولى.. نوط الدولة في التزام العمل وحبه.

الساعة الآن السابعة مساءً.. أمضيت ساعة جالسًا على أريكة جلدية في غرفة الانتظار.. غرفة مكيفة معطرة.. واسعة بقدر كافٍ.. لم يعني التكييف من إشعال سيجارة تلو الأخرى وطلب أربعة فناجين من القهوة ارتشفت آخرها بنهم تواء.. في يدي السيجارة السابعة.. أطفال أخواتها في الأرضية التي فرشت بسجادة جلدية سوداء.. ستة ثقب أسفل قدمي.. فارس حسين يخلف الدمار وراءه أينما حل.. أخرجت الهاتف وعبثت به ثم ألقيت سيجارتي أسفل قدمي وفركتها بقوة.. الملل أصابني وتملكت مني.. عبر الباب الزجاجي الذي كان في آخر الحائط على يساري.. توجه نحوي وجلس على كرسي بالقرب مني ثم قال:

- آسف يا فارس. ما فيش وقت. أنت عارف إننا بنجهز الحلقة.

- ولا يهملك.

ثم أضفت:

- بص يا رشاد. فاكر الشخص اللي قُلت لك عليه إنه عنده نفس حالة

نور.

- ما له؟

قلت بهدوء:

- شاكين إن عنده مرض وييقولوا إن له جانب نفسي.

- وبعدين.

تنحنحت وقلت بتردد:

- أنا آسف إني هاسألك السؤال دا. لكن يا ريت تجاوب لأن الدكاترة مش قادرين يحددوا هل الحالة النفسية دي بتكون نتيجة خلل في العلاقات ولا اضطراب نفسي من ضغط من نوع تاني.

ابتسم برفق وأردف:

- عايز تعرف إذا كان فيه مشاكل بيني وبين نور ولا لأ؟

أومأت رأسي وتابع:

- آها كان فيه مشاكل بيننا كبيرة جدًّا، لكن فضلنا نحترم بعض وكنا ناويين ننفصل لكن الله يرحمها ما قدرتش تستحمل الحالة اللي كانت فيها وانتحرت.

- طب هي كان ليها صحاب؟

قال ببرود:

- كانت صاحبتك. ولا هي ما قالتلكش عن علاقتنا؟

ثم تابع:

- أكيد يعني أنت عارف.

تنحنحت وأردفت:

- لا هي ما قالتش.

نظر بعين ثاقبة ثم قال:

- أنت عايز توصل لإيه؟ أعتقد الموضوع تعدى قصة صاحبك ودخل في

قصة تحقيق صحفي كبير عن حياة نور.

ثم قام وأضاف:

- آسف يا فارس، برغم صداقتنا لو اتنشر أي حاجة عن الي حصل لها أنا هارجع عليك بتعويض كبير وهاقفل لك الجريدة. بيتيهياً لي الأفضل تشوف شغلانة تانية غير دي وتدعي لها بالرحمة.
- لكن يا رشاد....

توجه ناحية الباب ثم استدار وقال بحزم:
- دا آخر كلام عندي، ويا ريت ما تخلينيش أضطر أعمل الي قُلت عليه.
أستأذن عشان عندي شغل.
غادر الغرفة ثم زفرت بقوة وقمت لأغادر..

* * *

تقلبت في مضجعي ذات اليمين واليسار.. البرد أثلج قدمي وجعلهما حمراوين ولم ينفع الغطاء بشيء.. تحتك واحدة بالأخرى ولا أستطيع النوم.. بتّ محاصراً من التفكير والبرد القارس..
أضع وسادة أخرى فوق رأسي.. أغمضت عيني لأنام ولكن أستقيظ عندما أرى صورة اللوحة التي وجدتها بشقة إبراهيم.. فتحت عيني وزفرت بحنق وتوتر.. اعتدلت وجلست على السرير واضعاً رأسي بين ركبتي.. الدقائق لا تمر والعقل يأسرني لمناهة من الأفكار الغريبة.. معضلة فارس حسين لا حلّ لها..

تناولت الهاتف لأنظر في الساعة ثم ألقيته بالقرب مني على السرير.. الساعة الآن الثانية وثلاثة وأربعون دقيقة صباحاً.. خفوت وصمت إلا من أصوات عقلي التي تجعل نفسي تنن من الصداق المزمّن..
أصوات تأتي من الصالة مصدرها الـ laptop.. صوت طرق ضخم على طبل وآلات متداخلة.. فزعت وقمت راکضاً متوجهاً نحو الصالة..
جلست أمام الترابيزة ليبدأ العرض.

المكان: شقة إبراهيم..

الزمان: غير محدد..

زاوية رؤية رأسية جانبية..

وقفت بالقرب من إبراهيم وهو يرسم تلك اللوحة التي ظهرت بها
أحتضن رحيم.. ظللت شاردًا أتفحص الرسمة وهو يضع الرتوش الأخيرة
لإنهاء العمل.. حرك الفرشاة برفق على اللوحة..

تتحول زاوية الرؤية لأمامية..

لتتضح قسمات وجهي.. تعابير غريبة بين الحزن والحب والزهة
واللامبالاة.. إبراهيم بدا في حالة تركيز شديدة قبل أن يردف:

- الدنيا رسمة كبيرة، تفاصيلها مش واضحة. وكل واحد يبشوف الرسمة
بشكل مختلف حسب زاوية رؤيته.

ثم وضع أدوات الرسم على الترابيزة بجانبه وأضاف وهو ينظر لي بثبات:

- زعلان يا فارس؟

- باحاول أتأقلم.

- لكن ما تخليش التأقلم يضيع منك صورة اللوحة الكاملة.

قلت ببلاهة:

- مش فاهم!

- إنك تقف مكانك بحجة التأقلم هيخليك تشوف الدنيا من منظور

ضيق ومش هتقدر تفهم أي حاجة.

ثم قام وتابع وهو يمشي ببطء مبتعدًا في الصالة:

- لازم تركز في أدق التفاصيل؛ لأن أدق التفاصيل اتبنى عليها أعظم

التفاصيل.

ثم استدار وأضاف:

- في علم البيولوجيا الجينات هي المسؤولة عن كل شيء. حاجة دقيقة جداً بمتحكم في كل حاجة في صفات الإنسان. في الفيزيا الإلكترونية تغير عنصر وتخليه عنصر ثاني.

قلت بسخرية:

- إبراهيم.. ما تكلمنيش كلام علمي.

ابتسم وأردف:

- تفنكر إني لو بقيت مش موجود هتقدر تتصرف؟

- إبراهيم أنت لازم.....

أغلق الفيديو.. الزمن دقيقتان وأربع ثوان.. زفرت بحنق بعد أن تمكك مني الفضول.. أردت أن أكمل دون أن ينطفئ الفيديو.. حاولت تشغيل الفيديو لكن لم يعمل.. أشعلت سيجارة وزفرت دخانها بضيق.. أتأمل الدخان المتصاعد ببلاهة حتى وجدته يقف أمامي يبتسم، ويبتعد بضعة خطوات في منتصف الصالة.. لم أخف هذه المرة وتناسيته غير عابئ بوجوده وكأنه طيف.. سحبت أنفاساً متتابعة وزفرتها بقوة ثم أطفأت السيجارة.. نظرت له بعينين ثابتتين حتى قطع لحظات الصمت..

- بتشبه علي ولا إيه؟!

ثم أضاف ساخراً:

- كان نفسك تكمل الفيديو.

- أنا نفسي ما اشوفكش ثاني.

ضحك وتابع:

- مش يمكن لو ما شفتنيش ثاني تتضر زي ما حصل بعد إبراهيم؟!

قمت ونظرت له بتوسل:

- أنا عايز أفهم.

- الناس بتعيش وتموت بتكرر نفس الجملة دي وما حدش بيّفهم.
ثم تقدّم خطوات بثقة وأردف بعدما وقف خلف الترابيزة:
- لو فهمت هتشوف إنك كنت أحقر بكثير من اللي عرفته عن نفسك
لحد دلوقتي.

ثم قال بثقة:

- هتفهم بس...

صمت فأردفت:

- بس إيه؟!

- لسا وقتك ما جاش.

* * *

السبت 19 يناير..

الساعة الحادية عشرة صباحاً..

جلس تامر على كرسي المكتب بالكاد يحاول أن يقاوم النعاس.. أمسك
فنجان قهوة بيده اليمنى.. ارتشف منه رشفة ثم وضعه على المكتب..
سحب نفساً عميقاً من السيجارة.. ارتدى جاكيت جلدًا بنيًا ولحيته نبتت
قليلاً عن ذي قبل.. استرخى على الكرسي ليعلو صوت صرير الكرسي.. تناول
ملفًا وفتحته لينظر به ثم أغلقه وتركه.. رنَّ الهاتف فتناوله من المكتب.. نظر
في شاشته.. الرقم private.. ضغط زر القبول ثم وضعه على أذنه اليمنى
ليسمع الصوتك:

- إزيك يا تامر بيه؟

- مين؟

- أسر حلو قوي.. طالع لمامته عينه زرقا. ذوقك حلو على فكرة.

قال بغضب بعد أن قام من الكرسي:

- أنت مين يا....
- لا استنى. امسك لسانك مش عايز قلة أدب.
ثم تابع الصوت ببرود:
- لو نفسك تشوفه بيكبر قدامك يا ريت تبعد عن فارس حسين لأن
آخرته وحشة.
صاح فيه بغضب:
- أنت بتهدد ظابط شرطة يا ابن....
قاطععه:
- أنا قُلت اللي عندي، واسمع.. ما تحاولش تدور ورا الرقم دا عشان دا
رقم من برامج النت. فيا ريت تنفذ اللي قُلت عليه.
أغلق الاتصال وتامر يردد:
- ألو..
- ألو..
جلس على الكرسي ثانية.. مسح شعره بغضب وجزَّ على أسنانه ثم غادر
المكتب..

* * *

تحرك جسده بعنف وهو يدفع الملفات بظهر يده اليمنى من سطح
المكتب لتصطدم بزجاج المكتبة على يمينه ويتهشم الزجاج لقطع صغيرة
تناثرت بالأرضية الخشبية.. كومة لحم غاضبة.. ترهلات جسده تتحرك
بعنف.. تصبب عرقًا واقفهر وجهه.. عيناه حمراوان ووجهه أيضًا.. لم تعد
ملابسه مهندمة وفتحت أزرار القميص من فرط الحركة.. ابتسمت بخبت
ونظرت له ببرود.. زفرت الدخان ببطء عندما كنت جالسًا على الكرسي
الأيمن أمام المكتب، وتابعت نظراتي الباردة قبل أن أقطع ثورته بكلمات
مقتضبة:
- اهدا يا عاطف.

قال وهو يضرب المكتب بقوة براحتي يديه:
- اهدا ازاي؟! أنت جاي تقول لي رشاد بيقول ممنوع إننا ننشر حاجة
عن موضوع نور.

ثم جلس وصاح في بغضب:

- أنا كنت متأكد إنك مش عايز تعمل التحقيق دا.

- أنا قُلت لك اللي حصل.

- أنا ما ينفعنش الكلام دا يا فارس.

تابعت برود:

- والمطلوب؟

- اقنعه.

- اشمعنى التحقيق دا؟ فيه مليون حاجة تانية نقدر نعملها.

قام ثانية وأضاف بغضب:

- أنت هتعرفني شغلي يا أستاذ؟ أنا قُلت التحقيق دا مسألة حياة أو

موت للجريدة.

قمت وجذبتنه من تلايبه بعد أن أطفأت السيجارة:

- اسمع يا عاطف، أنا طول عمري باعرفك شغلك. وعشان أنا باعرفك

شغلك باقول لك التحقيق دا كله وش وقرف.

ثم ربت على كتفه وأضفت:

- اقعد يا عاطف. الجنان بتاعك دا مش عليّ. أنا حاولت وبعدين جوزها

نفسه مش عارف حاجة أكثر من اللي أنت تعرفها.

هدأ وقال بود مصطنع:

- لكن أنت تعرف.

قلت بغضب وصياح:

- تاني يا عاطف؟ قُلت لك والله ما فاكر حاجة من اللي بتقول عليها ولا

فاكر إني كنت أعرفها.

أردف بغضب عات:
- أنت هتستهبل؟ يعني إيه مش فاكراً!!!
- اللي سمعته. وبعدين عندي تحقيق ممتاز عن.....
قاطعني:
- طب إبراهيم اللي اتقتل وأنت معاه!
- ياااااه!! بقيت مهتم بأخباري قووي.
ابتسم بخبث:
- عايز أعرف كل حاجة عنه.
- ماشي، ويا ريت تسيبني خالص اليومين دول، وما تعلقش على تواجدي
بالجريدة.
زفر بضيق:
- ما أنت طول عمرك باشا وما حدش بيعلق على حضورك.
- تمام ما تجيش تتجنن بقى وتكلمني في حاجة لحد ما اسلمك تقرير
مفصل عن الاتنين.
- مين؟!
- إبراهيم ونور.
لمعت عيناه وأردف:
- طول عمرك كفاء، بس عيبك إنك دماغك ناشفة.



قلت عن الحياة إنها خيوط متشابكة ورفات يولدان خلفهما بطلاً جديداً..

سيل من الأفكار المتواردة كشلال.. عقلي يغرق ولا منقذ له.. الخيوط تتشابك في رأسي ويزداد الأمر تعقيداً.. نفسي تنن وتتألم مما لحق بها وكأن فارس حسين تلازمه لعنة أبدية.. لعنة أن يرى القبح بداخله ويصبح سجين نفسه.. عقلي أصابه الجنون ودَّ لو عاد ينتشي بتأثير الكحول والحشيش لينسى ما ألم به.. نور وملك وإبراهيم وتامر وعاطف شخصيات تحيط بي وتدفعني لأفقد صوابي.. الوحدة في هذه الحالة ستكون خيراً لي.. لا أملكها ولا أستطيع فعل ذلك..

أرحت رأسي على كرسي المكتب.. لا أدخن فقد ضاق صدري وأصبح سعالي كثورة بركان أوشك على الانفجار.. فقط أنظر لسقف الغرفة.. خلعت نعلي والجاكيت قبلاً وجلست أرتجف من تأثير الهواء البارد الذي يأتي من النافذة بعنف ليصطدم بجسدي.. قميصي مفتوح الأزرار ولا أرتدي أسفله شيئاً.. عطست بقوة ثم تناولت منديلاً ومسحت أنفي.. لعل البرد أيضاً وجد طريقه لجسدي لينال منه...

تناولت الهاتف وضغطت على مشغل الموسيقى.. لحن هادئ لأغنية تركية
seni seviyorum.. أنا أعشقتك.. أحبك.. لمن؟!!

اللحن يصيبني بالخدر.. أغمضت عيني وأول من رأيت كانت ملك تبتسم وترسم بشفتيها الكلمة بصوت خافت ثم رسمت قبلة أشعرتني بنشوة.. ابتسمت وتواردت الذكريات معها منذ اللقاء الأول.. تتابع وتمضي بالعرض السريع.. Zoom in على شفتيها.. حركت شفتي وكأنني سأقبلها..

فُتح الباب بقوة لأفيق مذعوراً منتفضاً من الكرسي.. أغلق الباب وهو يتقدم بعينين غاضبتين.. لم يعتذر وظل صامتاً.. تناولت الهاتف أغلقت الأغنية.. جلس على الكرسي أمامي وقال بغضب:

- أنت ليك أعداء؟

- لأ.

أردف بغضب:

- أنا اتهددت بابني بسببك.

قلت ببلاهة:

- مش فاهم! فيه إيه يا تامر بيه؟!

- فيه سيادتك إن جالي اتصال بيقول لي ابعد عن فارس حسين وإلا ابنك

هيموت. وبعدين أنت عملت إيه في شقة إبراهيم؟ ما كلمتنيش ليه؟!

- ما لقيتش حاجة في الشقة.

ثم أضفت بحزن:

- مش عايز تكمل؟

قال بكبرياء:

- مش أنا اللي اتهدد لكن...

قاطعته:

- أنا ما يرضنيش إنك تتضر بسببي.

- لو احتجتني كلمني.

ثم قام متوجهاً نحو الباب واستدار قائلاً:

- قال لي فارس حسين آخرته وحشة.

وغادر المكتب بعد أن أغلق الباب برفق....

* * *

استيقظت تَوّاً من ثباتي العميق بفعل كابوس مزعج.. مخاوفي تتجسد في عالم الأحلام والخيالات والعقل يداعب نفسه فيساق لجنون.. يمضي نحو هلاكه منتعشاً منتشياً ويفتش بذكريات لم يعد الوعي يدركها..

الكابوس..

قبو خشبي ضيق، خال تماماً إلا من طاولة مستطيلة تتوسطه.. الإضاءة خافتة بمصباح تدلى فوق الطاولة بـمتر تقريباً.. الطاولة ملطخة بالدماء وعليها سكاكين حادة وسيوف معدنية.. أفق أمام الطاولة أرتدي جلباباً أبيض ملطخاً بالدماء.. وجهي وجسدي ملطخان بالدماء الجافة.. يدي اليمنى عليها دماء طازجة يتصاعد منها بخار ماء وكأنني نحرت حيواناً توا وأمسك بها ساطوراً ضخماً.. أضحك ضحكات شريرة كمجنون.. رفعت يدي لأرى يدي اليسرى مبتورة وتنزف منها الدماء بقوة. ملقاة أسفل الطاولة رأيتها عندما نظرت إلى الأرضية الرملية.. صحت بقوة ثم هدأت وضحكت.. أصبح وأضحك.. أصبح وأصبح... انتهى الكابوس وقمت فزعاً...

تناولت الهاتف لأنظر به.. الساعة الثانية وثلاث وأربعون دقيقة صباحاً.. اعتدلت وجلست على حافة السرير.. المصباح مشتعل لأنني أصبحت أخاف الظلام.. هممت لتناول السجائر لكنه قاطعني بصوت رخيم:

- فارس، وحشتني، بقالي يومين ما شُفتكش.

ثم أضاف وهو يتقدم نحوي:

- الكوابيس بتصحيحك؟ مع إن حياتك كلها كابوس، ومش عارف تفوق

لحد دلوقتي.

قلت مستسلماً:

- أنا مريض.

- أنت مريض بنفسك. شر جواك ما لهوش حدود. يا ريت ينفع ما

تدورش، لكن للأسف لازم تدور على نفسك.

ثم جلس على حافة السرير وأضاف:

- لكن تفتكر لو عرفت.....

قاطعته:

- عرفت إيه؟

- عرفت نفسك.
- قلت بتوسل:
- نفسي أعرفها.
- للأسف هتعرفها.
- ثم انسابت دمعات من عينيه وتابع:
- خمورجي وبتاع ستات و منافق وما خفي كان أعظم..

* * *

السبت 19 يناير..

الساعة 2 مساءً

ظلتت أحملق في صورة ريماس ابنتي وملك التي كانت معلقة على الحائط خلف الأريكة الوثيرة في فيلا عائلة خيري.. الصالون ذو طراز قديم يقبع في ركن على يمين السلم وأمامه باب زجاجي يطل على البسين.. الطقس اليوم ليس بتلك البرودة المعتادة.. معتدل مع برودة خفيفة أدركتها عندما كنت في الطريق إلى الفيلا..

الصورة كانت قديمة التقطت بالكاميرا خاصتي عندما كنا في الساحل.. تذكرت رحيم الذي رفض أن يظهر في الصورة ووقف بجواري.. ملك تقف أمام الشاطئ وريماس تقف بجوارها ينظران ويتسمان..

عمر تحدث لي قبلاً أن ملك عادت من الساحل، ما كان مني إلا أن أذهب لأرى ابنتي وهكذا ظلتت أنتظر ملك حتى تأتي..
أق الصوت من خلفي عندما كنت شاردًا في اللوحة:

- إيه يا فارس؟

استدرت وقلت:

- جاي أشوف بنتي.

- تفتكر إنها عايزة تشوفك؟!!

قلت بغضب:

- أكيد مليت دماغها سم!

- ريماس ذكية وكانت شايقة معاناتي معاك.

جلست بعد أن جلست على كرسي في مواجهتي وأردفت:

- طب ممكن تناديها؟

- دادة ناهد بتصحيحها فوق.

ثم وقفت وقالت ببرود:

- طبعا مش لازم أقول لك البيت بيتك. يا ريت تاخذ راحتك.

ثم أضافت وهي تتحرك ببطء:

- استأذنيك.

- ملك استني. أنا جاي أتكلم معاك. ملك أنا تعبان وعاييز أفهم.

قالت بعطف:

- ما لك يا فارس؟

- ممكن تقعدني ونتكلم؟

جلست فأردفت:

- أنا مش فاكتر أي حاجة من اللي قُلتيه إني كنت خاين. عاييز أفهم كانت حياتك معايا ازاي؟

- هي الحادثة أثرت عليك؟!؟

- لا يا ملك مش الحادثة. أنا واضح إني دخلت في حالة اكتئاب صعبة.

قامت واقتربت مني ثم قبضت على يدي برفق:

- طب ما لهوش لازمة نتكلم في اللي فات.

- عاييز أفهم...

تنهدت وأردفت:

- إذا كنت أنا ما كنتش فاهماك. أحيانا تبقى طيب وتحبني وأحيانا ترجع وش الفجر ريحتك خمرة. يوم تصلي ويوم تسكر. يوم تبقى طبيعي

ويوم تقفل على نفسك المكتب واسمعك بتكلم حد. أنا كمان أعصاي تعبت منك وبقيت مش فاهمة حاجة.

قلت ببلاهة:

- أنا بدأت أبقى كدا إمتي؟!!

- من سنتين تقريباً. قُلت لك تروح لدكتور كنت دائماً بترفض وتتجنن أكثر لما تسمع السيرة دي.

تقدّمت ريماس تركض نحووي وهي تهتف بحب وتردد كلمة بابا.. كانت قصيرة بيضاء البشرة.. ذات شعر بني كشعر أبي، جدها.. وعينين بنيتين مثل عيني.. تفاصيل وجهها تشبه وجه ملك كثيراً.. شردت بها وقمت من الأريكة أفتح يدي بحب.. انسابت دمعات على خدي لم أستطع أن أخفيها.. حضنتها بقوة وحب.. مضى وقت كبير لم أرها به..

- ريمو قلب بابا. وحشتيني قوي.

قالت بعينين شاردتين:

- بابا هو إحنا هنزجع شقتنا إمتي؟

- هنزجع يا حبيبتي.

ونظرت لوجه ملك كانت شاردة تنظر لنا تلامس أرنبه أنفها بين الحين والآخر.. بكت فأزالت دموعها ال Makeup لتظهر هالات سوداء شديدة أسفل عينيها..

ربت على كتف ريماس ثم قلت:

- ريمو روحي العبي مع دادة شوية.

غادرت ريماس فأردفت بعد أن عدت أجلس بالقرب منها:

- ملك أنت بتتعاطي حاجة؟

ابتسمت وأردفت:

- هيفرق معاك؟

- آها.

- أيوه يا فارس، باشم بودرة.

قلت بغضب:

- ليه يا ملك!?!

- فارس أنا لسا بحبك. أنت مش عايز تفهم!

ثم أضافت:

- فارس..

ضممتها بقوة وأردفت:

- فارس بيحبك يا ملك.

* * *

بعد شهر..

الثلاثاء 19 فبراير..

الساعة 11 مساءً..

جلست بغرفة مكنتي أمامي الـ laptop وبعض القصاصات لأوراق متناثرة فوق المكتب.. الغرفة وثيرة جلدية الفراش.. ألوان قائمة تناسب الديكور.. خلفي مكتبة ضخمة وأمامي المكتب.. الإضاءة خافتة مصدرها أباجورة صغيرة فوق المكتب.. أمسك بيدي اليمنى قلماً وأكتب ما حدث معي بالأيام الماضية.. أحاول أن أفهم بعد أن اختفى الزائر واختفى كل شيء..

عادت ملك لتعيش معي بشقتنا القديمة وهذا أفضل لتحيا ريماس حياة سوية.. ملك تقاوم الإدمان وتتعافى يومياً.. أصبحت شخصاً آخر الآن.. تهتم بي وبريماس أكثر من أي شيء.. لدي اليوم حياة طيبة أحياها.. وهدأ كل شيء إلا عاطف الذي ظل يسأل عن التقارير بعد انتظامي في العمل.. سلّمته تقارير كتبتها من مخيلتي حتى يهدأ فأصبح راضياً عن العمل..

الزائر قال من قبل أننا خلقنا لتأقلم وقد فعلت ما قال.. تأقلمت
وعدت أحيا حياة روتينية ونسيت أمر رحيم لعل الله يعوضني خيراً لكني لم
أنس الحشيش والكحول.. حاولت مراراً ولم أستطع وهذه السيجارة التي
أمسكها بين أصابع يدي اليسرى ودخانها قد عبأ الغرفة تفضح أمري..
لم تتركني الكوايبس يوماً وأحيا بها دائماً.. اعتدت أن أحيا معها كرفيق
أبدي كان من قبل غير مرغوب فيه، والآن أصبح صديقاً حميماً..
أرحت رأسي على الكرسي ثم زفرت نفس سيجارة الحشيش لأعلى
ونظرت له مبتسماً ببلاهة.. عدت أنظر أمامي لأجده يجلس على يسار
المكتب..

قال مبتسماً:

- بقالنا كثير ما تقابلناش.

ابتسمت وأردفت:

- افكرت إني خفيت لكن لما شُفتك عرفت إني فعلاً مريض.

- مريض بإيه؟

ثم تابع ساخراً وهو يشير لسيجارتني:

- عيب تقول كدا. دا أنت حتى ماسك سيجارة حشيش في إيدك، اعتبر

نفسك بنهلوس.

ثم صمت برهة وأضاف:

- اتأقلمت يا فارس؟ لكن دا ما كانش قصدي. بنتك هتتربي مع أب

مدمن وأم بتشم بودرة أكيد هتطلع شمال!!

قذفته بطفاية السجائر التي عبرت جسده، وسقطت على الأرضية ثم

قلت غاضباً:

- أنت بتقول إيه.....

فتحت ملك باب المكتب بقوة وأشعلت الضوء.. كانت ترتدي قميص نوم

طويل فوقه روب أبيض..

الفرع كسا وجهها وقالت بخوف:

- ما لك يا فارس؟

- ما فيش يا حبييتي.

أردفت ببلاهة:

- والطفاية دي؟

قمت واقتربت منها ثم ضممتها.. شعرت ببرودة أنفاسها.. بقلبها
ينتفض.. ثم مسحت على شعرها ببطء وقلت:

- ريمو نامت؟

ضحكت بخبث وأردفت:

- هو فيه إيه؟ أنت ما لك اليومين دول؟ هو كل شوية. أنا شايفة إننا
نوديتها تعيش عند بابا أحسن.

ضحكت حتى سعلت وقلت:

- بتوحشيني، أعمل إيه؟!

- هات نفس.

ناولتها السيجارة فسحبت نفساً عميقاً منها...

* * *

الأربعاء 20 فبراير..

الساعة 11:36 صباحاً..

قبضت على مقبض باب غرفة مكتبي بالجريدة.. نظرت لمحمد الذي كان
يجلس على مكتبه في القاعة منهمكاً في كتابه بعض التقارير.. ناديت عليه
ثانية ليتنبه..

فقام من الكرسي وقال بأدب:

- أيوة يا أستاذ فارس.

قلت بضيق:

- وهو عادي لما حد يعوزني تدخلوه مكتبي وأنا مش موجود؟!!

تنحى وقال برفق:

- دي تعليمات سعادتك يا أستاذ فارس.

تمالكت دهشتي وتابعت:

- هي جوا من بدري؟

- من نص ساعة.

أضفت بعد أن فتحت الباب:

- خلي عم عوض يجيب لي قهوتي جوا.

ثم أغلقت الباب وتقدمت نحو الداخل.. رأيت أنثى تجلس على الكرسي الأيمن أمام المكتب وتضع حقيبة يدها على الترابيزة الصغيرة بين الكرسيين.. وضعت قدماً فوق الأخرى لتجلس بوضع أنثوي دفاعي لأرى مقومات أنوثة وجسد ممشوق.. ترتدي بنطالاً أسود ضيقاً.. وبلوزة سوداء.. قامت ولم أرَ قسماتها جيداً لأنها ارتدت نظارات شمسية لكنها كانت بيضاء كالثلج.. خصلات شقراء تدلت من حجابها الصغير.. قسماتها جامدة..

قلت عندما كنت أتقدم:

- أهلاً مدام فرح.

ثم أضفت قبل أن تتحدث:

- مش مدام فرح برضه؟

قالت ببرود:

- مدام فرح..

ثم مددت يدي لتصافحني مصافحة باردة بأطراف أصابعها.. جلست على الكرسي ثانية، وجلست على الكرسي الأيسر في مواجهتها.. وضعت هاتفها وسجائري والمفاتيح.. أوامات برأسي مبتسماً حتى تتحدث فأزالت

النظارات عن وجهها.. ثم نظرت لها بعينين ثابتتين.. لم أتمالك نفسي عن الشرود بها..

حواجب رفيعة شقراء.. عينان زرقاوان بلون السماء.. أنف رفيع مستقيم وشفتان ورديتان.. أنثى يهيم بحسنها من يراها.. جميلة كجنة ورقيقة كوردة ربيعية.. طويلة ورفيعة وبارزة المفاتن.. ظللت مندهشًا وهي تضع النظارات على الترايزة..

قلت بود:

- تشربي إليه الأول؟ أنا ملاحظ إنك ما شربتيش حاجة.
- شكراً لذوق حضرتك. أنا جاية في كلمتين وماشية على طول.
أومات رأسي وأردفت:
- اتفضلي.

- أنا فرح حسن حرم المرحوم تامر الرفاعي.
قمت من الكرسي مندهشًا:
- تامر بيه مات؟!
- من شهر.

جلست ثانية وقلت بأسى:
- البقاء لله، والله ما أعرف غير منك.
- ربنا يرحمه.

ثم تنهدت بعمق وأضافت:
- عارف أنا باكرهك قد إيه؟
نظرت لها ببلاهة فتابعت:
- أنا اللي جابني هنا وصية المرحوم.
- مش فاهم حاجة!

انفجرت بالبكاء وقالت:

- كان عنيد، فضل يبجي له تهديدات كل يوم إنه ما يدورش ورا الزفت اللي اسمه إبراهيم، لكن كان مصدقك وفضل يدور وراه لحد آخر تهديد جاله إننا هنموت كلنا، وفضل مكمل وكل يوم كان بيزيد إصرار.

أخرجت مندبلاً ومسحت عينيها التي زادتا حمرة من البكاء وأضافت:
- أنت دمرت حياتي ومات جوزي وابني بسببك. ليه يا أستاذ فارس؟ ما لقيتش غير تامر؟

قلت بأسى:

- هو مات وهو بيأدي واجبه.

قالت بسخرية:

- والنتيجة؟ البلد هترجع هولي!!

ثم فتحت الحقيبة وأخرجت ملفاً وقالت وهي تناوله لي:

- عموماً دي معلومات مهمة. زوجي دفع حياته تمناها. ووصاني إني أوصلها لك.

التقطت الملف ثم قامت بعد أن تناولت أغراضها وتوجهت نحو الباب فناديت ولكن لم تجب.. غادرت وأغلقت الباب برفق..

دخل عم عوض ووضع فنجان القهوة فوق المكتب وغادر بعد أن أغلق الباب خلفه.. جلست على كرسي المكتب بعد أن وضعت أغراضي والملف عليه.. تناولت سيجارة أشعلتها ثم ارتشفت رشقة من فنجان القهوة وفتحت الملف..

ملف مكتوب عليه "خاص فارس حسين"..

العنوان تحريات إبراهيم محيي الدين صلاح..

توصلت تحرياتي على مدار الشهر الماضي بعد أن بحثت وراء المدعو إبراهيم محيي الدين صلاح وشهرته إبراهيم محيي. يعمل كعالم بيولوجي وحاصل على بكالوريوس العلوم قسم بيولوجي من جامعة عين شمس.. ليس

له وظيفة عامة بمصر، إلا أنه كان يعمل بالخارج وتشير شهادة تحركاته أنه تنقل بدول الاتحاد الأوروبي والولايات المتحدة الأمريكية.. لم تدم زيارته للخارج أكثر من عامين، ثم يعود لمصر لعام ويسافر ثانية بنفس المدد بتتابع قبل أن يعود ليستقر بمصر منذ أحد عشر عاماً..

لم يكن له محل معلوم؛ إلا أنه يملك عددًا هائلًا من العقارات كانت تدر عليه مبالغ طائلة مقابل إيجارها شهريًا..

لم يسبق له الزواج إلا أنه كان دائم التردد على الملاهي الليلية وتوصلت أنه كان على علاقة براقصة تدعى كريمان تعمل بمهلى ليالي بمنطقة الهرم.. لم يسعني استجوابها لأنها كانت في رحلة لقضاء العطلة الشتوية بالخارج..

توصلت لفحص الملف الخاص به في مدرسة الأمل بعد أن وجدته بالأرشيف.. أشار الملف لمدة تحسن حالته السريعة في سابقة نادرة والتي لم تستغرق الكثير ومن ثم غادر المدرسة.. كان طالبًا مشاغبًا حاول الاعتداء على أستاذه مرات، إلا أنه بعدما ترك المدرسة كان دائم الزيارة والتبرع لها.. ظل على مدار عشر سنوات يفعل الأمر حتى سافر للحصول على درجة الدكتوراة من الخارج، وعندما عاد ثريًا تبرع بمبلغ لهدم المدرسة وبنائها ثانية على نفقته الخاصة قبل أن يسافر ثانية..

بعد استشارة بعض الأطباء النفسيين كان التشخيص لحالته أنه شخص سيكوباتي مدمن كحول، يعاني من اضطرابات سلوكية ونفسية سببتها صدمة كبيرة، أو أنه لم يمثل للشفاء التام...

أغلقت الملف وأرحت رأسي بعد أن تنهدت بعمق.. طقطقت فقرات رقبتي ونظرت لشاشة الكمبيوتر المغلقة أمامي.. رنَّ صوت في أذني وعلا الطنين الحاد.. وكأن حواسي تضاعفت وبخاصة حاسة السمع.. شعرت كأنني أسمع دبيب النمل أسفل قدمي.. طنين وهمهمات ثم دوار وصوت يقول:

- الطريق اترسم يا فارس.

وظل يردد حتى صرخت بقوة ثم ضربت مقدمة جهتي بالمكتب ضربات متتابعة حتى يكف هذا الصوت عن الطنين.. ظللت على تلك الحالة حتى فقدت الوعي بعد أن رأيت صورة مشوشة للزملاء في القسم يقفون أمامي.

* * *

لم تدم غيبوتي لأكثر من ثلاث دقائق، حاول الزملاء إغاثتي بكافة الطرق.. استفتقت ورفضت أن أترك الجريدة لأن كان لدي بعض العمل لإنجازه.. مضت النصف ساعة الماضية بين قراءة التقارير المقدمة لي من الزملاء في القسم وإمعان القراءة في تحريات إبراهيم محيي.. ظللت هكذا حتى داعبني النوم ومثت برهة مستنداً على سطح المكتب بعد أن أزحت بعض الملفات وأخليت مساحة أضع رأسي بها.. أدركت أنها برهة يسيرة عندما استيقظت.. أيقظني ذلك الصوت بعد أن رنَّ في أذني مرات فقامت واعتدلت لأرى عاطف يقف ممسكاً ملف إبراهيم محيي ويقرؤه بفضول.. عيناه تشعان غضباً.. بدا متأنقاً ويرتدي حلة رسمية سوداء.. بادرنى بابتسامة خبيثة وغضب ثم أردف:

- بتشغلني يا فارس؟ بتديني تقرير كل معلوماته غلط!

قلت بجفن نصف مفتوح يقاوم النعاس:

- سيب الملف يا عاطف واتفضل اطلع برا.

صاح في بغضب:

- أنت اتجننت رسمي. أنت متحول للتحقيق يا أستاذ.

قلت ببلادة وأنا أشعل سيجارة وأزفر دخانها بقوة تجاهه:

- ماشي، واتفضل يلا.

- فعلاً أنت واحد حقير مضطرب نفسياً.

قامت غاضباً وأنا أتذكر ما قرأته في الملف.. اقتربت منه ثم صفعته بيدي

اليمنى بقوة وقلت:

- أنا سيكوباتي ومجنون. تحب أوريك الجنان؟

وانقضضت عليه حتى سقط أرضاً واعتليت جسده أكيل له اللكمات
بيدي اليمنى وبالأخير أطفأت سيجارتي بصدرة وهو يصيح ويتأوه..
تجمع الزملاء خلفي وأزاحوا جسدي عنه وهو يصيح بكلمات:
- أنت مجنون، والله لاحبسك يا فارس. ابقى قابلني لو دخلت الجريدة
تاني طول ما أنا موجود.

* * *

الساعة 8 مساءً..

الإضاءة كانت خافتة في الغرفة البيضاء الشاسعة.. جلست على كرسي
جلدي أبيض اللون في صالون على يمين مكتب أبيض أيضاً عليه لاب توب
apple ولافتة فوق المكتب لم أستطع قراءتها لخفوت الإضاءة.. وبالجهة
اليسرى من الغرفة سرير يكفي لجسد شخص واحد ومسند الرأس مائل
للأمام بزاوية منفرجة.. بالقرب منه أباجورة وضعت على كومود صغير
وبجوارها كرسي جلدي من نفس طراز كراسي الصالون الذي أجلس عليه..
على كرسي في المقابل يبتعد بضعة خطوات وتفصلنا ترابيزة زجاجية
صغيرة، جلس رجل ذو شعر أبيض طويل.. تخطى الخمسين عام.. لحيته كثة
بيضاء..أنفه دقيق وعيناه ضيقتان وحواجب خفيفة.. نحيف الجسد.. يرتدي
معطفاً أبيض.. ابتسم برفق ثم أردف بعد أن أشعل ال pipe بساق كبريت
وزفر الدخان برفق..

- إيه رأيك في اللون الأبيض؟

قلت بدون اكتراث:

- لون حلو يا دكتور...

ابتسم ببرود وقال:

- دكتور فوزي خليل. أنت بتنسى ولا إيه؟

ثم تناول نفساً وزفره بقوة:

- عمر كلمني عن حالتك وحاسس إن الموضوع بسيط.

قلت ساخراً:
 - أنت عارف أنا جيت معاه النهار دا ليه؟
 - ليه؟!
 - لأني كنت هاقتل رئيس التحرير النهار دا. وبدأت أخاف على نفسي
 بجدة؛ لأن طول عمري عندي ضبط نفس بس بقيت باتصرف بغرابة.
 ابتسم وأردف:
 - امممممم، طب الشخص اللي بيطلع لك دا لسا بيبجي؟
 - آها للأسف.
 تنهد برفق وقال:
 - طب احكي لي.
 - مش باعرف احكي يا دكتور فوزي.
 - طيب أنا هاكتب لك شوية مهدئات لكن المرة الجاية حاول تحكي.
 أومأت برأسي فقام وتوجه ناحية المكتب وشرع يكتب رويته ثم اقترب
 مني وناولها لي وهو يقول:
 - يا ريت تثق في عشان أقدر أساعدك يا أستاذ فارس.
 قمت وصافحته ببرود ثم أردفت:
 - فرصة سعيدة يا دكتور.

* * *

الساعة 11 مساءً

علا صوت الموسيقى وزاد الصخب.. موسيقا روك أند رول وجاز.. كانت
 الإضاءة خافتة يتخللها أضواء حمراء وزرقاء وخضراء بتبادل، مصدرها
 الكرات المعلقة في سقف الديسكو.. تدلت تلك الكرات كثيراً وكانت تدور
 مسببة صداً مزمناً وأرقاً لعيني.. الطاولات مبعثرة في الديسكو الذي
 تجاوزت مساحته مائتين وخمسين متراً.. وبعض الأرائك الجلدية متناثرة
 بنظام أمامها طاولات زجاجية.. يعلو صوت فتح زجاجات البيرة حولي.. حالة

من زيادة الأدرينالين.. أرى الرواد منتشين ويرقصون في حالة سُكر.. وهناك على المسرح فتيات يرقصن ولم يرتدين سوى قطعتي قماش إن جاز التعبير تخبيّ موضعي عورتهن..

أجلس على طاولة في منتصف الديسكو تقريباً برفقة عمر الذي كان منتشياً يتمايل بعنف فوق الكرسي بعد أن فتح زجاجة البيرة وتناول منها رشقات متتابة ثم أشعل سيجارة حشيش وسحب أنفاساً بعمق.. أردف وهو يناولني سيجارة الحشيش ويصيح حتى أسمعته:
- ما تفك يا فارس. أنا جايك هنا تتبسط شوية.

أومأت برأسي مبتسماً ولم أتناولها، فأشار بعينه نحو الأمام، فنظرت لأجد مايكل..

كان مايكل صديقاً قديماً يملك عدد من البارات ونوادي الديسكو ومالك هذا الديسكو أيضاً.. أربعيني فارغ الطول.. منسدل الشعر.. ذي بشرة بيضاء وعينين خضراوين وحمراوين دائماً بفعل تناول مخدر الحشيش.. حواجب قصيرة بشكل قوس.. أنف صغير دقيق.. يرتدي جاكيت أصفر اللون وبنطالاً أبيض وأسفله قميص مشجر مفتوح لتظهر منه السلسلة الفضية والوشم على شكل عقرب كبير على الجانب الأيمن من صدره.. ابتسم بحماقة وهو يتقدم فابتسمت له وهو ينظر لي..

قال عمر:

- أهو مايكل جا لك يا عم.

اقترب مايكل فوقف وضمته بقوة ثم قال:

- إيه يا روستو؟ نسيتنا خالص كدا؟ ومغير أرقامك مش عارف أوصل

لك!

ثم اقترب منه عمر فوقف وسلّم بحرارة قائلاً:

- والله يا مايكل جايه بالعافية بعد ما ضرب رئيس التحرير في الجريدة.

ضحك مايكل وأردف بعد أن ربت على كتفي:
 - جامد يا روستو. أنا عازمكم النهار دا على حساي بالمناسبة دي.
 ثم تابع بعد أن أشار بعينه لفتاة تقف أمامنا ترتدي ميني جيب وبلوزة
 قصيرة.. جميلة وذات شعر مصبوغة بعض خصلاته باللون الأخضر..
 - باقول لك يا روستو، مش عايز مولة؟!
 ضحكت وأردفت:
 - لا أنا مشفر يا ميكا والله.
 قال عمر بسخرية:
 - بس أنا مش مشفر يا ميكا.
 أردف مايكل بحزن مصطنع:
 - مولة مشفرة وفارس بس الي يعرف يفكها.
 ابتسمت وقلت:
 - لا أنا هاقعد شوية وأمشي.
 فقال مايكل بلوم:
 - أنت من ساعة موت رحيم. وأنت ما بقيتش روستو بتاع زمان.
 شعرت بضيق لكن ابتسمت ببرود ومسحت على شعري مقاوماً للضعف
 حتى وجدتهما ينظران لي ببلاهة.
 قال عمر بتوجس:
 - فارس، شعرك ما له؟!
 وأضاف مايكل:
 - ما تخوفهوش يا عمر.
 أخرجت هاتفي بخوف وشغلت الكاميرا لأنظر لمقدمة فروة رأسي وقد
 فقدت بعض خصلات توالي..
 نظرت لهما بتوجس وأردفت:
 - أنا لازم أمشي.

ثم ركضت نحو الخارج مرتطمًا بالأجساد في طريقي..

* * *

كانت السيارات تمضي أمامي كسلاحف في الطريق المكون من أربع حارات.. ضغطت على البنزين أكثر وأعطيت السيارة الغيار الخامس لأطلق لها العنان وتمضي بلا لجام يوقفها.. الإضاءة قوية وأعمدة الإضاءة على جانبي الطريق.. عيناى مثبتتان للأمام والرعب غزا قسماى وجهى، اختلست النظر إلى عداد السرعة الذى تجاوز المائة وعشرين كيلومتراً فى الساعة.. أقود بلا تأن وأتجاوز السيارات كسباق.. النار تستعر فى صدري ولهب الأفكار يؤرق عقلى..

سمعت صوته يتردد فى أذنى، ذلك العجوز الخبيث ما زال يرتدى حلته الرثة، أدركته بعد أن اختلست النظر عن يمينى لأراه يجلس يفتعل الخوف ويصيح بشدة:

- هنموت يا فارس. لا دا عاطف عنده حق إنك اتجننت.

فزعت عندما رأيتته وتركت المقود لأفقد السيطرة على السيارة لكن سرعان ما تحكمت بها، وضغطت المكابح ببطء لأستقر على يمين الطريق ثم ضغطت إشارة الانتظار..

ما زال كما هو، نظر لى وقال ببرود:

- بص كدا فى المرأية كويس. حالتك دي مش بتفكرك بحاجة؟

قلت بخوف:

- نور.

أردف بأسى:

- للأسف.

ثم تابع بعدما تنهد بعمق:

- خايف يا فارس؟

- الموت مش اختيار عشان أهرب منه.
- ضحك بخبث وأردف:
- لكن لما سنين عمرك تجري في شهور كل يوم منها هيعدي عليك كأنه سنين طويلة. قمة العذاب مش كدا؟
- قلت بيأس وصوت أرهقه الحزن:
- لكن وصلت كدا ازاي؟!!!
- عشان تستاهل تبقى كدا.
- شعرت بمن يطرق الزجاج الأمامي بقوة، نظرت بعين ذابلة ثم ضغطت زر فتح الزجاج.. كان أمين شرطة.. حليق اللحية.. جامد الوجه.. يرتدي بلوفر أسود عليه شارات الشرطة فوق الكتفين.. ثلاث شارات حمراء وحولها خيوط ذهبية ثم نظر بغضب وقال بحزم:
- رخصك.
- أخرجت الرخصة خاصتي وناولتها له فنظر بها وتابع:
- رخصة العربية لو سمحت.
- ناولتها له ببطء فتابع بحزم:
- سابق ليه على 130؟ الرادار لقطك وانت بتجري.
- قلت ببلاهة:
- هو أقصى سرعة كام؟!
- أقصى سرعة 80.
- وحرر مخالفة بدفتز صغير بمسكه بيده اليسرى ثم أضاف:
- يا ريت ما تعديش الحد المسموح.
- أومأت رأسي وأردفت:
- آسف يا كابتن.

* * *

الساعة 1 صباحاً..

دلفت غرفة النوم بالكاد أتحسس موطئ قدمي في هذا الظلام.. الإضاءة خافتة مصدرها مصباح الممر الطويل نحو الغرفة.. ظلت هكذا حتى أشعلت مصباح الضوء وأغلقت الباب برفق.. السرير عتيق مكوّن من أربعة أعمدة خشبية ضخمة في منتصف الغرفة، وعلى اليسار تسريحة من طراز عتيق أيضاً تبعد بضعة خطوات عن السرير في هذه الغرفة الشاسعة.. ملك نائمة وتتنفس بقوة.. أنفاس تقترب من أن تكون غطيظاً.. ابتسمت وتقدّمت نحو مرآة التسريحة لأنظر بعمق لوجهي.. نظرات ثاقبة وحادة تحمل بين طياتها معاناة وخوفاً من المجهول.. الألم يزداد ونفسي تهرم.. ظللت مثبت العينين كأنني لا أصدق ما أراه ثم جلست على كرسي التسريحة الجلدي الوثير ومضى الوقت.. أستمع لدقات عقارب الساعة.. أنظر لنفسي فقط.. حتى أتي صوت ملك ناعساً بعينين نصف مفتوحتين وقالت برفق:

- أنت هنا من إمتي؟

ثم تثناءت برفق وأضافت وهي تزيح الغطاء عن جسدها:

- هاروح أعمل لك عشا.

أومأت رأسي ثم قامت وعندما اقتربت مني صرخت بفرع:

- فارس، إيه اللي حصل لشعرك دا؟!!!

- مافيش يا حبيبتي أنا كويس.

أضافت وهي تقبض على يدي:

- لازم تروح لدكتور بكرى.

- هاروح يا ملك.



القدر له معروفة، واللحن هادئ لكنه نار تستعر لا يدركها سوى من تأمل

القرارات..

الإثنين 25 فبراير..

الساعة 2 مساءً..

مهندم الملبس أردتي حلة رسمية لونها كحلي.. عطر نفاذ قوي انتشر في الغرفة البيضاء الواسعة بفعل مكيف الهواء.. حلقت شعري بالملوس لأخبئ الخصلات التي سقطت.. اكتسبت وسامة أكثر من ذي قبل مع تلك اللحية الكثة.. أجلس بالصف الثاني أنظر لها بثقب وأتابعها وهي تمسك القلم وتكتب على السبورة البيضاء.. عيناها الزرقاوان ذابلتان وتحملان حزناً عميقاً يكاد يراه القاصي والداني.. ترتدي ملابس رسمية سوداء عليها لافتة أعلى الصدر الأيسر تحمل اسم فرح حسن بأحرف إنجليزية.. ترمقنا بثقة وبسمة مصطنعة.. رأيتني ولم تعرني اهتماماً وكأنني سراب أو لا شيء..

الطاولات متناثرة بنظام ونسق في الغرفة.. وعدد الطلاب تجاوز الخمسة عشر طالباً بي.. حاولت كثيراً أن ألتقي بها من قبل لكنها رفضت فما كان مني إلا أن آتي لتعلم الألمانية حتى أراها ولو للحظات..

مضت عشر دقائق بعد التحدث بالعربية مع الطلاب عن سبب تعلمهم الألمانية ثم تابعت وكتبت بمنصف السبورة من الأعلى بأصابع مرتعشة..

Das deutshe alphapet

ابتسمت بعد أن استدارت لنا ثم قلت:

- حاولت أكلّمك كثير؟

فقال بأدب:
- أعتقد إنك مش جاي تتعلم.
قلت ببلاهة:
- أنا جاي أتعلم وأتكلم معاك.
- حضرتك مستواك في الألماني ولكنك بتقول إنك عشت في ألمانيا فترة كبيرة.

- إزاي؟!
أردفت بغضب:
- والله!
ثم تابعت بضيق:
- لو سمحت يا أستاذ فارس ما تعطلناش.
- أنا عمري ما اتعلمت ولا درست ألماني.
تأففت وقالت بحنق:
- أمال إحنا بتكلم مصري دلوقتي?!
قلت بذهول:
- أنت بتقولِي إيه؟
ثم ضربت على جبهتي براحة يدي اليمنى بقوة وغادرت الغرفة..

* * *

مرت ساعة منذ أن غادرت الغرفة.. أجلس في الكافيتريا الخاصة بذلك المركز على طاولة بيضاء بلاستيكية وكروسي مثلها.. أرتشف فنجان القهوة الثالث وأتناول السجارة الخامسة التي أمسكها في يدي اليمنى، وأعبث بالهاتف باليسرى.. أطفأت السجارة بقوة.. شردت فيما قالته لي والحيرة التي تحيطني.. أتصنع الفهم ولكنني أبله لا يعي ما يحدث له منذ ظهور إبراهيم.. الوقت يمضي والغرفة أمامي.. الكافيتريا كانت كصالة مفتوحة على الغرف.. أنظر للغرفة رقم ٦ بين الحين والآخر أنتظرها حتى تخرج..

وبعد سويغات فُتح الباب أخيراً وخرجت بخطوات متثاقلة.. لم تلحظ وجودي فاقتربت من طاولة وجلست.. تقدمت منها وجلست على كرسي في المقابل ثم قلت قبل أن تتحدث:

- مش هأخذ من وقتك كثير.

قالت بغضب:

- عايز إيه؟

- عايز أعرف إيه خلى تامر بيه يكمل تحريات ورا إبراهيم مع إني طلبت منه يبعد.

- المفروض أصدقك؟!!

قلت بثقة:

- هاكذب ليه؟!!

- هو كان صرف نظر بس بعد كام يوم اتجنن وقال لازم أدور مش هينفع أسكت.

أومأت برأسي وأردفت:

- ما قالكيش إيه اللي خلاه يغير رأيه؟

- لأ، مع إنه ما كانش بيخبي علي، وحكى لي كل اللي حصلك.

ثم أضافت بعينين ثابتين:

- عارف أنا شايفاك إيه؟

صمت فتابعت:

- واحد نصاب، استغل ظابط شريف عشان يعمل سبق صحفي.

قلت بتوسل:

- صدقيني، والله أنا ما استغلته، ولو كان فعلاً حكى لك الموضوع بجد

كنتِ عرفتِ إن جوزك بطل ودا اللي خلاه يكمل.

أنسابت دمعات برفق على وجنتيها ثم أضفت:

- مدام فرح هو حقيقي أنا كنت باكلمك ألماني جوا؟

تأففت وقالت:

- لا أنت مجنون فعلاً.

ثم قامت وغادرت الطاولة لتجلس على أخرى بعيداً فقامت وغادرت..

* * *

الساعة 9 مساءً..

مضت دقائق أجلس على الكرسي الأبيض شاردًا بمكتب دكتور فوزي..
الإضاءة خافتة بقدر يريح الأعصاب.. ظللت أراقبه أمامي وهو يعبث في الـ
laptop ويمسك الـ pipe بيسراه.. جلس على المكتب بعينين غائرتين.. كان
منهمكاً بينما أشعل سيجارتي قام واتجه نحوي مبتسماً ثم جلس على كرسي
في المقابل.. زفر دخانه بقوة قبل أن يردف بود:

- إزيك يا أستاذ فارس؟ حلو النيولوك.

أومأت برأسي مبتسماً:

- شكراً يا دكتور فوزي.

فتابع مبتسماً:

- ها العلاج جاب نتيجة؟

- هو الشخص اللي كان بيظهر لي دا، ما ظهرش غير مرة واحدة.

- هايل.

أردفت بضيق:

- هو المشكلة إني ما بقيتش أقدر أتحكم في أعصابي.

عبث في لحيته وأردف:

- طب احكي.

قلت بتعجب:

- هو ممكن حد يبقى بيتقن لغة وما يعرفش إنه بيتكلمها؟

أردف في حيرة:

- إزاي؟!

- يعني أنا باتكلم ألماني كويس وأنا ما اعرفش.
شرد في بعين ثاقبة:
- أكيد أنت كنت بتعرف ألماني بس نسيت حاجات في الحادثة اللي
حصلت لك.
- مش عارف.
تنهد وأردف:
- خير يا أستاذ فارس. أنت تواظب على العلاج بس وكله هيبقى تمام.

* * *

الساعة 2 صباحاً..

أجلس بغرفة مكثبي بشقتي.. أتناول سيجارة من مخدر الحشيش وأزفر
دخانها بقوة في الهواء.. الضوء خافت من الأماجورة الصغيرة على المكتب..
أشعر بسيل من الأفكار المتواردة في عقلي.. ما حدث البارحة مع فرح! دكتور
فوزي الذي لا يعالجني بل يزيد تساؤلاتي يوماً تلو الآخر.. ضغطت على زر
التشغيل في الـ laptop ثم سحبت نفساً بقوة أنتظره أن يستيقظ من ثباته..
دست يدي اليمنى في جيب بيجامة النوم السوداء وأخرجت الفلاشة..
نظرت لها مبتسماً بخبث ثم دسستها بمدخل الـ usb وانتظرت.. ضغطت زر
تشغيل الفيديو..
موسيقا غريبة.. قرع طبول.. أشعر بأنني أصابني الصمم.. تعلقو وتزيد..
تداخل آلات غريبة.. دوار، رؤية مشوشة.. ضوء ساطع...

GAMECANGAMECANGAMECAN

المكان غرفة نوم وثيرة يتوسطها سرير ضخم فرش بعناية على الجانب
الأيسر منه كومود والأيمن كذلك.. دولاب ضخم في المقابل يقترب من الجدار،
وتسريحة أمام السرير على يسار الكاميرا.. الكاميرا تظهر الغرفة من أعلى
منظور أفقي واسع، وعلى يسارها السرير ويمينها التسريحة وخلفهما

الدولاب.. جلست نور أمام المرأة على كرسي وتحملق بثبات في وجهها.. تحركت الكاميرا وكأنها تصور أحد مشاهدها حتى رأيت صورة وجهها في المرأة لكن لم أر انعكاس الكاميرا خلفها..

Flash back

الفيديو يعمل بشكل عكسي بسرعة حتى ظهر الفيديو الذي يجمعني بنور، أشحت نظري بعيداً عن الفيديو ثم عدت أنظر ثانية.. لأرى رشاد يضع الكاميرات في الغرفة.. يثبتها في كل مكان.. يغير المرأة بأخرى ويضع خلفها كاميرا.. خبأ كاميرات كثيرة في الغرفة بكل مكان..

حفظت عيني من الدهشة.. انطفأ الفيديو.. زفرت بقوة مع آخر نفس من سيجارتي ثم أطفأتها.. قمت من الكرسي أستعد لكي أغلق الـ laptop لكن الفيديو عاد ثانية.. وميض قوي...

Gamecan

أسفل كوبري يرتفع سبعة أمتار.. صوت السيارات يرن في أذني بقوة ويسبب لي طنيناً حاداً.. الأرض زراعية طينية كساها العشب ومليئة بأشجار النخيل.. الكوبري يشق هذه الأرض الزراعية.. أقف بالجانب الأيمن من الكوبري.. الوقت قرب الغروب.. الأرض خالية.. عيناى تشعان غضباً ويتطاير منهما الشرر.. نظرت أسفل قدمي لأرى رشاد غارقاً في دمائه.. يتنفس بصعوبة وينتحب.. يبكي وينظر لي بتوسل.. ركلته بقدمي اليمنى في معدته..

قال بتوسل:

- أبوس إيدك خلاص.

ظللت أركله بقوة وأردد:

- ليه يا ابن الكلب؟

أغلق الفيديو لأجده.. ذلك العجوز يجلس على الكرسي الأيمن أمام المكتب.. يرتدي حلته المعتادة.. بدا متأنقاً هذه المرة ونظر لي بخبث وقال بلوم:

- يعني تخونه مع مراته وتقتله كمان!؟

نظرت له بخوف فأضاف:
- شفت أنت جواك وحش إزاي؟! طب ما عملتش كدا ليه في عاطف.
تقتل الراجل عشان صورك مع مراته؟ خايف تتفضح؟!
تنهدت بقوة وأردفت:
- الفيديو دا مش حقيقي.
ضحك بصوت عالٍ وتابع:
- كل اللي شفته حقيقي يا فارس.
اختفى وظل الصوت يرن في أذني مرات ومرات.....

* * *

الثلاثاء 26 فبراير..

الساعة 3 مساءً..

مضت الساعات الماضية كمرور دهر.. تنازلت عن الكثير حتى أعود إلى العمل وما كان مني إلا أن جمعت الزملاء صباحاً بصالة التحرير وتأسفت عما حدث على الملأ.. قلت تناولت مخدرًا دون وعي عبث بعقلي وقبلت رأس كومة اللحم عاطف لكنه لم يكن ليقبل سوى بوعده أن أوفيه بتحقيق سيقلب الدنيا رأساً على عقب.. لا تردد فيما فعلت ولا ينقص من كرامتي بشيء.. رؤية رهاس تجعلني أفعل أي شيء لتغدو سعيدة.. كيف إن تركت العمل وعلمت بذلك؟! ما زال هناك الأب الحنون بداخلي رغم بذاءاتي..
أجلس في مكتبي بالجريدة راضياً عن ذاتي وإن كان بشكل لحظي.. تنهدت وابتسمت.. أرحت رأسي على الكرسي وطققت فقرات رقبتني برفق.. ضحكت عندما تذكرت عاطف ثم أشعلت سيجارة..

رن الهاتف، التقطه وأجبت بهدوء:

- ألووو.

أتي صوت أنثوي عذب مهذب:

- أستاذ فارس؟

- خير؟
- مع حضرتك إسراء حميد من مستشفى صحة.
- أهلاً بـ حضرتك.
- أستاذ رشاد عبد التواب لسا خارج من العناية وطالب يقابلك.
- قمت من الكرسي مندهشاً وأردفت:
- ما له!!!
- حد اعتدى عليه.
- أغلقت الهاتف.. لم أتمالك أعصابي والصوت يرن في أذني "كل اللي شُفته حقيقي يا فارس".

* * *

سرت في الممر الطولي بخطوات متسارعة.. كان الممر يعرض ثلاثة أمتار.. الجدران بيضاء وكذلك الأرضية.. غرف على الجانبين ذات أبواب بيضاء تحمل لافتات عليها أرقام.. الممر هادئ والساعة الآن السادسة مساءً.. أمضي في الطابق الثالث بعد أن صعدت السلم على قدمي.. رشاد بالغرفة رقم ثمانية عشر، وقد خرج من العناية منذ ساعات..

وقفت بعد أن وجدت رقم الغرفة أمامي ثم اقتربت من الباب وطرقته برفق قبل أن أدير المقبض وأدلف الغرفة ثم أغلقت الباب خلفي بهدوء.. كانت الغرفة من الداخل بيضاء الجدران بها سرير واحد ونافذة زجاجية كبيرة بطول الجدار على يمين السرير الذي يتوسط الغرفة.. بالقرب من جدار باب الغرفة أريكة جلدية سوداء.. المكيف في مقابل السرير ودولاب صغير على يساره..

رشاد مستيقظ على السرير.. كان يتناول طعامه بنهم وكأنه لم يأكل منذ أعوام.. بدا أنه في حالة جيدة إلا قليل من الكدمات في وجهه.. رأني فتابع تناول طعامه غير مكترث.. اقتربت منه حتى أصبحت أمام السرير وظللت أنظر له بعين ثابتة..

قال بهدوء بقم مملوء بالطعام:
- كان ممكن أحبسك بس المسامح كريم.
ثم تابع بعد أن تناول ما في فمه:
- أنا ماسك عليك فيديو وأنت عارف إني قتلت نور. أظن كدا خالصين.
إيه رأيك نفتح صفحة جديدة؟
قلت محتقراً:
- عمري ما تخيلت إنك حقير كدا. وكنت عمال تمثل عليّ، وعامل إنك بتحبها.
أردف مبتسماً:
- كانت كدا كدا هتموت. أنت سُفت كانت عاملة إزاي؟!
- عشان كدا كنت خايف ندور وراها؟
ثم أضفت بعين ثابتة:
- قتلتها ليه؟
قال بلا مبالاة:
- المجنونة كانت عايزة تكتب لك كل حاجة بيع وشرا. هي آها لما عرفتك طلبت الطلاق وانفصلنا بس كان لازم نكمل فترة على ما نفرض الشراكة اللي بيننا.
ثم أضاف:
- من يوم ما ظهرت في حياتها وهي اتغيرت وعرفت بالصدفة إنك السبب، لكن كنت طلقتها واتفاجئت من المحامي بالصدفة إنها عايزة تبيع لك كل حاجة..
سألت ببلاهة:
- ليه ما قالتش إنكم انفصلتم؟
- أكيد عارفة إنك ما لكش في الجواز.
ثم تنهد وتابع:
- كل دا حصل بعد الحالة اللي دخلت فيها.

تذكرت ما رأيته في الفيديو عندما أردت أن أنهى علاقتنا، وما أردت أن
تفعله لأجلي ثم قلت بغضب:
- يا ابن الكلب، وصورتنا ليه؟
- عشان يوم زي دا.
أضفت بغضب عات:
- بعث الفيديو لعاطف ليه؟!
قال ببلاهة:
- أنا ما بعثش حاجة!
ثم تابع بهدوء:
- أنا بعث لك أنت بس.
- يعني إيه؟!
قال متحدياً:
- شوف مين بيراقبك!
توجهت ناحية الباب فقال بتحفز:
- أنت عرفت إزاي إني قتلتها!
قلت بسخرية:
- ما عرفتش. أنا ضربتك لأنك وسخ.
نظر لي ببلاهة وأردف بود:
- ماشي، بس ما تنساش إن كل واحد فينا رقبنه تحت سكينة الثاني.

* * *

الأربعاء 27 فبراير..

الساعة 9:30 مساءً..

ظل يعبث بالـ laptop غير عابئ بوجودي أمامه على الكرسي الأيمن من
المكتب.. عبث في لحيته البيضاء الكثنة كثيراً ثم تناول كتاباً مكتوباً
بالإنجليزية.. ارتدى نظارات القراءة وظل يقرأ.. تنهدت مرات وتنحنت

لكن لم يكتثر لأمري.. تناولت سجائري وأشعلت واحدة ثم زفرت دخانها بحنق.. قام من أمام كرسي المكتب ثم جلس أمام المكتب على الكرسي الأيسر.. ظل يتفحص الغرفة بنظره لبعض الوقت حتى قاطعته..

- دكتور فوزي، أنت كويس؟

فمال بجسده للأمام وأردف بخجل:

- أستاذ فارس. أنا آسف مش هاقدر أكمل.

قلت ببلاهة:

- ليه؟!!

- مش هاقدر أساعدك. أنا مش قادر أشخص حالتك كويس واحتراماً للمهنة أنا ما اقدرش آخذ منك فلوس قصاد حاجة مش عارف أعملها.

تنهدت وقلت:

- لكن يا دكتور فوزي....

قاطعني وهو يريح ظهره للخلف:

- صدقني كدا أفضل.

أردفت بغیظ:

- وهي آداب المهنة بتقول إنك تتخلى عن مريض؟!!

- للأسف أن مضطر أنهي المقابلة. فرصة سعيدة.

قمت وابتسمت بخبث ثم أردفت:

- ماشي يا فوزي.

ثم توجهت نحو باب الغرفة...

* * *

وقفت أمام الحوض في حمام شقتي.. بخار ماء كثيف في الحمام.. زجاج الدش خلفي باهت بفعل بخار الماء الذي زاد الدفاء.. مسحت على المرأة براحة يدي وظللت أنظر في وجهي عن كذب.. تأملت ملامحي والتجاعيد التي غزت وجهي.. خطأ الابتسامة فوق شفتي قد ظهرها والتجاعيد حول عيني أيضاً.. شعرت باليأس والمعاناة.. الشعرات البيضاء كست لحياتي

وشعري قد أنبت خصلات بيضاء.. مددت يدي وتناولت منشقة عن يساري،
جففت جسدي برفق ثم ارتديت ملابسني وخرجت من الحمام..
مضيت في الممر الطولي بخطوات مثقلة حتى اقتربت من صالون
الاستقبال وهمت على الأريكة.. ضمنت ركبتي إلى صدري كطفل في رحم أمه
لم يأت إلى الحياة.. النوم لا يداعب جفني.. فقط أتهد بعرق وأشعر
باليأس..
رأيت العجوز يجلس على كرسي يسار الأريكة.. نظر لي بخبث ثم أردف
بثقة:

- مش قُلت لك كل اللي بتشوفه حقيقي؟

ثم تابع:

- اتأكدت إني صح؟!

قلت بيأس:

- ما بقيتش عارف...

قاطعني:

- آديك شُفت، لسا مش مصدق؟

وتابع:

- حتى ملك وعمر حقيقة..

انسابت دمعات من عيني فأضاف:

- مش طول عمرك شايفها خاينة وبتشك فيها؟

قام ووقف أمامي ثم أردف:

- لكن مش قادر تعملها حاجة. عارف ليه؟

- ليه؟!

- الخيانة بتعلم الدياثة فطبيعي تبقى كدا..

ظلت كلماته ترن في أذني بعد أن اختفى..

* * *

الخميس 28 فبراير..

الساعة 10 صباحاً..

مسحت على رأسي برفق.. فتحت عيني ببطء لأرى ملك تقف أمامي
وقميل بجسدها علي.. ما زلت نائماً على الأريكة في الصالة منذ البارحة..
ابتسمت برفق محاولاً تناسي ما حدث البارحة، لكن الصوت يرن في أذني
يخبرني بخيانة ملك وعمر.. صراع داخلي لكني أقاوم ذلك الهاجس بعد أن
عادت حياتي لما كانت عليه..

ترتدي روباً أسود مفتوحاً أسفله بيجامة نوم قطيفة.. عيناها ناعستان
كسهما الحب والشفقة، ثم جلست على الأرضية بالقرب من جسدي الممدد
على الأريكة وظلت تعبت في شعري برفق..

قلت بجفن مثقل:

- ريمو فين؟

- الباص أخذها من شوية يا حبيبي.

ثم تابعت بحب:

- نايم في الصالة ليه؟ أنت زعلان مني؟

ابتسمت وأردفت:

- لا يا حبيبي.

- مش بتاخذ علاج شعرك ليه؟

قلت بياس:

- مش هيفرق يا ملك. مش هيفرق.

قالت بضيق:

- ما لك يا فارس؟

- ما فيش يا ملك. أنا هاقوم أروح الشغل.

- مش هتفطر.

تنهدت وقلت:
- هافطر في الشغل.

* * *

فتحت باب المكتب بقوة معها انتفض جسد عاطف على كرسي المكتب الوثير.. تقدّمت بثقة ليث متحفز.. كان يرتدي حلته الرسمية البنية.. أمامه ملفات متراسة، ويحملك في بخوف وود.. جلست على الكرسي الأيمن ونظرت إلى المكتبة أمامي التي سقط زجاجها الأمامي من قبل، وكانت كما هي على حالتها.. وضعت أغراضي على المكتب ثم أشعلت سيجارة وزفرت دخانها بقوة.. دقائق صمت يتخللها نظرات واهية.. ابتسمت له برفق فبادرني الابتسامة بخوف..

قلت بثقة:

- عاطف، أنت شايفني مجنون؟

قال بصوت متقطع:

- مين قال كدا؟

- يعني مش زعلان عشان ضربتك؟

صمت فأضفت:

- ما تزعلش يا عاطف. اعتبرني ميرفت.

ثم ضحكت حتى سعلت وتابعت:

- عارف إني هابقي زي نور.

نظر لي ببلاهة فأردفت:

- ما تستغربش. قريب جدّا هيحصل لي زيها.

قال في حيرة:

- ليه بتقول كدا؟

- عشان دي الحقيقة. دا التحقيق اللي وعدتك إنه هيقلب الدنيا وأنا

قدامك أهو تقدر تكتب تقرير عن حالتي كلها شهور وأموت. فرصتك جات لك لحد عندك.

ثم تنهدت بعد أن زفرت نفس الدخان بقوة:
- لكن ما تسألنيش عن حاجة؛ لأني مش فاكِر أي حاجة والأعراض بدأت
تزيد عندي.

قال بتردد:

- مش وقت هزار.

- عارف أنا حالق شعري بالמוש ليه؟

- ليه؟!

- لأنه بدأ يقع.

قال بخوف:

- طب ما حاولتش تتعالج؟

ضحكت وأردفت:

- كانت نور اتعالجت.

ثم أطفأت السيارة وقمت، قلت مبتسماً:

- ما تزعلش مني يا عاطف. ادعي لي من قلبك.

غادرت الغرفة متجهاً لمكتبي مطأطأ الرأس..

* * *

جلست في مكتبي شارداً.. مستنداً برأسي على راحتي يدي بعد أن
جلست على كرسي المكتب الجلدي.. انسابت دموعات برفق على وجنتي..
تذكرت مشاهد باهتة مشوشة لم أتبينها.. أصوات متداخلة كصراخ وتأوه
يتخللها أصوات موسيقا أنغام شعبية.. صوت فتح زجاجات بيرة.. موسيقا
صاخبة ثم عواء.. أسمع دبيب النمل وأصوات عقارب الساعة.. اعتدلت
وقبضت على رأسي بكلتا يدي.. طرقات متتابعة على الباب برفق ثم دلف
محمد يحمل حزمة ملفات على يده اليمنى.. تقدّم بخجل ثم وضعها على
المكتب..

قال بود:

- أستاذ فارس ما لك؟

- بخير يا محمد.
فأردف بحياء:
- حضرتك شكلك مرهق.
أومات برأسي فتابع:
- دي ملفات فؤاد رحمي اللي طلبتها.
قلت في حيرة:
- فؤاد مين؟! أنا ما طلبتش حاجة.
- فؤاد رحمي الدجال اللي عملنا عنه تحقيق من 3 سنين.
أشرت له ليجلس ثم قلت:
- فكرني بيه يا محمد.
جلس أمام المكتب وأردف:
- دا دجال كان بيدعي إنه يقدر يحضر أرواح ويستخدم السحر في إنه
يغني أي شخص وضحك على رجال أعمال كبار. وكنا ناشرين تحقيق مفصل
عنه.
- وهو فين دلوقتي؟
- هرب برا مصر بعد ما سرق ملايين.
قام ثم قال:
- استأذنك يا أستاذ فارس.
ثم غادر وأغلق الباب برفق.. أرحت رأسي للخلف ونظرت لسقف
الغرفة ثم أغمضت عيني..

كان الطريق طينياً يبلغ عرضه ثمانية أمتار، على جانبه الأيسر ترعة
مياها ضحلة بالكاد جفت، وعلى جانبه الأيمن أرض زراعية ممتدة من
أشجار النخيل والموز.. الضوء ساطع مصدره مصابيح سيارتي الأمامية التي

أنارت الطريق لمترات ومن ثم ظلام دامس بعد ذلك.. الوقت ليلاً لا أعرف الساعة تحديداً لكن بدا وكأنه في غياهب الليل، فلا أحد يمر من هنا.. أقف مستنداً على الباب الأمامي لسيارتي من اليسار.. أعبث في الهاتف برفق و أدندن لحنًا كئيبيًا.. سمعت صوت عجلات سيارة تأتي من بعيد ولم تشعل الضوء.. تقدمت ببطء لأراها.. كانت سيارة سوداء فارهة mercedes.. وصلت بالقرب من سيارتي، تبتعد مسافة مترات ثم ترجل منها شخص يحمل حقيبة سوداء..

كان أسود البشرة.. طويل اللحية وخفيف الشارب.. أصلع الرأس.. أربعيني.. ممتلئ الجسد.. برزت علامة الصلاة فوق جبهته.. عيناه تحملان مكر ثعلب.. يرتدي جلباباً أبيض وعلى كتفيه شال أبيض.. مشى ببطء.. اقتربت منه حتى وقفنا بين السيارتين..

قال بود:

- كان لازم تجيبنا المكان دا؟
- أنت عارف مركزي. أخاف حد يشوفني معاك.
- فأردف بسخرية:
- شغلنا اللي عمل الفلوس اللي عندك، مش مركزك يا عم فارس؟
- ثم ناولني الحقيبة وتابع:
- دول ستة مليون جنيه نصيبك.
- تمام.
- أردف مقطباً:
- أنا مش لاعب خلاص.
- ليه يا فؤاد؟!
- كفاية تعبت من السكة دي.
- قلت برفق:
- على راحتك.

ثم تحرك نحو سيارته واستدار ينظر لي بتوجس:

- ما بتفكرش تشتغل في الحوار دا؟

- يا ريت أقدر.

فضحك وأردف:

- يا راجل دا أنت الجن يخاف منك. أنت الحاجات اللي بتحصل لك دي

مش طبيعية خالص.

قلت ضاحكًا:

- لا أنا أصطاد زباين آها. أشتغل في دا لأ.

شعرت بمن يمسح على رأسي برفق.. فتحت عيني ببطء وجفن مُثقل..

كان عمر يقف بالقرب مني أمام كرسي المكتب.. يرتدي بنطالًا أسود

وجاكيت أبيض مغلقًا.. تأملته في شروء..

ابتسم برفق ثم قال بعطف:

- ما لك يا فارس؟ أنا هنا من بدري.

- تعبان شوية بس.

ثم استدار وجلس أمامي على كرسي المكتب وتابع:

- ألف سلامة عليك.

تناولت سيجارة أشعلتها وناولته واحدة فأضاف:

- أنت ليه ما قُلتش إن دكتور فوزي رفض يكمل العلاج؟

قلت بضيق:

- دا ابن كلب، هو دا اللي جايبه يعالجني؟!

- على فكرة كلمني امبارح يعتذر وقال لي إن حالتك ما لهاش تشخيص

عنده.

- ثم سحب نفساً عميقاً وزفره بقوة وتابع:
- أنا طبعاً ما سكتش فضلت أزعق لحد ما قال لي إنك حاولت تعتدي عليه أكثر من مرة وفي مرة كنت هتقتله.
- أردفت غاضباً:
- دا كداب.
- تفتكر هيكذب ليه؟!
- ثم أضاف بأسى:
- فارس أنت فعلاً بقت تصرفاتك مش طبيعية خالص. أنا هاسهر النهار دا. يا ريت تيجي عشان تهدي أعصابك شوية.
- أوك نتقابل بالليل.



عندما تقع في فخّ القدر لا تعدو الإرادة سوى مقاومة فأر يلفظ أنفاسه الأخيرة..

السبت 2 مارس..

الساعة 11 مساءً..

صفت السيارة على جانب الطريق ثم ترجلت.. تقدّمت ببطء ثم وقفت أمام الكورنيش.. أخرجت علبة سجائري وأشعلت واحدة، زفرت الدخان بقوة في الهواء.. ثم نظرت لماء النيل أمامي وشردت أتأمله.. لماذا لا يوجد به موج؟! لماذا لا يثور؟! ربما لأنه ماء عذب.. هكذا نحن نثور وتتحرك الأحداث بقوة في حياتنا عندما تكثُر بها الشوائب.. ليتني كهذا النيل بلا علاقات هادئ.. حياتي رتيبة بلا شيء يذكر..

استندت بيدي على السور الحديدي أمامي ثم سحبت نفساً أخيراً ورميت سيجارتي بالنيل..

قال بسخرية:

- مش غلط كدا؟ هتلوث الميه.

نظرت عن يميني لأجد العجوز بذات الزي يقف ينظر للأمام لم يلتفت لي

ثم تابع:

- ما تبصليش أحسن الناس يفتكروك مجنون.

- ما بقتش فارقة. الناس صعب ترضيها.

ضحك وأردف:

- حلوة صح؟!!

- مصر!
قال بثقة:
- لأ، فرح.
- مش مهتم.
ابتسم وأردف:
- دا أنت عينك هتطلع عليها. بصراحة هي أحلى من ملك.
قلت ساخراً:
- أنا واحد هاموت قريب، تفتكر هابص لواحدة بالنظرة الدونية دي؟
- وإيه الجديد؟ ما انت طول عمرك طففس.
أردفت بضيق:
- الجديد إني اكتشفت إني كنت غلط.
- رد على تليفونك.
التقطت الهاتف من جيب بنطالي وأجبت:
- ألو.
أنى صوت بالكاد سمعته من الصخب:
- روستو.
- ما يكل.
- مستنيك ما تتأخرش.
ابتسمت وأردفت:
- جاي لك..
أغلقت الهاتف نظرت حولي لكن لم أجد العجوز، فتوجهت نحو
السيارة..

* * *

الساعة 12:10 صباحاً.

دستت الهاتف تَوًّا في جيب بنطالي بعد أن نظرت في الساعة.. أمضي
مرتطمًا بالأجساد بقوة وأتقدم.. الموسيقى عالية ترن في أذني.. الأضواء خافتة..

تدور الكرات فوق رأسي وتسبب تبادل الأضواء بين الأخضر والأزرق والأحمر.. الديسكو ممتلئ والطاولات أيضًا.. الكثيرون يرقصون بنشوة بكل مكان.. مشهد فوضوي عبثي مقزز لكن لذيذ.. يزيد الأدرينالين في جسدي لأشعر بنشوة..

مايكل أمامي على بعد بضعة خطوات بيده كأس من الـ red wine.. تجرعه دفعة واحدة.. جلست بالقرب منه مولة.. بالأحرى لا ترتدي.. وضعت قدمًا فوق الأخرى.. جيبة قصيرة أظهرت فخذها وبلوزة كات.. تمايلت بعنفوان.. هنالك كرسي أخير شاغر يتسع لفرد آخر وبالأحرى كان لي..

اقتربت منهما فقام مايكل وسلّم عليّ بود:

- روستو سلّم على مولة.

سلمت عليها ببرود فتابع:

- عاجباني دماغك.

ثم مسح على رأسي وضحك بقوة وأضاف:

- مولة كانت هتموت وتشوفك.

جلسنا ثم ظللت أتفحصها.. كانت بيضاء ذات أنف صغير به حلقة

معدنية.. تضع الكثير من مساحيق التبرج وروج موث على شفيتين ممتلئتين..

حاجبان متقطعان لثلاثة خطوط.. شعر أسود تتخلله خصلات خضراء.. جسد

ممشوق بارز.. عينان حمراوان غائرتان.. تاتو عين حورس بالذراع الأيمن..

ابتسمت وقلت بود:

- مش صقعانة؟!

قالت ببرود:

- تعبانة.

وكزني مايكل في كتفي وقال وهو يضحك:

- بتقول لك تعبانة يا روستو.
نظرت لنا وقالت بغضب تخاطبني:
- تعبانة منك، بقالك فترة مش بتسأل عني وسايني. أنت اتغيرت قوي.
- ماعلش يا مولة.
مال مايكل على أذني وهمس قائلاً:
- اطلع ريح في المكتب عندي شوية وخذ مولة معاك.
ثم ناولني المفتاح وغمز بعينه لمولة، وقال وهو يحرك رأسه:
- مولة روحي مع فارس يلا.
فابتسمت بفرح وقامت:
- يلا يا فارس.
ثم جذبتني من يدي بقوة..

* * *

كانت الإضاءة عالية بغرفة مكتب مايكل.. وقفنا أمام باب خشبي
بداخل الغرفة.. قبضت على مقبضي الباب الخشبي الجرار بكلتا يديها ثم
فتحته بقوة، وجذبتني من يدي وتقدمنا نحو الغرفة ببطء..
كانت الغرفة من الداخل خافتة الإضاءة بها سرير ضخم، وثلاجة قصيرة
بطول ستة أقدام تحتوي على مشروبات كحولية.. الجدران خشبية والغرفة
متوسطة الحجم.. جذبتني بقوة نحو السرير ثم دفعتني لأجلس على
حافته..

قمت محاولاً كبج جماح نفسي.. اقتربت مني ثم ضمتني بقوة.. حاولت
أن تقبلني مرات لكنني تمالكت نفسي حتى قالت غاضبة:
- إيه يا فارس ما لك؟
قلت بأسى:
- مش هينفع يا مولة.
- فارس، أنت نسيت إني مراتك؟!

أردفت ببلاهة:
- وأنا اتجوزتك إمتى؟!
قالت بغضب:
- إيه يا فارس؟! أنت بقيت غريب قووي، زي ما تكون حد تاني ما اعرفوش.
- اتجوزنا عرفني؟
ضحكت وأردفت:
- أمال رسمي؟!
شعرت بألم يعتصر معدتي.. حاولت ألا أظهر ما أشعر به.. الألم يزيد بقوة وكان نصل رمح غرس في معدتي.. دوار حاد وآلام في رقبتي.. تأوهت أخيراً ثم صرخت من الألم.. وضعت يدي على معدتي.
قالت بفرع:
- ما لك يا فارس؟
سقطت على ركبتي ثم ملت بجسدي وتقيأت.. دماء خالصة وقطع دماء متجمدة.. ظلت تصيح بفرع..
- فارس.. الحقوني.
ثم ركضت خارج الغرفة.. رأيتها بصورة مشوشة باهتة عندما كنت مسجياً على الأرضية...

* * *

فتحت عيني ببطء وتعب عندما كنت مستلقياً على سرير في غرفة بيضاء.. كان مايكل أمامي، أرى ظهره وبالقرب منه طبيب يرتدي معطفاً أبيض ويمسك أشعة بيده اليمنى ويرفعها للأعلى.. الإضاءة عالية والوقت غير معلوم لي.. مايكل يومئ برأسه ببلاهة يتصنع الفهم والطبيب يزفر بقوة..
قال في حيرة:
- مستر مايكل الأشعة سليمة! لكن دي أعراض قرحة معدة.
- يعني هو كويس ولا مش كويس؟!

أردف الطبيب بأسى:

- مش عارف.

- أمال مامتي اللي تعرف. هو حضرتك دكتور ولا سباك!؟

قال الطبيب بضيق:

- لو سمحت يا مستر...

قاطعه:

- لو سمحت أنت. أنا جاي هنا بفلوسي وعايز أفهم فارس ما له.

- أنا نفسي مش فاهم. التحاليل كويسة والأشعة كويسة وبتقول ما عندوش حاجة.

تأفف مايكل وأردف:

- يعني إيه؟

تنحى الطبيب وقال بصوت متقطع:

- يعني لو عنده حاجة هيبقى حاجة ما قابلتش الطب قبل كدا.

قاطعتهما:

- الدكتور عنده حق يا مايكل.

التفتا لي وقال مايكل بتعجب:

- إزاي!؟

- اللي سمعته، اللي عندي ما لهوش علاج.

قال الطبيب وهو يمسك عويناته برفق:

- أعراض اللي بيحصل لك إيه؟

- مش هتفيدك يا دكتور.

* * *

الإثنين 4 مارس..

4:30 مساءً..

أزحت ذراعي توًّا بعد أن نظرت في الساعة.. عدت أنظر أمامي من الأسفل نحو الأعلى بإعجاب مبتسماً.. أقف أمام الهرم الأكبر مبتعداً عنه

مترات.. ارتديت بنطالاً أسود وبلوفر كتان.. يقف بجواري عمر ينظر ببلاهة إلى الهرم أو كان بالأحرى غير مهتم.. أرتدي الجينز وبليزر كحلي.. الشمس بدأت تختفي بالأفق والجو يحمل برودة خفيفة.. شعاع الضوء يسقط على عيني لكنه لم ينل مني؛ لأنني ارتديت نظاراتي الشمسية.. دقائق من الصمت والشroud يتخللها صوت صافرات عمر..

قاطعته:

- أجدادنا دول كانوا عظماء قووي.

ثم تابعت وأنا أشير بيدي للهرم:

- شايف العبقرية والهندسة؟

قال ساخراً:

- عاجبني حسك الوطني!

ثم تابع بعد أن التفت لي:

- أنت ما قُلتلش ليه إنك بتعرف روسي؟

قلت ببلاهة:

- أنا!

- روسي وألماني وفرنساوي وإيطالي وإنجليزي وأسباني.

وأضاف مازحاً:

- اتعلمت كل دا إمتي؟

أردفت بتعجب:

- أنا؟!!

- يا ابني أنت ما سبتش حد من السياح ما اتكلمتش معاه لدرجة إن

المرشدين كانوا مستغربين منك جداً.

ابتسمت برفق وتابعت النظر للهرم..

* * *

الساعة 7 مساءً..

أجلس على مقهى شعبي بمنطقة الحسين.. أتأمل الناس في الطريق أمامي بين غاد وآت.. بشرود أنفحص الوجوه أمامي.. كنت خارج المقهى على كرسي خشبي رث وأمامي تراييزة صغيرة عليها كوب من الشاي الساخن.. قربت مبسم التزجيلة من شفتي وسحبت نفساً عميقاً ومعه زفرت سيلاً من الدخان..

تناولت الهاتف من جيب بنطالي وبحثت في دليل الهاتف حتى وجدت اسم النقيب تامر ضغط زر الاتصال..

أنى صوتها بحزم:

- مين؟!

- مدام فرح؟

قالت بحزم:

- مين حضرتك؟

- أنا فارس حسين.

قالت بضيق:

- عايز إيه؟

- لو سمحت بس طالب أقابلك بكرة في موضوع مهم بخصوص المرحوم.

- موضوع إيه؟!

- مش هينفع في الموبايل. هاعدي عليك بكرة.

ثم أغلقت الهاتف وابتسمت بثقة...

الساعة 2:34 صباحاً..

بغرفة مكنتي بشقتي أشعلت توا سيجارة الحشيش.. أمسكها بأصابع يدي اليمنى وأزفر دخانها بقوة.. أرحت رأسي على الكرسي ثم تفحصت الغرفة بنظري.. ثوان وبدأت مشاهد مشوشة تظهر بعقلي وأصوات ذبذبات حادة معها أطلقت ضحكة مكتومة ثم تابعت إلى أن ضحكت بصوت عالٍ..

مددت يدي وأخرجت الفلاشة من درج المكتب ثم دسستها بمدخل الـ USB وأشعلت الـ laptop مستنداً بكوعي الأيسر على المكتب منتظراً أن يستيقظ من ثباته.. ضغطت الفيديو بعجل.. بدأت الموسيقى للتو.. تتداخل الأصوات.. طنين في أذني.. ألم حاد في رأسي.. تظهر الكلمة gamecan.

المكان في موقع الحادث.. الإضاءة خافتة والسيارة انقلبت على جانب الطريق.. بدأت النار تشتعل بها.. اقترب ثلاثة أشخاص لم أتبين هويتهم لخفوت الإضاءة.. دنا واحد من باب السيارة الأمامي وتفحص الداخل ببصره ثم التفت لهما قائلاً..
- مش موجود.

فقال أحدهما بغضب وصوت أجش:

- يعني إيه؟! والحاجة الي أخذها منه؟

فحص السيارة من الداخل بكشاف ضوء صغير وعاد يتحدث:

- الملف جوا.

عاد صاحب الصوت الأجش يتحدث قائلاً:

- دوروا عليه. أكيد ما راحش بعيد.

قال الرجل الذي دنا من السيارة بخوف:

- النار خلاص هتوصل للتانك. اهربوا.

انطفأ الفيديو فعدت أتناول سيجارتي بشره، وظللت أضحك بقوة...

* * *

الثلاثاء 5 مارس..

الساعة 6:17 مساءً..

جلست على الترابيزة البلاستيكية في مركز اللغات.. مرّت نصف ساعة أنتظر فرح حتى تنهي المحاضرة.. أعبت في الهاتف بملل وأرتشف القهوة

السادة بضيق.. زادت حلقي مرارة وجعلتني مضطرباً.. أنظر للغرفة رقم ستة بين الحين والآخر.. أشعلت سيجارة وزفرت دخانها ممل.. السجائر أصبحت ما يطفئ مللي..

الكافتيريا خالية إلا مني وحدي.. بدوت متأنق الملبس.. ارتديت حلة رسمية سوداء وقميصاً أبيض مفتوح الأزرار العلوية.. رائحة عطري مميزة انتشرت بالمكان.. شغلت كاميرا الهاتف ونظرت لهيئتي شعرت بأن الصلح أكسبني وسامة أكثر من ذي قبل.. أنبتت فروة رأسي شعرات لم تتجاوز المليمترات جميعها بيضاء..

خرجت فرح من الغرفة أمامي.. ترتدي حجاباً صغيراً أظهر خصلات ذهبية ومعطفاً أسود حتى منتصف الركبة.. رأيتني فتقدمت ناحيتي بوجه خالي السمات.. تأففت بسخط ثم جلست أمامي..

قالت بضيق:

- خير؟

- تشربي إيه؟

ابتسمت ببرود وأردفت:

- شكراً.

- تامر ما كانش له حد قريب منه. صديق في الداخلية يعني؟

- ليه؟

- عايز أفهم.

قالت بضيق:

- تفهم إيه؟

- أفهم اللي بيحصل لي وإيه اللي قدر يوصل له عن إبراهيم.

ثم أضفت بأسى:

- ما تكرهينيش قووي كدا. أنا عندي نفس حالة نور وكلها شهور وأموت

ولازم أفهم يمكن أنقذ أرواح بريئة.

- أردفت بريية:
 - مش عارفة أصدقك.. لكن....
 ثم تنهدت وتابعت:
 - المقدم محمود عثمان. دا تقريباً كان صاحب تامر وصديق عمره.
 - معاك رقمه؟!
 أو مأت برأسها ثم أخرجت الهاتف:
 - اكتب ٠١.
 كتبت الرقم بعجل ثم أردفت:
 - يا ريت تعتبريني صديق ولو حصل أي حاجة كلميني.
 ثم قمت وأضفت:
 - شكراً يا مدام فرح.

* * *

الساعة 8:20 مساءً.

جلس عمر خارج المقهى البلدي على طاولة بلاستيكية فوق رصيف عرضه ثلاثة مترات.. المقهى يشغل الرصيف ويمنع عبور المشاة.. على الرصيف غطاء من المشمع يمنع الأمطار عن الكراسي.. الطاولات منتشرة على الرصيف كصف وخالية من الرواد إلا من طاولة عمر التي تبعد خطوات يساراً عن باب المقهى..
 أمامه نرجيلة طويلة يسحب منها أنفاساً.. ارتعد جسده مرات من البرد القارس والرياح العاصفة التي تحرك صف الأشجار بعنف أمام الرصيف.. كان يعبث في الهاتف غير مكترث بشيء حتى إنه لم يلحظ تقديمي منه..
 جلست على كرسي بالقرب منه بعد أن وضعت أغراضي.. نظر لي مبتسماً
 ثم عاد ينظر في الهاتف..
 قال بلا مبالاة:
 - خلصت؟
 - آها خلصت. أنت إيه اللي مقعدك برآ في الجو دا؟

- أردف بسخط:
- دوشة جواً. شوف عايز تشرب إيه.
- صحت فيه بغضب:
- سيب الزفت دا وركز معايا شوية.
- وضع الهاتفف على الطاولة وأردف:
- معاك أهو.
- أنت شوفت مني تصرفات غريبة قبل كدا؟
- شرد قليلاً وأردف:
- بصراحة آه، بس كنت باقول المخدرات اللي بتعمل كدا.
- إزاي؟!
- يعني كنت بتكلم ناس مش موجودة أحياناً. ساعات بعد ما نشرب كانت بتطلب معاك عياط وصويت.
- ثم شرد لوهلة وضحك فقلت مستفهماً:
- بتضحك ليه؟!
- فاكر حنان؟
- حركت رأسي يمنة ويسرة نافياً فأضاف ضاحكاً:
- حنان البت اللي أخذتها من الديسكو ولما دخلت معاك الأوضة فضلت تضرب فيها لحد ما كانت هتموت في إيدك. حظك إني كنت معاك لولا كدا كان زمانك قتلتها.
- أنا عملت كدا ليه؟!
- سحب نفساً أخيراً من النرجيلة وقال ببلاهة:
- مش عارف. حتى البنت رفضت تتكلم، وما شفتش وشها من ساعتها.
- مايكل عارفها؟!
- أوماً رأسه إيجاباً فتابعت:
- أنا عايز أوصل لها.

* * *

الأربعاء 7 مارس..

الساعة 11 صباحاً..

أطقتق بأصابعي فوق المكتب لأنهي حالة التجاهل.. جلس عاطف أمامي على كرسي مكتبه الجلدي يرتدي نظارات القراءة ويحملك في ملف يقرؤه بشرود وتفحص.. أراح النظارات على أنفه قليلاً بيده اليمنى ثم نظر لي نظرات ثاقبة فتوقفت وأشعلت سيجارة ومعها زفرت الدخان بقوة في الهواء.. طرق الباب برفق ثم دلفت ميرفت تحمل بيدها القهوة الخاصة بي.. اقتربت بخطوات أنثوية وتمايلت ثم مالت بجسدها بالقرب مني وهي تضع القهوة على المكتب.. شممت رائحة عطرها القوي.. وتأملت البنطال الضيق الجينز والبلوزة القטיפية.. سحبت نفساً عميقاً أشم رائحة عطرها ثم قلت بود:

- حلو قووي ال berfume دا يا ميرفت.

ابتسمت برفق:

- شكراً يا أستاذ فارس.

- لا بجد أنت متألقة النهار دا!

ثم نظرت لعاطف الذي كان يرمقني بغضب وتابعت:

- شكل أستاذ عاطف بيغير.

احمر وجهها خجلاً فأردف عاطف بحزم:

- اتفضلي يا ميرفت وبعدين دي شغلة عم عوض ما تجيبيش قهوة تاني

لحد.

نظرت له بغضب ثم غادرت ميرفت وقلت:

- فيه إيه يا عاطف؟ ما اعرفش إنك قفل قووي كدا.

- وأنا ما اعرفش إن عينك زايغة كدا!

ضحكت بقوة وأنا أرتشف فنجان القهوة الذي اهتز وسقط أغلبه على

الأرضية ثم أردفت:

- مصر كلها عارفة دا.
ثم أردف عاطف بعد أن وضعت فنجان القهوة على المكتب:
- طيب نتكلم في المفيد.
أومأت برأسي وتابع:
- مشيرة ممدوح عندها نفس حالة نور وفي مستشفى الهلال دلوقتي.
قمت من الكرسي مندهشًا:
- وساييني كل دا؟!!!
ثم أضفت وأنا أغادر:
- أنت بتهزر يا عاطف.

* * *

الساعة 12:30 مساءً..

تفحصت جسدها، كانت نائمة شاحبة الوجه فوق سرير معدني أبيض قصير.. بطانية رثة على جسدها.. تتنفس بصعوبة وتتأوه بين الحين والآخر..
خصلات بيضاء وسقط أغلب شعر رأسها.. وجه مليء بالتجاعيد.. وجه سيدة تخطت السبعين عامًا.. يد ضعيفة ترنحش بقوة وبها إبرة محلول.. ظللت أتفحصها عندما كنت واقفًا بالقرب من الحامل الذي يحمل المحلول..
أصوات صاخبة في العنبر الذي احتوى عشرين سريرا كفصين متوازيين يصنعان ممرا ضيقًا.. الأرضية كانت بيضاء لكن الأوساخ خبأت لونها..
الجدران سقط أغلب دهانها.. بعض القطط تتمشى في العنبر ويعلو مواؤها..
مرت خمس دقائق واقفًا حتى شعرت بمن يربت على كتفي برفق..
استدرت لأرى رجلًا أربعينيًا رث الهيئة.. له شارب خفيف وعينان تحملان بؤسًا وشقاء.. ممتلئ الجسد.. شعر غزا الشيب القليل منه.. أنف صغير.. يرتدي بنطالًا وقميصًا.. بدا يرتجف من البرد قليلًا.. نظرت له بشفقة قبل أن يسأل مستفهمًا..
- حضرتك تعرفها؟
- لأ.

فأضاف بتوسل:

- حضرتك شكلك مقتدر أو دكتور هنا. ممكن تساعدنا؟
- أنا فارس حسين صحفي وجاي أعمل تحقيق عنها وأساعدك.

ثم أضفت بود:

- أنت تقرب لها إيه؟

- أنا سميح جوزها.

قلت برفق:

- إيه اللي حصل!؟

- ما حدش بيبيديني يا باشا والله تعبت. بقالها 3 أيام مرمية في المستشفى
وما حدش سأل فيها خالص. وأنا والله ما حيلتي حاجة عشان أعالجها.
أومات برأسي في أسى وأردفت:

- هي كدا من إمتي؟

- من خمس شهور واحنا ناس على قد حالنا. كانت بتشوف خيالات
غريبة رُحنا لشيوخ اللي يقول لك لبس واللي يقول مس لحد ما بدأ شعرها
يقع وكبرت زي ما انت شايف.

- هي عندها كام سنة؟

- اتنين وأربعين سنة.

سمعت صوتها تتأوه فالتفت أنظر لها بثقب.. ابتسمت بخبث ثم ظلت
تنتفض بقوة في السرير حتى تقيأت دماً..

دنا منها سميح وهو يصيح بفرع إلى أن لفظت أنفاسها الأخيرة..
مسحت على رأسي بيأس وغادرت..

* * *

عبرت باب المستشفى تَوَّاء.. نزلت درجتين من السلم الرخامي ثم
استدرت ونظرت لأعلى لأرى لافتة المستشفى تحمل اسم مستشفى الهلال..
نظرات بين اليأس والعتاب وكأنني أحملها ذنب موت هذه المسكينة.. الفقر

معضلة لا حلَّ لها.. الفقر آثم.. حيوان فتاك ينهش في العقول والقلوب..
نحن درجات وهؤلاء البشر خارج التصنيف.. هؤلاء هم اليأس بعينه..
ظللت واقفًا أمام باب المستشفى لسويغات يرتطم بجسدي بعضهم عند
الخروج والدخول..

رنَّ هاتفي فالتقطه من جيبي:

- أيوة يا عاطف.

- عملت إيه؟

أردفت بيأس:

- ولا حاجة ما لحقتش أعمل أي حاجة.

- حصل إيه؟!

قلت بأسى:

- الست ماتت.

فأضاف ساخرًا:

- أنت هتعيط؟ هي كانت من بقية أهلك!

صحت فيه بغضب:

- اقفل يا عاطف.

أغلقت المكالمة ثم بحثت في دليل الهاتف وضغطت زر الاتصال..
انتظرت أسمع رنين الهاتف حتى أتى صوت حاسم أجش..

- أيوة مين؟!

- محمود بيه؟

قال بحزم:

- أنت مين؟

- فارس حسين.

فأردف متنهّدًا:

- آهاااا فارس.

ثم صاح بأحدهم وعاد يتحدث:

- عايز إيه؟!

- عايز أقابلك.

قال بخبث:

- تنور، أنا في مكتبي مستنيك.

ثم أغلق الهاتف.. دسسته في جيب بنطالي ونزلت باقي الدرجات مغادراً
المستشفى..

* * *

الساعة 2:45 مساء

أشحت بنظري بعيداً وهو يصيح بالمتهم الواقف أمامه.. كان شاباً ربيعاً
أسود.. حليق الرأس واللحية.. لديه ندبة كبيرة بالخد الأيسر.. يرتدي بنطال
بيجامة وجاكيت أسود قماش مقطوع منه الذراع الأيسر فظهر ذراعه بوشم
طولي مرسوم بغير احترافية.. ظل يصيح بطريقة فجأة تسبب لي الصداع..
ظلمت أنظر إلى اللافتة التي تحمل اسمه وتتوسط المكتب.. ثوان حتى دخل
أحد الأمناء وأخذ المتهم وخرج..

استدار لي وتقدم بثقة.. يتنهد بقوة من العصبية الزائدة.. وجهه زاد
حمرة.. رفيع وطويل.. متناسق الوجه.. لا شيء مميز به غير الوحمة البارزة
أسفل ذقنه.. يرتدي بنطالاً جينز به جراب السلاح وقميص سماوي سادة..
حاجبان عاقدان عابثان..

نظر لي بسخط ثم ربت على كتفي بقوة وقال وهو يتجه لكرسي
المكتب:

- عيال بنت كلب تحرق الدم.

وتابع بعد أن جلس على الكرسي:

- ربنا يتوب علينا بقى.

ثم أضاف بقسمات جامدة:

- فارس حسين، اممممم. صحفي هلاس وبتاع نسوان. صح؟!

قلت ساخرًا:
- هو أنتو ليه باحسكم اسطمبة واحدة؟
- إحنا مين؟
ثم تابع:
- تقصد الظباط. أنا برضه شايفكم اسطمبة واحدة لكن مش شايف كل الصحفيين زيك. أنت نوع وساخة...
قاطعته:
- أنا جاي تساعدني مش تقول رأيك فيّ.
قام وصاح في بغضب:
- عايزني أموت أنا كمان؟ أنا اتجاهي في الشغل مش زي تامر، مش باعمل شغل الوزارة ما كلفتنيش بيه.
قلت مستعطفًا:
- يا محمود بيه. أنا قُلت للمرحوم يسيب حوار إبراهيم هو اللي كملّ.
مش معقولة كل الناس شايفاني وحش!
ثم تابعت:
- لو حكاك عن العقار دا فحباب أقول لك إني عندي الشيء دا.
قال ببلاهة:
- إزاي؟!
- يعني هاموت قريب، بس مش فاهم أخذت العقار دا إمتى.
تنهد برفق ثم أضفت:
- في ست في مستشفى الهلال اسمها مشيرة ممدوح. اسأل عن حالتها عشان تتأكد.
ثم قمت مغادرًا..

* * *

الساعة 11 مساءً..

وضعت صغيرتي ريماس ال headphones واهتز جسدها بقوة.. تدندن لحنًا أجنبيًا.. جميلة منسدلة الشعر البني.. ترتدي بيجامة النوم وتجلس فوق سريرها القرفصاء.. إضاءة خافتة مصدرها الأباجورة الصغيرة فوق الكومود بجانب السرير..

ما زلت أقف أمام الباب أمسك مقبض الباب بيدي اليمنى وأستند بساعدي الأيسر على الحائط لكنها لم تلحظ وجودي.. ضغطت على مفتاح الإضاءة الذي كان بالقرب مني.. نظرت مبتسمة ثم أزاحت ال headphones عن رأسها..

قالت مبتسمة:

- بابا وحشتني.

تقدمت بلهفة ثم جلست على حافة السرير. ضممتها برفق وأردفت:

- وحشتيني يا قلب بابا. عاملة إيه في الدراسة؟!

- كان عندي امتحان النهار دا وجبت أعلى واحدة فال mates. ميس

هايدي خلت ال mates يصقفوا لي.

مسحت على شعرها برفق:

- ريمو أنت بقيت كبيرة صح؟

أومأت رأسها فتأبعت:

- يعني بابا لو سافر قريب وما رجعت ثاني هتبقى شاطرة كدا على

طول؟

قالت بتحفز:

- هتاخذني معاك يا بابا.

ضممتها بقوة وأردفت:

- بعد الشر عنك يا حبيبتني. أنا هاروح عند ربنا.

ثم انسابت دموعات على وجنتي برفق. فقالت بغضب:
- كذا غلط يا بابا. الي بيروح عند ربنا مش شر.
مسحت على شعرها بقوة:
- الحق بقى شر يا رهو..
وأغمضت عيني برفق.. استيقظت مسجياً على السرير وملك تعتلي
جسدي وتصفعني بقوة.. تصيح بهستيريا وتلطمني على وجهي.. لم أفهم ما
يحدث سوى عندما رأيت ريماس على الأرضية تنزف دماً من وجهها..
ملك صاحت في بغضب:
- كنت هتقتلها يا مجنون. أنت مريض نفسي.....
ثم رأيت صورة مشوشة وتابعت نومي..



مضى الزمان يقرب الأجل.. وشمس الأمل عني تغيب
ليت السنون تخطئ زللاً.. فيخطئ عني سيف المشيب

فارس حسين

كتابة الخواطر ضالة الضعفاء.. القنوط كفر بين ومحض أفكار عابثة،
وأيضاً الإيمان في عالم فوضوي تذكرة عبور لجنون حتمي.. الكلمات كالسهم
تخترق الآذان وتصل لهدفها المنشود إن قذفها القلب..
عدت وحيداً بلا رفقة.. الناس حولي وعقلي بالشروء سجين.. أفتش عن
ذاتي ولا أعني كيف السبيل.. مضت ثلاثة أيام بعد أن غادرت ملك الشقة..
أجلس ألوم عقلي على ما صنع.. في طريقي لفقدانه.. بل ضاع من قبل..
ريماس فقدت أربعة أسنان أمامية من جراء اللكمة التي لا أعلم كيف
سددها إليها.. أصبحت عبثاً على الجميع.. أشعر بنظرات الخوف بالعمل..
من عاطف.. من عمر.. من الجميع..
يقولون مريض فقد عقله كاد أن يقتل ابنته.. كم من قصص قيلت ولا
أعلم هل أصدقها أم لا! أنا لا أتذكر أو أتذكر أنني لم أفعل ثم أكذب نفسي..
ما أصعب هذا الشعور أن تصبح سجين كلمات تحركك!!
أنهيت بيت الشعر تواء عندما كنت جالساً على كرسي المكتب في شقتي..
تجاوزت الساعة الثانية عشرة صباحاً وبالقرب مني زجاجة خمر.. تناولتها
وتجرعت رشقات ثم سحبت أنفاساً من سيجارة الحشيش بعمق..
وعدت أردد ما كتبت من بيت شعري أحاول أن أجد كلمات في عقلي
لأكمل القصيدة..

قلت ضاحكًا:

- فيخطئ عني سيف المشيب.

ظهر العجوز أمامي، رث الهيئة بذات الحلة المعتادة.. أمام المكتب، نظر لي بخبث وأردف:

- عارف القطر لما ييفقد السيطرة يبقى صعب توقفه؟

ثم تابع:

- هو اللي بيحصل لك إيه؟ حاجة طبيعية بتكبر بس بسرعة شوية.

أردفت بيأس:

- مش خايف، لكن..

قاطعني:

- مش فاهم تصرفاتك.

- آها.

- تصرفات طبيعية من واحد الشر هو اللي بيحركه.

قلت ببلاهة:

- أحاول أقتل بنتي؟!!

- مش يمكن عشان شايفها مش بنتك.

صحت فيه بغضب:

- أنت بتقول إيه؟!!

- عارف أحلى عارض بيحصل لك إيه؟

صمت فتابع:

- أنا كل حاجة خايف تعملها بقيت بتعملها بدون إدراك. تقدر تقول

بترجع طفل تاني لا قادر يميز صح من غلط.

- الأطفال بريئة!

- ما كنتش عايز أقول إنك في طريقك للجنون.

ثم ابتسم واختفى من أمامي..

* * *

الإثنين 11 مارس..

الساعة 1 مساءً..

أشعر بالخوف والوهن.. أتأمل الغرفة بعين غائرة.. غرفة مكثبي بالجريدة.. أمسكت ملقاً لأحد التحقيقات المتداولة وظللت أقرأ به.. طُرق الباب برفق كان عم عوض.. وضع قهوتي على المكتب ثم غادر.. تناولت فنجان القهوة، وارتشفت منه القليل ثم وضعته.. أشعلت سيجارة وزفرت دخانها بقوة.. أرتدي حلة رسمية سوداء ورابطة عنق مثلها.. قمت من كرسي المكتب ثم تجولت بالغرفة.. ببطء وهدوء.. أنفاس متهدجة تحمل أسي ويأساً..

فتح عاطف الباب برفق ثم دلف بتردد.. نظرت له وابتسمت.. بدا متأنقاً بجسد يتحرك بصعوبة.. تقدمت من الكرسي أمام المكتب فأردف قبل أن أجلس..

- ما لك يا فارس؟ هو الكلام اللي بيتقال عنك دا حقيقي؟

جلست ثم قلت:

- ما اعرفش يا عاطف.

اقترب وجلس على الكرسي المقابل ثم تابع:

- أنت فعلاً كنت هتقتل بنتك؟

- مش فاكر يا عاطف!

قال بأسى:

- طب ما رحتش لدكتور نفساني.

- أنا عندي نفس حالة نور وتقريباً بدأت أفقد التحكم في نفسي.

قال ببلاهة:

- تفتكر دي عدوى عشان علاقتك بيها؟!

- الحالة دي مش مرض.

ابتسم برفق:
- دي حاجة مش طبيعية، فأكيد مرض بس أنت مش عارف العلاج...
ثم أضاف بتحفظ:
- أكيد فيه علاج يا فارس. حالة الشيخوخة دي غريبة جدًّا، في مجرد
شهور تكبر سنين طويلة!
قلت بيأس بعد أن أطفأت السيجارة:
- حتى لو فيه علاج، على ما يكتشفوه أكون...
- اللي عندك دا مرض....
قاطعته بود:
- ما تزعلش مني لو يوم زعلتك.
ابتسم ثم قال:
- لو تعبان من الشغل...
قاطعته:
- لا الشغل أحسن من الوحدة.
- أنا في مكيتي لو احتجت حاجة.
ثم قام واتجه للباب ببطء...

* * *

الساعة 4 مساءً..

الجو يحمل دفنًا مصطنعًا بفعل مكيف الهواء.. جلست على طاولة
المقهى قريب من الجريدة.. الباب زجاجي مغلق.. الطاولات متناثرة بنظام..
الجدران مرسومة بجرافيتي.. لافتات كلمات أغاني قديمة.. الأرضية بنية
تناسب طوب الديكور على الجدران.. المقهى ممتلئ والنادل يمر أمامي بين
الحين والآخر..

ناديت بأدب:

- لو سمحت

اقترب وقال مبتسماً:

- اتفضل يا أفندم.

- نسكافية بلاك..

- تحت أمر حضرتك.

ثم غادر وبعد دقائق نظرت للباب الزجاجي كان عمر يعبر برفق.. رأني وابتسم ثم تقدم بثقة وجلس أمامي..

قال بود:

- كنت جاي لك أطمئن عليك. لقيتك بتقول لي قاعد هنا.

- زهقان شوية.

- ملك مصممة ما ترجعش تاني.

- عندها حق.

ثم شردت لحظات وأضفت:

- مش خايف مني؟

- أخاف ليه؟!!

قلت بضيق:

- يعني واحد حاول يقتل بنته ممكن يعمل أي حاجة.

- أنا مش مصدق إنك تعمل كدا يا فارس.

ثم أضاف مبتسماً:

- أنت عايز لك سهرة مع ميكا.

- ياعم أنا ناقص جنان.

ثم ضحكنا بصوت عالٍ محاولاً تناسي ما يمر بي...
* * *

الساعة 8 مساءً..

الظلام يحيط بي إلا من أضواء خافتة على الجانب الآخر عند الشاطئ هناك.. كان القارب يهتز برفق ويعلو المماء.. قارب صغير جلست فيه برفقة

مايكل وعمر، وذلك الرجل الذي يرتدي جلباباً رثاً بآخر القارب يوجهه ويقوده بنا.. كنا ممنتصف النيل وتوقف القارب يتمايل برفق.. جلسنا على حافة القارب ممنتصفه نضحك ونهيم بذكريات الطفولة.. كل واحد منا يمسك زجاجة من النبيذ الأحمر وسيجارة باليد الأخرى..

شعرت بنشوة مع الريح الخفيفة التي لفحت وجهي.. جسدي علت حرارته بفعل الكحول ورأسي هام بعالم من الأحلام بفعل مخدر الحشيش.. عم الصمت إلا من بعض الضحكات والهمهمات بين الحين والآخر.. مايكل يندن لناً غربياً بصوته وما أنكره.. ذلك ما زاد ضحكات عمر الذي جلس بالقرب منه..

ضحكت بقوة حتى سعلت وابتلعت باقي زجاجة النبيذ دفعة واحدة.. شعرت بالخدر في جسدي وزادت النشوة بزيادة الريح العاصفة.. سويعات حتى بدأت أمطار خفيفة تسقط فوق رؤوسنا.. تنفست بعمق ثم قمت أفتح ذراعي بنشوة لحظات ثم توجهت نحو مؤخرة القارب.. أحمل بيدي زجاجة الخمر ووقفت بآخر القارب فاتحاً ذراعي كفيلم تيتانك.. ضحكت بقوة ثم رفعت يدي محاولاً إلقاء الزجاجة.. ترنح جسدي واختل توازنه عندما كنت ألقى زجاجة الخمر ثم سقطت معها هاء النيل.. أدرك العوم لكن خدر جسدي لم يسعفني.. وظل جسدي يغوص نحو الأسفل.

كان الممر صخرياً بعرض أربعة أمتار والطول لم أتبينه فقد عم الظلام بآخر الممر بعد عدة مترات.. الأرضية ترابية ووجهي كساه التراب وعلق بعضه بباقي ملابسي.. نظرت لسقف الممر الذي علا فوق رأسي بمقدار خمسة أمتار تقريباً.. الإضاءة باهتة مصدرها مشاعل معلقة على الجدار أمامي.. وقفت بصعوبة مومياء استيقظت لتبعث من جديد.. كأن عظامي مهشمة أسمع صوت طقطقة فقرات رقبتني..

حاولت نفث التراب عن ملابسي.. نظرت ببلاهة أرتدي جلباباً متسخاً به
رقع بالية.. جسدي ينتفض بقوة كأن روعي ستبلغ الحلقوم.. تأوهت من
الأم وصحت رنَّ الصوت ثانية.. صدى صوت قوي..

سويغات حتى ظهر من آخر الممر أمامي من ظلام.. رجل أسود البشرة..
شديد السواد كظلمة الليل.. مفتول العضلات.. ملامح قاسية وعينان تشعان
شرراً.. لا يرتدي شيئاً بنصفه العلوي..

تقدم نحوي ببطء بخطوات واثقة.. ارتعدت خوفاً واستدرت أهول نحو
الجهة الأخرى بعيداً عنه.. أركض مسرعاً حتى وجدته يقف أمامي وينظر لي
بغضب..

مدَّ يده بجسدي فنفذت وكأني شبح غير مادي وظل يسحب شيئاً من
صدري بقوة.. صحت من الألم وهو يخرج ذلك العجوز ويمسكه بقوة من
رقبته...

صاح العجوز ونظر لي برعب:

- خليه يسبيني يا فارس.

صمت فأردف الرجل الأسود:

- هذا هو الهرم. ليس له حظ منك لتتحيا أبد الأبدین، وتمكث ليوم

معلوم.

قلت برعب:

- سيبه.

فأردف بغضب:

- لكنك أردت ولا رجعة. ألا تريد الخلود؟!!

أضفت بصوت متقطع:

- مش عايز، سيبه. أنا عايز أعيش حياة طبيعية، وأموت زي كل البشر.

- لك ما شئت.

ثم دفعه بقوة بجسدي فعاد كما كان وسقطت أرضاً.. بدأت الرؤية

تصبح مشوشة إلى أن اختفت وساد الظلام..

فتحت عيني برفق ووهن..الرؤية مشوشة والإضاءة خافتة بالكاد أرى..
كنت مسجياً بمنتصف القارب ومايكل يجلس بالقرب من رأسي.. لم يدرك
أنني استيقظت لأنه كان يضع رأسه بين ركبتيه في يأس.. ملابسي مبتلة
وأرتعش من البرد القارس.. سعلت بقوة وجسدي انتفض.. نظر لي مايكل
بفرح ومسح على رأسي، ثم قال كلمات لم أدركها لضعف سمعي من الماء
الذي ملأ أذني.. أدركت تَوّاً أن عمر يجلس بالقرب من قدمي عندما عادت
الرؤية أوضح.. اقترب عمر منا والرجل صاحب القارب وظلوا جميعهم
ينظرون لي بفرح..

قال مايكل بصوت متقطع:

- حمد الله على السلامة يا صاحبي.

ثم أضاف وهو ينظر لصاحب القارب الذي ابتلت ملابسه:

- البركة في عم ووحيد لحقك في آخر لحظة.

أردف عمر متسماً:

- كنت هتموت وتسييني؟

قلت بصوت مرتعش:

- ما انا كذا كذا ميت.

فتابع وهو ينظر لصاحب القارب:

- طلعتنا برا يا عم ووحيد وشوف بطانية عندك نغطيه بيها.

* * *

الثلاثاء 12 مارس..

الساعة 3:18 مساءً..

جلست في الصالون بفيلا ملك.. أنتظر أن تأتي وأشرد أنفحص الجدران
بعيني هائماً.. نظرت أسفل قدمي إلى السجادة البنية بخجل ويأس.. أتخيل
ردة فعل ملك عندما سترايني.. لم أهتم لمبسي اليوم ونزلت في عجل بعد أن

استيقظت متأخراً.. جميع ذكرياتي تمر في ذاكرتي معها هنا واليوم الأول الذي جلست بهذا الصالون أتقدم لخطبتها..

رأيت سيادة اللواء أمين بيه يقف مبتعداً مترات.. يرتدي ملبساً رياضياً ويدخن السيجار.. ما زال وسيماً رغم التقدم في العمر وقسماته الجامدة.. شعره مصبوغ بعناية.. مظهر أربعيني لرجل تخطى الستين عاماً.. جسد رياضي وعينان ثاقبتان..

قال بحزم:

- خير يا فارس؟

ثم أضاف قبل أن أتحدث:

- عشان أريحك لو بتفكر ترجع ملك فانسى. أنا قبلت المرة اللي فاتت بسبب ضغطها، لكن المرة دي ما عنديش استعداد إن بنتي تموت لو عاشت مع واحد....

ثم تابع وهو يزفر دخانه بغرور:

- غير سوي.

ابتسمت وقلت:

- قول مجنون عادي. أنا جاي أكلمها كلمتين وماشي.

- أوك، يا ريت ما تطولش عليها عشان أعصابها تعبانة.

ثم غادر نحو باب الفيلا، وهو يجيب على هاتفه ويضحك بلا مبالاة.. نظرت أسفل قدمي بيأس، مضت دقائق حتى ألقت ورقة بعنف على الترابيزة أمامي.. نظرت فوجدتها ملك بعينين حمراوين من البكاء.. هالات سوداء شديدة.. قسماتها جامدة تشعرني برفضها لي..

قالت بغضب:

- أقرأ.

تناولت الورقة ثم وقفت وشرعت أقرأ. سألت متصنعا عدم الفهم:

- إيه دا؟!!

- مش عارف؟ أظن إنه واضح.

ثم أضافت:

- دا تحليل DNA لرحيم. الحمد لله ربنا خيب ظنك وطلع ابنك.

ثم تابعت:

- أنت مريض يا فارس، مش بمرض الجنون بس. عارف أنت مريض بإيه؟

نظرت لها بخجل فتابعت:

- أنت مريض بالساخة، ودا مرض ما لهوش علاج.

ثم انفجرت بالبكاء وهي تصيح في بهستيريا..

* * *

الساعة 4:20 مساءً..

مشيت برفق على رصيف الكورنيش بعد أن صفت سيارتي.. شعرت بنشوة مع الرياح التي تلمح وجهي.. أقاومها وأمضي عكس اتجاهها.. الرياح عاصفة محملة بأتربة كثيفة جعلتني أغلق عيني قليلاً.. أستمع لصوت حفيف الأشجار، وصوت الرياح الغاضبة.. أقاوم كأنني أتحدى الطبيعة.. ملابسني تتحرك بعنف.. الجاكت يبتعد طيراً عن جسدي من ارتطام الرياح به..

رنّ الهاتف فتناولته من جيب بنطالي برعونة:

- أيوة يا عاطف؟

- إيه الهوا الي عندك دا. أنت فين؟

قلت بصياح:

- بامشى برا شوية.

- طب ما جيتش الجريدة ليه النهار دا؟

- ماعلش صحيت متأخر.

- هاستناك بكرة.

أغلقت الهاتف ثم دسسته في جيب بنطالي واقتربت من الكورنيش أنظر لماء النيل بشرود. أخرجت سجايري ثم قمت بإشعال واحدة بعد عدة

محاولات مع قداحة أطفأتها الريح مرات.. سحبت نفساً عميقاً وزفرت
الدخان بقوة الذي بالكاد حملته الريح عندما خرج من فمي..
سمعت صوت صافرة عذبة فنظرت عن يميني لأجد العجوز يقف
يحملق في ماء النيل مثلما أفعل.. رث الهيئة طويل الشعر الأبيض واللحية
الكثة.. بدا أكبر سنًا ولكنه سعيد..

قال بود:

- شكراً يا فارس.

- على إيه؟!!

ابتسم وأردف:

- إنك ما خليت هوش يقتلني.

قلت بتحفز:

- هو مين دا؟!

- ما اعرفش. أنا اللي عايز أعرف مين دا، وإيه اللي أنت أردته.

مسحت على رأسي بيأس:

- أنا بيحصل لي كدا ليه؟!!

ثم صحت:

- اشمعنى أنا يحصل لي كدا؟!!

مر من أمامي عجوز يرتدي جلباباً، يقلب كفيه بشفقة ومتم:

- لا حول ولا قوة إلا بالله.

صحت فيه:

- أنا مش مجنون...

هرول أمامي وعدت أصيح بهستيرياً:

- ليه أنا؟!

* * *

عبثت باللافتة المكتوبة بالإنجليزية وتحمل اسمه "فوزي خليل".. كان
يعبث في الـ laptop غير عابئ بوجودي.. رفعت اللافتة وضربت بها المكتب
فأراح ظهره للخلف واعتدل على كرسي المكتب.. تنهد بحنق ونظر لي بعين
ثاقبة..

قال بملل:

- أستاذ فارس، حضرتك أنا قُلت إني مش هاقدر أكمل علاجك.

أردفت بتحد:

- أنا مش جاي أتعالج.

- جاي ليه؟

- أنت قُلت إني حاولت الاعتداء عليك.

أوما برأسه وأردف:

- كنت هتقتلني أكثر من مرة. أنت حالتك صعبة فعلاً وعندك حالة

انفصام واكتئاب وأمراض نفسية بالجملة..

- عشان كدا خفت.

ابتسم وقال بخبث:

- لأ.

- إيه اللي خوفك؟!

أشعل الـ pipe ثم أخذ نفساً عميقاً وأردف:

- لأني اضريت جدًا بوجودك.

- إزاي؟!

- بصراحة سمعتك سيئة وأنا كل المرضى بتوعى..

قاطعته:

- أنت بتهزر؟ وأنا جاي أخطب بنتك عشان تقول لي سمعتي؟

- أنا قُلت مش هاقدر أكمل علاجك. يا ريت ما تجيش المكتب تاني...

قلت بتحدّ:
- هتندم يا فوزي.
فأردف بفرع:
- أرجوك يا أستاذ فارس. مش بإيدي...
- فيه إيه؟!
قال بصوت متقطع:
- مش هاقدر أقول، بس اتأكد إن اللي اتقال لي إنك مافيش دكتور نفسي
هيقدر يستقبلك.
- جالك تهديد؟!
- يا ريت تكون فهمت....
أومأت برأسي في أسي ثم قمت واتجهت نحو باب الغرفة، صاح بود:
- يا ريت ما تاخدش الموضوع بشكل شخصي.
استدرت وابتسمت برفق....

* * *

الساعة 11 مساءً..

فإن عذبتني فبسوء فعلي..
وإن تغفر فأنت به جدير..
أفر إليك منك.. أفر إليك منك..
وأين إلا إليك يفر منك المستجير..
وقفت أستمع لتلك الكلمات في الحضرة، وأمامي رجال يرتدي أكثرهم
جلابيب بيضاء.. يتمايلون بعنف وتعلو كلمات الأغنية.. يمضي الوقت ولا
يتغير شيء إلا من زيادة الرواد.. كنت أمام ضريح مساحة واسعة أرضيتها
صخرية، والجدران مزينة بنقوش عمارة إسلامية.. الساحة دون سقف..
كبيرة بقدر ثلاثمائة متر تقريباً.. خلفي باب خشبي ضخّم قد حمل عبق

التاريخ والأزمان.. مفتوح قليلاً دخل البعض منه وجلسوا على حصيرة من
القش تبعد بضعة مترات عن يميني..
أفر إليك منك.. أفر إليك منك..
وأين إلا إليك يفر منك المستجير..

تنهدت بعمق عندما سمعت هذه الكلمات ثانية.. شعرت بالسلام
النفسي الذي غاب عني منذ أمد.. أغمضت عيني والكلمات ترن في أذني..
سويجات حتى هطلت أمطار خفيفة بللت كل شيء ودقائق حتى اشتدت..
ابتلت لحيتي وملابسي وتنفست بعمق.. رفعت رأسي للسماء وقطرات المطر
ترتطم بوجهي..

الصوت علا وزادت حركتهم.. تمايلوا بعنف وصوفية.. نظرت بثقب رأيت
عمر أخيراً يغادرهم ويتجه نحوي، ثم ابتسم لي برفق وأشار بيده تجاه
حصيرة، فتوجهت وجلست عليها ثم تبعني..
بعد أن جلس عمر تنهد بقوة بالكاد يلتقط أنفاسه، فنظرت له بثقب
وقلت:

- أنت متدين ولا منحرف ولا جنس ملتك إيه؟

ابتسم برفق:

- مش بارتاح غير هنا.

ثم تابع:

- ما شاركتش ليه؟!

- ما ليش في الجو بتاعكم دا.

ثم أضفت:

- جيت من عند فوزي.

- إيه وداك هناك؟!

أردفت بضيق:

- عشان أفهم.

قال بتحفز:

- وفهمت؟!

- بيقول جاله تهديدات إن ما يتابعش حالتني وإن مافيش دكتور هيرضى
يستقبلني.

قال ببلاهة:

- تهديدات!

- مش فاهم حاجة يا عمر.

شرد قليلاً:

- معنى كدا إن فيه حد بيراقبك وعارف إنك تعرف حاجات مهمة مش
عايزك تتكلم فيها مع حد، لكن....

شردت ولم أستمع لباقي كلماته، وظللت أتفحص الساحة بنظري...

* * *

السيجارة الثالثة تشتعل بين أنامل يدي اليسرى.. تذاب شوقاً بين فمي..
تئن أسناني وأجز عليها.. الألام المعوية والتقلصات الليلة تداعب السكون في
عقلي وكان الألم الجسدي أصبح رقيقاً وإن جاز فقد أصبح قريناً.. يدي
اليمنى ترتعش احتراماً مع آخر رشفة من زجاجة النبيذ التي أنهيتها ثم
وضعتها على الطاولة الزجاجية أمامي..

الساعة تجاوزت الثالثة ليلاً والنوم تجاوزني كعادة مملة.. أسهر لقرب
الفجر وليتني أفعل شيئاً سوى تناول ما ينسيني ما أمر به.. أصبح الصالون
ملادي ومجلسي في بيت أوهن من بيت العنكبوت، أحيا به بعد أن ذهبت
عني ملك..

الشك لم يكف عن العبث في عقلي.. من كل شيء وعلى كل لقطة تمرّ في
ذاكرتي..

شريط ذكريات معادة ويسف دائماً.

تناولت الفلاشة ثم دستتها بمدخل الـ USB ثم انتظرت الموسيقى لتشعل
رأسي خوفاً.. ثوان ويعمل الفيديو بعد أن ضغطت زر التشغيل..

بدأ العرض Gamecan

المكان: عيادة فوزي..

الزمان: بالأحرى ليلاً..

اعتليت جسده عندما كان ممدداً قسراً فوق الشيزلونج.. نظر لي بفزع بعد أن مزقت الذراع الأيمن لمعطفه الطبي وأحطت به رقبتة.. جحظت عيناه وهو بالكاد يلتقط أنفاسه بفم مفتوح يتوسل لذرات الأكسجين أن تمر منه.. يتفوه بحرف واحد ويردده بصعوبة (ف).. أراد أن ينطق اسمي لعلي أرحمه من هذا القتل غير الرحيم..

توقفت فتنفس بعمق ثم قال بصوت متقطع:

- أرجوك.

أردفت بغضب:

- شايل التسجيلات بتاعة عمر دي عندك ليه؟!

ثم تابعت:

- كنت ناوي تهدده بيها؟ دي فيها كلام يسجنه!

وأضفت بعد أن لكمته:

- أنت مريض.

قال بخوف:

- أنا..

قاطعته:

- أنت ما عندكش ضمير مهني. أنا هاحبسك..

قال بتوسل:

- اديني فرصة أسمعها لك.

- تسمعني إيه؟!

أردف وهو يتنهد:

- يا أستاذ فارس دي مجرد مزىكا.

وأضاف بود:
- تعالی شوف بنفسك...
تركته يغادر المكتب ثم أحضر المسجل والـ CD وضغط زر تشغيل أمامي
لتظهر موسيقا...
نظرت له ببلاهة برأس كاد ينفجر من الصداع....

أغلق الفيديو دون فعل شيء مني.. تفحصت الصالة بإضاءة ليلية خافتة
مصدرها مصابيح حمراء صغيرة بطول الجدار عن يساري.. شردت أنتظره أن
يأتي كما يفعل دائماً.. أصبحنا صديقين واعتدت على وجوده إلا أنه يذكرني
بسوء نفسي ولكنه مرآة تريني ما لا أرى.. العجوز لم يأت حتى بعدما
طرقت على الطاولة الزجاجية بقوة..

صحت بغضب:

- أنت فين؟!!

وأضفت بتوسل:

- أنا أنقذتك. أنت سايبيني ليه؟. أنا عرفت إني خلاص هاتجنن ومصدق.

ثم بكيت بتضرع:

- مش أنا وأنت واحد. هتسيبيني لحد ما أتجنن كدا ومش هتساعدني؟
تمددت على الأريكة بخوف وبكيت بشلال دموع يسقط.. يبيلل قماش
الأريكة.. يبيلل وجهي..

روحي تطفأ ويغشاها الجزع...

* * *

الأربعاء 15 مارس..

ثقة وجمود.. عينان ثابتتان لا يرتد طرفهما.. خطوات ليث أو كما قيل
واقق الخطى.. تناسيت ما حدث البارحة وكأنني شخص آخر، بل الاستسلام

جعل مني شخصاً يجيد إخفاء كل شيء.. ارتديت أفضل حلة رسمية لدي دون رابطة عنق.. أخيراً حلقت لحييتي لأبدو أصغر سنًا وإن كان بأشهر فقط.. عطري يملؤ الأفق بل أشد من رائحة الندى والمطر وعوادم السيارات.. أرتدي نظاراتي الشمسية حتى أثناء سيرتي في الممر الذي يقود لمكتب عاطف..

الساعة العاشرة والرابع صباحًا والوقت يمضي بتأنٍ كأنه وقف ليراقب الثقة المفترطة.. نظرت في ساعتني حتى الآن خمس مرات ولا أعلم لماذا.. أمضي في الممر بخطوات واسعة سريعة بتحفض.. اليوم وكأنني بعثت من جديد، وكأن كل ما مررت به كابوس رحل عني..

اقتربت من الردهة وعبرت نحو الداخل.. رأيت ظهر ميرفت تستند على المكتب وتعبث ببعض الملفات.. لم تفتن لوجودي فوقفت مبتعدًا خطوات أتفحصها بعين ثاقبة..

ترتدي بنطالاً ضيقًا.. أضيق من أن يلبس بطريقة طبيعية.. وجاكيت فوق الخصر.. مالت بجسدها على المكتب وتمايل جسدها دون إرادة منها.. أعلم ذلك، فهي بداخلها راقصة محترفة ولم تملك الفرصة لإظهار مواهبها.. تقدمت بحذر منها حتى لا تسمع ديبب نعلي ثم اقتربت من أذنها وهمست برفق..

- احلويت قووي يا ميرفت.

انتفضت ثم صرخت صرخة مكتومة وأردفت بخوف:

- أستاذ فارس!!

- أستاذ فارس عايز يرجع المية....

قاطعتني بغیظ:

- كان زمان. مش ميرفت اللي يتقال لها لأ.....

قاطعتها:

- شكل عاطف بيأدي واجبه كويس.

ثم أضفت ساخراً:
- على فكرة الحباية مش بتفارق جيبه.
- أحسن ما ينام حاضن قزازة خمرة...
قلت بغیظ:
- الشمال عمره ما یحذف یمین أبداً.
صفعتني بقوة حتى سقطت نظاراتي الشمسية على الأرضية وأردفت:
- اخرس.
مسحت براحة يدي اليمنى على خدي ثم تركتها وتوجهت نحو باب
المكتب..
صفعت الباب تواء خلفي بقوة معها انتفض عاطف على كرسي المكتب
الوثير ونظر لي بخوف، فتقدمت منه وأنا أصيح بغضب عات:
- البت دي تسيب الجريدة النهار دا.
قال ببلاهة:
- مين؟
- ميرفت.
فأردف بخوف:
- فيه إيه يا فارس؟
- اللي سمعته.
قال ببرود:
- آسف.
- لأ، هتمشي. عايزها يبقى في البيت عندك مش هنا، وإلا هاشهرك على
النت.
ثم تابعت:
- لو على فيديو نور فكل الناس عرفت إني مجنون يعني....

- ثم تنهدت فقال بود:
- خلاص هامشيها. ممكن تهذا بقى وتقعده.
 - جلست ثم تابع برفق:
 - هاجيب لك لمون يهدي أعصابك.
 - مش عايز زفت.
 - ابتسم وأردف:
 - طيب هديت؟
 - أنت مين بعت لك الفيديو بتاعي؟
 - طرد جا لي على المكتب.
 - ماشي يا عاطف.

* * *

الساعة 7:34 مساءً..

ظللت مستنداً على تلك الشجرة أمام مركز اللغات.. الإضاءة عالية والسيارات تمضي مسرعة أمامي.. صففت سيارتي بجانب الرصيف تبتعد بضعة خطوات عني.. الجو يحمل برودة شتوية اعترت جسدي وجعلتني أرتعش قليلاً.. أشعلت سيجارة برفق لعلها تزيد الدفء.. ظللت أنظر لباب المركز حتى رأيتها تنزل درجات سلّم المركز ببطء..

اقتربت منها ثم قلت بود:

- مدام فرح، إزيك؟

- أهلاً!

فأردفت بخجل:

- الحقيقة مش عارف أقول لك إيه. محمود بيه رفض يساعدني فلو

حضرتك..

قاطعتني:

- للأسف علاقتي بيه سطحية، آسفة.

ثم تركتني ومضت أمامي خطوات فمضيت خلفها وهمست:

- ولا عشان طلبك للجواز؟

استدارت وقالت بغضب:

- هو قال لك؟!!

- اعتبريه قال لي.

فقالت بضيق:

- أنت عايز إيه؟ وبتدخل في حياتي ليه؟!!

- أنا والمرحوم كنا قريبين قووي من بعض.

نظرت لي ببلاهة فتابعت:

- يعني حكى لي أول مرة عرفتو بعض فيها عن طريق أخته.

ثم أضفت بثقة:

- كان دايماً يقول لك يا فرحتي، وكنتو بتتخانقوا بسبب شغله طول

الوقت.

- أنت عرفت الكلام دا ازاي؟!!

- الله يرحمه وصاني عليك قبل ما يموت، وكان بيدور ورا إبراهيم لأن

كان فيه أهل طفل غلابة مبلغين إنه مفقود وكان متعاطف معاهم.

نظرت لي بثقب:

- شكراً إنك بتعمل بالوصية لكن أنا...

قاطعتها:

- لازم تبقي قريبة مني وإلا وارد يحصل لك حاجة؛ لأن الي عملوا فيه

كدا أكيد فاكرين إنك معاك معلومات مهمة.

أومأت برأسها فقلت برفق:

- تحبي أوصلك؟

- شكراً.

- طب خلي بالك على نفسك.
استدارت ومضت في طريقها ثم تابعتها بنظري بخبث...

* * *

الساعة 11:45 مساءً.

أغلقت الباب خلفي برفق ثم ابتسمت للبودي جارد الواقف أمام الباب
كتمثال.. مفتول العضلات تجاوز طوله المائة وتسعين سنتيمتراً. عيناه
ثاقبتان بوجه خالي السمات، إلا أنه ابتسم لي بود وأردف:

- مستر مايكل مستني حضرتك في الصالة تحت.

أومأت برأسي بود فتابع:

- يا ريت توصيه علينا يا أستاذ فارس.

- ما تقلقش يا....

- عبيد.

ربت على كتفه وأردفت:

- ماشي يا عبيد.

ثم دسست يدي في جيب بنطالي وأخرجت ورقة فئة مائة جنية وضعتها
في جيبه فقال بفرح:

- شكراً ل حضرتك يا أستاذ فارس.

قلت بحزم:

- لما مولة تخرج خليها تحصلني، أنا هاقعد في الصالة مع مايكل.

أوماً برأسه ثم عقد ذراعيه أمام صدره..

مضيت نحو السلم الذي يبتعد عني بضعة خطوات وتقدمت بثقة..
نزلت السلم وجسدي تمايل نشوة من تأثير الموسيقى الصاخبة، والجرعة التي
جددت نشاطي الذكوري الذي تناسيته.. مولة فعلت بي ما لم ألقه ونسيت
أمره.. غزال شارد استقر بين أحضان جفت ينابيعها، ثم أغلقت القفص
عليه.. لذة ما زالت تسري بجسدي.. موج عاتٍ ثم هدأ أمام شاطئي..

تضاريس الخرائط الجغرافية التي أنهيت دراستها توًا.. ما زالت رائحة عطرها في أنفي تجعلني أتشممها في كل شيء.. المشهد أعيد في ذاكرتي فابتسمت شبقًا..

عند آخر درجة من السلم تفحصت الصالة بعيني.. إضاءة خافتة تطفأ وتضاء.. تتبدل الأضواء بألوان حادة تسبب ألمًا بعيني.. تعلو الإضاءة قليلًا.. حالة نشوة وسُّكر وتمايل أجساد.. موسيقا صاخبة وأجساد متلامسة على مسرح الرقص.. على الطاولات.. أمام البار..

رأيت مايكل يجلس على طاولته المعتادة ممنتصف الديسكو.. تقدّمت، ارتطم بالأجساد رويدًا رويدًا.. كأنني أصارع لأصل لطاولة مايكل.. طريق محفوف باللذة التي معها تمايل جسدي بعنف..

جلست على طاولة مايكل الخالية إلا منه.. ابتسم لي مع فتح زجاجة البيرة التي ثارت وانفجرت كبركان كأنها هامت مثل رواد الديسكو.. صب الكأس أمامي وهو يقول بصياح:

- إيه؟ كله تمام؟

ابتسمت ثم أردفت:

- حبيبي يا ميكا.

ضحك بقوة وأردف:

- هو دا روستو..

ثم أضاف:

- فين مولة؟

- ثواني وجاية.

صمت أتفحص الصالة أمامي ثم أردفت:

- هو أنا اتجوزتها عرفني؟

- شوف يا روستو، أنت أحلى حاجة فيك إنك مش بتعمل حاجة حرام

أبدًا. للأسف آها اتجوزتها.

ثم أضاف بأسى مصطنع:

- وأنا قطعت الورقتين.....

ثم انفجر بالضحك وتبعته، فتابع بخبث:

- أيوة كدا، اضحك بقى. يلعن أبو اللي يزعلك.

رفعت الكأس وتناولته دفعة واحدة....

مضت دقائق نتناول البيرة ونتراقص طرباً يتخللها ضحكات هستيرية..
زجاجات تفتح وموسيقا تعلو.. أضواء تسبب اتساع الحدقة.. صداع لذيذ
وجسد يرتعش من النشوة..

اقترب بودي جارد من مايكل ثم مال وهمس في أذنه فتبدلت قسماته
وكأنه تلقى صفعة قوية وهب واقفاً من الكرسي.. انتقلت لي العدوى
فوقفت وسألت بخوف:

- فيه إيه يا مايكل؟

- العيال اتمسكوا.

قلت ببلاهة:

- عيال مين؟!

- الرجالة بتاعتي اتمسكت بالبضاعة.

- مخدرات؟!

قال بضيق:

- هيروين.

ثم تابع بغضب:

- دي بضاعة بملايين.

بعد سويغات اقترب البودي جارد وهمس ثانية في أذنه فتنهد بعمق
وأردف:

- هربوا. بس البوليس ممشط المنطقة بأوصاف العيال والعربيات.

قلت بثقة:

- خليهم يبعثوا اللوكيشن.

- ليه؟! -

فتحركت بسرعة مغادراً وأردفت:

- ابعث لي اللوكيشن بتاعهم.

أذكر كلماته لي وأنا أملأ السيارة بهذه البضاعة دون خوف.. ما زلت أرى قسماته البلهاء أمام عيني وهو يقول "أنت كدا هتتمسك" لكن لم أبه لما قيل.. تحديث رجال مايكل أن أعبر بهذه الحمولة بأمان.. الساعة الآن تجاوزت الثانية صباحاً. استنفار أمني بكل كمائن القاهرة وتم الإبلاغ..

زفرت دخاني بقوة بالهواء وسيارتي تقف خلف سيارتين.. الكمين أمامي ويقف رائد شرطة يتفحص السيارات ورخص القيادة.. بعض السيارات تفتش بعناية.. الكمين ممتلئ بقوة من الداخلية بعض الأمراء وذلك الرائد..

أشار لعسكري فأزاح الحاجز الحديدي لتعبر منه السيارة الأولى، ثم بدأ تفتيش السيارة الأخرى مع إغلاق الحاجز ثانية..

ظلمت أنفوس الدخان بحنق متمنياً أن تمر لحظات الملل ثم فتحت الزجاج على يساري لأشم برودة خفيفة مع ربح هامس، ها قد عبرت السيارة أغلق الحاجز بعد مرورها ثانية..

قدت ببطء وملل حتى أوقفت السيارة أمامه. فقال بأدب:

- رخصك لو سمحت وافتح الشنطة.

ناولته الرخص فتابع:

- تمام أفتح الشنطة.

- طيب ممكن أنزل عشان مش بتتفتح أوتوماتيك..

أوماً رأسه وابتعد عن الباب يفسح لي الطريق.. نزلت وتبعني إلى أن وصلنا لمؤخرة السيارة ثم دسست المفتاح ورفعت الغطاء..

نظر لي بثقب فأومات برأسي ثم ناولني الرخصة دون أن ينبس بنبت شفة. ركبت السيارة وقدتها بثقة متجهاً إلى مايكل..

* * *

الخميس 16 مارس..

جلست على كرسي مكتبي في الجريدة.. أقطع فقرات رقبتى بعنف بجفن مثلث يجاهد لكي يبقى يقظاً.. لم أنم البارحة، فكنت برفقة مايكل إلى ما قبل الآن بساعة واحدة.. كان يوماً عصيباً ليس علي؛ بل عليه ولا يزال لا يصدق أنني تمكنت من إحضار الهيروين له دون عناء..

وقبل أن آتي هنا مررت على مقهى وتناولت فنجاناً من القهوة حتى يساعدني على البقاء يقظاً ومن ثم المرور على الجريدة لإضاعة بعض الوقت..

أحاول البقاء يقظاً وأقوم من الكرسي وأجلس مرات حتى لا يأخذني النوم.. أشعلت سيجارة بعد أن جلست على الكرسي وتناولتها بشراهة، تفحصت الغرفة بعيني في شرود بأمر الضابط الذي لم يفتش السيارة رغم أن البضاعة كانت أمامه.. إنها إحدى المرات القليلة التي ينصفي بها الحظ ويشد عضدي..

طُرق الباب برفق ثم دلفت ميرفت تطأطئ رأسها بخجل وترتدي ملابس محتشمة على غير عاداتها.. جاكيت فوق الركبة.. مسحة قليلة من مساحيق التجميل التي أظهرت بعض القبول وليس حسناً بارعاً.. أغلقت الباب برفق ثم تقدّمت ولم أتحدث.. فقط تابعتها بنظري إلى أن جلست على الكرسي أمامي وما زالت تطأطئ رأسها..

سحبت نفساً من السيجارة وزفرت الدخان بقوة تجاهها ثم أردفت:

- جاية ليه؟!

قالت بود:

- أنت فعلاً مصورني مع عاطف؟

ابتسمت بخبث وأردفت:

- للأسف.

- ليه يا فارس؟!

- دا موضوع شخصي بيني وبين عاطف.
فقال بعد أن انسابت دمعات على وجنتيها:
- آسفة على اللي حصل امبارح. خلاص أن هاسيب الجريدة بس أرجوك
بلاش تفضحني.
أطرقت رأسي ثم أردفت:
- غيرت رأيي لكن...
ثم سحبت نفس وتابعت:
- ولأنك يبقى لي لوحدي. مافيش كلمة تحصل في الجريدة ولا مع
عاطف ما اعرفهاش.
أومأت رأسها إيجاباً ثم أردفت:
- ممكن سؤال؟
- اتفضلي.
- ليه؟!
أطفأت السيجارة وقلت بثقة:
- لأن لازم كل كلمة بتحصل في الجريدة أبقى عارف بيها، وأنا مش دائماً
متواجد.
ثم أضفت مبتسماً:
- تقدري تعتبريه فضول.
- موافقة. أنا تحت أمرك في أي حاجة.
نظرت لها بتفحص ثم أردفت:
- أي حاجة؟!
أومأت رأسها فتابعت:
- ماشي اتفضلي على مكتبك. لما أعوزك هاكلملك.
قامت ثم تابعتها بنظري بخبث، وهي تغادر الغرفة..

* * *

رفعت الهاتف على أذني عندما كنت أمام باب الجريدة المفتوح على مصراعيه وانتظرت إلى أن أتي صوته..

- ألو.

- أيوة يا رشاد، عايز أقابلك.

- فيه حاجة؟

قلت بود:

- ما تقلقش، أنا عند اتفاقنا بس عايز أسألك على كام حاجة.

- طيب تعال على النادي....

- ماشي.

أغلقت الهاتف ودسسته في جيب بنطالي ثم تقدمت متجهاً إلى سيارتي

بخطوات مسرعة..

* * *

مضت عشر دقائق.. نظرت تَوًّا في ساعتَي التي تجاوزت الثانية عشرة وربع مساءً.. أجلس على طاولة بلاستيكية فوق عشب أخضر كسا الأرض أمامي.. حولي طاولات أخرى متناثرة بعشبية في الحديقة، جلس عليها بعض العائلات.. الطقس مشمس اليوم والهواء يحمل دفئاً.. أمامي فنجان قهوة تناولت نصفه حتى الآن، وأغراضي التي ألتقط منها الهاتف بين الحين والآخر ثم أضعه ثانية بينهم..

رأيت رشاد بيتسم بود على بعد مترات.. يرتدي ملابس رياضية، بنطالاً وجاكيت.. بدا وسيماً كعادته لا يأبه بشيء وتقدّم بيتسم لكل من يراهم بود.. وقف مرات يلتقط بعضهم معه الصور التذكارية كنجم من نجوم المجتمع.. غير المصافحة باليد والقبلات ونظرات النساء التي أعرفها.. نظرات لفارس أحلام تمنين أن ينلنه ولكن....

جلس على الكرسي أمامي وأردف بود:

- نعيماً. أول مرة أشوفك من غير دقن.

- مش جاي أضيع وقت..
فتبدلت قسماته لجدية وأردف:
- اتفضل.

دستت يدي في جيب بنطالي، ثم وضعت صورة لإبراهيم قصتها من
صفحة الحوادث. نظر لها بثقب وقال:

- مش فاهم!

- تعرفه؟

تناول الصورة وظل يتفحصها ثم قال بلامبالاة:

- جابر عبد الرحمن!

- جابر مين؟!

قال بثقة:

- دا جابر عبد الرحمن. قعدت معاه مرة قبل كدا بس ما استريحتهوش
- ليه؟!

- ردود أفعاله غريبة وبيأخذ على الناس بسرعة. شخصية مجنونة كدا.
ثم تابع:

- كان صديق مقرب لنور. كان بيقول إنه رجل أعمال كبير ومعجب بيها
وعايز يعمل لها فيلم.

قلت بتحفز:

- وبعدين؟

- بقى قريب منها وحاول يقرب مني وكان بيسهر معاها هي وصحابها.
أنت ما قعدتتش معاه؟

قلت بضيق:

- أنا مش سألتك قبل كدا لو كانت تعرف حد برا الوسط؟!

- بصراحة كنت قلقان منك. ما انت عارف يا فارس...

قاطعته:

- دي معلوماتك عنه؟
- آها وشفت خبر عن وفاة واحد شبهه. اسمه إبراهيم تقريباً وعالم....
- ثم أضاف وهو يقوم من الكرسي:
- دا كل اللي أعرفه عنه.
- قمت وأردفت:
- شكراً يا رشاد.
- ثم تحركت مغادراً فنادى بعد أن مشيت خطوات. استدرت له فأضاف:
- يا ريت الموضوع بتاعي ما حدش يعرف حاجة عنه.
- أومات برأسي مبتسماً وغادرت...

* * *

أقود سيارتي برعونة متذكراً ما قاله رشاد من قبل.. سيل من السيارات أمامي في طريق مكون من ثلاث حارات.. السيارات واقفة لا تسير ولا تتحرك قيد أهلة.. parking كبير على شكل طريق طولي.. وكأن الشمس اليوم قررت أن تظل علينا بصيف حاد من أيام أغسطس الحارة.. فتح زجاج السيارة في هذا الوقت انتحار مع تلك العوادم والأصوات الصاخبة لصياح بعضهم وغضب آلات التنبيه، لكن الجلوس بلا سيجارة في هذا الملل يسبب تجلط الدماء.. شغلت المسجل على أغنية كثيفة تصبب علو هرمون الملل.. أطفأته وضغطت على آلة التنبيه بقوة مثلما كان الجميع..

فتحت الزجاج مستسلماً وأغلقت المكيف ثم أشعلت سيجارة وزفرت دخانها يملل يقاطعه ملل.. بعض المتسولين وبائعي المناديل.. تناولت الهاتف ونظرت في الساعة التي تجاوزت الواحدة مساءً..

ضغطت زر الاتصال فأجاب بعجل:

- إيه؟! -

- محمود بيه.

قال بغضب:

- مين؟

- اخص عليك، ما سجلتش رقمي؟ أنا فارس..

- خير يا فارس؟

أردفت أحاول استفزاز حسه الشرطي:

- طب حيث إنك عايز نبقي صحاب وشلت الألقاب. بص يا محمود

أنا...

قاطعني بغضب:

- أنا مش فاضي لك.

- تعرف إن مراقي بنت أحد قيادات الداخلية زي مراتك كدا؟

صاح في بغضب:

- وأنت ما لك ومال مراقي؟

- اهدا بس. المدام ست فاضلة مش دا موضوعنا.

- انجز عايز إيه؟!

- بص لو فريد بيه عرف إنك كنت عايز تتجوز على بنته هيعمل فيك

إيه؟

قال بلامبالاة:

- قل له، أكيد هيعرف إنك كداب. وهو حد ياخذ معلومة من...؟!

قاطعته:

- بص عشان ما اطولش عليك، تيجي معايا سكة في اللي عايزه وإلا.....

- عايز إيه؟!

- كل اللي تامر قالهولك.

أردف بتأفف:

- عدي عليّ في المكتب.

- أغلقت الهاتف ثم ضغطت زر الاتصال برقم آخر وانتظرت فأجاب:
- شكراً يا عم عبد الله.
- عملت إليه مع محمود بيه؟!
- قلت مبتسماً:
- المعلومات اللي اديتها لي جابت نتائج كويسة.
- ما تنساناش في الحلاوة بقى.

* * *

الساعة 1:48 مساءً

نظرت في ساعتى عندما كنت جالساً على كرسي المكتب بينما خرج محمود منذ دقائق لمكتب المأمور وترك الباب نصف مفتوح.. ظللت أزفر وأتهدأ أقطع هذا الملل الذي أصابني اليوم، ثم بعد سويغات دخل عامل البوفيه ووضع فنجان القهوة على الترابيزة الصغيرة أمام المكتب وغادر. بعد عدة رشفات دخل محمود الغرفة يتأفف وصفح الباب خلفه. بدا في حالة مزاجية سيئة اعتدت أن أراه بها.. مقطباً وعاقد الحاجبين دائماً.. نظر لي بغير اكتراث ثم تقدم وجلس على كرسي مكتبه بعد أن وضع سلاحه فوق المكتب..

تأفف ثم أردف:

- تعرف إن ما حدش هددني قبل كدا؟
- لأ ما اعرفش.
- ثم تابعت ببرود:
- والتهديد بييجب نتيجة معاك ولا لأ؟
- رمقني بغضب وقال:
- ها عايز تعرف إليه؟!
- ثم تابع قبل أن أجيب:
- مين اللي قال لك إنى كنت عايز أتجوز؟

ثم أضاف:

- ما علينا، تامر ما قالش كثير. هو جا له تهديدات وأنا حذرتة يكمل في السكة دي. لكن إبراهيم دا أغرب حد دور وراه. بيسحب عامل زي نبت الشيطان مش مفهوم منه حاجة. كان هنا بيعمل إيه وسافر ليه؟!..
وحكايات غريبة عنه من ناس مختلفة..

قلت بتحفز:

- إزاي؟!!

- اللي عرفته إنه كان انطوائي واجتماعي. واحد ممكن يخلص قرازة الخمرة ويروح يصلي. وحكايات كثير، ناس تقول كلام كويس وناس تقول كلام وحش، ودا اللي خلى تامر يسأل دكاترة نفسيين عن حالته لأنه بدأ يشك إنك بتشتغله أو إبراهيم دا كان بيشتغلك وما فيش حاجة كدا.

قاطعته:

- سألت عن مشيرة؟

أوما برأسه:

- سألت وصدقتك، لكن أنا ما عنديش أي طرف خيط أمشي وراه، والمنظمة اللي قال لك عليها دي تقريباً وقفت نشاطها.

أردفت بتحد:

- لأ ما وقفنش.

- إزاي؟!!

- لو كانت وقفت ما كانوش قتلوا تامر عشان يبطل يدور ورا إبراهيم.

قال بخبث:

- وانت سايبينك عايش ليه؟!!

- أنا ماليش علاقة بيهم.

- إزاي وانت كنت قدامهم ساعة الحادثة.....

ثم تابع بحس شرطي:
 - عارف دا معناه إيه؟
 - إيه؟!
 - إنك متساب عايش عشان حاجة معينة.
 قلت بيأس:
 - أنا كدا كدا ميت...
 أراح ظهره على الكرسي وأردف:
 - ممكن بيشوفوا تطور الحالة قدامهم فيك.
 قلت ببلاهة:
 - تقصد إني...
 قاطعني:
 - بالظبط، متراقب.
 مسحت على رأسي بخوف فأردف:
 - فطبعاً أكيد عارف هاطلب منك إيه؟!
 ثم تابع بود:
 - أنا مش ملك نفسي، أنا عندي ناس كتير مسؤولة مني...
 أومأت برأسي في أسي:
 - فهمت، لكن لو احتجتك في يوم؟
 - لو حاجة أقدر أعملها مش هاتأخر.
 ثم أضاف:
 - ما جربتتش تكتب عن الموضوع؟
 - شكلك بتحبني قووي. تفنكر هالحق؟
 فحرك رأسه نافيةً ثم قمت وصافحته بود، ومن ثم توجهت إلى باب
 المكتب مغادراً.

* * *

بعد أن جلست أمام مقود السيارة التفت أنظر حولي بتوجس كأنني أشعر بأن هناك من يراقبني.. سويعات ودقائق كالدهر بها أشعلت محرك السيارة وظللت أنظر أمامي لسيارة الشرطة التي تحركت أمامي توأ.. سمعت صوته أخيراً فنظرت عن يساري لأجد العجوز عاد ثانية.. نظرت في مرآة الصالون أمامي حتى لا يظن أحدهم أن أصابني الجنون..

قلت بلهفة:

- كنت فين؟

- حبيت أريحك مني شوية.

ثم تابع:

- أنت عرفت ازاي إن تامر كان بيقول لفرح يا فرحتي؟

فنظرت له في مرآة الصالون ببلاهة وتابع:

- طب عرفت معلوماتك عن محمود دا ازاي؟

- مخبر اسمه عم عبد الله شغال جوا.

ضحك ثم أردف:

- مش هو آخر واحد كلمته؟!

- أيوة.

- طب بص في المكالمات كدا.

التقط الهاتف ثم نظرت بسجل المكالمات. آخر اتصال مدون محمود

عثمان. نظرت له بخوف فقال بيأس..

- سُفت إن وجودي هيتعبك ازاي؟ خليك في دوامة الجنان.

ثم اختفى فصحت منادياً:

- استنى.

ثم تشبثت بالمقود وظللت أجذبه بقوة والسيارة تهتز بي....



غياهب العقل أشد وطأة من جسد يُلى. ليت الهرم طال الجسد وأبلاه
وترك لي عقلاً يدرك ما حوله..

سكون يحيط بي.. وجوم وصمت في كل شيء إلا عقلي.. الكلمات لن
تعبر عما مررت به.. لن تفيد.. لن تضيف سوى تساؤلات جمّة تتبعها
تساؤلات ثم اعتراضات ثم تقلبات ثم جنون يؤدي لكفر بكل شيء..
البشر أغبياء لا يدركون ماهية المادة ويبحثون عن كشفها.. فضول غبي
أنفق مليارات للوصول لمعرفة واهية، وإن أدركنا ماهية كل شيء فبالأخير
سينتهي العالم بقنبلة نووية أو حرب عالمية أو نبوءة مكتوبة كما تقول
الأديان..

للمؤمنين وغيرهم جميعاً مؤمنين بأن لكل شيء نهاية حتى هذه المعاناة
التي أعيشها، سنتتهي بموت قريب، بعقل أضله هذا العقار ويبلية كما يبلّي
الجسد..

ما الفارق بين الوهم والحقيقة؟ بين فارس قبل أن يقابل إبراهيم وفارس
بعده؟ نفس الشيء ونفس الشخص إلا تسارع قطار العمر.. عجلة تمضي بلا
توقف.. رفات لشخص يتغذى عليه آخر، وبالأخير لا حل لتلك المعضلة..

عشرة تساؤلات بلا جواب منطقي:

كيف حصل إبراهيم على الإيميل الخاص بي؟!

ما سر فيديو ملك وعمر؟!

كيف هربت منهم دون أن يقتلوني؟!

ما سر الفلاشة؟!

من هذا العجوز؟!

ما سر هذه اللوحات والفيديوهات التي رأيتها برفقة إبراهيم؟!
لماذا لم يستجوبوني إذا ظنوا أن لدي معلومات مهمة؟!
من أعطى لعاطف الفيديو الخاص بي؟!
لماذا تركني الضابط أذهب عندما رأى المخدرات بحقيبة السيارة؟!
لماذا هددوا فوزي بعدم إكمال علاجي?!

أنهيت كتابة تلك الأسئلة عندما كنت جالساً على كرسي التسريحة أمام
المرآة بغرفة نومي.. هذا ما تذكرته وهناك الكثير لم أستطع إجابته.. ظللت
شارداً أحاول أن أجد شيئاً منطقياً يجب تساؤلاتي غير الجملة التي تريح
كثيراً "لقد فقدت عقلك".. بالأحرى هناك جواب آخر يريح أكثر.. أنا في
كابوس مزعج من تناول المخدرات وسأستيقظ قريباً..

نعم هذا صواب.. هذا أفضل شيء يجب تساؤلاتي.. لأن هناك عندما
يغيب العقل يتوقف المنطق.. أنا في ثبات عميق وفي كابوس مزعج
سأستيقظ وكل شيء قد عاد كما كان.. لم يمت رحيم ولم تخني ملك ولم
أحاول قتل ريماس.. لم أفقد عقلي.. لم أصب باكتئاب..
تكفي كلمة "لم" لتمحو كافة الذنوب البشرية.

"لم" هي صك الغفران.. الفعل نفيه "لم".. فإذا لم يفعل ابن آدم؛ لما
ارتكب جرائمه..

انسابت دموعات على خدي تائهة مثلي لا تعرف وجهتها.. تتعرج
بمنحنيات تجاعيد ظهرت بقوة.. تجاعيد تخبرني أن الأمر قد اقترب.. هي
ضلت طريقها وظلت تهبط حتى وصلت لشعر شاب منذ أيام على صدر
رافق الدخان.. وأخرى من العين اليسرى وصلت لقلب لم يعرف البكاء.. قلب
لا يشعر سوى بالجنس والمنحنيات النسائية.. قلب أدرك أن الحب هو
الجسد وإن تجسد له الحب كامرأة لفعل بها الأفاعيل..

أتأمل هذا الوجه! التجاعيد ظهرت بين ليلة وضحاها.. التغيرات
الفسولوجية تحدث عند النوم.. الحل ألا أنام ولكن سأصدم بساعة

بيولوجية تتحكم في جسد واه ليصبح عجوزًا خرفًا قريبًا، ومن ثم نهاية نور
أم مشيرة؟!

أسفل العينين جلد قديم مترهل منتفخ.. السن الآن تخطى الخمسة
وخمسين عامًا أو أكثر.. أنا في طريقي.. إبك لأجلي يا من تشعر بما أشقى..
كل عجوز بهذا العالم يدرك ما أقول.. ليبقى حينًا يداعبه.. حينين اليوم الأول
لكل شيء.. لمدرسة الطفولة.. الحب الأول.. الخطبة.. الزواج.. الابن الأول..
الحفيد الأول.. الهرم لعنة.. الموت.. الموت..

ها قد بليت بذنب ضعفي..
عجز الجسد يعتريه بلاء..
إني أصارع عجز نفسي باكيًا..
ومن ذا الذي يستحيه بكاء..
كل الأجساد تُلقى بالتراب..
والروح تلقى روحها ظلماء..

خطا الابتسامة قد ظهرها بقوة.. برزا فوق شفتي ليخبراني أن لا حاجة
لأبتسم ثانية، فقد اقتربت من الهرم.. لا بسمة بعد اليوم.. ليت إبراهيم
صنع إكسير الخلود.. ليتني تركت الأسود يقتل العجوز لأحيا دائمًا.. ليس
هناك خلود في هذا العالم.. وإن خيرت الآن فلا بد أن أدفع ثمن الخلود كما
دُفع من قبل لكن لن يقدر عليه أحد.. لن يقدر عليه سواه.. هو فقط أول
من تجبر في الكون.. هو من يقدر أن يدفع ثمن الخلود ويلعن.. لست أنا..
مسحت الدمعات برفق أخيرًا، وقمت من أمام المرأة لألقي جسدي على
السرير وأجذب بطانيتي وأنا مغمغم..

* * *

كثبان رمال حولي في كل مكان.. لا دليل ولا شيء يجعلني أرى.. الشمس
تلفح وجهي وأتصبب عرقًا.. ماء بلل جسدي العاري إلا من بنطال قصير..

السماء صافية زرقاء كماء المحيط.. لا شيء لأفعله سوى الجلوس.. لا ساتر هنا.. لا شيء هنا.. ولا إرادة لتختار بها أين تذهب فكل شيء تشابه..
جلست القرفصاء لبرهة قبل أن أقوم أتلوى من الرمال الساخنة.. أصبح بصوت عالٍ ولا مجيب.. ماذا أقول ومن أناجي؟ ناديت مرات ومرات..
حفرت بقوة بكلتا يدي في الرمال كالمجنون.. تعجبت فالرمال كلما حفرت أكثر تصبح باردة.. حفرت حفرة تكفي لأنام ثم نمت ورددت على جسدي بقوة.. تنفست أنفاساً متسارعة.. أريح جسدي مما شعرت به من حرارة الشمس..

مضى الوقت الذي لا أعلم مقداره.. وقت كثير ولم تأفل الشمس.. كأنها لن تذهب بعيداً لتظل تعذبني..

شعرت بظل معتم عندما كنت ناظراً إلى السماء فرفعت رأسي لأرى أربعة كلاب سوداء كبيرة.. كبيرة بقدر الذهول أكبر من حصان بالغ وعلى ظهورها هودج كبير يحوطه قماش أسود.. خفت أن يروني ببداي الأمر، لكنني رأيتهم هم المخلص مما أنا فيه..

قمت بعد أن مروا أمامي مترات ونفضت الرمال عني ثم ركضت خلفهم أصبح..

- الحقوني. حد يساعدي.

توقفت الكلاب ونظر لي أحدهم نظرة خبثة ثم ابتسم ليظهر نابيه.. جلسوا على الرمال ثم خرج من.... إبراهيم.. نعم هو.. خرج من الهودج ومشى تجاهي.. كان كملك يرتدي جلباباً أسود تزينه حلي من الذهب وجواهر ماسية تعكس ضوء الشمس ليرتد في عيني اللتين لم يستطيعا أن ينظرا.. ركضت إليه بعين نصف مفتوحة.. تهللت فرحاً وأنا أصبح..

- إبراهيم..

ثم اقتربت منه وضممته بقوة فأردف بود:

- ما تخافش يا فارس. مش هاسيبك.

قلت ببلاهة:
 - أنت لابس كدا ليه؟ وإيه الكلاب دي؟!
 - تعالى يا فارس.
 - فين؟
 ابتسم وأضاف:
 - يلا تعالى معايا لأنك لو سبتك هنا...
 قاطعته:
 - أنت اديتني العقار ليه يا إبراهيم؟ واديتھولي إمتي؟
 - عقار إيه؟!
 - أنا باكر بسرعة يا إبراهيم وهاموت قريب.
 ابتسم وأردف:
 - أنت عايز تعيش للأبد؟! ما كلنا هنموت...
 ثم تابع وهو يقبض على يدي ويجذبني:
 - يلا مافيش وقت.
 مضيت معه إلى أن وصلنا للكلاب ثم ركبنا الهودج وانطلقت الكلاب
 تطوي الصحراء التي.....
 ثم صحت باكيا:
 - نزلني مش عايز أكمل...

* * *

استيقظت وانتفضت من على السرير.. جسدي بلله العرق الغزير
 والخوف تحكم بي.. مددت يدي لألتقط الهاتف من على الكومود ثم نظرت
 للساعة التي تجاوزت الحادية عشرة صباحاً.. ربما نمت كثيراً لأن جسدي
 متعب ولم أنم جيداً منذ أيام.. ألقىته على السرير بجانبني ثم بحثت عن
 السجائر لم أجدها فقممت مترنحاً والتقطتها من على التسيريحة وعدت أجلس
 على حافة السرير.. أفرك عيني لأستيقظ وأخرجت سيجارة أشعلتها.. سحبت
 أنفاساً بشرامة وتتابع..

رنَّ الهاتف لم ألتقطه وتركته.. وظللت أتناول سيجارتي وأشرد بذلك الكابوس المزعج.. رنَّ ثانية فالتقطه ونظرت في الشاشة "تامر الرفاعي" .. إنها فرح ومعها زاد الفرح في قلبي المريض.. ضغطت زر القبول ووضعت الهاتف على أذني برفق.

- أستاذ فارس، عايضة أشوفك.

- أوك نتقابل النهار دا.

قالت بعجل:

- أوك. كافيه رودانا في المهندسين. عارفه؟

- تمام عارفه، أشوفك إمتى؟

- يا ريت بعد سبعة أكون خلصت شغل.

- أوك.

- سلام...

أغلقت الهاتف وألقيته على السرير ثم قمت مترنحًا متجهًا إلى الحمام..

* * *

السبت 16 مارس..

لبست حلة كحلية مهندمة، ووضعت عطري النفاذ مع نظارات الشمس التي لم تفارق وجهي منذ الخروج من الشقة، وكأنني أردت أن أخبئ تجاعيد عيني بها.. تقدّمت تَوًّا من الردهة ثم خلعت نظارتي الشمسية وغمزت بعيني لميرفت الجالسة على المكتب وتحدث في الهاتف بثرثرة نسائية..

ابتسمت ثم تركت سماعة الهاتف الأرضي وأردفت:

- أجيّب لك قهوتك جوا؟

- خليها دوبل يا ميرفت.

- ماشي..

دستت النظارات في أزرار القميص العلوية ثم اقتربت من باب مكتب
عاطف وطرقته برفق قبل أن أدير المقبض وأدلف..
جلس كعادته فوق كرسي المكتب.. ما إن رأيته حتى ابتسم بشفقة وود..
تقدمت وجلست أمام المكتب فأوماً برأسه في أسي..
قلت بضيق:

- خلاص يا عاطف. ما تقعدش تفكرني كل شوية إني كبرت.
- تشرب إيه؟!

- ميرفت هتجيب القهوة.

ابتسم بود وأردف:

- حقك تؤمر، ما انت رجعتها الشغل تاني.

- دي بنت غلبانة وبتحبك.

قال بتأفف:

- بيني وبينك زهقت. عايز أجدد.

ثم أضاف بسماحة:

- أنت عارف الملل بقى، وأنا اللي هاقول لك؟!

- جدد يا عاطف.

قال بضيق:

- مركزي أنت عارف.

- مش هتلاقي واحدة تستحملك غيرها.

- طب ما تشوف لي حاجة.

ابتسمت ثم أردفت:

- أنا خلاص عجزت زي ما أنت شايف.

فتحت ميرفت الباب برفق فصمتنا حتى وضعت القهوة وغادرت فقال

عاطف:

- عارف يا فارس. برغم إني كنت باكرهك جدًا بس خلاص المسامح كريم

أنت كلها كام شهر وتقابل وجه كريم.

فقلت بضيق وأنا أشعل سيجارة:
 - تصدق إني نفسي أموت عشان ما اشوفش سحتك دي.
 ضحك ثم أردف:
 - مقبولة منك يا عم.
 - كتبت تحقيق عن حالتي؟
 أوماً رأسه نافية فتابعت:
 - عموماً هاعمل لك تحقيق عن حالتي بالظبط وكل اللي مریت بيه
 وابقى نزله باسمك لما أموت. أهو حاجة تترحم علي بيها وأوعدك بمعلومات
 هتقلب مصر كلها.
 ابتسم وأردف بود:
 - مش عارف أودي جمابيلك دي فين يا فارس.
 - يا راجل إحنا اخوات.
 فأشار لفنجان القهوة:
 - اشرب قهوتك.

* * *

الساعة 4:18 مساءً..

تقدّمت بخطوات واسعة فوق السجادة الترتان بين صفي الطاولات في
 ذات العبارة التي جلست بها مع عمر من قبل.. الجو منعش اليوم، يحمل
 نسائم وهواء لطيفاً.. الطاولات شبه شاغرة إلا من طاولتين أو ثلاث.. عمر
 جلس بأخر العبارة يرتدى نظارات شمسية وحلّة رسمية برابطة عنق.. أمامه
 حقيبة العمل.. بدا كأنه هنا منذ فترة ليست بالقليلة.. نظر للماء بشرود
 وكأنه تجمد هكذا.. مظهر لا يشي إلا بخطب ما..
 سحبت كرسيّاً بعد أن اقتربت من طاولته ثم أردفت مداعباً:
 - عبارة على النيل؟ ممكن تقول لي طبيعة علاقتنا إيه بالظبط؟

نزع نظاراته فرأيت عينيه وقد تحجرت بهما دموع، فقلت بلهفة:
 - ما لك يا عمر؟!
 قال وهو يضع نظاراته على الطاولة:
 - ما عرفتش أعمل له حاجة.
 - هو مين دا يا عمر؟
 انفجر بالبكاء وأردف:
 - النهار دا كانت جلسة الحكم وأخذ إعدام.
 ثم تابع:
 - كان بريء يا فارس..
 وأضاف وهو ينتحب:
 - وعنده عيلة وهيتشردوا. ولاده هيعيشوا بعار وأبوهم هيتعدم ظلم.
 - هو صاحبك؟!
 - لأ، موكل عندي.
 قلت بتعجب:
 - أنا أول مرة أعرف إنك كدا.
 - إني إيه؟ باحس! يا فارس إحنا بنظلم نفسنا لكن هاقابل ربنا ازاي
 بذنب الراجل دا؟
 ثم تابع:
 - عارف تلاقيك بتضحك من جواك ومش مصدقني عشان عمرك ما
 شُفتني كدا، لكن أنا عمري ما حد اترافعت عنه اتعدم ظلم.
 أردفت متعجبا:
 - ازدواجية غريبة، كان أولى تكتب الواد الي خلفته قبل كدا باسمك
 بدل ما تهرب، ما دام أنت حقاني قوي كدا.
 - وإيه يضمن لي إنه ابني؟!
 - أعمل له تحليل DNA.

ضحك وأردف:

- التحليل دا سهل يتزور عادي. دي عينات ممكن تتبدل.

نظرت له بثقب وشردت أتذكر تحليل رحيم ثم أردفت:

- عمرك خُنت يا عمر؟

- خُنت لكن عمري ما خُنت واحد صاحبي ولا موكل عندي.

- أمال خُنت مين؟!

أردف بحكمة:

- خُنت نفسي، وخُنت كل ست عرفتها عشان كدا ما عرفتش أتجوز

ودخلت في بحر الكبت.

ثم تابع بعد أن تنهد:

- اللي زينا يا فارس عندهم كبت. مافيش ست تملا عينهم.

- بس أنا...

قاطعني:

- عارف، بتحب ملك، وهي كمان بتحبك. أنت حبك ليها وغيرتك عليها

اتحولوا لوسواس بالخيانة. كنت باحاول أبوظ قضية الحضانة بأي شكل

عشان مش عايزك تبقى عمر تاني.

ثم أردف بعد أن تفحصني:

- أنت هتموت فعلاً يا فارس زي ما بتقول؟!

وانفجر بالبكاء ثانية:

- كبرت قوي يا صاحبي. خلاص هتسييني؟

ابتسمت وقلت برفق:

- العمر بإيد رينا. لو حصل ادعي لي.

- لا يا فارس مش هتموت، أكيد فيه علاج. أنا عندي فلوس كتير خدهم

واتعالج...

أومات برأسي في أسي:
- ما الفلوس كثير يا عمر بس مافيش علاج..
- لأ فيه علاج يا فارس.. فيه علاج والله..
ظل يصيح بهستيريا وكل الأنظار تتجه إليه...

* * *

الساعة 8:30 مساءً..

منذ نصف ساعة أجلس في هذا المقهى الذي يبعث الكآبة في النفس.. هدوء وسكون تتخلله موسيقا هادئة.. أجلس على طاولة بالقرب من الجدار الزجاجي.. المقهى جدرانه زجاجية بالطابق الثاني من مبنى طويل تجاوز العشرة طوابق.. الطاولات تعد على الأصابع.. الملل جعلني أقوم بعدها.. ثماني عشرة طاولة ألوانها بنية.. مع أرضية نحاسية وبار بالمنصف.. ونادل يمر أمامي بين الحين والآخر ليحضر فنجان قهوة ويأخذ الفارغ.. التدخين ممنوع تأففت كلما رأيت اللافطة على الجدار الزجاجي أمامي.. لعنت فرح لأنها وضعتني في هذا العذاب.. أعبت في الهاتف مرات ثم ألقيه على الطاولة بضجر..

ها هي عبرت الباب أمامي.. تتمايل بأنوثة بعينين زرقاوين ظهرتا مع الإضاءة العالية في المقهى.. ترتدي بلوزة قصيرة سوداء كعادتها.. طال الحداد.. وددت أن أخبرها أن القمر إن دخل في حداد لهذا السواد الغارق فيه لمات من في الأرض، لكن لن تعي هذه الكلمات البلهاء..

جلست أمامي وقالت برفق بعد أن وضعت حقيبتها:

- إزيك يا أستاذ فارس.

ثم تفحصتني بنظرها وأضافت:

- أنت حصل لك إيه؟!

- مش قلت لك إني هاموت قريب.

- قالت بأسى:
- كلنا هنموت، لكن...
قاطعتها:
- مافيش حل.
ثم تابعت مبتسماً:
- خير؟
- هو عادي إني أشوف تامر في الحلم ويقول لي قربي من فارس؟
ابتسمت وأردفت:
- أنت بتؤمنني بالأحلام؟
أومات برأسها فأضفت:
- مافيش أي حاجة قال لك عليها تساعدني ما اعرفهاش.
قال لي إنه شاكك فيك.
قلت ببلاهة:
- إزاي؟!
يعني كان شاكك فيك في الأول، بس بعد كدا بقى متحفز جداً إنه يفهم مين إبراهيم دا.
- هو مات إزاي؟
كان بيحيب أسر من المدرسة والعربية اتقلبت بيه وولعت.
نظرت لها بثقب:
- كان في شبهة جنائية.
للأسف لأ، لكن التهديدات خلطنا نتأكد إنها بفعل فاعل.
إزاي والحادثة قضاء وقدر!
اطرقت برأسها ثم أردفت:
- وموته بعد التهديدات دي؟!!

ثم تابعت:
 - الحاجة الوحيدة اللي أعرفها إن الناس دي مش بتلعب وخلصت الموضوع بمنتهى البساطة.
 - مش خايفة؟
 ابتسمت وقالت ببرود:
 - عندي إيه أخسره تاني بعد موت جوزي وابني؟
 - نقوم؟
 ابتسمت وتناولت حقيبتها ثم تابعت:
 - بس تسمحي لي أوصلك. أنتِ معاكِ عربية؟
 - لأ
 - أوصلك؟!
 أوامات برأسها إيجاباً وابتسمت..

* * *

لم أستطع الجلوس بالصالة في ديسكو مايكل.. الموسيقى تسبب لي صداداً وطنيناً بالأذن.. الإضاءة تزيد عيني حمرة وتسبب تهيجاً في أعشيتها.. جسدي لم يعد كما كان يحتمل الكثير.. أكاد أسمع صوت طقطقة فقرات رقبتي قسراً وكأنني باب خشبي يصدر صريراً.. قد تخلى عني الزمن وأطلق العنان لسنونه لكي تلعب معي.. غادرت الصالة منذ برهة بعد رحلة عناء وارتطام بأجساد منتشية.. أجساد لم تُبل مثل جسدي ولكن الشهوة تبليها.. سعدت السلم بخطى مثقلة واهنة نحو مكتب مايكل.. أستند على السور الحديدي له براحة يدي اليسرى.. وأقف مرات أجمع قوتي الذابلة.. مشيت في الممر الواسع أمامي ثم وصلت غرفة مكتب مايكل.. دسست المفتاح وفتحت الباب ثم دلفت وأغلقت الباب خلفي برفق.. الإضاءة عالية والغرفة معزولة عن الضوضاء في الصالة.. تقدّمت وجلست على كرسي أمام المكتب ثم نظرت في ساعة يدي برفق.. الساعة الحادية عشرة مساءً.. الطقس رائع لكنني لم أبه.. أنا في حداد اليوم على فارس المسكين..

فتح مايكل الباب برفق ثم تقدّم مترنحاً من تأثير الكحول، وجلس على كرسي مقابل لي ثم أردف:

- ماعلش اتأخرت عليك يا روستو.

قلت بضيق:

- لا أنت تقوم تغسل وشك وتفوق. أنا مش هاكلمك وأنت كدا.

قال بصوت ناعس:

- يا عم أنا فايق أهووه.

- قوم يا مايكل.

تأفف وقام يترنح ويتجه لحمام صغير في الغرفة، دس رأسه أسفل صنوبر الماء في الحوض بعد أن ترك باب الحمام مفتوحاً، وظل على تلك الحالة بقدر أن أشعلت سيجارة وأنهيتها وأشعلت الأخرى..

ناديت ببلاهة:

- أنت مت ولا إيه يا ابني؟! فأشار لي بيده ورأسه لا تزال أسفل الصنوبر ثم تابعت:

- يا عم خلّص أنت هتنام كدا. بقالك ربع ساعة تحت الحنفيه.

أخيراً أزاح رأسه ثم التقط منشفة وتقدّم يمسح رأسه من الماء بملابس تبللت. ظل ينظر لي بعته ويبتسم ثم أردف:

- أما حلم يا فارس.

ضحكت حتى سعلت:

- أنت كنت نايم تحت الحوض؟

- مش فاكر!

جلس على كرسي في المقابل ثم تابعت:

- لا وحياة أمك ركز معايا.

- معاك يا فارس.

- قلت بضيق:
 - متأكد؟
 - آها.
 ثم ناولته سيجارة:
 - خد ولع وفوق كدا.
 تناولها ثم أشعلها وظل ينفث الدخان برفق وبطء ثم أردف:
 - كنت عايزني في إيه؟
 - فاكر حنان؟
 سحب نفساً ثم سأل مستفهماً:
 - حنان مين؟
 - البت اللي كانت شغالة عندك.
 - اللي أنت ضربتها؟
 ثم تابع مازحاً:
 - كانت أسطورة. منك لله فقدت أحد أركان الديسكو الرئيسية.
 - أحد أركان. يا عم ركز والنبي مش طالبة هزار.
 قال بجدية:
 - ما لها؟
 - عايز أشوفها.
 أوماً برأسه:
 - نروح لها ماشي.
 ثم تابعت ثانية:
 - عارف كبارية سهرات اللي في الهرم؟
 - آها.
 - في بت هناك رقاصة اسمها كريمان مسافرة برآ...
 قال بتعجب:
 - ودي عرفتها من ورايا؟

- يا عم هافهمك بعدين. المهم عايز أعرف رجعت ولا لسا.
 - طب ثواني.
 أخرج هاتفه ثم ضغط زر الاتصال ووضع على أذنه:
 - ألو، إيه يا عم سيف! ما نسمعش صوتك كدا؟
 ثم تابع:
 - اخص عليك. لا والله مش عايز حاجة أنت وحشتني وحببت أسأل
 عنك.
 ثم تابع:
 - باقول لك إيه.
 ثم ضحك بقوة وأضاف:
 - لا دا مش طلب لأ. دا لسا جاي على بالي دلوقتي بس أنا مكلمك عشان
 أنت واحشني..
 ثم صمت ثوان وتابع:
 - فيه بت في كبارية سهرات اسمها كريمان كانت مسافرة برا. عايز أعرف
 رجعت ولا لسا.
 أوما برأسه:
 - آها يعني لسا ما رجعتش؟ حبيبي يا سيف. خلينا نشوفك سلام.
 وضع الهاتف على المكتب وأردف:
 - لسا ما رجعتش.
 قمت وقلت:
 - طب أنا هامشي عشان محتاج أرتاح. هاكلمك عشان نروح للبت دي.
 - ماشي يا روستو.
 توجهت ناحية الباب وغادرت بعد أن خرجت وأغلقت الباب برفق....

* * *

الأحد 17 مارس..

الساعة 2:30 مساءً

أزحت ذراعي بعد أن نظرت في الساعة.. استيقظت منذ ساعة ونصف..
الجو يحمل برودة خفيفة، وشعاع شمسي رأسي لم ينل من عيني اللتين
اختفيتا وراء نظارات شمسية سوداء.. في حديقة فيلا أمين بيه خيري، أمام
البسين الممتلئ بأوراق الأشجار.. طافت فوق الماء الذي أصبح لونه بنياً
بفعل الأتربة والرياح.. الأرض عشبية تكسوها حشائش خضراء قُلمت
بماينة عشب بعناية فائقة.. سور الحديقة تحوطه أشجار خضراء بلغ طولها
المتر والنصف تقريباً.. الطاولة البلاستيكية خلفي بخطوات، تركت عليها
أغراضي وظللت شاردًا أتفحص الماء..

الشوائب الشتوية التي غسلت كل شيء إلا هذا البسين.. فارس حسين
أيضًا لن تستطيع أي مياه في العالم أن تغسل جسده الضعيف من ذنوبه
وآثامه.. لن يستطيع أي دواء في العالم أن يعيد له الشباب المفقود..
أتأمل الماء وأتنفس بعمق لأخرج زفيراً حاول أن ينفذ اليأس من صدري
لكنه فشل..

ربت على كتفي بقوة:

- عايز.....

ثم قطعت حديثها صرخة:

- فارس ما لك؟

قبضت على يديها:

- اهدي يا ملك أنا كويس.

ثم بكت تنتحب بسيل من الدموع انفجر من عينيها:

- إيه اللي حصل لك؟

- مسامحاني يا ملك؟

ثم تابعت:
- للأسف يا ملك خلاص كل حاجة بقت قريبة، والموت.....
قاطعتني:
- بعد الشر يا حبيبي.
- أنا جيت بس عشان أقول لك إني ما كنتش عارف أنا باعمل إيه لما
ضربت ريماس. صدقيني اللي حصل دا من أعراض الحالة اللي أنا فيها.
قالت بكلمات تقاوم ياساً ملاً قسماتها:
- تتعالج يا فارس. بابا يقدر يوديك.....
قاطعتها:
- مافيش أمل يا ملك والله. أنا جاي أسألك...
قاطعتني بضمة قوية وصدر تعلق أنفاسه:
- مسامحك وبحبك.....
انسابت دمعات على شعرها من عيني وأنا أقبل رأسها، برفق ثم أردفت:
- على قد ما عذبتك على قد ما حبيتك.
وكان الزمن توقف.. هنا رجوته أن يتوقف وينهي كل شيء...
* * *

الساعة 2 صباحاً..

جلست في صالون شقتي أمامي الطاولة الزجاجية وفوقها الـ laptop..
أنهيت توالف السيارة المتخمة بمخدر الحشيش، ثم مسحت عليها بطرف
لساني بلعاب حاول أن يصبح لاصقاً ولكنه بالكاد فعلها.. لعابي جاف حتى
بعد تناول زجاجة مياه بشرهة.. كأن الجفاف أصاب جسدي ويزحف عليه
كأغصان شجرة عنب عتيقة..
وضعت السيارة على الطاولة ثم تناولت زجاجة نبيذ، ارتشفت منها
رشفتين.. دسست الفلاشة في الـ Laptop ولم أشغل الفيديو؛ بل انتظرت،

وأشعلت سيجارة الحشيش التي عقب مخدرها في عقلي.. في دمائي وإن كان قد خدّر قلبي من اليأس أيضاً، لأطلق ضحكة أتذكر معها بلاهة مايكل أسفل صنبور المياه..

وضللت أضحك بقوة على أي شيء أتذكره.. حالة من الضحك الهستيري.. ضحكت حتى سالت الدموع من عيني ثم بكيت..

بكيت على كل شيء حتى بلاهة مايكل.. كل شيء وإن رأيت أقوى فيلم كوميدي الآن لن يزيدني غير دموع ذابلة أكثر..

ضغطت زر التشغيل أخيراً لتبدأ الموسيقى.. تهتز الصالة بي.. شعرت وكأن الأثاث ينتفض.. موسيقا تدوي في أذني.. طنين حاد وصداع معه أطلقت صرخة أكاد أجزم أن كل الجيران سمعوا بها..

ظهرت الكلمة المعتادة Gamecan وبدأ العرض..

المكان: سيارة تامر..

الزمان: بمنتصف النهار .

زاوية رؤية جانبية على يمين تامر الذي التقط هاتفه بعد أن رنَّ.. بدا متوتراً وتصبب عرقاً.. كانت يده اليسرى ترتعش ولا تتحكم في مقود السيارة، ثم وضع الهاتف على أذنه..

- ألو.

تابع بخوف:

- أنت مين؟

ثم أردف بهلع:

- طب بلاش ابني.

Cutting..

في الجريدة جلست على كرسي المكتب زفرت نفس الدخان بقوة
بسيجارة أمسكتها بين أنامل يدي اليسرى، والهاتف بيدي اليمنى.. تقترب
الكاميرا من وجهي.. zoom in على شفتي اللتين تصاعد منهما دخان كثيف
مع كلمات مقتضبة..

- ابقى ربيبه في الجنة.

الشاشة تحولت للأسود، ثم ظهر مشهد لي في الكمين مع ذلك الضابط..
الإضاءة خافتة بالكاد أرى.. زاوية الرؤية رأسية ضيقة..
نظر لي الضابط بدهشة بعد أن فتحت حقيبة السيارة:
- إيه دا؟!!

ثم دس يده وتفحص البضاعة وقبل أن يصيح نظرت له بعين ثاقبة
فناولني الرخص بعد أن أوأمت برأسي..
أغلق الفيديو...

ظلت عيني جاحظة بعد أن فسدت جرعة المخدر وتأثير الكحول..
أحملك في شاشة الـ laptop كالأبله ولا أفعل شيئاً غير ذلك.. لا أعلم أي
تفسير منطقي لما حدث.. ماذا فعلت وماذا حدث؟! هذه الفلاشة لعنة
وتسبب لي الهذيان.. أدركت تَوّاً أن إبراهيم قد أرسلها لي ليجن جنوني.. ما
هذا الهراء؟! كيف يتم تصويري هكذا؟! هل تلك المنظمة تراقبني؟! لكن
كيف تضع هذه الفيديوهات في الفلاشة.. هل هذه الفلاشة تكنولوجيا
متقدمة ويرسل عليها هذه الفيديوهات دون علمي؟! هل يرونني أنني
أفقد عقلي ويرسلون تلك المشاهد لمراقبة ردود أفعالي؟! تذكرت ما قاله
محمود عثمان أنني تركت حياً لهدف.. الآن أعلم الهدف هو مراقبة ردود
أفعالي من تأثير العقار..

هل مرت نور بهذا؟!!

هل مرت مشيرة؟!!

سيل الأسئلة انفجر في عقلي.. قبضت رأسي بكلتا يدي مع هذا الصداق
المزمن الذي ملأ رأسي، ثم نمت على الأريكة مكاني..

* * *

الثلاثاء 19 مارس..

ما زلت أجلس على كرسي المكتب أمام عاطف الذي ارتدى نظارات
القراءة وظل يتفحص الملفات أمامه بتأمل.. أثرت الصمت مع تناول هذه
السيجارة التي قتلت نصفها حتى الآن.. لم أبعدها عن شفتي الجافتين..
مظهر مدمن يرتدى حلة رسمية غير مهندمة ولحية زاد طولها لتخبئ بعض
التجاعيد.. أضع الملف فوق ركبتي وأنظر لفنجان القهوة الخالي أمامي إلا
من بقايا بنّ قاتم.. المكتبة أمامي تم إصلاح زجاجها منذ أيام..
نظرت في ساعتني بعد أن أطفأت السيجارة.. تجاوزت الحادية عشرة
صباحاً بخمس دقائق.. وظللت جالساً حتى الآن ربع ساعة..

نظر لي عاطف أخيراً ثم أردف بعد أن نزع نظاراته:

- آسف يا فارس. كنت باقراً تقرير مهم.

ناولته الملف الذي أحمله ثم قلت:

- اتفضل. دا تحقيق كامل عن حالتي وعن اللي حصل معايا.

تناوله وابتسم بخبث:

- طيب هاقره وأرد عليك لو فيه حاجة ما ينفعش ننشرها.

- عموماً أهو معاك. كدا أنا وفيت بوعدني.

ثم ناولته ورقة أخرى فقال:

- إيه دي؟

- استقالتني.

- ليه؟

قلت مبتسماً:

- محتاج أرتاح اليومين اللي فاضلين لي.

- لكن يا فارس....

قاطعته:

- محمد الي معايا في القسم ولد موهوب وشاطر. هيمشي الشغل
كويس أحسن مني كمان لحد ما تشوف حد يمسك القسم.

قال بأسي:

- أنت فكرت كويس يا فارس؟

أومات برأسي فتابع:

- طب هتعدي علينا ولا خلاص مش هنشوفك تاني؟

- أكيد يا عاطف. بس مش عايز شوشرة. لو حد سأل عني قول لهم أخذ

أجازة مرضية.

- بالتوفيق يا فارس.

* * *

جلست على كرسي مكتبي بعد أن جمعت أغراضي ووضعتها على
الأريكة أمامي.. تنفست بعمق ثم زفرت بأسي.. ظللت أتفحص الغرفة
بعيني وكأنها نظرات الوداع.. سوف أشتاق لهذا المكتب.. لرائحة الورق..
لابتسامه الزملاء السمجة.. تنمري على البعض ولساني السليط..

أشياء عدة تشغل تفكيري الذي قاطعته طرقات برفق على باب المكتب،
ثم دلف محمد وأغلق الباب برفق..

تقدّم ثم وقف أمامي وقال بأدب:

- حضرتك طلبتني.

أشرت له:

- اقعد يا محمد.

جلس ثم أردفت:

- أنا قدّمت استقالتي.

قال بضيق:

- ليه؟

- أنا زي ما أنت شايف مريض وما بقيتش أقدر على الشغل..

ثم تابعت:

- أنت هتمسك القسم في غيابي. أنا كلمت أستاذ عاطف وعايزك

تشرفتني.

ابتسم وأوماً برأسه ثم أضفت:

- طبعا أنت معاك رقمي. لو أي حاجة وقفت معاك تكلمني. أنا سايب

كل أرقام المصادر بتاعتي في ملف وورد على الكمبيوتر.

ثم قلت بعد أن قمت من الكرسي:

- يلا بقى وصلني بالحاجات دي لحد العربية.

* * *

الساعة 1 مساءً..

الجو يحمل برودة خفيفة.. السماء غائمة متخمة بالسحب.. الطريق أمامي مليء بالسيارات التي تسير ببطء كالسلاحف في هذا التجمع البشري كأنه يوم الحشر.. بعض عربات الباعة الجائلين على الجهة الأخرى.. يبيعون كل شيء وأي شيء ولا أحد يشتري.. ضجيج تسببه آلات التنبيه لهذه السيارات.. أصوات صياح بعض الباعة وهم ينادون ويدللون على بضاعتهم الرثة.. صوت بائع الجرائد يصيح بين الحين والآخر..

الجلوس بمقهى شعبي له سحر خاص وضربته الصداق الذي يدوي في الرأس.. قادتني سيارتي هنا إلى هذه الحارة التي وجدت بها مقعداً شاغراً على ذلك المقهى أمام رصيف بالكاد يتسع للطاولات الخشبية الصغيرة، والمقاعد الخشبية القديمة التي تسبب آلام العمود الفقري..

عدت أنظر أمامي ثانية بعد أن نظرت لسحب كثيفة تتدافع في السماء وتتصارع لتكتب نهايتها قريباً بسيل من الأمطار الرعدية، ثم رمقت النرجيلة أمامي التي لفظ الحجر الثاني لها أنفاسه الأخيرة منذ قليل..

وضعت المبسم على الترابيزة الخشبية، وتناولت الهاتف لأنظر بساعته تجاوزت الواحدة بثلاث دقائق .. تأملت ثلاث دقائق من آخر مرة رأيت بها الساعة.. هذا وضع يشي بملل ويُنَبِّئ بأن وقت المغادرة قد آن..

السيارة صُفت أمامي والسائس يراقبها عن كثب.. يمني نفسه بورقة فئة خمسين جنيه وهو يتفحص العلامة التجارية لشركة BMW.. تلك العلامة التجارية التي أجزم أنها لم تطأ هذه الحارة من قبل مع صف السيارات Lada وغيرها من السيارات الاقتصادية التي أراها..

ملل الاهتمام بالتفاصيل عند الوحدة والتأمل الشارد برنامج حاسوبي يأخذ حيزاً كبيراً من كمبيوتر العقل.

تأملت هذه العجوز الغجرية التي سألت حاجتها لكل الطاومات بالمقهى.. عجوز غزت التجاعيد وجهها.. ترتدي جلباباً أسود عليه حجاب أسود كبير يخبئ ثلث وجهها.. عينان حادثان واثقتان أسفل حاجبين خفيفين بالكاد ظهرا..

أنف صغير أفتس يشغل حيزاً من وجه صغير.. شفتان يابستان أسفلهما خط أسود طولي وعلى جانبيه نقطتين وكأنهما رسمت صليبا غير مكتمل.. لم يعد هناك غيري لتسألني فدست يدي في جيبي وأخرجت ورقة فئة عشرين جنيه تركتها في يدي، وعندما اقتربت وضعتها في يدها دون أن تتحدث..

قلت مبتسماً:

- ادعي لي يا أمي بس بالله عليك.

- ربنا يكرمك يا ولدي.

ثم أضافت بكبرياء:

- احنا ما بناخد مال ولا بنتوسل لسؤال.

قلت مازحاً:

- ما أنت أخذت يا أمي.

ثم تابعت بودّ:
- الناس لبعضها.
- لا يا ولدي أقبل إن قبلت الخدمة.
قلت ببلاهة:
- خدمة؟!
فجلست على كرسي بجواري وأردفت:
- باضرب لك الودع وأقرأ لك الكف.
مددت يدي اليسرى بلا مبالاة:
- اقري.
- يمينك يا ولدي.
فسحبت يدي اليسرى وناولتها اليمنى تناولتها ثم جحظت عيناها:
- كف شيطان مريد ممسوح منه تفاصيل. لا شفنا خط عمر ولا بان منه
حظ.

قلت بغضب:
- شيطان إيه يا ست أنت؟ أنت شكلك مجنونة.
نظرت لي بخوف:
- يبعد ربي شرك.
فقلت بود:
- شوفي تاني ماعلش.
ثم وضعت يدي اليمنى واليسرى أمام عينيها فصاحت ثانية:
- يا الله!
قلت بخوف:
- فيه إيه؟!
- بانك تفاصيله.
- يا حاجة ما تخوفينيش أنا مش ناقص.

فقالته بعجل:

- عاشق وعاوي نسا. حظك بيان عظيم ومخبي فيه الشقا. عمرك ما ظاهر ليه؟!

ثم تابعت ببلاهة:

- من أنت يا ولدي؟

- أنا شخص عادي يا أمي.

ثم تابعت بيأس:

- إن حكيت لك تدبريني؟

- قول يا ولدي.

قصت عليها بعض الأشياء عن حالتي وما حدث لي وعلى مدار عشر دقائق كانت ملامح البلاهة تكسو وجهها وبعد أن فرغت قالت..

- ما شُفت بعمرى كيف ما قلت. ولا شُفت بعمرى كف زي كفك. لا أقدر أقول لك سحر ولا أقدر أقول لك علم.

صمت وتناولت رشقات من كوب المياه ثم تابعت برفق:

- ما قرينا الكتب.

وقبل أن تغادر نظرت في كفي ثانية بفضول:

- كف.....

ثم هرولت بعيداً عني. تناولت مبسم الشيشة بعد أن وضع القهوجى حجراً آخر...

* * *

الساعة 9:30 مساءً..

جلس عمر على الكرسي الوثير بمكتبه بعد أن أغلق النوافذ.. الغرفة شاسعة بها تكييف في الجدار المقابل لمكتب عمر الضخم.. وراء المكتب مكتبة كبيرة تحوي مجلدات.. الوسيط في شرح القانون المدنى.. الدفوع الجنائية في قضايا المخدرات.. الطب الشرعى الجنائى.. ظللت شاردًا أتفحص

المجلدات بعناية وتساءلت إن قرأ عمر كل هذا لأصبح علامة قانونية، لكنه لم يكن محباً للقراءة.. أيضاً هو محام متميز عن أقرانه ويتقاضى عن بعض القضايا مبالغ تتخطى المائتين ألف جنيه..

معضلة غريبة، حلها أن الفساد يجعل الطريق أسرع.. معضلة الغاية تبرر الوسيلة وهي نهج عمر في حياته، وما جعلته يصل لتلك المكانة القانونية المرموقة..

أرخص رابطة عنقه ثم أخرج سيجارة ملغمة بمخدر الحشيش وأشعلها ثم سحب نفساً وناولها لي عندما كنت جالسا أمامه..

- كيف مناولة يا صاحبي.

- عمر أنت مش بتتكسف لما بتتقعد مع زمايلك من طريقة كلامك دي؟

تناولت السيجارة ثم أجاب:

- الطريقة دي اللي بتخليني أعرف أتعامل. أنا بيورد عليّ كل فئات المجتمع ولازم أعامل كل واحد بطريقته.

- وأنت بتتكلم معايا كدا على أساس إني مُسجل؟
أردف بود:

- لا يا صاحبي أنا باقى براحتي معاك.

أومأت برأسي ثم سألت ببلاهة:

- أنت قرئت الكتب اللي وراك دي؟

- لا يا عم، أقرأ إيه بس؟ دول ديكور.

فضحكنا ثم أردفت:

- حصل لي موقف غريب النهار دا.

- إيه؟!!

سحبت نفساً عميقاً من السيجارة ثم قلت:

- قابلت ست عجزية من اللي بيقرأوا الكف أول ما شافت كفي اتصدمت

وقالت لي كف شيطان مافيش فيه تفاصيل. بعد شوية شافته تاني قالت لي بانة تفاصيله وقعدت تكلمني عن حظي لكن خط العمر ما كانش ظاهر.

قال بتحضر وأنا أناوله السيجارة:

- وبعدين؟

- حكيت لها عن اللي حصل لي قالت لي دا ما اقدرش أقول سحر ولا علم.

ثم تنهدت وتابعت:

- بصراحة كلامها لعب في دماغي وعايذ أروح لحد من الناس دول.

قال ببلاهة وهو يزفر نفس الدخان:

- ناس مين؟

- الدجالين. تعرف حد؟

ابتسم وقال بثقة:

- عمر ما فيش حاجة ما يعرفاش.

ثم أطفأ السيجارة وقام من الكرسي وأضاف:

- يلا نسهر شوية ولا هتنام بدري؟

- لا يلا.



العلم سحر لمن لم يدركه، والسحر علم لمن أدركه..

أكملت تَوّاً ارتداء جاكيت البدلة.. وقفت أهدم ملابسي أمام المرآة بتأنّ.. نظرت لوجهي نظرات شفقة على تلك التجاعيد التي كسته وتفحلت به.. عاقد الحاجبين، واجم القسمات، عبوساً كأسد جائع.. تأملت لحييتي التي أنبتت وزاد طولها وشعر رأسي الذي ظهر فاقداً بعض الخصلات الأمامية ولكن لا تُلُفت الأنظار..

تناولت زجاجة عطر ثم رششت على ملابسي إلى أن اقتربت من أن تنتهي.. وسواس قهري بالنظافة لجسد سيّلي ويتعفن قريباً.. متلازمة البقاء تدفع ما بقي من روحي المهترئة.. مسحت على وجهي بالعطر المنعش ثم تناولت أغراضي وغادرت الغرفة..

رأيت الصالون المتسخ في طريقي للخروج ثم رمقته بضيق مشمئزاً وعبرت نحو باب الشقة، ثم خرجت وركبت الأسانسير.. ظللت أتأمل وجهي في مرآة الأسانسير إلى أن استقر أخيراً بالطابق الأرضي، فخرجت صافعاً الباب خلفي بقوة كادت أن تحطم الزجاج الأمامي له..

مشيت بثقة في مدخل العمارة ثم ألقيت التحية على بواب متحفز النظرات.. وأكملت طريقي للخارج.. بعد بضعة خطوات من باب العمارة صُفت سيارتي.. تقدّمت منها ثم ركبت وأشعلت المحرك مغادراً.. سرت ببطء في الشارع الضيق إلى أن وصلت نهايته وأدرت عجلة القيادة برفق ميمناً مع إشارة.. ثم أطلقت العنان لمحرك السيارة لتسير بسرعة مع

أنغام علت من المسجل لأغنية تركية adımı kalbine yaz لحن يسبب تهيج
الأغشية السمعية وتنميل في الأطراف لتتحرك معه..

Senden nı bir haber

Ne selam geler oldu

أططق على مقود السيارة مع علو اللحن الذي خالجه رنين هاتفي..
أغلقت المسجل ثم أجبت..

- ألو.

- أيوة يا فارس عايز أقابلك.

- ما لك يا رشاد؟!!

- مافيش أنا في الفيلا. يا ريت تعدي عليّ ضروري.

- طيب يا رشاد ساعة وأكون عندك.

- ما تتأخرش يا فارس.

أغلقت الهاتف ثم ضغطت زر تشغيل المسجل ثانية...

* * *

وقفت أمام الجدار الزجاجي بطول الغرفة الذي يطل على حديقة فيلا
رشاد.. فتحت الباب قليلاً ثم نفخت دخاني نحو الخارج مع عبور تيار هواء
قوي أثلج صدري.. رميت السيجارة في الهواء لتكتب قصة عشق دامت
دقيقتين.. الجو يحمل برودة قارسة مع هواء بارد.. درجة الحرارة خمس
عشرة درجة كما ظهرت في الهاتف الذي نظرت في شاشته منذ قليل..
استدرت أتفحص الغرفة..

الغرفة شاسعة ومساحتها تخطت الأربعين متراً.. سرير رشاد خلفي بعد
عدة مترات.. سرير له أربع قوائم ضخمة وأربعة أعمدة يحملون ستارة
شفافة.. التسريحة عملاقة في مواجهة السرير.. لم يكن هناك دولاب ملابس
أمامي.. وربما امتلك dress room مخصصة للملابس..

وكان هناك في آخر الغرفة بقسم آخر أنتزبه مودرن أمامه شاشة تلفاز عملاقة، وباب صغير خرج من منتصف الجدار الأيسر بالأحرى باب حمام داخلي..

المال لا يجلب العمر ولا يجلب السعادة لكن يجلب الرفاهية.
كان رشاد غارقًا في نوم عميق.. ينتفض بين الحين والآخر والعرق الغزير بلل نصفه العلوي مع تلك البيجامة البيضاء.. ربما يعاني من الحمى.. غُطي نصفه السفلي ببطانية ثقيلة أثقل من أن يتحملها جسده مع هذا العرق..
الساعة الآن الواحدة والنصف مساء.. مرت نصف ساعة منذ أن أتيت ولم يستيقظ إلى الآن، أردت أن أوقظه مرات لكنني احترمت ما طلب..
فقد أخبر الخادمة بأن أجلس أمام السرير وإن وجدته نائمًا، ولا أغادر حتى يستيقظ ولا أحاول أن أوقظه..

تأففت ثم تقدّمت من باب الغرفة وعندما اقتربت من باب الغرفة، رأيت الخادمة ترتدي uniform منزلي وتحمل فنجانًا آخر من القهوة..

قالت بأدب وهي تعترض طريقي:
- فارس بيه، أرجوك استنى شوية. رشاد بيه لو عرف إنك مشيت ممكن يقتلني.

قلت بغضب:
- هو المجنون دا ما طلبش دكتور ليه؟!
قالت بأسى:
- هو مش بيحب الدكاترة.
- أنا هاكلم دكتور.
ثم تنهدت وتابعت:
- وإيه هاقعد أتفرج عليه وهو نايم؟!
- ماعلش يا فارس بيه. حضرتك اشرب القهوة الأول، وبعدين اعمل اللي تعمله..

أومات برأسي ثم دلفت الغرفة ووضعت القهوة على كومود بالقرب من السرير وغادرت..

تقدّمت وجلست على كرسي بالقرب من السرير ثم أشعلت سيجارة.. تناولت فنجان القهوة وارتشفت عدة رشقات ثم وضعته أمامي.. فتح رشاد عينيه بصعوبة ونظر لي بخوف وتوسل..

أردف بخوف:

- فارس، مش عايزة تسيبني.

- مين دي يا رشاد؟!

- نور.

ثم أضاف وهو يبكي:

- عايزة تشوفك يا فارس.

قلت مازحاً:

- لا أنا لازم أكلم دكتور أنت شكلك عندك حمى وبتخرف يا رشاد.

- لا يا فارس.

ثم مدّ يده بوهن فمددت يدي بعد أن أزحت الستارة الشفافة:

- عايز تسلم.....

* * *

كانت الأرض ترابية أسفل قدمي.. غابة من أشجار الكافور العملاقة التي تمتد على مرمى بصري.. تمند بقدر ما استطاع نظري أن يصل.. نظرت حولي في كل الاتجاهات وكأنها بلا نهاية.. كما أنا أرتدي ملابس ذات الهيئة.. ركضت للأمام حتى لهثت وانكأت على ركبتي براحتي يدي ثم تنفست بعمق وركضت يمينا ويساراً.. لم أستطع أن أحدد الاتجاهات فدست يدي في جيب بنطالي لأخرج الهاتف وأرى البوصلة لكن لم أحمل شيئاً في جيبتي.. لا مال ولا محفظة ولا هاتف..

صدري يعلو ويهبط مع الأنفاس المتهدجة ثم جلست أستند على ساق شجرة.. دقائق بل ثوان ثم قمت وصحت بصوت رنٍّ ودوى كأنه خرج من مكبر صوتي..

- رشاد.

- رشاد.

- نور.

ثم ظهرت أمامي نور من العدم على بعد مترات.. عادت شابة كما كانت.. جميلة كبدر.. عينان زرقاوان تلمعان كموج المحيط.. خصلات ذهبية زاد لمعانها شعاع شمسي فر من ظلال أشجار الكافور.. ترتدي جلباباً أسود مزيناً بحلى ذهبية وأخرى ماسية مثل الذي ارتداه إبراهيم من قبل.. ابتسمت وهي تضع قدمها فوق صدر رشاد المسجى على الأرض بذات الملابس.. نظر لي بتوسل ويأس..

لم يتحدث ولكن هي من قالت بغلٍّ:

- لازم يموت الكلب دا.

فأردف رشاد بتوسل:

- خليها تسييني يا فارس.

ركلته في وجهه بقدمها فسالت دماء من فمه وفقد الوعي ثم أردفت بلهفة:

- وحشتني يا فارس. أنا عايشة في وحدة وعايزاك معايا.

- سيبه يا نور.

صاحت في بغضب:

- لا مش هاسيبه.

- طب سيبه وهاعمل لك اللي تطلبه.

أطرقت برأسها ثم أردفت:

- تيجي معايا.

قلت مازحاً:
- أوعدك لما أموت وأدخل النار هابقي أتجوزك هناك.
ضحكت ثم قالت:
- ومين قال لك إنك مش في النار؟ أنتو قيامتكم يوم ميلادكم وبتدخلوا
نار الدنيا من غير حساب.
قلت ببلاهة:
- إحنا مين؟!
- هاسيبه يا فارس عشان بحبك، لكن المرة دي لو خدعتني تاني..
قاطعتها:
- إحنا مين؟!
- أنتو.....
ثم ضحكت وأضافت:
- هاستناك.
عدت لوعبي أقبض على يد رشاد اليمنى.. فتح عينيه ثم نظر لي مبتسماً
مع فيم سألت منه دماء قليلة.. وكأن رشاد لم يشعر بالتعب.. لم يكن هناك
عرق.. كان في كامل وعيه وفي أوج نشاطه.. قام ثم أزاح الستارة وجلس على
حافة السرير..
قلت ببلاهة:
- عندك تفسير للي حصل؟!
- أنا كنت باتعذب يا فارس.
ثم تابع بعد أن دنا مني وقبل رأسي:
- أنت أنقذتني.
عاد وجلس على حافة السرير ثانية فقلت بغضب:
- عايز تفسير!

- كانت بتيجي لي كل يوم لحد ما الموضوع زاد. كنت فاكِر إنها مجرد
كوابيس لحد ما قالت إنها هتقتلني لو ما شافتكش. أنا ابتديت أتوتر ورحت
لدكاترة ما جابتش نتيجة لحد ما واحد شار علي أروح لراجل علامة كبير..
ثم تنهد وتابع:

- اسمه شمس تبرير. راجل شيخ كبير كدا وعليه الوقار، قال لي إن روحها
مش عايزة تسيبك ولازم تعمل لها اللي عايزاه وإلا ممكن تتأذى منها وهي
كان طلبها إنها تشوفك...
قلت بتحفز:

- أنا عايز أقابل الراجل دا.
- للأسف هو مش في مصر حالياً، لكن أنا هاكلمه وهابعت أجيبه.
ثم أضاف بفضول:
- عايز تشوفه ليه؟!!

- الراجل دا ممكن يريحني من اللي أنا فيه، بس في أقرب وقت يا رشاد
لأني مش ضامن أعيش لحد إمتي...
- أنت عندك نفس حالة نور؟!
أومأت برأسي فأردف بودّ:
- خلاص يا فارس. في أقرب وقت هيكون هنا ما تقلقش.

* * *

الخميس 21 مارس..

كل شيء حمل عبثاً ونسائم رقيقة.. الجو رائع تزين بلون ربيعي ينعش
الأنفاس.. أنفاسي التي اختلطت بدخان وكحول، هل سيقدر الربيع أن
ينسيها فسادها؟! الليل أتى سرمدياً مع أضواء خافتة لوقت تجاوز السابعة
مساء.. الوحدة والشجن يحيطان بي.. أخيراً ارتديت ملابس خفيفة مع ذلك
الطقس الذي تأخر كثيراً ولكنه بالأخير أتى ليطوي بعض الشتاء بما له وما
عليه..

أجلس على الكورنيش أتأمل مياه النيل وأشرد بها.. أحدثها عما مررت به
ولا تجيب، فأزيدها حديثًا واهيًّا.. أشعل سيجارة أخرى وألفظ أنفاسها
بغضب عندما كنت جالسًا على السور الصخري..

الهرم آفة الأغنياء وأصحاب النفوذ..

الصحة ما عجز المال عن شرائها..

الموت لا يرشى ولا يموت..

الخلود ممل ولعنة..

لم أذهب أي مكان منذ أن تركت رشاد البارحة.. نمت منذ أن غادرت
فيلته إلى قبل الآن بساعتين وكأن عقلي رفض جنون الواقع ووجد بالنوم
ضالته فاستسلم له طواعية..

أتأمل العاشقين على يساري، أحضان هامسة وقبلات خلصة بين الحين
والآخر، يسرقان من الحياة لحظات من الحب الذي سينتهي قريبًا بزيعة
لهذه الحسناء رغمًا عنها ثم تتأقلم لتصبح سعيدة بما حظيت..

الحب الصادق لا ينتهي بالزواج.. الزواج منحى بالقصة.. الحب الصادق
لا ينتهي أبدًا وإن لم يكن هناك زواج.

رنّ هاتفي فالتقطه وأجبت:

- إيه يا عمر؟

قال بوهن:

- أنا في مستشفى السلامة.

قلت بلهفة:

- فيه إيه؟

ثم أضفت:

- أنا جاي لك.

* * *

عبرت الباب المفتوح ملتصقًا بالحائط تَوًّا.. ألهث كمن فرَّ من فكِّ مفترس.. صدري يعلو ويهبط وأنفاسي متقطعة.. لا بد أن السجائر جعلت صدري كقنديل فقد وقوده فخفت واقترب من ألا يضيء ثانية.. أتأمل الغرفة الصغيرة بدولاب طبي قزم بجانب سرير ارتفع ما يقرب من المتر بآخر الغرفة.. لا شيء يذكّر في تفاصيلها غير الإضاءة العالية بمصابيح نيون قوية زادت إضاءتها مع الجدران البيضاء والأرضية..
جلس عمر على حافة السرير الطبي عاري النصف العلوي ولفَّ شاشًا طبيًا فوق كتفه اليسرى..

كانت الممرضة قد فرغت تَوًّا منه وتستعد لكي تغادر.. ما إن رأته حتى ابتسمت ببرود ولكن ابتسامة عمر ما جعلت عقلي يهدأ قليلًا..
تقدّمت بخطوات متحفزة وأنا أصبح:

- ما لك يا عمر؟

ثم أردفت الممرضة بود:

- ما تقلقش خير.

وأردف عمر:

- مافيش حاجة، إصابة بسيطة كدا. قدّر ولف.

- حصل إيه؟!

قال بعد أن غادرت الممرضة:

- عيل مُسجل اختلفت معاه في الأتعاب ضربني بمطواة.

- عملت محضر؟!

ابتسم ثم قال بغلّ:

- لا أنا هاعرف أجيب حقي كويس.

تعجبت من ازدواجية عمر وكيف أنه محام ولا يخضع للقانون فيما

يخصه وظللت شاردًا حتى قطع صمتي..

- يلا بينا. هات إيدك بس خلي بالك على كتفي.

- طب هيمشوك إزاي من غير محضر؟
أردف مبتسماً:
- ما تشغلش بالك. أنا مخلص كل حاجة.
مددت يدي أساعده وسرنا ببطء وبعد أن اقتربنا من باب الغرفة قال
بأدب:

- ماعلش يا فارس نسينا التيشرت بتاعي على السرير ورا. ممكن تجيبه؟
تركته عند باب الغرفة وبعد أن تناولت التيشرت نظرت لظهره ثم
جحظت عيني.. شعرت أن الدنيا تدور بي وسأفقد وعيي لكني جمعت
بالكاد قوتي.

أردفت بهدوء يخالف ما شعرت به:
- إيه اللي في ضهرك دا يا عمر؟
- دا جرح قديم كنت واقع وأنا صغير على سيخ حديد لكن ربك ستر.
قلت بتعجب:

- لكن دا أكثر من 3 علامات!

- الحمد لله.
ثم تابع مازحاً:
- المؤمن دايمًا مصاب. مش أنا مؤمن يا فارس؟
ابتسمت بخبث وأردفت:
- أنا اللي آمنت خلاص.
نظر لي ببلاهة ثم اقتربت منه وتابعتنا طريقنا...

* * *

الإثنين 1 أبريل..

أيام مضت ورحلت ولم يرحل جسدي من شقتي.. أصبحت حبيس
هواجسي بما رأيت من رشاد ثم عمر.. كل شيء خارج حدود المنطق الآن
ويدفع عقلي للخلود إلى النوم.. تئن نفسي وتصارع الواقع الفوضوي..

تشابهت الأيام واختلط الحابل بالنابل.. الخمر أصبح رفيق عزلتي على مدار الأيام الماضية.. لم يأت الزائر حتى الآن وكأنه فرغ مني..
فقدت ضرسين وساءت حالتي عن ذي قبل.. أموت ببطء.. قطار الهرم سريع لكني أريد قطار الموت أن يسبقه.. أريد أن أموت بلا ألم وتطلق روحي بسجية تنن قسراً..

نظرت في هاتفي ثم وضعت على الطاولة أمامي عندما كنت أجلس في صالون الشقة الجلوس المعتاد.. الساعة الخامسة مساءً.. مضت ثلاث ساعات أجلس بها على ذات الحال.. فقط أتأمل وأفكر..

رُنْ هاتفي الذي تركته تواً كأنها حزن على فراقني. تناولته ثم أردفت:

- إزيك يا مدام فرح.
- الحمدلله. أنت أبارك إيه؟
- عايزة أشوفك النهار دا.
- تمام أنا كنت خلاص زهقت من البيت وهانزل. هاعدي عليك.
- أوك في المركز.
- أوك سلام..

* * *

الساعة 8 مساءً..

قبضت على يدي برفق عندما كنت أضعها فوق مقود السيارة.. مثبت العينين على الطريق أمامي الذي كان مكوناً من أربع حارات.. حركة المرور بطيئة وبالكد سرت مسافة أربعين كيلومتر في الساعة..
السيارات تملأ الحارات وصوت المحركات وآلات التنبيه أسمعه بقوة مع شبابيك أمامية مفتوحة يسري منها تيار هواء منعش..

نظرت لها بدهشة ثم قلت:

- فيه إيه يا فرح!؟

- وحشتني.

قلت بتعجب:
- أنت كويسة؟!
ثم تابعت بعد أن أزحت يدها:
- شاربة حاجة؟
- عاجباك؟
صفت السيارة على يمين الطريق ثم أردفت:
- فرح أنت مش طبيعية خالص.
- عاجباك من أول ما شفتني وبتحاول تعمل أي حجة عشان تقابلني.
ثم تابعت بخبث:
- أنت كمان عاجبني. فاكر يا فارس لما اتخليت عني وسبتني؟
قلت ببلاهة:
- اتخليت عنك؟!
- عشان عجزت.
صحت فيها:
- فيه إيه يا فرح؟!
- جسم حلو لكن للأسف مش هيتحمل وجودي. ممكن أبقى فيه كل ما
تعوز نبقى سوا. ها قُلت إيه؟
- فرح؟!
قالت بغضب:
- أنا نور مش فرح.
- نور..
- إيه مستغرب إن روح تبقى في جسم تاني؟ فيه حاجات كتير ما
تعرفوش عنها حاجة.
لطمتها بقوة:
- فوقي يا فرح.

- هاجي لك تاني.
ثم انتفض جسدها بقوة واهتز وفقدت وعيها للحظات.
استيقظت ونظرت لي بريية:
- فيه إيه؟ إيه اللي موقفك هنا؟!
- مافيش أغمى عليك وكنت باحاول أفوقك.
قالت برفق:

- أنا فعلاً ما حسيتش بنفسي. حاسة إني مرهقة من الشغل.
- ألف سلامة عليك. أنا هاوصلك وروحي ارتاحي على طول.
أومات برأسها ثم أشعلت المحرك..

* * *

مسحت على مرآة الحمام برفق لأزيح قطرات الماء العالقة بها.. نظرت بتوجس لوجه خالجه التجاعيد.. أصبت بلعنة تسارع ساعة العمر.. شفتان يابستان ووجه تحجر وجفت نضارته.. فتحت فمي ونظرت لضرسي اللذين فقدتهما من قبل.. شعرت بيأس وموت يطرق أبواب جسدي.. لا داعي لأحلم الآن.. متى سينحني ظهري؟! سأصبح غير قادر على الحركة ثم سأموت متعفنًا فوق أريكة الصالون.. سيعلم الجيران بوفاتي من رائحة جسدي ثم ستسرد قصص واهية كاذبة بأن فارس حسين رحمه الله كان طيباً محباً للخير..

لا داعي لفعل الخير فالموتى دائماً كانوا أفضل الناس.
هذا ما يقال دائماً عن الموت وكأن الناس تجامل الروح البائسة بكلمات لن تزيدها شيئاً سوى سيرة طيبة بعالم مادي.. لن تشفع الكلمات المنمقة للموتى ولن تزيدهم شيئاً..
تناولت منشفة ثم جففت جسدي ببطء من قطرات ماء تشبثت به لدقائق، وهي مدة وقوفي أمام المرآة والآن المنشفة كتبت نهاية قصتها..
ارتديت ملابس ببطء ثم غادرت الحمام بخطى واهنة..

اقتربت مترنحاً من أريكة الصالون ثم جلست.. رأيت سجائري فمددت ذراعي والتقط سيجارة أشعلتها وزفرت الدخان بحنق.. أتذكر المأساة التي أحيها وحين تذكرت العجوز الزائر وجدته يجلس على كرسي يساري..
قال مبتسماً:

- كبرت قووي يا فارس.

- هاموت إمتي؟

فأردف بتعجب:

- مستعجل على الموت؟

- عايز أترحم من العذاب اللي أنا فيه.

قال بغلّ:

- وهتسيب حقك؟

ثم تابع:

- شفت زهر عمر عامل إزاي؟ أكيد صدقت إن كل اللي شفته حقيقي!

- عمر مستحيل يخوني.

فضحك وأردف:

- تفتكر واحد بازدواجية عمر دي. مش سهل جداً يبقى وفي وخاين في

نفس الوقت؟

ثم أضاف:

- أحلى حاجة فيك إنك بتختار تصاحب المرضى النفسيين اللي زيك.

- أنت عايز إيه؟!

قال بودّ:

- مش عايز. أنا بس باوعيك عشان صعبان عليّ.

- عمر عمره ما كان خاين...

قاطعني:

- طب وملك مش طول عمرك شايفها خاينة. مش ممكن تكون ضحكت

عليه؟!

- لا ملك ما تعملش كدا.
- براحتك. أنت اللي....
ثم اختفى مع إشعالي سيجارة أخرى متخمة بمخدر الحشيش..

* * *

الثلاثاء 2 أبريل..

الساعة 4 مساءً..

خفتت الأشعة الشمسية وقلت حرارة الجو.. لم يقترب ما بقي منها من عيني بنظارات شمسية سوداء زينت وجهاً جافاً.. الجو منعش ويحمل تيار هواء بارد مع رؤية النيل أمامي في تلك العبارة التي أصبحت أحد أفضل زبائنها.. الطاولات ممتلئة أمامي.. تفحصت العبارة بعيني قبل أن أنظر ثانية لماء النيل الهادئ أمامي..

أجلس على طاولة جهة اليمين منتصف العبارة.. ارتشف من القهوة السادة رشقات متتابعة ثم نظرت لعلبة سجائر أمامي وتراجعت عن تناول سيجارة أخرى.. رتتي تحملان أطناناً من السواد الذي خلفه الدخان.. نظرت في الموبايل ثانية وقبل أن أتصل بها وجدتها أمامي.. تغير كل شيء بها.. ماذا حدث لك يا ملك؟! ارتدت عباءة سوداء وحجاباً صغيراً.. نظارات شمسية ذات عدسات دائرية كبيرة خبأت وجهها.. كأنها شخص آخر لفظ الدنيا وآثر أن يعود لطبيعته الملائكية.. أكانت في حداد علي ما أصابني؟! اقتربت من الطاولة ثم سحبت كرسيًا وجلست دون أن تسلم علي، ثم نزعت نظاراتها ونظرت لي بشوق بعينين تحجرت بهما دموع جزعة.. نظرات يأس وحب.. نظرات لم أرها من قبل في عين أحدهم..

قالت برفق:

- عمري ما كنت أتخيل يا فارس حينا ينتهي بانفصال.

ثم فرت الدمعات من عينيها وتابعت:

- عمري ما فكرت في لحظة إني هاشوفك بتموت قدامي وما اقدرش

أعمل لك حاجة.

ابتسمت وحاولت أن أقبض على يدها فأبعدتها ثم قلت بخجل:

- كفاية إنك تسامحيني.

- أنا مرتاحة كدا يا فارس.

ثم تابعت:

- فارس أنت ما جربتش تقرب من ربنا؟

- ما أنا قريب من ربنا، وبعدين إحنا بشر لازم نغلط.

أردفت بضيق:

- يا فارس أنت بتموت. لازم تحاول تصلح من نفسك.

- إن شاء الله. تشريني إيه؟!

- شكراً.

صمتنا شاردين لثوانٍ ثم قالت بودّ:

- فارس أنا عايزة أعيش معاك اليومين اللي هتعيشهم.

قلت بيأس:

- لكن ما اتعودتش أكون ثقيل...

قاطعتني:

- أنا ملك يا فارس. هارجع البيت بكرة إن شاء الله.

ثم قامت وابتسمت لي برفق...

* * *

الساعة 6 مساءً..

قبضت على الباب الزجاجي برفق ثم فتحته ودلفت.. تفحصت المقهى

بعيني.. الطاولات متناثرة ومتباعدة بنظام في صالة المقهى مع علو أنغام

لمعزوفة المطر.. موسيقا ترخي الأعصاب.. تنفست بعمق ثم تنهدت وقبل

أن أخرج هاتفي اقترب مني مدير المقهى وابتسم بسماحة..

ارتدى بدلة سوداء أضافت الرسمية على قسماته وقال بأدب:

- اتفضل يا أفندم. فيه حجز؟
- أستاذ عاطف...
- قاطعني بأدب:
- آخر تراييزة على اليمين. هو في انتظار حضرتك يا فارس بيه.
- أومأت برأسي ثم تقدمت.. ما إن رأني حتى ابتسم بود ثم اقتربت منه
وسحبت كرسيًا وجلست..
- قال مازحًا:
- ما تطلع النضارة دي. مافيش شمس خلاص.
- أزحت النظارات عن وجهي ثم أردفت بعد أن وضعتها على الطاولة:
- خير يا عاطف!؟
- التحقيق اللي بعتهولي.
- ما له!؟
- قال بتعجب:
- بصراحة غريب.
- مش فاهم!
- بص يا فارس. أنا مش هانكر إن دايمًا علاقتنا كانت متوترة لكن دا ما
ينفعش يكون دافع ليك إنك تخليني مادة للسخرية.
- قلت ببلاهة:
- مش فاهم!
- أردف ساخرًا:
- الكلام اللي بعتهولي دا تقراه في رواية هابطة.
- ثم أضاف بعد أن ضحك:
- لا رواية إيه. دا ما حصلش مجلة ميكي.
- قلت بغضب:
- تصدق إنك حمار وعمرك ما هتتغير.

قال بدهشة:
- أنا يا فارس؟!
- أيوة يا عاطف. ما تبص على وشي. فين الكذب؟! شايف أنا عجزت قد
إيه؟

فأردف بتأفف:
- أيوة وحد بيطلع يكلمك اللي هو أنت بعد ما كبرت، وبتشوف خيالات
وحاجات ما حصلتش ومش عارف الخيال من الحقيقة ومنظمة بتراقبك..
ثم تابع بعد أن شرد قليلاً:
- إحنا ممكن نحط دا تحت مسمى الجنون اللي بتسببه الحالة دي.
صحت فيه:
- أنا مش مجنون يا عاطف.
ثم قمت مغادراً...

* * *

جلست على كرسي المكتب في شقتي.. لحظات من الصمت والتأمل في
سمت الجنون.. الخيوط متشابكة بقدر لا يعي فهمها.. وكأن قصتي كتبها
روائي بائس مجنون يلهث وراء الشهرة.. حبكة قدرية لا منطق بها وصدف
غريبة.. لا أريد أن يكذب علي أحدهم الآن فعقلي قام بذلك وقد فعل
بأبهي صورة..

قصتي لوحة غير نمطية لفنان فقد عقله.. تشبه اللوحتين أمامي على
المكتب ورسمتا بعبثية بيد إبراهيم.. ظللت أتأملهما وأشرد بهما.. في صورة
هذا الرجل ممسوح الوجه.. من هو؟! هل هي رسالة؟!
كما رأيت من قبل في الفيديو أن الاهتمام بالتفاصيل سيجعلني أصل إلى
ما أريد.. دقائق هكذا حتى شعرت بملل ومعه أرحت رأسي على كرسي
المكتب وطقطقت فقرات رقبتني بعنف كاد أن يحطمها..
أشعلت سيجارة معها أطلقت زفرة غاضبة من ملل أصابني ولحق بي..
بل من فضول المعرفة التي ما زلت أبحث عنها حتى بعدما اقترب أجلي..

صمت وهمسات خافتة مصدرها الأثير.. همسات لا يسمعها إلا عقلي ولن يسمعها غير عقلي العالق في سكرات متاهة التأمل..
رَبِّ صوته في أذني وهو يجلس أمامي على كرسي المكتب الأيمن، ثم قال مبتسماً:

- باحب أقعد على الكرسي اليمين دائماً. تعرف باحس إن اليمين دائماً الصح.

- ممكن؟

ثم تابعت:

- أنت مين؟!

- يا راجل دا أنت سألتني السؤال دا ألف مرة وما جاوبتش. ليه هاجاوب دلوقتي؟

قلت بعين ثاقبة:

- عشان أنت يمين واليمين صح وبيساعد الضعيف.

- امممم نظرية.

أوما برأسه:

- أنا اللي باقي منك!

- مش فاهم.

فقال مبتسماً:

- تقدر تقول أنا شوية العقل اللي فاضلين في مخك.

- عقل؟!

ثم تابعت غاضباً:

- دا أنت كنت سبب في إن حالتي تبقى أسوأ.

- أنا كنت بافكرك بس.

أومات برأسي وقلت بحزم:

- طب فكري باللوحتين دول. مين الشخص اللي ممسوحة تفاصيل وشه

دا؟

أطرق برأسه:
- دا؟ امممم ما اعرفهوش لكن...
ثم أضاف وهو يشير بيده محذراً:
- إبراهيم مش صح إنك تمشي وراه أبداً.
- يعني إيه؟!
لم يجب واختفى من أمامي، لم آبه وتناولت سيجارة حشيش أشعلتها..
* * *

الأربعاء 3 أبريل

الساعة 10 مساءً..

صفت سيارتي أمام ديسكو مايكل.. تزلت برفق ثم أغلقت الباب
الأمامي بصفعة قوية.. مشيت ببطء متجهاً لباب الديسكو الذي زينه تمثالان
من الجبس لفتاة تمتطي أسداً ظهر ناباه وأحكمت لجامه.. إشارة عظيمة
بأن هنا الجنس الآخر يروض الرجال.. هنا الجنس والكحول والموسيقا.. هنا
يسكن شيطان الهلس ويخر أعتى جابرة الرجولة الشرقية.. هنا يا صديقي
يباع الوهم وتذاكر الهيروين.. بل تباع أجساد النساء وكلما زادت المنحنيات
زاد السعر..

وقف شابان مفتولا العضلات.. ارتديا زياً رسمياً.. ساعدان معقودان إلى
الصدر.. ونظرات ثاقبة مع إيماءات لمن يعبر الباب..

رأيت لافتة عنوان الديسكو *mika devi house*.. مع أضواء حمراء قوية
وكشافات led تضيء أمام الديسكو.. مايكل صاحب منزل الشيطان..
ابتسمت أتذكر بلاهته ثم تقدمت أصعد درجات السلم الرخامي..

ما إن وصلت إلى الباب حتى فُتح الباب وخرج مايكل يرتدي ملابس
خفيفة ويضع يده فوق كتف فتاة بالكاد ارتدت ما ستر جسدها..
رأني فصفعها مازحاً وقال:
- اسبقيني جوا.

- ثم صافحني بضمة قوية وقبلات وتابع:
- روستو حبيبي، فينك يا عم؟
- ثم أضاف وهو يقبض على يدي ويجذبني نحو الداخل:
- تعالي ندخل.
- لا خلاص بقى. شكلك كانت عندك سهرة.
- سهرة إيه يا عم؟ أنا كنت هاعمل كدا مع أول واحد أشوفه وكأنه صاحبى.
- ثم أضاف هامسًا:
- بيني وبينك كنت عايز أخلع. يلا هنفضل واقفين كدا؟
- لا هامشي. أنت عملت إيه مع حنان؟
- قال بضيق:
- عزلت والله بس هاجيب عنوانها قريب. البت ريحتها طلعت في منطقتها واضطرت تمشي. الناس قرفانة منها، ما حدش عارف راحت فين.
- هاكلمك تاني.
- ثم ابتعدت خطوات فنادى وهو يتبعني:
- استنى. أنت وراك حاجة؟
- قلت بعد أن استدرت له:
- لأ.
- طب أن جاي نسهر سوا.
- أومأت برأسي فتابع:
- بتعرف تسوق ولا نركب عربيتي؟
- مش ناقصة رزالة أمك.
- فضحك وأردف:
- حبيبي يا روستو.

* * *

تمايل القارب برفق فوق سطح الماء الهادئ مع تيار هواء ربيعي منعش..
جلسنا بمنصف القارب.. دندن مايكل لحنًا كثيبًا ولفظ أنفاس سيجارته بقوة
ليحملها الهواء وتصير زبدًا.. الإضاءة خافتة لا نكاد نرى إلا أضواء بعيدة على
ضفتي النيل.. ننظر أماننا بظهيرين متكئين على جانب القارب الصغير..
شغل صاحب القارب أغنية لأم كلثوم معها خفت صوت مايكل وهي
تدندن أغنية أنت عمري..

الليل وسماه... نظرنا للسماء بشجن..

ونجومه وقمره.. شردنا أكثر..

كلنا في الحب سوا..

قال مايكل مازحًا:

- ملعون أبوه.

- مين دا؟

- الحب.

ثم أضاف متأثرًا:

- جيلان سابتني عشان قلة الفلوس ودلوقتي بتضرب نفسها بالجزمة. ما
هي كلبة فلوس ما يفرقش معاها القرف اللي أنا فيه.

قلت بتأثر:

- طب أنت ليه...

قاطعني:

- كلهم كلاب فلوس.

ثم تابع بيأس:

- أنا مش مرتاح يا روستو. مليت من القرف اللي أنا فيه.

- ما حدش مرتاح يا مايكل.

أردف بأسى:

- أنت هتموت وهترتاح. يا ريت كنت أنا.

- إيه يا عم هنقلبها دراما؟ بعدين أنت خلصت السيجارة من غير ما
أخذ نفس!

فأشعل واحدة وناولني إياها...

* * *

الخميس 4 أبريل ٠٠

رنّ جرس الشقة وطرق الباب بعنف.. تقدمت مترنحًا بالكاد أتوازن ثم
فتحت الباب بعين نصف مفتوحة وقلت بدهشة..

- أمين بيه؟

أردف بغضب:

- هتسيبني واقف على الباب كثير؟

- لا اتفضل سعادتك.

دخل أمامي ثم اغلقت الباب، يرتدي بدلة رسمية ومنمق الملبس..
كعادته له غرور تهابه النفوس.. شخصية اللواء تسيطر عليه حتى الآن.. ما
إن وصلنا إلى الصالون حتى رمقه مشمئزًا..

- إيه القرف دا؟!

فهرولت أنظف كرسيًا ليجلس عليه ثم تقدّم وجلس وتبعته..

تابع بسخط:

- بص يا فارس. أنت واحد زي ما أنت شايف مش قادر تخلي بالك من
نفسك، هتخلي بالك من بنتي ازاي؟! شايف القرف اللي أنت عايش فيه؟
ثم تابع بعد أن أشعل سيجارًا وقال بجمود:

- عندي علم بحالتك وعرفت إن كلها أيام وتموت. ملك أنا حبستها في
الفيلا لأني ما احبهاش تعيش تخدم واحد زيك.

وتابع مشمئزًا:

- افرض اللي عندك دا معدي؟ ترضى إن بنتك تموت بسببه أو ملك؟

صمت فصاح في بغضب:

- رد.

أردفت بخوف:

- لأ.

سحب نفساً من سيجارته وزفره بكبرياء ثم أشار بسبابته محذراً:
- اسمع يا فارس، أنت زي ابني، وكنت باعتبرك كداه لكن لما الموضوع
يوصل لأنك تضر ملك. أنت عارف أنا أقدر أعمل إيه.

ثم صاح مؤكداً:

- عارف ولا لأ؟!

- عارف.

- يا ريت لا تتصل بيها ولا تشوفها تاني.
أومأت برأسي ثم قام مغادراً وفتح الباب خلفه بقوة...



يبقى في داخلك جزء لا مرئي.. لا تعلم عنه شيئاً.. جزء يتصرف بما يخالف
ظاهرك عندما يُطلب..

انتفض جسدي بقوة فوق السرير.. تصببت عرقاً من ذلك الحلم المزعج
الذي تذكرت بعض تفاصيله ثم ذهب عني.. الكوابيس تعبت في العقل
لتغزل لوحة جنون يرفضها العقل ويصحو ليتشبث بواقع فاق الكوابيس
حدة..

تأملت الغرفة بعينين شاردتين، ثم التقطت سجائري من على الكومود
الذي كان بالقرب من السرير، أشعلتها وسحبت أنفاساً زفرتها بحنق بعين
تقاوم النعاس الذي داعبها مرات.. ثناءت ثم فركت عيني بكلتا يدي..
طقطقت فقرات رقبتي برفق..

تناولت الهاتف بعد أن رنَّ:

- ألو.

قالت بصوت متقطع:

- إزيك يا فارس.

قلت بود:

- إيه يا ميرفت فينك؟

- عايزة أقابلك ضروري.

- لو على اللي طلبته منك إن تراقبي عاطف.....

قاطعتني:

- عايزاك في موضوع شخصي.

ثم تابعت باكية:

- هتقف جنبي؟

- هاليس وأقابلك في كافيهِ موكا اللي جنب الجريدة.
- شكراً يا فارس.
ثم أغلقت الهاتف وألقيته على السرير وسحبت نفساً آخر زفرت دخانه
بقوة..

* * *

الساعة 12:14 مساءً.

أزحت يدي تواء بعد أن نظرت في الساعة ثم تناولت فنجان القهوة
وارتشفت رشفة واحدة.. وضعت الفنجان وتناولت الهاتف من على
التراييزة، وتفحصت الإنترنت لدقائق.. لم يفلح النت في إخماد لهيب الملل
المستعر في عقلي..

الطاولات شبه خالية إلا من طاولتين يجلس على كل واحدة شاب..
تأملت الأول، منعزل عن العالم في شاشة الهاتف ويدخن النرجيلة مع رائحة
علكة نفاذة طغت على رائحة عطري وملأت المكان، أما الآخر يصيح في
الهاتف بغضب ويسب لحبيبة تركته حتى الآن ما يقرب من ساعة..

الكافيهِ يبعث الكآبة في النفس، مظهر مشوه لحدائثة التصميم مع عبق
الماضي.. لافتات تحمل كلمات أغانٍ قديمة على جدران زُينت بطوب ديكور
وطاولات مودرن من الخشب الوثير..

لم أشعر بهذا من قبل، لكن ربما تقلّب مزاجي وأصبحت دائم التأمل
والاهتمام بتفاصيل لا يراها أحد، ناقوس خطر يفضح مللاً وزهداً وحالة من
الهُواجس.. تأملت النادل ثم الجدران ثم الساعات.. الهواتف والطاولات ثم
باب المقهى والأرضية إلخ....

وكان كلمات إبراهيم علقت في ذهني، وكان الاهتمام بأدق التفاصيل
سيجعلني أجد حلاً لما أنا فيه..

مقهى رتيب وممل.. مشوه ككل شيء.. الحضارة لا تخالجها حدائثة
والماضي لا يخالط الحاضر..

إن اجتمع عقب الماضي مع الحداثة سنحصل على كيان مشوه.
ربما أهذي من الفتور الذي أصابي، ثم قطعته ميرفت بعد أن تحدثت
بصوت هامس:

- فارس أنا بانادي عليك من فترة. ما لك؟

- ماعلش سرحت شوية يا ميرفت.

ثم تابعت:

- كنت عايزاني في إيه؟!

تنهدت وقالت بأسى:

- عاطف.

- ما له؟!

تحجرت الدموع في عينيها وأردفت:

- قطع الورقتين العرفي بعد ما عرف إني حامل.

قلت بغضب:

- ابن الكلب! أنت حامل في الشهر الكام؟

قالت باكية:

- في شهرين.

ثم تابعت بتوسيل:

- فارس استر علي. أنا أبويا لو عرف ممكن يموت فيها.

- أتجوزك يعني؟

- لأ، اقنعه يتجوزني.

- طب ما تسقطي وخلص.

قالت بيأس:

- كنت غلطانة لما افتكرت....

قاطعتها:

- خلاص يا ميرفت. أنت روعي دلوقت وما تنزليش الجريدة تاني لحد ما

أشوف هاتصرف ازاي في المصيبة دي.

قالت بتوسل:

- هتساعدني؟

- هاساعدك يا ميرفت. يلا قومي أنتِ دلوقتي وهابقي أكلمك.

* * *

أغلقت باب مكتب عاطف بالترباس من الداخل ثم استدرت أنظر له بعينين يحملان بركاناً متوهجاً.. حمم بركانية في رأسي تجعل وجهي أشد حمرة من لون الدماء.. قسماث ليث ينتظر الانقراض على فريسته ويدان ترتعشان غضباً..

قام من كرسي المكتب ثم نزع نظارات القراءة ووضعها أمامه وأردف بخوف:

- أنت زعلان عشان اللي قُلته عن التحقيق؟ أنت عارف أنا هزاري ثقيل. دا تحقيق ممتاز وهانشره.

ثم أضاف وهو يتنهد:

- هانشره حالاً. استنى بس أكلم المطبعة.

قلت بغضب عندما كنت أتقدم ببطء:

- دا أنا اللي هانشرك.

- فيه إيه يا فارس؟

- فيه إنك ابن كلب وواطي. تضحك على البت الغلبانة وتقطع

الورقتين!؟

قاطعني بخوف:

- وأنا إيه يضمن لي إنه مني؟

ابتسمت بخبث:

- هتتجوزها؟

- يا فارس أنا بحبك ومش عايز...

ثم صمت وابتلع ريقه وقال بصوت متقطع:
- يا فارس دي بنت شمال وضحكت عليك بكلمتين.
- هتتجوزها يا عاطف؟
فقال بتحد:
- لا يا فارس.
انقضت عليه واعتليت جسده فوق المكتب وظللت أكيل له اللكمات
وأردد:

- هتتجوزها؟
- لأ مش هاتجوزها.
أردفت بغضب وأنا أقبض على رقبته:
- هاقتلك يا عاطف.
كسر الباب وتجمع الزملاء ثم أبعدوا جسدي عنه وهو يصيح:
- والله ما هاسيبك يا فارس أنت وهي.
- مش هاتكلم عشان مش عايز أفضحك، بس ورحمة أبويا لأعمل اللي
قُلت لك عليه.

ثم دفعت الزملاء عني وذهبت مغادراً...

* * *

الأحد 7 أبريل..

الساعة 1 صباحاً..

جلست في صالون شقتي أمسك زجاجة خمر وأنجرعها بيأس.. تذكرت ما فعلت البارحة مع عاطف ثم ضحكت حتى سعلت.. تناولت سيجارة الحشيش من المطفأة ثم سحبت نفساً عميقاً انتهى بضحكة قوية جعلت الدخان يرتد قسراً من صدري الذي كان يئن أليماً.. ثم بصقت في المطفأة كتلة دماء خالصة قانية..

نظرت لها بيبأس ثم ضحكت وقلت مخاطبها:

- سُفِّت؟ أهو هاموت دلوقتي.

ثم تابعت بيبأس:

- منك لله يا إبراهيم. يا رب تولع.

ثم قلت مخاطبًا زجاجة الخمر:

- يولع إيه؟ دا زمانه بيتشوي في نار جهنم.

وأضفت:

- قال عايز يعمل إنسان كامل. طب أنا ذنب أمني إيه؟ أنا ولا نور ولا

مشرة، لازم تدينا الزفت دا؟ طب أنا ليه مش فاكِر إني كنت أعرفه؟

والمنظمة اللي سايباني دي وعمالة تراقبني وتبعث لي فيديوهات ما كانوا

قتلوني وخلصوا.

ثم ألقيت زجاجة الخمر أمامي على الأرضية وأطفأت السيجارة وملت

على الأريكة مكاني..

* * *

دوى صوت موسيقا الفيديو في أذني.. على نعيق الغربان على شجر

الصفصاف ورائي.. دنت فروعها مني حتى لامست كتفي.. الأرض عشبية

خضراء أسفل قدمي.. غابت الشمس وخفتت أشعتها وتحت أضواء قمرية

نظرت حولي لأرى أشجار الصنوبر والصفصاف والكافور..

دخان عظيم يلقي بظلاله على الغابة تحمله الرياح التي لامست وجهي

برفق.. رائحة عفن حملها وجعلت القياء ينساب مني ليعكر صفو هذه

الحشائش الخضراء.. لكن لونه ما جعلني أحتار في أمري.. دماء سوداء لزجة

صنعت دائرة فوق العشب.. عدلت ظهري ثانية ثم ذهبت تجاه الدخان..

مشيت مترات حتى ظهرت نار تبعد بقدر ليس ببعيد.. نار شديدة

التوهج والغلظة ومن حدتها استشعرت حرارتها.. سرت متجهًا نحو النار

بتحفز وكأن شيئًا ما يناديني ولما اقتربت وجدت أناسًا كثيرين يرقصون طربًا

ويطوفون حول هذه النار..

جلس رجل يبتعد مترات يمسك بيده آلة غريبة بشكل صليب مقلوب
وينفث في قاعدته لتعلو أصوات تشبه الموسيقى التي سمعتها قبلاً في
الفاشة..

شعرت بالخدر يسري في جسدي وتقدّمت مترنحاً نحو بقعة ضوء ظهرت
في الأفق.. وكلما ابتعدت عن الصوت استعدت توازني.. حتى هرولت هرباً..
أركض حافي القدمين فوق رمال تتحرك كلما لامست قدمي..
علت أنفاسي ولهثت.. توقفت مرات ألتقط أنفاسي وعندما وصلت
لبقعة الضوء.. كانت دائرة ضوئية خرجت من كهف وكأنها القمر..
كهف خرج من هضبة صخرية وابتعد عن الأرض مترات وحفر بالهضبة
سَلماً ممهداً إلى الكهف..

اقتربت من السَلْم وقبل أن أصعد سمعت الصوت:

- رايح فين يا فارس؟

استدرت فوجدت إبراهيم ومشيرة ونور يقفون على خط واحد، وارتدوا
ذات العباءة السوداء المزينة بالحلي ثم نظرت لهم ببلادة فتابع..

- مش هتعرف تدخل مهما حصل.

- أدخل فين؟!

أشار للكهف:

- هنا.

- أنا كنت أعرفك ازاي وإيه الدوا اللي اديتهاولي؟

- القدر نتقابل وننسى ونتقابل لكن....

استيقظت على صوت رنين الهاتف تناولته وأجبت:

- أيوة يا مايكل.

- عندي ليك خبر حلو.

- إيه؟ لقيت حنان؟!

- أيوة ساكنة في القلعة.

ثم تابع برفق:
- نروح لها إمتى؟
- هاكلمك بالليل، سلام.

* * *

أغلقت الهاتف وأكملت نومي...حتى رنَّ ثانية تناولته متأفِّفًا ولكني
ابتسمت عندما نظرت في شاشته..

- ملك وحشتيني.
قالت باكية:
- بابا يا فارس.
- عرفت، هو جا لي.
ثم تابعت برفق:
- ما تزعليش يا ملك. هو صح، أنا هابقي أعدي أشوفك من وقت للتاني.
- لكن يا فارس..
قاطعتها:
- اهدي وكل حاجة هتبقى تمام.
- ماشي يا فارس.

* * *

الإثنين 8 أبريل..

الساعة 10:28 مساءً..

طرقت على الباب الخشبي بقوة ثم نظرت لهم.. كانوا يقفون وراي
يراقبون ما أفعل في صمت.. نظرت لميرفت منتفخة العينين لم تكف عيناها
عن البكاء وكأنها سماء في أحد أيام يناير ولم ينطفئ سيل الأمطار منها..
عمر الذي أوما برأسه مبتسمًا كأنه يشجعني على ما أفعل.. حمله في
بنظرات واثقة ثم غمز بعينه اليمنى لي يجعل عقلي يتشجع أكثر على ما أراد..

وذلك المأذون الذي يرتدي جلباباً كحلياً وعلى رأسه عمامة.. ويحمل
بيمينه دفتراً كبيراً.. حسن الوجه ومنتاسق القسماط بوجه ملائكي يشع نوراً
وعلامه صلاة كبيرة أعلى جبهته.. بلحية حليقة وعينين زرقاوين وأنف طويل
مستقيم.. شاب ثلاثيني وقور ومهذب.. نظراته لي كانت جامدة لم تفصح
عن شيء إلا أنني شعرت بقليل من التعجب أو الخوف على قساماته..
فُتح الباب ونظرت لنا خادمة ترتدي جلباباً مزيئاً ببعض الورود.. ملامح
بائسة لامرأة خمسينية تحمل بين طياتها أمماً ووهناً، نظرات رعب حركت
الملكاه الراكدة في تعابير وجهها لتزيد بعضاً من تجاعيده مع حجاب أظهر
بعض الخصلات البيضاء لشعر أشعث..

قلت لها بغضب:

- هو هنا؟

قالت بصوت متقطع:

- مين؟

- عاطف.

أومات برأسها في خوف وأردفت:

- آها، هاناديه.

فتقدّمت ودفعتها بيدي اليمنى ثم مررت نحو الداخل وهم يتبعونني
لأصل لصاله تتوسطها طاولة خشبية ضخمة يجلس عليها عاطف برفقة
أربعة آخرين، وخلفهم نافذة يعبر منها تيار هواء قوي.. كانوا يلعبون القمار
أو الكوتشينة لم آبه وتقدّمت أصبح بهم..
- اطلعوا برا.

نظروا لي نظرات رعب وكأنهم يرون مجنوناً، ثم أخرجت طبنجة رصاص
حي تسعة مللي وسحبت الأجزاء.. اقتربت منهم أكيل لهم اللكمات والركلات
وهم يفرون أمامي كفتران، ثم نظرت لعاطف نظرات نمر جائع.. نظرات
جعلته يقف من الكرسي كتمثال فاقد الحياة..

قلت بحزم وأنا أشهر فوه المسدس تجاه صدره:
- اقعد يا عاطف.

ثم تابعت:

- حسابك في البنك وصل كام؟
قال بصوت متقطع:

- ثلاثين مليون.

- طلع دفتر الشيكات واكتب شيك بخمسين مليون باسم..
ثم نظرت لميرفت:

- اسمك الرباعي إيه؟

- ميرفت عماد عبد العظيم وهدان.
نظرت له وقلت بغضب:

- سمعت؟!

أخرج دفتر الشيكات وكتبه وهو يبكي ثم أردف:
- خلاص كدا؟

- لأ.

ثم أشرت للمأذون:

- اتفضل يا مولانا.

واقتربت من عاطف تناولت الشيك ثم ناولته لعمر الذي رمقه متحفزاً
ثم أردف بغلٍّ مخاطباً عاطف:

- طبعاً لو فكرت تطلق عارف إيه اللي هيحصل؟

أوماً برأسه في خوف ثم أشرت لميرفت فجلست على الطاولة وقلت
لعمر:

- هات بطاقتك.

تناولت البطاقة ثم أخرجت بطاقتي وناولتهما للمأذون:

- البطايق أهى يا مولانا....

* * *

الثلاثاء 9 أبريل..

جلست برفقة مايكل فوق أحد أسطح البنايات في منطقة القلعة..
السطح خالٍ إلا من غرفة تشغل حيزاً صغيراً منه وأريكة مهترئة تستند
للسور الذي تجاوز طوله المتر ويطوق السطح.. أمام الأريكة كرسي خشبي
قديم وجالون مياه مقلوب فوق أربعة حجارة تم استغلاله كترابيزة ليكمل
لمسة الديكور الشعبية..

مايكل كان يتحدث في الهاتف ثم صاح بغضب وقام متجهاً لآخر السور
الذي ظل مستنداً عليه ويهمس بخفوت ثم يصيح بعته ثم يتقلب مزاجه
بضحكات هستيرية إلخ...

تفحصت البدلة الصفراء التي يرتديها وشعره الذي تطاير بفعل ريح
رقيق فوق مبنى تجاوز الأربعة طوابق.. ابتسمت من حماقته ثم نظرت في
شاشة الهاتف والساعة تجاوزت الرابعة بعشر دقائق..

طقطقت فقرات رقبتي بعنف ثم دسست الهاتف في جيب بنطالي
ورمقت البنايات حولي.. عبثية وبناء عشوائى مع بعض عيش الدواجن
وأطباق الدش.. مبانٍ من الطوب الأحمر.. لوحة رائحة لمن أراد أن يصاب
بالاشمزاز..

أنهى مايكل المكالمة ثم قال وهو يتقدم:

- ال view ریح أعضائي، بافكر أشترى بيت هنا.

قلت بضيق:

- هي أم حنان دي ماتت جواً؟!

- يا عم الست بتجنبي لازم تضايفنا، وبعدين دول كوبايتين شاي.

ثم أضاف وهو يجلس على الأريكة:

- وكمان حنان مش هنا. مش قالت لك بتجيب حاجة من تحت؟

زفرت بحنق مع خروج أم حنان من الغرفة.. امرأة تجاوزت الخمسين
عاماً.. بدينة وتتحرك بصعوبة مع عرجة خفيفة.. قمحية البشرة ذات عينين

ضيقتين وحواجب غليظة وأنف ينساب منه خط من الماء.. ارتدت جلباباً
فضفاً.. بلا حجاب فظهر شعرها المجعد..
ظلمت أتابعها بعيني مشمئزاً حتى وضعت الصينية أمامنا وجلست
وأردفت بودّ:

- طب والمسيح الحي إحنا زارنا النبي يا مايكل بيه.
- ثم تابعت وهي تنظر لي بودّ:
- اشرب يا حاج.
- ثم تابعت مزاحة:
- يووه نسيت، اشرب يا مقدس، والإنجيل إحنا زارنا النبي.
- نظرت لها بضيق فأردف مايكل ضاحكاً:
- فارس مسلم يا أم حنان.
- والله يا حاج فارس زارنا النبي.
- قلت بضيق:
- هي حنان فين؟!!
- بتجيب حاجة بنات من الصيدلية.
- ثم غمزت لمايكل وتابعت ضاحكة:
- حاجة بنات بقى يا مايكل بيه. أنت فاهم.
- ضحك مايكل وأردف:
- أيوة فاهم أيوة.
- ثم تابع بسخرية:
- ألا هو أنت كنت بنت يا أم حنان ولا اتولدت بالحجم دا؟
- ضحكت وأردفت:
- مقبولة منك يا مايكل بيه. الحمد لله البت مش طالعة لي.
- هو كان فيه زي حنان، دي كان عليها....

ثم صمت عندما رأى حنان التي تحولت قسماً وجهها لفرح ممزوج
بهستيريا وركضت تحضن مايكل بود:

- ميكاء، والله ابن حلال.

- عاملة إيه يا بت وفين أراضيك؟

قالت بضيق:

- شغالة ممرضة بس أيامك وحشتني يا ميكاء.

- إحنا فيها، ارجعي الشغل.

ثم اقتربت من أمها ووكزتها في كتفها:

- قومي يا امه عايزة أقعد مع ميكاء شوية.

ثم نظرت لي ببرود:

- إزيك يا حاج؟

قال مايكل مبتسماً:

- دا فارس.

- فارس مين؟!!

- فارس حسين صاحبي.

قالت بفرع:

- يا نهار أسود..

- اهدي بس واقعدي.

ثم جذبها مايكل لتجلس على الكرسي الخشبي بعد أن غادرت أمها
وجلس بالقرب مني على الأريكة..

قلت بود:

- حنان أنا عايز أفهم أنا ضربتك ليه؟!!

- مش عارفة. ألا هو أنت حصل لك إيه يا أخويا؟

قال مايكل بتأفف:

- حنان مش جاين نتساير. اخلي احكي حصل إيه.

- بص إحنا دخلنا الأوضة وكانت كل حاجة حلوة، فجأة فارس اتحول
وفضل يضرب في لحد ما أغمى عليّ. ولولا عمر بيه ربنا يستره سمعني كان
زماي رُحت فطيس. صحيت وشي كله دم ولا مؤاخذة عضني في بطني.
ثم نظرت بخوف فقال مايكل:

- كملي.

- أنا قُلت أقعد في البيت ما نزلتش الشغل لحد ما وشي يخف. سخنت
بعد ما روحت على طول، فروحت المستشفى الدكتور شاف العضة قال لي
إنها عضه كلب مش عضه بني آدم أبداً واتعالجت. وحلفت يمين ما ادخل
الديسكو تاني.

قلت ببلاهة:

- عضه كلب!

- وأخذت مصل.

قال مايكل بغضب:

- بت اتظبطي.

- والله أخذت مصل يا ميكا.

تبادلنا نظرات التعجب.. ثم قمت مبتعداً نحو السور وأخرجت الهاتف
واتصلت بعمر حتى أتى صوته..

- عمر سُفت لي الشيخ. أنا لازم أشوفه في أقرب وقت.

قال بتعجب:

- فيه إيه؟!

- اسمع اللي باقول لك عليه.

- طيب خلاص هاشوف وأكلمك.

أغلقت الهاتف ثم توجهت لمايكل وقلت بحزم:

- يلا بينا يا مايكل.

* * *

الأربعاء 10 أبريل..

الساعة 2 صباحاً..

رنَّ الهاتف ودوى صوته كالنعيق فوق رأس متخم بالكوابيس.. تحسست بيدي موضع الهاتف الذي شاركني نومتي.. وضعت يدي على زرِّ كتم الصوت دون أن أنظر في الشاشة، ثم غطيت رأسي بوسادة أخرى لتكتم صوت رنين الهاتف المستعر الذي ظل يرنُّ لكني لم آبه.. زفرت بغضب ثم التقطه بعين ناعسة ونظرت فيه، وضعته على أذني ثم أجبته بصوت مبحوح..

- أيوة يا ميرفت. حد يكلم حد في الوقت دا؟

ثم تابعت بوهن قبل أن تتحدث:

- بصي أنا في اللي مكفيني حلي مشاكلك مع عاطف بعيد عني.

قالت بعجل وخوف:

- اسمعني يا فارس، فيه حاجة مهمة لازم تعرفها.

ثم تابعت بصوت متقطع:

- عاطف كان بيكلم حد عليك وقال له التحقيق اللي بعته ما قلتش فيه

حاجة عن العقار، وإنك بتلعب عليه ومخبي معلومات كتير.

انتفضت وقلت بخوف:

- بتقولي إيه؟!

- قال لهم يستجوبوك بمعرفتهم.

ثم أضافت:

- فارس أنت لازم تهرب من عندك لأنهم في طريقهم ليك.

قلت بعجل:

- أنت متأكدة؟!

- صدقني والله أنا سمعته بالصدفة وحييت وأبلغك.

- خلاص اقفلي.

قمت من السرير كالمجنون أتخبط في الغرفة ثم تنهدت وجلست على حافة السرير.. تناولت الهاتف وحاولت مرات حتى أجاب بصوت ناعس غاضب:
- أيوة يا محمود....

* * *

نُزعت العصابة عن عيني تواء.. قاومت كثيراً حتى أستطيع النظر برؤية مشوشة وعمى جزئي أصابني.. حاولت أن أمد ذراعي لأفرك عيني لكنه كان مكبلاً في كرسي حديدي استقبل جسدي كالسجن..
دقائق من الصمت حتى بدأت تتضح الرؤية..
الغرفة سماوية خالية إلا من ترابيزة حديدية في منتصفها مع كرسيين كان أولهما من نصيبي.. الإضاءة عالية مصدرها مصابيح ليد بطول جدران الغرفة.. تحاشيت النظر لأعلى حتى لا تسبب لي الصداع.. نظرت خلفي لأرى رجلاً يرتدي بدلة من قطعة واحدة لونها أصفر.. ذكرتني برواد الفضاء.. لم يخبئ وجهه الذي لم تكن به تفاصيل كبيرة غير أنه لا يحمل الجنسية المصرية..

لم يتحدث وظل واقفاً خلفي حتى فُتح الباب ودخل رجل أربعيني فارح الطول.. لديه شامة على يسار الخد.. قسماط جامدة.. حواجب خفيفة فوق عينين حادتين حالكتين كقمر محاق، وأنف طويل كساق الكافور..
مع حلة رسمية مهندمة وصوت ديب نعلين يدوي في الغرفة..
أشار بيده للرجل الواقف خلفي فغادر وأغلق الباب برفق ثم جلس الرجل صاحب الحلة أمامي وأردف:

- إيه يا فارس؟ سبناك كثير؟

قهقهت:

- إيه جو العصابات دا؟!!

- الجو دا أنت اللي بدعته. بص إبراهيم ساب لك عينة من العقار قبل ما نقتله.

- ليه هو أنتوا مش معاكم عينة؟

- إبراهيم دمر كل العينات قبل ما يهرب. فقتلناه لما خفنا إنه يسافر ويدي نتائج الأبحاث دي لأي حد.

ثم تنهد:

- الكلب حط فيروس على الـ system بعد أيام من الحادثة النظام الأمني بتاعنا كله اتمدم واطمسحت كل الملفات وطبعاً كل الأجهزة بقت خردة.

ضحكت ساخرًا ثم أردفت:

- والناس اللي كانت شغالة معاه؟

قال بضيق:

- كانوا بقر ما حدش فيهم عرف يفهم باقي الأبحاث.

ثم أطرق برأسه وسأل بتحفز:

- أنت هربت ازاي منهم في الحادثة. أنا مديهم أمر مباشر إنهم يخلصوا عليك.

تنهدت وقلت:

- ما أنا كنت قدامك بعد الحادثة.

- للأسف كان عندنا شك إن فيه عينه من العقار معاك وكنا هنستجوبك

فلقيناك بتعاني من الحالة اللي بيسببها العقار وجسمك كان متماسك أو بالأصح أول حالة ملموسة قدامنا فقررنا نراقبك من بعيد.

- امممم وبعدين؟!!

صاح بغضب:

- وبعدين سيادتك معاك العقار دا وأنا عايزه وإلا هاطلعه منك

بطريقتي.

قلت بتحدّ:

- أنا مش معايا عقار، ولا هاتكلم بأساليب التعذيب مهما عملت.
ضحك وقال بسخرية:

- تعذيب إيه يا راجل بس إحنا علماء. أنا هاعمل عليك شوية تجارب.
ثم تابع بخبث:

- ويؤسفني أقول لك إن آخرتها هتموت، لكن الألم النفسي والجسدي
أضعاف اللي أنت فيه..

صُفح باب الغرفة بقوة نزعته من المفصلات وأردته أرضًا كالقتيل.. تقدم
محمود يشهر سلاحه وخلفه قوة من قوات التدخل السريع وعناصر الأمن..
لم أستمع للمعركة بالخارج لأن الغرفة كانت معزولة جيداً..

نظر له الرجل بعين ثاقبة ثم أردف يخاطبني:

- نهايتك قربت يا فارس.

ضحكت وقلت:

- يؤسفني أقول لك إنك هتشفوف ألم نفسي وجسدي أكثر من تأثير

العقار.

* * *

الثلاثاء 30 أبريل..

الساعة 12 مساءً..

دلفت مكتب محمود عثمان ثم أغلق العسكري الباب خلفي برفق..

جلس فوق كرسي مكتبه يعبث بأزرار laptop ويدخن سيجارة بشراهة

وكأنه يغتصبها إلى أن استسلمت أخيراً ثم فركها في المطفأة أمامه..

ابتسم لي ثم وقف من كرسي مكتبه واقترب ليصافحني بحرارة وقوة، ثم

جلسنا أمام مكتبه..

أردف بودّ:

- عامل إيه يا فارس؟

- الحمد لله وأنت يا محمود؟

ابتسم ثم قال برفق:

- أول مرة في تاريخ خدمتي أبقى راضي عن نفسي، الله يرحمه إبراهيم كويس إنه دمر كل حاجة قبل ما يموت.

قلت ببلاهة:

- لكن ليه قال لي إن العقار دا معاهم؟

- تلاقيه كان عايزك تخلصه منهم.

أومأت برأسي:

- دا التفسير المنطقي.

قال بأسى:

- للأسف يا فارس بعد كل محاولات استجواب الناس دي مافيش أي تهمة نقدر نوجهها لهم غير خطفك.

أومأت برأسي ثانية فتابع:

- لكن الحمد لله هم وانزاح.

ثم أضاف:

- زعلان عشان هتموت؟!

- المفروض أزعل، لكن...

قاطعني:

- أنت بطل يا فارس ولازم تواجهه.

- فيه حاجة عايز أقولها لك، الناس دي كانت بتراقبني من فترة كبيرة، وكان فيه فيديوهات بتتبع على فلاشة. ما اعرفش كانت بتوصل لها ازاي من غير نت. بس هو واضح إنها تكنولوجيا متقدمة.

قال بتحفز:

- فين دي؟!

دست يدي في جيب بنطالي وناولته الفلاشة فقام وأدار ال laptop تجاهنا ثم دسها وانتظر.. ضغط على الملف فظهر الفيديو بشاشة سوداء ثابتة عليها كلمة Gamecan.. لم يعمل الفيديو لكني سمعت صوت الموسيقى التي سببت لي طيناً حاداً وصداعاً مزمناً..

قال محمود:

- دي كلمة ثابتة وما فيش حاجة.

- مش سامع الموسيقى؟!!

أردف بتعجب:

- موسيقا!!!

علا الطنين في رأسي وشعرت بأنني أرى شريطاً من المشاهد التي تُعرض

أمامي..

تنهدت بعمق مع دوار أصابني ثم صحت:

- اقلها يا محمود.

- فيه إيه؟!!

- ما فيش.

ثم تابعت بتحفز:

- أنت متأكد إنك لا شُفت ولا سمعت حاجة؟

- آها.

فسحبت الفلاشة وغادرت...

* * *

الأربعاء 1 مايو..

الساعة 9 مساءً..

كانت الغرفة بلا دهان ذات إضاءة خافتة مصدرها قنديل صغير وضع فوق ترابيزة أمامه.. جلست برفقة عمر على أريكة خشبية فرشت بجلد

الماعز دون إسفننج.. أحسست بألم في ظهري من الجلوس عليها.. الغرفة واسعة ظلماء دهماء خالية إلا من الأريكة والكرسي..

على الترابيزة كتاب غليظ الجلد وعليه نقوش من الخارج لأرقام ورموز.. على الكرسي جلس رجل بدين الجسد بوجه كمثلث.. ذو ذقن مدببة ولحية غير مكتملة فكانت الشعرات في وجهه لا تريح النظر.. أصلع الرأس.. رأس ملساء تلمع في الضوء.. عينان حادتان ترمقنا بثبات بين الحين والآخر.. أنف ضخم أسفله شفتين غليظتين.. شفاه علوية مشقوقة من المنتصف وسن ذهبي بصف الأسنان العلوي.. ارتدى جلباباً أسود غُطي ببعض خالجه الرقع الكبيرة بشال أسود التف حول الرقبة..

لحظات من الصمت زادت التوتر في عين عمر حتى انتقلت العدوى لي حتى قطعها الرجل بصوت أجش:

- خير؟ مين دلکم علی هنا؟

قال عمر بتنحنح:

- والله يا شيخ عمّار...

قاطعته:

- خلاص مين المضرور؟!

قلت برفق:

- أنا.

- احكي.

- بيطلع حد يكلمني وباشوف أحلام غريبة والنهار دا عرفت إني من فترة عضيت واحدة والدكتور قال لها إن دي مستحيل تكون عضة بني آدم وأخذت مصل لعضة الكلب..

فنظر لي ببلاهة ثم تابعت:

- باشوف أموات وبالكلمهم وواحدة كنت على علاقة بيها لبست جسم

واحدة تانية وقالت لي نبقي سوا.

قال بثقة:

- أنت بتحب النساء؟

أومات برأسي فأردف:

- نحضر الخدام وكل شيء هيبقى معلوم.

ارتعد جسد عمر خوفاً فقبضت على يده ليهدأ ثم تناول عمّار الكتاب
وغمغم بصوت خافت حتى ارتعش جسده بقوة وانتفض.. سيل من الدماء
سال من أنفه ثم استيقظ..

قال بفزع:

- شر.

ثم انتفض جسده ثانية وسويغات حتى اشتعلت النار التي كان مصدرها
لا شيء.. نار عظيمة على الجدران وكأننا بداخل فرن كبير..

استيقظ ثانية وقال بوهن:

- شر، الخدام مات.....

ثم لفظ أنفاسه الأخيرة فركضنا إلى خارج الغرفة في رعب..



عندما تياس من الغد ستفتش عن نفسك في ماضيك..

وكان القمر ملّ من البشر واختفى وراء سواد مظلم.. هذا ما قلته وأنا
أفتش عنه في سماء حالكة تزينها نجوم منيرة بعد أن صفت سيارتي على
جانب الطريق وجلست فوق الرصيف لبرهة أريح ظهري من القيادة التي
دامت لأربع ساعات دون وجهة..

ظللت شاردًا هكذا وصوت العجلات يرنّ في أذني وكل ما شغل عقلي هو
أمر الفلاشة الملعونة التي أحملها في جيبي.. نظرت في الساعة ولم أستطع
رؤية الوقت لخفوت الإضاءة.. أخرجت هاتفي ونظرت بشاشته.. الساعة
تجاوزت الثامنة مساءً..

ما زلت لم أتصل بعمر منذ ذلك اليوم.. تركته في ذعره الذي لم يؤثر على
عقلي الذي عاش بأضغاث وهلوسات جعلته كصنم لا يشعر بما حوله ولا
يفرق بين واقع أم خيال..

الأسئلة لا تزال تملأ عقلي.. أسئلة سمجة لن تضيف شيئًا لي غير أجوبة
غير منطقية لرجل شارف على الحقيقة المنطقية التي اتفق عليها كل من في
الأرض..

الحقيقة الوحيدة التي اتفق عليها الناس رغم أنهم اختلفوا على الإله
هي الموت.

منطق غريب، الاتفاق على المخلوق والاختلاف على الخالق! أي بلاهة
أصيب بها ابن آدم.. طين في طبق طيني لم يجف، هذا هو ذكاء البشر.. ذكاء
أبله في عقل غير ناضج.. ذكاء في عقل غير مكتمل فقد رونقه في هذا العقل
المحدود..

أبعد عن شقتي القديمة عشر دقائق.. تذكرت عم سالم والفلاشة ثم
قمت وركبت السيارة مغادراً..

مضت ثماني دقائق فأبطأت سرعة السيارة وأدرت المقود يساراً برفق وأنا
أدلف الشارع الذي تقبع فيه بناية شقتي القديمة..

صففت السيارة وترجلت ثم تقدّمت ببطء تجاه البناية.. عم سالم هناك
يجلس على أريكة خشبية.. يرتدي جلباباً خفيفاً أبيض اللون ويدخن النرجيلة
التي غزل دخانها خيوطاً كأنها فلتت من جلبابه..

رأني فابتسم ثم قام واحتضني بحب:

- والله وحشتني يا أستاذ فارس.

- كنت جنب العمارة وحببت أشوفك.

فقال وهو يجلس ويطرق على الأريكة برفق:

- اقعد يا فارس يا ابني.

ثم أضاف:

- الهانم الصغيرة عاملة إيه؟

- الحمد لله.

- أنا ما شُفتهاش غير مرة واحدة بس ما شاء الله ربنا يحفظها..

قلت بودّ:

- ربنا يخليك يا راجل يا طيب.

ثم أضفت بعد أن جلست:

- الفلاشة اللي اديتها لي.

- كلاشة إيه؟!!

قلت مبتسماً:

- الفلاشة اللي قُلت لي حد سابها لي.

- آهاااا أيوة أيوة.

- مين اللي سابها؟ أقصد شكله إيه؟!!

- هو واحد طول بعرض كدا لابس بدلة وكان راكب عربية آخر فخامة.
- امممم طب مافيش فيه علامة مميزة؟!
- لا غير إن وشه كان عليه غضب ربنا ما بيضحكش.
- ماشي يا عم سالم.
- ثم أضفت بعد أن قمت:
- أنا هامشي.
- ما تقعد.
- دسست يدي في جيبي وناولته ورقتين فئة مئتين جنيه.
- لا عايز أروح عشان أرتاح شوية.
- روح ربنا يبارك لك يا أمير يا ابن الناس الطيبة..

* * *

السبت 4 مايو..

الساعة 12 مساءً..

فتحت الباب الزجاجي برفقٍ لذلك المقهى الذي يبتعد عن مبنى الجريدة بضعة مترات.. كان خالياً إلا من ثلاث طاولات وميرفت تجلس على طاولة منهن.. ترتدي ملابس سوداء لا رائحة فيها ولا طعم ككوب ماء لكن تكفي لستر حياء الجسد.. مسحت عينيها بمنديل ورقي ثم رمته في مطفأة على الطاولة.. تناولت كوب الشاي الأخضر وارتشفت منه برفق..

أغلقت الباب خلفي بهدوء بعد أن تفحصت المقهى بعيني ثم تقدّمت لطاولة ميرفت القابعة بأخر المقهى على يساري تستند على الجدار المزين بطوب الديكور..

جلست أمامها ثم أردفت بودّ:

- إزيك يا ميرفت؟

ثم تابعت:

- أنا مش عارف أشكرك إزاي، لولا اللي عملتبه معايا...

قاطعتني:

- دا جزء بسيط من جمالك..

ثم أضافت بهدوء:

- أنا ها طلق من عاطف وكنت عايزة الشيك.

- ليه؟!!

- عايزة ادبهوله.

- اممم إحنا ممكن نحبسه.

قاطعتني ثانية:

- هو already محبوس جوا نفسه، وجوا خوفه منك.

ابتسمت وأردفت:

- عاطف عمره ما كان مشكلة لأني عارف آخره.

- أنت بتناقض نفسك!

تنهدت وقلت:

- دا آخر كلام عندك؟

- صدقني يا فارس عاطف أحقر من إنك تأذيه.

ثم أضافت بأسى:

- أو إن ست تعيش معاه وتستحمل ميولة الغربية.

- أنت قبلت ليه؟!!

- افتكرت إنه هو العفريت اللي هيحقق أحلامي.

وتابعت بحزن:

- ساعات مش بيبقى عندك إرادة تختار.

قلت بسماحة:

- هو حد غصبك عليه?!!

- لأ، بس لما بيبقى قدامك كام اختيار والعقل والمنطق والظروف تدفعك

لاختيار بعينه دي مش إرادة. كنت عايز أعمل إيه؟ أنا واحدة كل مؤهلاتي

دبلوم تجارة ولقيت فرصة زي دي قدامي. فلوس ومركز يساعدوني أصرف على عيلة وأب مريض! ولا كنت أروح أقف في سوپر ماركت ودا يعاكس ودا يبصبص.

قلت بضيق:

- مش مبرر!

- أنا كان ممكن أكون سلعة قدام....

قاطعتها:

- أنت شفت نفسك سلعة على المشاع، فاخترت تبقي جارية، كملي بقى.

أنا ممكن أساوم عاطف وأجيب لك منه كام مليون بالشيك دا..

قالت باكية:

- يعني بعد ربنا ما ستري....

- ميرفت ما تكلمينيش في الدين. احسبها بعقلك. كويس اتنين مليون؟

ثم تابعت:

- امممم لأ خمسة عشان يبقى في عين العدو.

ابتسمت ثم أردفت:

- لكن يا فارس أنا....

قاطعتها:

- ولا كلمة، الفلوس دي اعتبريها مكافأة مني بس أنا لازم أعور عاطف

فيهم عشان يعرف مين فارس حسين.

ثم قمت وتابعت:

- استأذنيك دلوقتي وخلي تليفونك مفتوح عشان هاكلمك قريب..

* * *

دفعت الباب برفق ثم أغلقتة ودلفت ببطء مبتسمًا.. نظر لي كأنه يرى شيئًا.. لم يُخيل إليه أن فارس ما زال حيا.. قام من المكتب بوجه غزاه الرعب وتملأ منه فتصبب عرقًا وتناول منديل قماش يجفف وجهه بيد

ترتعش قسراً.. ابتسم رعباً وهو يلقي المنديل على المكتب.. علت أنفاسه
ودق قلبه بعنف.. أكاد أستشعر ما يشعر به وأنا أقف أمام الباب المغلق
أبتسم له بسماجة وبرود فاذا جبال القطبين..

قال بصوت مبحوح:

- فارس!!

- إزيك يا عاطف؟ اوعى تكون زعلان من اللي عملته فيك.

ثم أضفت وأنا أتقدم ببطء:

- أنا كمان مش زعلان عشان كلّمت الناس دي تقول لهم يستجوبوني.

- فارس....

قاطعته وأنا أجلس:

- خلاص اللي فات مات.

ثم أشرت له ليجلس وتابعت:

- كنت تعرفهم من إمتي؟!

صمت بعد أن جلس فصحت فيه:

- رد.

- كلموني من قريب والله وسألوني عن حالتك ومع كام وعد حكيت لهم

عن التقرير.

- وبعدين؟!

- طلبوا مني أراقبك وأبقى قريب منك بس لما عملت معايا كدا....

قاطعته:

- قُلت تنتقم.

ثم تابعت ببرود:

- أنا مسامح في حقي بس حق البنت الغلابة مش مسامح فيه.

- مين؟!

- ميرفت.

- قال بضيق:
- ما أنا اتجوزتها؟!
 - ما دا مش حقها. حقها تعيش مع راجل يا عاطف. أكيد فاهمني.
 - أطلقها ماشي، بس الشيك؟
 - قلت برفق:
 - ما دا اللي عايزك فيه! تاخذ الشيك وتطلق وتديها خمسة مليون.
 - قال بغضب:
 - بس دا كتير يا فارس!!
 - نسيت أقول لك إني بارجع في كلامي.
 - إزاي؟!
 - قلت ببرود:
 - يعني ممكن ما اسامحش في حقي. ها قُلت إيه؟
 - ممممممم.
 - صحت بحزم:
 - اخلص.
 - موافق. موافق.
 - شاطر.

* * *

الساعة 9 مساءً..

دلفت مكتب عمر ببطء وهدوء.. كان يجلس على كرسي المكتب يعبث ببعض ملفات القضايا ويتفحص الأوراق.. أوراق كثيرة متناثرة على المكتب مع بعض من الكتب التي أخذها من المكتبة القانونية القابعة خلف كرسي المكتب..

تفحصني ببصره بحب ورعب ويأس وقام من كرسيه ثم اقترب مني واحتضني برفق، وكأن شيئاً ما في صدره جعله يخافني أو يريد تجنب

ملاقاتي.. لم أعر هذا الشعور اهتماماً وصافحته ببسمة ممزوجة بلهفة صداقة
قرين.. استدار وعاد يجلس على مكتبه ثم ملمم الأوراق المبعثرة على سطح
المكتب دون الحديث..

جلست على كرسي المكتب الأمامي ووضعت أغراضي فوق الترابيزة
الصغيرة ثم أشعلت سيجارة ونفثت دخانها ببرود.. أشعل سيجارة هو الآخر
ثم ابتسم لي بوداً..
قلت مبتسماً:

- مش بتكلمني يعني ولا أعرف عنك حاجة من ساعة ما كنا عند الشيخ

دا؟

أردف متلعثماً:

- لا والله يا فارس، انشغلت شوية. أنت أخبارك إيه؟

- لا تعالى معايا دوغري. فيه إيه؟

- مافيش يا فارس.

قلت بضيق:

- لأ فيه.

قال بخوف:

- فارس أنا من ساعة اللي حصل مش باعرف أنام، وكل ما افتكر شكل

الراجل...

قاطعته:

- اعتبرها حادثة قهرية.

- اللي هو ازاي؟! أنت ما سُفتش اللي حصل؟!!

ثم تابع:

- أنت أزاي مش خايف على نفسك؟

ابتسمت ثم أضاف ثانية:

- فارس، أنت أكيد فيه سحر كبير معمول لك.

- للأسف اتأكدت.
- طب والعمل؟
- أومات برأسي:
- قريب يا عمر هافهم كل حاجة.
- ثم تابعت بعد أن قمت من الكرسي:
- مش هنتيجي نسهر شوية؟
- لا أنا عندي شوية شغل.
- على راحتك.

* * *

الأحد 5 مايو..

الساعة 8 مساءً..

صفت السيارة بالقرب من الكورنيش.. الإضاءة خافتة والهواء منعش
أثلج صدري.. الناس تعبر أمامي غير عابئين بشيء ولا يفكرون سوى بخطط
لحظات من السعادة الواهية التي ستؤول إلى برود ثم تفكر كحال البشر
جميعاً..

نظرت على يميني وملك تجلس تنظر أمامها برود ثم نظرت لي بضيق
وترجلت من السيارة لتسير مبتعدة بعد أن صفعت الباب خلفها وكأنها
أخرجت الغضب المستعر في صدرها به..

ترجلت خلفها وسرت سريعاً حتى ألحق هذا القطار الغاضب من كل
شيء.. من أمين بيه.. من فارس حسين.. من الحياة وقوانين القدر..

ناديت مرات ولم تعرني اهتماماً حتى جذبتها من يدها برفق فاستدارت
بعينين تحملان أطناً من الأسى والعتاب.. السائرون يراقبوننا بأعين تختلس
النظرات المتطفلة.. لا شك أنهم لم يظنوا أننا مراهقان وإلا ما كانوا لينظروا
بذات الطريقة، بل ظنوا أننا زوجان على أعتاب الفراق..

قلت برفق:

- فيه إيه يا ملك!؟

- أنت جاي تقابلني عشان تقول لي إن بابا عنده حق.

- صدقيني دا الأحسن لي وليك.

قالت بعتاب:

- يا خسارة يا فارس، كنت فاكراك اتغيرت، لكن للأسف اتأكدت إن

عمرك ما حبيت غير نفسك.

أردفت غاضباً:

- أنا يا ملك؟ أنت متأكدة من حبي ليك. هو أنا عشان باقول لك بابا

عنده حق وما ينفعش تربطي مصيرك بواحد خلاص بينه وبين الموت لحظات

أبقى باكرهك؟

- ولا تحبني! طول عمرك جبان وخواف ولا قدرت تواجه حاجة. طول

عمرك بتحمل غلطك على غيرك.

ثم تابعت بعد أن أجهشت بالبكاء:

- أنا ماشية يا فارس، بس تعرف إنك لو احتجتني هتلاقيني. عارف ليه!؟

صمت فتابعت ثانية:

- عشان أنا بحبك. سلام يا فارس.

ثم استدارت ومضت خطوات أراقبها بعينين تحجرت بهما الدموع..

بجسد أتلفه المرض وعقل ذابل كزهرة خريفية.. أشارت لـ Taxi ثم ركبت

وغادرت وما زلت أتابعها بعيني..

* * *

استيقظت فزعاً توّاً من كابوس لا أذكر تفاصيله.. جلست على السرير

أتنفس بصعوبة وعمق.. صدري يعلو ويهبط كعداء أنهى سباقاً منذ برهة..

أتألم وأشعر بطينين بأذني وآلام بعظامي.. كأن فقرات رقبتني تهشمت بمطرقة

حديدة.. الإضاءة عالية، لم أغلق مصابيح الشقة.. الخوف كان يسيطر علي

ويتحكم بما بقي من أعصابي..

اختلست النظر عن يميني وعن يساري وكأني أشعر بأنفاس خفيفة قريبة مني.. أستشعرها وأكاد أوقن بحقيقتها.. إنها أنفاس ساخنة ذات رائحة عفنة.. أشعر بأنني أقترب من الهلاك والجنون..

عبر العجوز باب غرفة نومي المفتوح وتقدّم بخطوات واهنة، بدا وكأنه يتعفن.. لقد نال منه الشيب وفاق ما نالني.. يمشي بعرجة ثقيلة يكاد يجر قدمه اليسرى ويدفع بحمل جسده على قدمه اليمنى.. ما زال كما هو يرتدي الحلة الرسمية.. اقترب كثيراً مني ونظرت له بتعجب لكنه نظر لي بشفقة وحب.. إنه الموت الذي يقترب منه ومني.. إنه أنا.. إنه فارس..

قال بوهن:

- خلاص يا فارس، النهاية قربت.

ابتسمت وقلت:

- ما جبتش جديد. كلنا أموات ولاد أموات.

- أنا نفسك يا فارس، أو تقدر تقول عقلك أو اللاوعي. أنا قربت أنتهي لأنك..

قاطعته:

- هاموت.

- لأ.

ثم تابع:

- لأنك خلاص قربت تفقد الجزء الأخير في عقلك وبعد كدا هتنتهي. ما

كنتش أتمنى عالم زيك يموت الموتة دي...

قهقهت:

- عالم!

ابتسم وأردف:

- مش إبراهيم بس اللي كان عالم.

قلت بصياح:

- أنا مش فاكر ليه أي حاجة؟!

- لأن اللحظة اللي بتشوفني فيها هي دي ممكن تكون اللحظة الوحيدة
اللي بتبقى فيها أنت...
قلت بياس:
- أنا مش فاهم!
- صدقني ولا أنا فاهم لكن الفلاشة...
- ما لها؟!
قال بياس:
- مش عارف...
ثم اختفى من أمامي تاركًا أسئلة تدور في خلدي وعدت أصيح وأردد
النداء حتى يعود أو يسمعني...

* * *

الإثنين 6 مايو..

الساعة 9 مساءً..

أرحت رأسي على الكرسي الجلدي الوثير ثم وضعت هاتفي على الطاولة
الزجاجية أمامي.. نظرت إلى الطاولات المتناثرة حوي في هذا المقهى الفاخر..
طاولتي أمام المقهى ولا ساتر فالسما المعتمدة تزيد المشهد هدوءًا مع تلك
الإضاءة الخافتة والموسيقا السلو.. تعلو سحب الدخان الكثيفة حوي مع
بعض الرواد الذين يدخلون النرجيلة.. والأصوات المتداخلة باتت تعكر صفو
المشهد.. ضحكات خليعة.. أصوات نرجيلة.. عبث شبابي وألفاظ نابية.. بعد
الطاولات رصيف يعبر منه بعض المارة ويقفون لتبادل التقاط الصور.. تحول
المشهد لصورة ممسوخة تعكرها الضوضاء..

التقطت السجائر وأشعلت واحدة ثم نفثت دخانها ببطء.. أشرت بيدي
اليمنى لمايكل الذي وقف على بعد مترات يجول بنظره ببلاهة يفتش عني
وتقف جارته مولة.. ليس من الصعب تمييزه بذلك القميص أخضر اللون
وكانه سقط من شجرة عتيقة..

رآني فابتسم ببلاهة وربما مولة أصابتها العدوى منه ففعلت مثلما فعل
وتقدما حتى اقتربا من الطاولة وجلس ثم قال مايكل:
- ماعلش يا فارس مولة صممت تيجي معايا.
قالت مولة:
- وحشتني يا فارس.
- شكرا يا مولة.
فنظرت لي بغضب حتى قاطع مايكل الهدوء:
- أنت بقالك كام يوم مش بتكلمني ولا بترد على تليفونك ليه؟
- ماعلش يا مايكل نفسيتي تعبانة شوية.
فأضاف:
- عموماً كريمان رجعت.
- بجد؟
قالت مولة بضيق:
- مين كريمان دي؟
قلت بضيق:
- خليك في حالك يا مولة.
ثم تابعت:
- هنروح لها إمتى؟!
- تنزل بس الشغل يا فارس.
- ماشي يا مايكل. تشربوا إيه؟
- ممممم

* * *

الساعة 1 صباحاً..

الليل يداعب نفسي ويغشاها.. باتت أشد ظلمة من سماء حالكة..
الطريق إلى الموت جبراً والإرادة لا تستطيع أن تفر من قدر أوشك على

الوقوع.. قانون الكون من العدم نشأ وإلى العدم سيزول وهذا الدخان الذي
ملاً الغرفة كأنه الغبار الكوني لعالم خلقته وأردت أن أحيأ به.. ظننت أنني
إله ولم ينل مني الموت أو الهزم، ولن تنال مني خطايف القدر لكني الآن
أدركت الحقيقة الأزلية.. الحقيقة الواحدة والتي نعرفها ونؤمن بها لكنها في
أعمق مكان في عقلنا اللاواعي..

جمعينا نؤول لذات المصير وجمعينا نؤمن أن مصيرنا لم يكتب مثله..
ممدد الجسد على السرير.. ألتقط أنفاساً حارة من السيجارة والدخان
يتصاعد برفق مع الإضاءة الخافتة.. صدري يعلو ويهبط.. فقدت تسعين
نفساً من أنفاسي الباقية إلى الآن.. لا أملك تفسيراً لما رأيت ولكني أعلم أن
ذلك العجوز أخبرني باقتراب أجلي..
استسلمت للنوم أخيراً وأغلقت جفني.. النوم غالبني ونال مني خلسة
فغدوت معه بأوصال واهنة مرتخية..

* * *

أقف أمام الهضبة مرة أخرى والإضاءة خافتة.. القمر يلقي بنوره رأسياً
على باب الكهف.. نظرت مرات إلى السلم الذي صعدته من قبل.. أحاول
الصعود.. أحاول أن أعلم لماذا أعود هنا مرة أخرى.. شيء ما يدفعني
لأصعد.. هرولت لأصعد السلم لاهتئاً.. اقتربت من الباب.. باب خشبي لا
أعلم هل تغير أم ما زال على حالته.. طرقت على الباب بكلتا يدي.. شق
صخر الهضبة وخرج ثعبان لم أر مثله.. ارتعدت خوفاً ثم وقعت على الأرض
أحاول الابتعاد دون أن أشيح نظري عنه..

- لقد لعنت قبلاً أنت ورفقائك وحرم عليكم معبدنا.

صرخت من الخوف فتابع:

- عد من حيث أتيت لتحيا مثلهم وتواري ثراهم.

- أنا مش فاهم.

فتح فمه وأظهر لسانه المشقوق ثم تابع:
- وكلت بحفظ السر، ولن تعبر إلا بموتي ولو سمح لي لقتلتك.
- أنت مين؟!
- أنا حارس المعبد.
قلت بخوف:
- أنا ليه بيحصل لي كذا؟!
- لا أعلم ما تقول، وحق عليك أن تعلم كما جمعت الألسنة..
ثم صاح بغضب:
- عد من حيث أتيت وإلا كبلتك.
استيقظت أنفض وأتصبب عرقاً ثم قمت مترنحاً لأشعل ضوء الغرفة
لكني سقطت أرضاً مغشياً علي..

* * *

الثلاثاء 7 مايو..

الساعة 8 مساءً..

صياد ورحت اصطاد صادوني..

يا عدوية

طرحوا شباكهم رموش العين وصادوني..

يا عدوية..

سحب الدخان كثيفة.. غابة ضبابية في ذلك الملهى الليلي.. الطاولات
متناثرة.. زجاجات البيرة تُفتح وتنفور بهيام.. أفتش حولي بعين منتشية مع
اللحن.. على المسرح مطرب يرتدي حلة رسمية.. يدندن بنغم ويعلو
الإيقاع.. كريمان ترقص وترتدي ما لا يستر.. الأعين تتفحصها بشوق..

الملهى مكتظ بالرواد.. النادل يهرّ أمام عيني مرات يحجب رؤية المسرح.. الأجساد تتمايل.. صورة غير مُطية للملهى الليلي.. ليس هناك الثري العربي أو المعلم صاحب العباءة.. لعل مشهد الستينات تغير في مطلع هذه الألفية..

آه يا ليل يا قمر..

المانجا طابت ع الشجر..

يتابع اللحن وتكرار.. مايكل تمايل وحرك رأسه طرباً.. حماقته ترسم البسمة علي شفّتين يابستين.. ناولني سيجارة الحشيش المتخمة.. تناولتها سحبت نفساً عميقاً.. أعمق من أن يفرّ من صدري.. نفساً يغشى روحي.. يجعلني أذوب شوقاً لسريري.. أنسى.. مع علو اللحن يزداد الخدر.. تمايل جسدي هو الآخر ونسيت كل شيء..

لحظات السعادة إن دامت لمات الصراع بداخلنا وتهدمت الدنيا..

لكني أعلم أنها زائلة ولن تدوم.. معها انسحب المخدر من جسدي.. أطفال السيجارة وأخرجت هاتفي.. نظرت في الكاميرا.. لأرى وجه العجوز فارس والعينين الحمراوين.. استفقت من غفلتي ونظرت لمايكل بضيق وهو يتفحص كريمان ويتناولها ببصره.. أكاد أرى انعكاسات مفاتها في عينيه.. حياة مادية بحتة.. عالم تعيس وسكير.. جميعنا سكارى في ملذات الحياة ونهايتنا سكرات موتنا..

ابن آدم سكير والمشاعر كأسه..

انتهت الأغنية ومعها علا التصفيق الحار.. ابتسمت كريمان ثم غادرت المسرح وتبعها هذا المطرب..

صحت بمايكل:

- هنفضل كدا كتير؟

- استنى يا فارس دقائق وهتنزل تقعد معنا.

- أومات برأسي فأضاف:
- بس إبراهيم دا كان ذوقه عالي قووي.
ابتسمت فتابع:
- ما لك يا فارس؟
- قرفان منك.
- اشعل سيجارة وقال وهو يزفر النفس الأول ويغمض عينه اليسرى:
- عادي.
- ثم تناول نفساً آخر وزفره بحنق:
- ما انا قرفان من نفسي بس أنت هتموت وترتاح.
وتابع بجدية:
- تعرف يا فارس أول مرة أحسدك.
ضحكت بسخرية:
- أنت فاكرني هادخل الجنة؟!
- على الأقل هترتاح من قرف الدنيا.
أومات برأسي:
- ما افتكرش إني هارتاح أبداً.
قاطعني:
- أنت بتدور ليه؟
- عايز أفهم....
قاطعني ثانية:
- ليه؟
- عشان...
قاطعني الثالثة:
- عشان عندك أمل إنك تلاقى أي مخرج. متمسك بالحياة قووي.
حاسس إنك لازم تعيش أكثر.

- عشان أصلح.
- لا ما أطنش. أنت بتجري ورا ملذات الدنيا. ما شبعتش من المخدر.
- أنت عايز إيه يا مايكل؟!
اقتربت كريمان من طاولتنا وهي تبتسم.. هبّ مايكل واقفًا وهي تمد يدها بالسلام.. سلّم بشوق ثم انحنى وقبل يدها.. زاد غرورها الأنثوي وابتسمت ببرود..
- ما اعرفش إن عندنا فنانات بالجمال دا.
ابتسمت وأردفت:
- ميرسي يا مستر مايكل.
- شكلنا هنعمل شغل سوا كتير.
ثم غمز بعينه فضحكت ضحكة ماجنة وهي تنظر لي ببرود.. أزاح مايكل الكرسي لتجلس فجلست وتبعها ثم أردف..
- أعرفك بفارس صاحبي.
- إزيك؟
أومأت برأسي في برود:
- أهلاً..
كيمياء البشر تنافرت بيننا.. وأدركت أنها شخصية لن تبهر في قاري..
لحظات صمت دامت ونحن نتفحص الملهى حتى قاطع مايكل الصمت:
- عرفت عايز أقابلك ليه؟
قالت ببرود:
- شغل؟!
- امممم خدمة.
ثم نظر لي فقلت:
- بصي يا كريمان عشان ما اطولش عليك. أنت كنت تعرفني إبراهيم محيي؟

- أعرفه.
- طب احكي؟! -
- أردفت بتعجب:
- أحكي?! -
- علاقتك بيه.
- كنا أصدقاء.
- قلت ببرود:
- صداقة من أي نوع?! -
- أصدقاء عادي.
- طب انطباعك عنه?! -
- مش فاهمة?! -
- يعني كان بيتصرف ازاي معاك?! -
- شردت ثم ابتسمت:
- كان gentle man.
- أومأت برأسي وتابعت:
- ما لاحظتيش حاجة غريبة عليه?! -
- لأ.
- قلت بغضب:
- بت اتظبطي واحكي.
- جحظت عيناها:
- أنت مجنون؟ -
- آها للأسف. اسألي مايكل.
- حاولت أن تغادر جذبها مايكل من ذراعها حتى أجلسها فتابعت:
- كان ماشي معاك. ما تدعّيش الشرف. أنا مش جاي أفتح تحقيق معاك.

ثم تابعت مهدداً:

- أنت لو ما اتكلمتيش هاتكلك.

نظرت لمايكل فأوماً برأسه وأردف:

- كريمان إبراهيم ادی لفارس عقار طبي خلاه يکبر زي ما انت شايقة.
هو قدامه أيام معدودة ويحاول يلاقي أي مخرج فلانم تساعديه باللي
تعرفيه لأنه مش باقي على حاجة..

كست أمارات الدهشة وجهها وظلت تنظر لي بتعجب لدقيقة ثم
أردفت:

- هاقول حاجة مهمة. إبراهيم حصل له كدا.

قلت بتعجب:

- إزاي؟

صمتت وقالت بخفوت:

- جسمه من جوا جلده كبر وشعر راسه وقع لكن...

صمتت فصحت فيها:

- إيه؟!

- مش عارفة وقف الموضوع..

ثم شردت وتابعت:

- يوم جا لي وجاب لي عربية غالية وكان طائر من الفرحة وقال لي إنه
لقي العلاج. ما كنتش فاهمة حاجة. أنا لاحظت إن جلده بدأ يكرمش لكن
بعد كدا وقف الموضوع وثبت عند حد معين وبعد كدا بقى بياخد أدوية...

قلت مبتسماً بسعادة:

- أيوة والعلاج دا فين؟!

- صدقتي ما اعرفش.

- طب ما فيش حاجة تانية؟!

حركت رأسها نفيًا فأشرت لمايكل:
- يلا بينا.

* * *

الهواء منعش منتش يلفح وجهي.. أنفاس باردة مع طقس معتدل.. أقود بتأن وأنظر إلى الطريق أمامي بعين ثابتة.. شاردًا بعقلي وعيناوي مثبتتان على السيارات أمامي.. اختلست النظر إلى المرأة اليمنى ثم عبرت جهة اليمين.. أمام الكورنيش في موضع اعتدت أن يكون ملاذي.. الساعة تجاوزت الرابعة مساءً وذبلت حرارة الشمس.. أبطأت السرعة وضغطت زر الانتظار.. نظرت عن يميني أفتش عنها.. نظرت أمامي لم أجد سيارتها.. أخرجت هاتفي وقبل أن أحدثها وجدتها تقف تنظر إلى الماء.. أعلم تفاصيلها وكل شيء عنها.. أدرك رائحتها وإن بعدت عني سنوات ضوئية.. من خلف ظهرها وإن لم أرَ وجهها.. ترتدي ملابس فضفاضة واسعة وحجاب صغير.. ترتدي الأسود وكأنها ترتي لحالي.. ملك من أشعلت جوارحي.. من ملكت عصمة أمري.. ملك الحب والوهم والحببية والخائنة وكل شيء..

ملك هي ملاكي في عالم خلقته في عقلي.. عالم تقترف فيه الملائكة الأخطاء.. فارس حسين إن صنع عالمًا سيكون عالمًا ممسوخًا.. وتكون ملك أفضل من به..

صفت السيارة ببطء وترجلت.. أغلقت الباب برفق وتقدمت منها بخطوات متراجعة.. وقفت خلفها أتنفس بعمق.. أشتم رائحتها التي فاقت كل شيء.. عطرها يغشى الكون ويملاً أفق عالمي..
ناديت بخفوت:
- ملك.

استدارت بعينين شاردتين في قسماتي.. تحتضنني بعينها وتعاتبني.. مقلتان تحجرت بهما الدمعات.. دمعات شوق وهيام.. عطف وكبرياء.. حب وكره وغضب.. كل ما ورثته الإنسانية من مشاعر جمع في هذه اللحظة.. وأين سأجد كلمات تصف ما مررت به.. لن يفلح الوصف..

مثبت العينين وأصابتنى عدواها.. تحجرت الدمعات في عيني.. شردت بها بقلب يثور.. بعقل نسي كل شيء سواها.. ما فعل مخدري مثلما فعلت بي.. وكأنها كأسي الذي طال بحثي عنه..

- فارس.

قلت بهدوء:

- ليه عايزانا نتقابل هنا؟ ممكن نقعد في مكان.

ابتسمت:

- حبيت نبقى في مكان لينا ذكريات كتير فيه..

- ملك...

قاطعتني:

- بتحبني؟!!

- ما اعرفش إنها ممكن توصف حاجة من الي في قلبي ليك.

قالت بحزن:

- ليه هتسييني؟!!

- ملك أنا باخا...

قاطعتني:

- لمرة واحدة حاول ما تكونش سلبي.

- ملك أنا عارف إن النهاية خلاص، وكدا كدا أنا هاموت. هنعيش سوا

كام يوم وأسيب لك ألم. ملك أنت جرحتيني كتير وأنا جرحتك..

ثم شردت:

- فاكرة لما جيت لي المستشفى وكنتي لابسة خفيف في عز المطر؟

- كنت عايزة أشوف غيرتك. فارس أنا بحبك.

ثم تابعت:

- سييني أعيش معاك اليوميين اللي فاضلين لوحدي، هاسيب البنت عند

بابا.

- لكن...
- بابا مش هيعارض.
- طب تعالي أوصلك...
ثم جذبتها من يدها قاصدين السيارة...

* * *

الساعة 9 مساءً..

أطقت بيدي على سطح المكتب بسخط.. الوقت لا يمر.. أخرجت هاتفي وتفحصت مواقع التواصل.. أجلس أمام مكتب عمر.. خرج قبلاً ليتحدث في الهاتف، وبدت أنها مكاملة غرامية لا يريد أن تصل بذاته إلى مسامعي.. أعبث في الهاتف بتأفف.. أشعلت سيجارة وزفرت الدخان بسخط.. مرت خمس دقائق إلى الآن وما زال يتابع الثثرة.. شعرت به يربت على كتفي وهو يتجه ليجلس على كرسي المكتب.. لم ألحظ أنه هنا لشرودي بشاشة الهاتف..

قال وهو يجلس:

- ماعلش يا فارس اتأخرت عليك.

- ولا يهملك.

ثم أضفت:

- أنت مش بتظمن عليّ ليه؟!

قال بتعجب:

- فارس أنا حاولت أكلمك أكثر من مرة أنت بقيت بتختفي.

- اممممم.

تابع مبتسماً:

- أخبارك إيه؟!

- لقيت علاج.

هب وافقاً وقال فرحاً:

- إزاي؟! -

- الرقاصة اللي اسمها كريمان قالت إن إبراهيم كان بيحصل له زيي وقدر

يوقف الموضوع.

- الحمد لله.

- لكن...

أردف بتحفز:

- إيه؟! -

- ما اعرفش مكانه. أنا أعرف إنه موجود بس.

جلس وتابع بأسى:

- قصدك إيه؟! -

- ما بقيتش عارف حاجة يا عمر.

قال وهو يحرك رأسه يمنة ويسرة:

- لا لا في أمل يا فارس. إحنا مش هنستسلم.

أطفأت السيجارة وتابعت:

- أنا هامشي يا عمر.

- تعالى نسهر.

قلت بهدوء:

- مرة ثانية، محتاج أرتاح.

أوماً برأسه ثم قمت من الكرسي وتوجهت إلى باب المكتب..

نادى بودّ:

- فارس.

استدرت وقلت:

- نعم؟

قال مبتسماً:
- مش هنيأس.
أومات برأسي وغادرت..

* * *

الأربعاء 8 مايو..

رَنَّ الهاتف مرات ولم أعره اهتماماً.. لم أملك القوة للنظر فيه.. تابعت
افتعال النوم حتى صمت.. لم يغالبي النوم منذ أن رَنَّ.. أحاول أن أغلق
عيني.. أمني نفسي بميتة وقتية تأخذي من معاناة الواقع وإن كانت
كوابيسي ستعانقني.. تقلبت مرات يميناً ويساراً.. وضعت الوسادة فوق
رأسي.. اعتدلت وجلست ثم حاولت النوم ثانية.. دقائق على هذه الحالة
حتى يأس عقلي من النوم.. اعتدلت وتناولت سجائري.. أشعلت واحدة
والتقطت الهاتف.. الساعة الآن الثانية ظهراً.. أربع مكالمات فائتة من
رشاد..

ضغطت زر الاتصال وما إن سمعت جرس الهاتف حتى أجاب:

- أنت فين يا فارس؟

- كنت نايم يا رشاد.

فقال بعجل:

- هنروح لشمس النهار دا. هو وصل مصر امبارح.

قلت فرحاً:

- تمام.

- أشوفك بالليل..

سحبت نفساً عميقاً من سيجارتي بعد أن أغلقت الهاتف.. ظللت أتناولها
بشراهة.. خمسة أنفاس عميقة حتى اقتربت من سكراتها ثم أطفأتها بميتة
رحيمة..

رَنَّ هاتفني ثانية، التقطه:

- ملك أنت كويسة؟

- فكرت في اللي اتكلمنا فيه..
صمت لثوانٍ ثم أردفت:
- ادعي لي يا ملك. إن شاء الله هنعيش سوا.
- اممممم!
ثم تابعت بغضب:
- لسا زي ما أنت.
- مش كدا...
قاطععتني:
- سلام يا فارس...
سمعت جرس انتهاء المكالمة فألقيت الهاتف على السرير وقمت...

* * *

الساعة 10 مساءً..

ظل ثابت العينين ينظر أمامه ولا يكاد يرمقني بنظرات إلا خلسة بطرف عينه اليمنى.. وضع يده اليسرى على مقود السيارة وقد أراح كرسي القيادة إلى الوراء.. تفحصته مرات بين الحين والآخر.. أدرك كم الغرور البشري في هذه الشخصية.. حلته الرسمية.. عطره البراق.. الساعة الـ Rolex بجانب علامة marcedes وإن كان لا يقصد أن تكون ساعة يسراه بجانب علامة السيارة على المقود لكن المصادفات تحدث..
لبرهة تذكرت إبراهيم "لازم تركز في أدق التفاصيل".. ابتسمت ثم نظرت أمامي حتى قاطع شرودي وقال بثقة:
- الفيلا قدام بعد 200 متر على اليمين.
قلت بلا مبالاة:
- تمام.

فتابع:

- على فكرة أنا اللي ماجرها له عشان تعرف...

قاطعته:

- ما تكلمنيش بالمادة يا رشاد. أنت عارف إن عندي فلوس قدك عشر مرات.

فقال بتردد:

- لا ما اقصدش. أنت فهمت غلط.

- مش هتفرق..

اقتربنا من باب الفيلا فأدار المقود يميناً وضغط على آلة التنبيه مرات حتى فتح الباب رجل أربعيني يرتدي جلباباً.. لم أر تفاصيل وجهه لخفوت الضوء.. رفع يده وحيا رشاد الذي تجاهله وتابع القيادة للداخل..

صف رشاد السيارة ثم ترجلنا ودلفنا إلى الداخل بعد أن عبرنا الباب المفتوح على مصراعيه.. اقتربنا من الصالون وجلسنا متقابلين لبضع دقائق حتى قطعت الصمت..

- هو مافيش حد في الفيلا؟

- يبحب العزلة.

سمعت خطوات نعليه وهو يقترب فتوجهت الأنظار تجاه الصوت حتى رأيته.. رجل خمسيني يرتدي حلة رسمية.. الكثير من الخواتم في أصابع يده اليمنى.. شعر مصفف إلى الوراء بعناية تخالطه الشعرات البيضاء.. بشرة ناصعة البياض وأنف دقيق.. عينان واثقتان.. لحية متوسطة الطول.. وجه متناسق القسمات.. جسد متناسق وخطوات واثقة.. لا يبتسم.. فقط يمضي بتأنٍ.. جلس على كرسي يتوسط الأريكتين اللتين جلس كل واحد منا على إحدهما.. نظر لي بعين واثقة.. كأنه يقرأ كتاباً.. اضطربت قليلاً حتى قال ولكنة مصرية ركيكة:

- خايف؟!

- عايز أفهم..

فابتسم ببرود:

- مافيش داعي تبقى خايف.

- قبل ما اجي لك زُرت شيخ والمكان ولع وآخر كلمة قالها...

قاطعني:

- جايز يكون...

قاطعته بثقة:

- المفروض مين يخاف!؟

شرد ثم أردف:

- بتشوف كوايبس؟

- كتير.

ثم تابعت:

- أكيد عارف اللي حصل مع رشاد...

- طب هنعمل حاجة وعائزك تحكي سُفت إيه؟

- حاجة إيه!؟

قام واقترّب مني ثم وضع يده على رأسي.. نظرت له بتعجب حتى بدأ يتمتم بصوت هامس.. بدأ الخدر يسري في جسدي.. ارتخت أوصالي وشعرت بدوار.. الرؤية مشوشة.. علت أنفاسي وشعرت بأن شيئاً ما بي يقاوم.. فاستفقت ثانية.. بدا عليه التعب بجفنين مثقلين ثم نظر لي وصاح بغضب.. - قُلت لك أنا باساعدك.

ثم عاد يكرر ما فعله.. فشعرت بالخدر واستسلمت للنوم أخيراً..

علا صوت الموسيقى التي سمعتها قبلاً gamecan .. شعرت بالخدر يسري بجسدي ومضيت مترنحاً أسقط أرضاً ثم أقف ثم سقطت ثانية وزحفت مبتعداً عن الصوت.. لا أرى شيئاً فالظلام حالك.. أشعة قمرية ساقطة رأسيًا تبتعد مترات عني.. زحفت تجاهها بوهن.. الصوت ينخفض كلما ابتعدت وتتضح الرؤية.. قل طنين أذني وبدأت أشعر بعودة وعيي.. أستفيق من

غفلتي.. أقرب من بقعة الضوء.. أزحف بوهن حتى اختفى الصوت
 واستجمعت قواي ووقفت أنفض الغبار عن جسدي..
 لقد عبرت غابة بالكاد أرى مدخلها.. ضوء القمر يلقي بنوره على جسدي
 والضوء خافت.. نظرت حولي لكل شيء.. أفتش عن شيء لا أدركه.. أدور
 حول نفسي في حلقات.. ناديت على إبراهيم ولم يجب.. ناديت على شمس..
 ناديت صارخاً لعلي أستيقظ.. ثم مشيت خطوات إلى الأمام.. زادت الإضاءة
 كلما سرت وأصبحت أرى الهضبة وباب الكهف.. شيء ما يقودني هنا..
 شقت الأرض على بعد متر مني فوقعت أرضاً وتعرق جسدي من
 الخوف.. لقد رأيته كما كان من قبل.. يسد الأفق أمامي.. ضخم الجسد
 وعينه تلمعان بالشر.. حمران مشقوقتان طويلًا وكأنه ينظر زهواً.. ثم
 أخرج لسانه المشقوق نصفين.. علت ضربات قلبي ولم أستجمع قوتي لأقف
 أو أفر منه.. الثعبان الذي ألاحقه ويلحقني وكأن شيئاً ما يقودني لأراه وبئس
 النهاية..

تنهدت بعنف وارتجفت حتى قال بغل:

- لماذا تعود ثانية؟!

- مش عارف.

- لقد أخبرتك أنك لن تدخل المعبد ثانية.

- ليه؟!

قال بحزم:

- أنت من رفضت ميراث العائلة، ولعنت من أبيك لتحيا بجسد فان

يضعفك وتضعفه وتموتا سوياً.

- مش عايز أموت!

- لن تفلح العودة لقد وكلت بحماية المعبد.

- طب هو مالوش ذنب.

- ما زلت تعشق عالمهم ولك ما شئت ستفنى كبشري.

ثم أضاف:

- إن عدت ثانية ستكون الثالثة ويحق لي قتلك.
- استيقظت أرتجف وجسدي بلله العرق الغزير.. شمس ما زال يضع يده على رأسي ثم ابتسم لي وقال:
- سُفت إليه يا فارس؟!
- تنهدت بعمق وأرحت رأسي على الأريكة فكرر بحماس:
- سُفت إليه؟!
- تعبان.
- أوماً برأسه وأردف:
- كمل.
- لعنة وهاعيش في جسم بشري لحد ما أموت فيه.
- ثم تنهدت:
- وكهف كل شوية أروح عنده. قال لي هاقتلك لو قربت هنا تاني.
- قال بحزم:
- فارس أنت لازم تدخل الكهف دا بأي شكل.
- ليه؟!
- لأن دا خلاصك!
- لكن إبراهيم لقي علاج.
- قال بحزم:
- ما فيش علاج. لازم تدخل.
- هيقتلني..
- أردف بهدوء:
- مش هتكون لوحديك.

قلت بخوف:
- لأ.
أردف رشاد:
- فارس دا الحل.
ثم تابع:
- ممكن تدي له مهلة يفكر يا شيخ شمس.
قال شمس ببرود:
- يوم وإلا مش هاقدر أساعده..
أومأت برأسي فقام رشاد:
- نستأذك يا شيخ شمس.
قمت وسرت برفقة رشاد مغادراً..



الموت يحيا بداخلنا منذ ميلادنا لم يكن يوماً مرادفاً للنهاية..

الخميس 9 مايو..

الهواء رائع والأنفاس باردة.. روحانيات عالية وإيماني بدأ ينضج أخيراً..
آمنت أن الموت الذي أفر منه سيلاقيني.. لكني آمنت أن السعي لإيجاد
علاج ما أنا فيه سيجعلني أموت راضياً..

أجلس في تلك العبارة على النيل.. بالطابق العلوي وأشرد في وجوه
البشر.. أراهم موتى وصرعى.. وجوه تخبئ أسفلها هياكل عظمية.. مشاعر
خالجها اليأس.. الضحكات والحب والسعادة أسفلها شعور واحد.. شعور
الفقدان والقهر والموت.. الظاهر يغشى الباطن، والباطن هو حقيقة الأمور،
ولأن الدنيا بلاء فحقيقتها مشاعر سلبية..

بعض الرواد يعبرون الممر الطولي ويجلسون.. ما زالت السيجارة في يدي
تتألم مما تلاقيه.. من مصير حتمي.. أنظر إلى مياه النيل بشرود ثم أطرق
برأسي.. أنتظر عمر الذي خاطبته قبلاً منذ ساعة.. نظرت في ساعة يدي..
كانت الرابعة والنصف مساءً ثم أزحت يدي وتناولت الهاتف.. ووضعته
ثانية لأمسك فنجان القهوة وأتناوله.. رشفة واحدة تكفي.. أطفأت
السيجارة مع قدوم عمر الذي تقدم تجاهي مبتسماً بخطوات متحفزة.. لعله
ابتسم لكي يشاركني ما أنا فيه.. نظرت له متجاهلاً ما بدر حتى جلس ثم
أردف:

- ما لك يا فارس!؟

- قابلت شيخ اسمه شمس معرفة رشاد.

- وبعدين!؟

- عنده علاج.
قال بسعادة:
- بجد؟
- لكن ممكن أموت.
- مش فاهم...
- فيه تعبان بيحرس كهف باحاول أدخله ولكنه بيمنعني.
قال ببلاهة:
- دا حلم؟
أومأت رأسي نافية:
- كأنه حقيقة يا عمر.
- والعلاج إنك تدخل الكهف؟!
- للأسف لكن وارد إني أموت. هو قال هيساعدني.
أوما برأسه:
- أنا مش بافهم في الأمور دي لكن أنت كدا كدا هتموت. مش هيحصل
حاجة لو جربت.
قلت بهدوء:
- عندك حق.
ثم أضفت:
- عايزك معايا.
- آسف يا فارس مش هاقدر.
- هاكلمك يا عمر لما أخلص..
ثم قمت مغادراً فنادي:
- فارس، أنا آسف.
- مافيش مبرر يا عمر.
ثم غادرت.....

* * *

الحادية عشرة مساءً..

عمّ الصمت وتبادرت النظرات خلسة.. وكأننا أبيننا أن نتواصل.. وإن جاز
كأن الصمت يفرغ جبال الأسئلة في خلدي.. وإن لم أجد جواباً لما مررت به..
رمقني بثبات وجحود وهو يجلس على الكرسي الذي توسط الأريكتين في
الفيلا.. وكأن المشهد أُعيد نواً.. وما سلف قد حلّ ثانية..

رشاد مطأطأ الرأس.. يفتش عن ماضيه بين قدميه.. يخشى شيئاً ما.. وما
زلت أجهل لم أريد أن يساعدي! تحاشيت النظر في عيني شمس وظللت
أتفحص رشاد.. لم أبدأ مرتعباً ولكن الصمت يفرغ ما في جعبته ليبري شمس
أنني كذلك.. أكاد أشعر بما يدور في خاطره.. كأنني هنا قسراً.. طائعا لمصري
الذي قادني ولا أملك الفرار منه..

شردت أتفحص الصالون إلى أن التقت أعيننا فابتسم لي وأردف:

- جاهز يا فارس؟

أومأت برأسي فتابع:

- أنا عارف إنك مش خايف.

- سُفت حاجات تخليني...

قاطعني:

- ما تخافش؟!

قلت بلا مبالاة:

- إيه هيخوف حد بينه وبين الموت شعرة؟

- الموت.

ثم تابع:

- ولا مش خايف منه هو كمان؟

- اممم.

- أنت لازم تدخل الكهف، فيه مخطوطة هتحفظها وتكتبها لي لأن دي

علاج اللي أنت فيه.

قلت مضطرباً:

- طب والتعبان؟!

- ما تقلقش.

ثم قام وتقدّم مني كأنني فريسته.. وضع يده فوق رأسي لسويغات..
دقائق.. لم أشعر سوى بخدر وغالبي النوم..

* * *

دوى نعيق الغربان في أذني.. تلفت يميناً ويساراً.. لم أر سوى الظلام..
ظلام تحفه ظلمات.. صحت بصوت فزع.. تلفت ثانية.. ثالثة.. أدور في
حلقة.. ركضت لاهتاً حتى سال لعابي.. على صدري وهبط كأماج عاتية في
محيط ثائر.. جفّ حلقي واتكأت على ركبتي.. ثم خارت قواي ووقعت
أرضاً..

صوت الغربان يعلو.. نباح كلاب.. النباح يزداد.. المخاوف تتجسد
أمامي.. ألقيت في سجن وغلّقت أبوابه.. سمعت صوتاً كالحفيف في أذني..
- قوم في نفس اتجاهك لحد آخر الغابة..

قمت بوهن وسرت ببطء.. سرت كثيراً حتى لاح القمر في سماء لم أر فيها
نجمة واحدة.. رأيت الهضبة أمامي فركضت تجاهها حتى اقتربت منها..
رمقت الكهف بخوف.. لم أر الثعبان هذه المرة.. لم أتقدّم خوفاً من مصير
الموت.. حاولت العودة لكنني أردت أن أنهي ما أنا فيه..

شقت الأرض عنه حتى صار أمامي.. كأنه يشتعل ناراً من غضبته..
تنفست بقوة مضطرباً..

- ألم أخبرك؟!

ثم تابع:

- حسناً هذه نهايتك.

زاد نباح الكلاب واقترب من أذني.. ظل يعلو ويدنو من أذني.. أسمع
الصوت قادماً من خلفي.. زاد الرعب في نفسي.. بت أعلم مصيري الآن.. هذا

شَرَك أوقعني فيه شمس.. علم أن الخوف من الموت سيجعلني أقترّب من نهايتي..

القدر لا فرار منه والفرار منه إليه..

وضعت يدي على أذني حتى لا أسمع هذا النباح.. لكن لا جدوى بات قريباً كأنهم في رأسي.. أغمضت عيني حتى سمعت صرخات هذا الثعبان.. كأنه يتلوى أهماً.. ثم صرخ بصوت عالٍ..
- لم يا مريد؟! -

نظرت إليه وتلك الكلاب تقبض بأنيابها عليه وهو يحاول التملص.. كلاب سوداء زادوا عن العشرة كلاب، ضخام كأنهم أسود برية.. أعين حمراء تشع ناراً.. تصرعه وهو يقاوم.. تركت المعركة وركضت تجاه الكهف وهو يصيح..
- لا تقرب، فعلتها قبلاً وستنهي أمر العشيرة.

اقتربت من الهضبة وصعدت هرولة.. ألثت ولا أقدر على التنفس لكني أقاوم بما أوتيت من قوة خائفة.. لكنها أصبحت خارقة.. الآن صراع البقاء.. اقتربت من الباب الخشبي للكهف.. دفعته بقوة لم يفتح.. مرات أحاول ولم أستطع.. سقطت أرضاً وحاولت حتى فُتح أخيراً..

كان الظلام يحفه لكن شيئاً ما جعلني أرى.. كأن عيني تشعان نوراً.. الكهف ضيق بقدر كبير بشكل هرمي.. تقدمت خطوات للداخل بحذر.. تكفي أربعون خطوة لتجعلني أرى الجدار أمامي برموز لم أر مثلاً.. وقفت أمام الجدار الصخري المنحوت ببراعة أنظر لتلك الرموز التي لم أعلم كينونتها.. مر الوقت أتأملها شاردًا بها.. كأنني بلا روح.. كأنها خطفت بصري.. ظللت هكذا..

الوقت يمضي لكنه توقف في عقلي حتى حدث!!

الحروف بدأت تضيء وتغير موضعها.. فتشت حولي في الكهف.. وجدت صخرة صغيرة مدببة.. تناولتها وظللت أحفر تلك العبارات على جلد ساعدي الأيسر..

انتهيت وغادرت الكهف لاهثاً نزلت الهضبة عدواً ثم صحت:
- شمس أنا خلاص جبت الي أنت عايزه.. شمس خرجني..
ثم ركضت في كل مكان.. أريد أن أعود.. سمعت صوت ذلك الثعبان في
أذني..

- لا تضيع القسم حتى لا تخضع عشيرتنا.

* * *

استيقظت ساعدي الأيسر يتقطر بالدماء.. رأيت عينا شمس تلمعان
بالشره وينظر لساعدي ثم قال بتحفز:
- فك الرمز.

نظرت له ببلاهة فتابع:

- يلا مستني إيه؟! ما أنت حبسوك في الجسم دا.

صرخت:

- لأ.

فقال بغضب:

- أنا عشت طول عمري مستني اللحظة دي. أنتو العشيرة الوحيدة الي
أتمردت وما قدرش حد...
قاطعته:

- لأ.

- فك الرموز وإلا هاقنتك.

دفعته بقوة.. قام رشاد واقترب مني ثم حاول أن يوقفني.. دفعته هو
الأخر ثم ركضت هارباً..

* * *

انداحت همهمات الليل وزاد عني مرارة.. أنلفظ الأنفاس حسرة.. لم أع
ما يحدث حولي، ولم أفسر ما كان إلا أنني أصبت بلعنة من عالم آخر.. عوالم
غيبية وجن وأشباح.. أشياء لم أعلم عنها شيئاً.. ربما علمت ولكني لا أتذكر..
حتى ذلك الوقت من الليل الذي تحوطه الظلمات زاد غموض المشهد..

الساعة تجاوزت الواحدة وما زلت أنظر إلى ماء النيل كأنه جواب ما أنا فيه.. أستند على السور الحديدي وأتكئ عليه.. أصبت بمرض الكرب.. سأموت حاملاً في صدري مخلوقاً غريباً..

كل شيء حدث لي محض خيالات.. الفلاشة مجرد خيال.. ولربما يخيل إليّ أن هذا يحدث..

رَنّ الهاتف، التقطه من جيب بنطالي، نظرت إلى الشاشة.. رقم خاص.. وضعته على أذني..

- فارس لازم أقابلك.

- أنت مين؟!

قال بعجل:

- أنا وحيد سليمان، مهندس برمجيات وعارف إبراهيم كويس.

- وإيه المطلوب؟!

- أعتقد إنك عايز تفهم؟!

قلت بتحفظ:

- يا ريت.

- اكتب العنوان دا.

* * *

السبت 11 مايو..

الحادية عشرة والنصف صباحاً..

مضى يوم حمل معه معاناة وأتى آخر حَمَلٍ بضيق.. لم أقابله البارحة.. لم أفعل أي شيء سوى النوم والنظر إلى ساعدي الأيسر.. أحاول أن أفهم ما قاله شمس.. عانيت لفهم أمر ذلك الثعبان والقسم.. لكن لا جدوى من المحاولات اليائسة..

أجلس في سيارتي أمام مبنى عالٍ مدون عليه لافتة عملاقة بطول المبنى..
elwaheed group.. أفكر هل أتقدم أم أعود من حيث أتيت.. دقائق مرت
وقد ظللت هكذا حتى رنَّ هاتفي فأجبت ليأتي صوته بحزم:
- اتفضل يا فارس أنا مستنيك من بدري.

- حاضر.

أغلقت الهاتف ووضعتَه في جيب بنطالي ثم تراجلت من السيارة متجهًا
لمدخل البناية.. التقطني بودي جارد بابتسامة باردة ومضيت معه نحو
المصعد.. تحرك المصعد متجهًا للطابق الخامس ولم يحدث هذا الجسمان
القابع أمامي كأنه يخشى فراري من ثقب في المصعد..

مضت الدقائق كدهر كئيب ومضيت معه في ممر طولي حتى اقتربنا من
باب غرفة مؤصدة فتحها دون أن يطرق بابها ودفعتني برفق إلى الداخل..
الغرفة بيضاء الجدران إلا الجدار المقابل لبابها كان زجاجيًا.. أمامه
مكتب زجاجي وكريسيان معدنيان.. وجلس على كرسي المكتب وكان الكرسي
في مواجهة الجدار الزجاجي.. لم أر وجهه.. رأيت ظهره فقط.. تحدث بثبات
دون أن يعدل من وضع الكرسي..

- اتفضل اقعد يا فارس..

قلت ببرود:

- ما اتعودتش أكلم حد من قفاه.

ضحك ثم أردف:

- كنت متوقع.

ثم استدار فرأيت وجهه.. كان رجلًا عجوزًا أصلع الشعر.. ليست لديه
تفاصيل تذكر في ملامحه لكن رائحة عطره لم أتبينها وكانت قوية كأنها
تميزه.. لا شيء يذكر.. سمين الجسد.. مترهل.. أنف صغير.. حاجب دقيق..
عينان بنيتان.. أسنان بارزة.. ملابس أنيقة..

قاطع شرودي:

- اتفضل.

تقدّمت بثقة وجلست:
 - طلبتني؟!
 - عايز تفهم؟
 أمّات برأسي فتابع:
 - أنا زيك بالطبط.
 قلت بدهشة:
 - نفس الحالة؟
 أمّاً برأسه:
 - أنا اللي برمجت الفلاشة.
 قلت بتحفز:
 - فهم...
 قاطعني:
 - هافهمك وما تقاطعنيش.
 ثم استطرد:
 - الحالة اللي عندنا دي حالة تلبس، أو تقدر تقول إحنا ملازمنا جن. لا
 يقدر يخرج مننا ولا نقدر نسيبه.. الفلاشة عبارة عن ذبذبات حاولت بيها
 أبطاً مفعول اللعنة اللي صابتنا..
 - تقصد اللي عندهم نفس حالتنا؟
 ثم تابعت:
 - إحنا كام واحد؟!
 - وليه إحنا.. ليه بيحصل لي كدا وإيه الفيديوهات اللي على الفلاشة
 دي؟
 - فيديوهات؟!
 قلت بغضب:
 - أيوة.
 - أنا لما برمجت الذبذبات دي كان الهدف إني أبطاً...

- قاطعته:
- إبراهيم لقي علاج..
- قال بغضب:
- ابن الكلب!!!
- صحت فيه:
- فهمني؟!
- فارس أنت اللي كنت بتشوفه ممكن اللي محفور في اللاوعي عندك..
- أنا شُفت حاجات حصلت..
- قال بدهشة:
- يبقى كنت بتشوف بعينه!
- صحت ثانية:
- مش فاهم.
- ولا أنا فاهم كل حاجة!
- قلت بضيق:
- هو طول الوقت متحكم فيّ ومش فاكر أي حاجة.
- ما عرفناش.
- صحت الثالثة:
- وضّح.
- ما عرفناش إرادة مين فينا اللي بتتحكم.. اللي قدرت أفسّره إن إرادتنا بقت واحدة.
- يعني إيه؟!
- يعني ما اعرفش مين اللي بيتكلم دلوقتي همّ ولا إحنا.
- وليه شُفت نفسي عجوز؟!
- يمكن لأنك عارف نهايتك، عقلك اللاواعي رسم الشخصية دي.
- قمت من الكرسي فأردف:
- رايح فين؟!

- عرفت مين الي بيتكلم؟!
 نظر مقطباً فتابعت:
 - هم الي بيتكلموا. عارف ليه؟
 - ليه؟
 - لأنك ظهرت دلوقتي وكان ممكن تظهر من زمان..
 فأوماً برأسه:
 - إحنا شياطين يا فارس.
 ثم انسابت دمعات من عينيه لم أستطع حجب تأثيرها وغادرت بدمع
 يفر قسراً من عيني..

* * *

الواحدة صباحاً..

أشعلت سيجارة ثانية بعد أن صرعت الأولى منذ سويغات.. متخمة
 بمخدر الحشيش أكثر من سابقتها.. سحبت نفساً عميقاً ثم لفظت الدخان
 بضيق.. الغرفة ساكنة مع إضاءة خافتة إلا من همهمات أنفاسي.. أطرقت
 برأسي أنظر إلى الغرفة أفتش عن العجوز.. ربما اشتقت إليه.. ممدد علي
 سريري أضع قدماً فوق الأخرى.. أطقق فقرات رقبتي بقوة.. أسحب أنفاساً
 متسارعة ثم أطفأت سيجارتي أخيراً..
 ألم في ساعدي الأيسر.. كأن ناراً تشتعل به.. وضعت يميني عليه.. صرخت
 أماً.. وددت قطعه حتى أستريح.. يخيل إلي أن الحروف تبرز.. تغير موضعها..
 نظرت إليه بدهشة.. بخوف.. بضيق.. حتى استسلمت أخيراً..
 دوى الطنين في أذني.. أكاد أسمع صوت دقات قلبي ونبض أوردتي.. أشعر
 بحركة عظامي وهي تن..
 صرخت ثانية.. الثالثة.. رابعة.. الحروف تبرز.. تتضح أكثر.. كتابة لم أرها
 من قبل..

* * *

كان الضباب الأحمر الدامي قد سدَّ الأفق وحبب رؤية كل شيء.. أسفل
قدمي رمال ذهبية تلمع.. سمعت همهمات حوي.. أصوات خافتة
متداخلة.. دقات طبول.. أزيز مياه.. حفيف أشجار.. صرخات.. صدى
صوت.. الأصوات تعلو في رأسي.. وضعت كلتا يدي على أذني.. لكن لم تتوقف
كأن الصوت أتى من رأسي..

* * *

جبال لم أر نهايتها.. أرض ممهدة أمامي.. أفق أمام جبل شاهق وأمامي
يمر رجال يرتدون الجلابيب السوداء.. زادوا عن المائة.. لم أر وجوههم..
تركتهم يعبرون أمامي.. كانوا يقودون أحدهم مكبل اليدين.. لم يلحظوا
وجودي.. كأنني سراب..

توقفوا وجلس الرجل المكبل على ركبتيه.. اقترب منه أحدهم.. سرت
تجاههم حتى أنفقد ما يحدث..
دقائق مرت حتى قال الرجل:

- لعنت يا طالوس، وستبقي بجسد بشري حتى تفنى معه.

قال المكبل:

- لكنني لم أع.

- إن قوانين العشيرة قد خطت قبل ميراث البشر. لم نخضع لساحر أو
مارد ومن يخضع منا يصير كالبشر ويهرم مثلهم..

- العفو.

- لقد آثرت أن تتشكل بجسد بشري وتعيش بعالمهم. لتحمي به..

ثم تابع:

- ستهرم معه ويهرم معك بقوانين البشر. ستتحدر إرادتك وإرادته. ولن
تعي من سيكون صاحب الجسد..

* * *

دبّ الصولجان الفضي على أرض صخرية فنحرتها وفتت منها قطعاً
حجرية تناثرت بالفضاء.. رمقت صاحب الصولجان فاقشعر بدني.. ارتعشت

خوفًا.. على صدري.. لم أع ما أرى.. كيان أسود لم أتبين قسماته.. قرنان
كبيران ملتويان فوق الرأس.. عينان كأعين الثعابين ولكنها حمراء تتوهج..
رأس طويل بذقن مدبب.. هب واقفًا لأرى جسدًا ضعيفًا تجاوز المتر بقليل..
ملابس سوداء تزينها حلي باهتة وأحجار عاجية.. غر الفاه وظللت هكذا..
أتأمل جدران الكهف الصخرية.. أتأمل الكيان الآخر الذي وقف أمامه
خانعًا.. خاضعًا.. مطأطأ الرأس..

دبّ الصولجان ثانية لتهتز معه جدران الكهف وأطلقت صرخة رعب لم
يسمعها سواي.. لم يحرك الكيان الآخر ساكنًا وظل أمامه على حالته.. لم أفرق
بينهما.. يتشابهان كثيرًا إلا أن الآخر كان عاري الجذع..
قال صاحب الصولجان:

- من اليوم أنت مرید العشيرة. تمردت كما فعل طالوس وستلعن بجسد
بشري.

- لكن يا أبتى..

صاح فيه بغضب:

- لست أبًا لأحد. لتحل عليك لعنتي وتمكث لتفنى معه.

* * *

كانت الجبال في كل صوب.. متناثرة بعثية.. فوقها سماء فاقع لونها..
وأرض خالطتها الصخور والرمال.. أكواخ مخروطية تناثرت على الأرض
بعثية.. فضاء شاسع من الأرض أمامي.. ثم ظهر هذا الكائن عاري الجذع
ثانية من الفراغ لكنه لم يكن وحيدًا.. رافقه كيان آخر يشبهه لكن طويل
الشعر بقدر اقتراب أن يلامس الأرض.. يرتدي عباءة سوداء ذات خطوط
حمراء داكنة.. ينتعلان شبشبًا باليسرى واليمنى حافية..

قال الكيان صاحب العباءة:

- ماذا تريدني أن أفعل يا حاصد الألسنة؟

- كوني معي يا ريعان نحيا كالشجر لئلا نلحق بالعدم...

قاطعته:

- لكن العشيرة لن تمنحنا من الحظ ذلك.

ثم صمتت وتابعت:

- سنلعن.

- درست كل الألسنة لأفك طلسم العشيرة ويجندهم السحرة.

اشتعلت ناراً من الغضب:

- ستفعل ذلك لأجل ماذا؟!!

- أكره معيشتكم. أنتم عتاة الجن تعيشون هكذا. نحن العشيرة الوحيدة

التي امتلكت قوة تخضع العالمين وأبت.

ثم تابع بود:

- ستحيين معي؟!!

- نعم ولكن..

قاطعها:

- لتذهب العشيرة لجحيم يستعرو..

* * *

عاد الكهف ثانية.. ليقف مرید أمام الكيان صاحب الصولجان لكنه هذه

المرّة كان مكبل اليدين تحوطه كيانات أخرى وتقيد حركته.. كان صاحب

الصولجان يشتعل ناراً.. يرتعد غضباً.. يثور.. لكن مرید لم يحرك ساكناً هذه

المرّة وكأنه أبل أن يحاكم بشيء شعر أنه حق له..

قال صاحب الصولجان:

- خنت العشيرة واخترت البشر ستحيا كما أردت وستنسى مثلهم، وصار

وعداً علينا أن نلعن كل من سار في درب أنت وضعت سنته.

قال المرید بتوسل:

- لكن ريعن يا أبل.

- ستلعن هي ورفاقك، ستنسى أنك عشقتها وتحيا بعقل بشري ناقص..

تنسيه الحياة ويدوم بسكراتها.. ستهرم بقوانين البشر بعقدك الرابع وإن

رأيت رفاقك ستهرم بقوانين خلقها سحر العشيرة.

صرخ المرديد:
- أمهلني يا أبي..
- ستصير إرادتك بشرية.
صرخ ثانية:
- أمهلني يا أبي..
- ستلعن.
صرخ الثالثة:
- أمهلني يا أبي.....

* * *

كانت الغرفة شاسعة.. جدرانها صفراء قائمة.. يتوسطها سرير خشبي صغير.. دولا ب كبير في المقابل.. مرآة باهتة.. ونافذة مفتوحة تُرسل تياراً من الهواء جعل شعر السيدة يتطاير بعنف.. ترتدي بيجامة منزلية.. حسناء بقدر يخشاه الحسن.. أنف ذو انحناء لطيفة.. شفتان رقيقتان.. عينان بنيتان.. شعر مصبوغ بعناية باللون البني.. جسد ممشوق.. تأففت ونظرت لطفل ممدد على السرير بالكاد يظهر وجهه.. وراح في ثبات عميق كملاك نائم..

دخل رجل يرتدي حلّة سوداء كلاسيكية.. ويدخن سيجارة بشراهة.. وسيم ذو شعر ناعم.. شارب غليظ أسفل أنف طويل حاد.. نظر إليها الرجل بعطف.. استيقظ الفتى وكأنه يراهما بعين تراقب بحذر كأعين الذئاب..

ربت الرجل على كتفها فأزاحت يده وتأففت:

- ما لك يا حورية؟!

قالت بغضب:

- اتصرف في ابن أخوك دا. أنا باري عيالي بالعافية.

- أعمل إيه يعني؟!

صاحت بغضب:

- ما اعرفش، وديه ملجأ.
- أخويا دمه ما بردش هو ومراته بعد الحادثة، والواد الدكاترة قالت إنه ممكن يفوق من الصدمة..

تابعت بضيق:

- وممكن يفضل كدا باقي عمره. أنت عارف إن الإصابة هتعجزه.
أوما برأسه في أسى:

- هاوديه مدرسة داخلي للمعاقين.

- مدرسة كمان! وتطلع إيه دي؟

أردف بضيق:

- مدرسة الأمل.

* * *

تدلت مصابيح من السقف على صف واحد في عنبر طولي يحتوي عددًا من الأسرة كصفين يصنعان ممرًا طوليًا نحو نافذة زجاجية.. كان العنبر خاليًا تمامًا إلا من طفل يجلس على كرسي ويحمله في مياه الأمطار الساقطة بعنفوان على أشجار الحديدية أمامه.. اقتربت منه يد ترتدي خاتمًا فضيًا مزينًا بنقش الشعبان.. ثم قال صاحبها بخفوت..

- هيكون ليك شأن عظيم يا فارس..

ثم تابع:

- أنا عارف إنك ممكن تعيش عاجز باقي عمرك والحادثة أثرت على مخك، لكن باوعدك بإرادة إنسان كامل يقدر يعمل كل حاجة.

ثم اقترب من أذنه وهمس بها:

- أنا كنت زيك ودلوقتي..

تم تنهد وتابع برفق:

- خليك زي إبراهيم...

* * *

قبضت اليد السوداء على قضبان حمراء كحمم.. ثم ابتعدت بغتة.. صرخ صاحب اليد بصوت كالعواء.. واستعر جسده ناراً.. كان بقفص من القضبان الملتهبة.. يثور ويبيكي وينتحب.. يتأوه.. يرتعد.. عاري الجذع.. بقرنين غليظين ملتويين.. كان مريد العشيّة.. في قفص سجن به.. اقترب صاحب الصولجان منه وصاح فيه..

- رفاقك قد خانوك حتى لا تصيبيهم اللعنة ولكنهم سيلعنون أيضاً.

- الرحمة يا أبي..

- هذه القوانين لتفنى بعالم الإنس ولكن لا تثق برفاقتك..

- كيف وقد نسيت أمر أنني من العشيّة؟!

قال بحزم:

- احذر إن علمت.

- لقد أرسلتني لقعر محيط ولست من الغواصين!

- أنت من أراد.

ثم غادر صاحب الصولجان فصاح المريد:

- سأفنيكم كما أردتم لي ذلك...

* * *

استيقظت فزعاً وجسدي بلله عرق غزير.. شردت بأمر ما رأيت.. بت أعلم الكثير عما حدث لي.. علمت أمر الكائن الذي اقترن بي منذ صباي.. منذ ذلك الحادث.. أعلم الآن أن إبراهيم كان يدرك من أنا.. أعلم لما نسيت.. ربما لعنة الكائن جعلتني أنسى وربما كنت أنا هو.. أعلم الآن كيف تحدثت تلك اللغات دون أن أدرك..

شردت ثانية..

أكان رفاقي خائنين؟!

ربما خاني إبراهيم وسيخونني وحيد أيضاً.. الآن أعلم سرّ علاقتي بنور أو رباغن.. علمت أن إبراهيم حاول كسر اللعنة بالدواء.. ووحيد حاول

كسرها بالتكنولوجيا.. لكن بقي دوري كحاصد للألسنة.. سأهلك هذه
العشيرة إن أنهيت أمر الطلسم..
ربما ما نقشته على ساعدي هو ناقوس خطر لموت محقق.. من منا كان
يسير الآخر.. هو من يسيرني أم أنا؟!
بات كل شيء جلياً أمام ناظري.. هي لعبة واستطاعت أن تتحكم بي..
ربما سماها وحيد كذلك لأنه ظن أنها تستطيع..

* * *

بعد أسبوع..

Gamecan

تلك الكلمة أصبحت مخدراً يسري بجسدي ليقبل أمر لعنة مريد
العشيرة ولعنتي.. في الأيام الماضية صرت وحيداً بلا رفاق.. هجرتهم جميعاً
واستسلمت لمصير حتمي.. لم أفكر بأمر النقش على ساعدي.. أو لم يفكر
المريد في ذلك.. أدرك الآن أن المريد هو من تحكم بإرادتي.. سر اللوحة وذلك
الشخص مطموس الهوية كان مريد.. منبوذ من الجن أو من البشر.. ربما كان
إبراهيم.. أو غيره ممن أصابتهم اللعنة..
لكن هناك شيء أخير سننهيهِ سوياً..

جلست بغرفة مكتبي أمام الـ laptop وأشعلت سيجارة أطلقت بها زفرة
حانقة.. كأن تسلسل معاناتي أراه أمامي.. أدركت أن فارس حسين ما هو إلا
شيطان إنسي.. نسي مريد وأنساني ما مضى في سنين عمري..
التقطت الهاتف وضغط زر الاتصال:

- وحيد...

- فارس!

قلت بهدوء:

- مافيش علاج.

صاح في بغضب:

- أنت تقدر تفك طلسم اللعنة.

- للأسف ما قدرتش.

تابع بتوسل:

- فارس أرجوك.

- أنا زيك.

ثم تنهدت وأردفت:

- إحنا شياطين يا وحيد. مش دا كلامك؟ أظن الموت هيكون أفضل لينا

- عايز أقابلك!

- ما اعتقدش إن عندي حاجة أفيدك بيها.

ثم تابعت:

- مين اداك طلسم الفلاشة؟!

صمت فتابعت:

- شمس؟

تابع صمته فأغلقت الهاتف ووضعتة برفق على المكتب:

- كلكم خونة...

* * *

الساعة 1 مساءً..

لفحت برودة مكيف الهواء وجهي.. ظللت أعبت بذقني شاردًا.. رمقت الطاولات المتراصة بنظام في مقهى مودرن بمنطقة وسط البلد.. المقهى خال إلا مني في ذلك الوقت.. الطاولات زجاجية تحوطها أربعة كراسٍ جلدية بنسق مهندم.. الأرضية بنية.. الجدران ذات نقوش لأشجار.. أطرقت برأسي أتابع النظر لكل شيء.. ثم تناولت فنجان القهوة ورشفت منه الرشفة الأخيرة..

تناولت هاتفي:

- عمر.

قال بود:

- فارس أنت فين؟!!

- مش بتسأل عني ليه؟! أظن افكرتني مُت وعفنت..

قال بلوم:

- أنت بتقول إيه يا فارس؟! أنا كل يوم باكلمك مش بتزد.

- عدي علي في الشقة بالليل..

- ما لك؟

- هاحكي لك بس ما تنساش..

- حاضر يا فارس.

ابتسمت ونظرت بعين ثاقبة للنادل الواقف أمامي يرتدي uniform بني

بلون المقهى.. انحنى ثم ابتسم وقال بود:

- خلاص القهوة حضرتك؟

- أومأت برأسي إيجاباً فتابع:

- حضرتك تؤمر بحاجة ثانية؟

نظرت إليه بثبات:

- لو اكتشفت إنك شيطان.. تكمل ولا تحاول؟

نظر لي بعته فتابعت:

- تحاول تبقى بني آدم؟!!

- هو فيه شيطان بيتوب؟

ابتسمت وأردفت:

- فنجان قهوة تاني..

انحنى وأردف:

- تحت أمرك يا افندم.

ثم التقط فنجان القهوة وغادر... تناولت الهاتف ثم ضغطت زر الاتصال

فأتي صوتها يحمل أطناناً من الأسى.

- خلاص يا ملك.
- فارس حبيبي، أنت كويس؟
- أول مرة أتأكد إن عمري ما هابقى كويس.
- بتقول ليه كدا؟!
- أنا اتعالجت.
قالت بسعادة:
- بجد؟
ثم تابعت:
- وليه مش هتبقى كويس؟!
- لأنك مش معايا.
- فارس أنا بحبك.
- وأنا كمان...
ثم تنهدت وأردفت:
- عايز أشوفك بالليل يا ملك، تعالي الشقة لازم نتكلم كثير.
- حاضر...
أغلقت الهاتف وقمت مغادراً بعد أن وضعت عشر أوراق فئة المائة
جنيه على الطاولة.. تقدّمت بهدوء فنادى النادل.
- القهوة يا افندم.
نظرت إليه وقت بودّ:
- اشربها أنت وخلي الباقي علشانك...
* * *

الساعة 7 مساءً..

سرت متزحاً نحو باب شقتي بعدما أصابني الجرس بالصداع.. نظرت في
العين السحرية.. وجدت عمر يقف أمام الباب ولا يكاد يترك زر الجرس.. بدأ

متأنقًا يرتدي حلة سوداء.. فتحت الباب بهدوء فاقترب مني واحتضنني بود
ثم أردف:

- أنت كويس يا صاحبي؟
أومات برأسي:
- اتفضل.

تقدّم أمامي نحو الداخل خطوات وما زلت أقبض على الباب.. أغلقت
الباب برفقي ثم تناولت قضيباً معدنياً واقتربت منه بحذر.. هويت على رأسه
فخر مغشياً عليه وسالت الدماء من رأسه.. سحبته بوهن نحو غرفة نومي..
قد تملك الضعف مني وأصبح الجسد خاوياً من القوة كقنديل فقد وقوده..
دلفت غرفة النوم ثم اقتربت من ملابسه فنزعت الجاكيت برفق ثم
القميص ثم البنطال.. أزحت غطاء السرير.. فرأيت جسدها.. نعم هي ملك
التي أتت لمصيرها منذ برهة.. المخدر يسري في جسدها ليجعل هذه
الشيطانة تتأهب لنومتها الأبدية.. ترتدي قميص نوم أرهقتني عندما
ألبستها.. نظرت إليها بغضب.. ابتسمت بنشوة.. الآن سأنتهي أمر كل شيء..
اللعبة تستطيع أن تجعلني أكرر المشهد..

حملت عمر ووضعت جسده على السرير بالقرب منها.. اقتربت من
التسريحة وحملت سكيناً ثم توجهت لزاوية على جدار مقابل للسرير..
عدّلت وضع الكاميرا..

حان الوقت لأنهي أمر المشهد.. صعدت على السرير ثم عدلت جسد
عمر ليعتلي جسدها.. اقتربت من ظهره ثم هويت بالسكين..
لكنني توقفت عندما لامس ظهره...

صرخت..

بكيت...

لم تكن إرادته ما تحركني..

لست كذلك..

نعم أنا لست دمية.. لست مرید العشيّة.. ألقيت السكين من يدي
وركضت هرولة...

* * *

20 مايو..

قلت بصوت عالٍ:

اكتشفت إن الملائكة لو امتلكت إرادة.. ممكن جدًا تعصي ربنا وسهل
جدًا.. تتحول لشياطين..

الطقس باهت كقلبي.. الساعة الرابعة عصرًا.. لكن الضوء لي كظلام غشى
روحي.. تساؤلات تعبت برأسي.. إبراهيم الذي عانى من نقصان الإرادة
وأصبح شيطانًا بعد أن امتلكها.. فارس الذي تعرض لحادث أفقده الحركة
وجزاء من رزانة العقل أصبح شيطانًا هو الآخر.. هل اخترت ذلك؟! لماذا لا
نرضى بما خُط في قدرنا؟ ذلك المصير المبهم.. الغد لا يحمل كثيرًا من الآمال..
لكنه لم يتحكم بي.. أم أنا من أقوده.. هذا ما قاله وحيد، لم نع من منا
الشيطان.. حالة سحر لم تحدث قبلاً ولن تحدث.. ما هذا؟! بلاء أم نعمة..
رمقت مياه النيل بثبات.. أشعلت سيجارة.. سحبت نفسًا عميقًا.. ما زال
لدي الكثير لأعلمه لكن الواقع يفرض علي ألا أعلم كل شيء.. سنتك جزءاً
لعقل يجهد في التدبر، ولن يعي سوى القليل..

وضعت كلتا يدي على السور الحديدي.. سحبت نفسًا آخر.. زفرته..
نفسًا ثالثًا.. زفرته.. رابعًا.. خامسًا.. ألقيتها في مياه النيل.. تقدّمت من
سيارتي.. فتحت الباب برفق.. صعدت.. صفعته بقوة.. قدت دون أن أقصد
وجهتي..

ظلت أفكر.. أعلم الآن لماذا خانني إبراهيم.. لأن رفقاء العشيّة
خائنون.. لا داعي لأنق بوحيد.. سأتركه يواجه مصير الموت.. كل
الفيديوهات كنت أراها بعين المرید وبعضها شكله اللاوعي.. علمت كيف

فررت من رجال المنظمة.. ساعدني أو بالأحرى ساعد نفسه.. ذلك الطلسم المنقوش على ساعدي الأيسر سيجلب عداة أبناء العشيرة.. لكنه لا يريد أن يفك لغز الطلسم وكذلك أنا...
أكملت شرودي وتابعت القيادة..

* * *

الساعة 6 مساءً..

صفت سيارتي على جانب الطريق.. بعد أن قاذي القدر لهذا الشارع غير المعلوم لي.. فتحت الباب الأمامي وترجلت.. تقدمت بخطوات ثابتة بعد أن أغلقت الباب برفق.. كان الشارع بعرض خمسة عشر متراً.. بالأحرى منطقة شعبية.. أصوات آلات التنبيه يصم أذني.. صياح البعض.. البنايات على يميني ويساري.. وصف محلات على اليمين.. مقاهٍ شعبية.. مشيت خطواتٍ منتصف الشارع.. غير عابئ بالسيارات التي تمر بالقرب مني في اتجاهين.. بعضهم يسبني.. بعضهم يعتني بالجنون.. كأن فارس حسين أصبح غير منتمٍ لذلك العالم.. وقفت أخيراً منتصف الشارع.. أفتش ببصري يميناً ويساراً..

نظرت لمقهى على يميني وكانت الطاولات قد ملأت الرصيف.. ثم رأيت هذا العجوز وهو يحمل كتاب كفاحي لهتلر ويقرؤه من أسفل عوينات طبية دائرية العدسة..

قلت بصوت جهور:

- الحرب المرة دي مش حرب تعصب للجنس.

ثم نظرت لشاشة التلفاز فوجدت صوراً لقصف الأراضي المحتلة..

وتابعت بصوت أعلى:

- ولا حرب عدوان..

نظرت على يساري لثلاثة شباب يشتبكون بالأيدي ثم زفرت بضيق

وتابعت:

- ولا حرب لآخوات في نفس الأرض..

أطرت برأسي ونظرت أمامي لأرى الكلب الأسود الذي علا نباحه وهو
ينظر لي بشره، ثم صرخت بصوت عالٍ:
- ولا حرب مع الجن.
ثم تنهدت وقلت بصوت خافت:
- الحرب المرة دي مع النفس. ودي أعظم الحروب.

* * *

بعد شهر...

بت أعلم كل شيء الآن.. وارتضيت بقدري الذي كُتِب عليّ.. وذلك
النقش على ساعدي الأيسر جعلني أرى ما حسبت أنه خفي في غياهب
عقلي.. رأيت أمر العشيرة وزاد بأني رأيت ذلك الماضي الأثيم لفارس..
جميع من كانوا هنا في قلبي قد رحلوا.. أم رحلت عنهم بخلجات نفس
واهية تأمرني بسوء فساءت الشيطان ذاته.. اليوم أنا فارس الذي علم كل
شيء..

فوق سطح أحد بنايات القاهرة القديمة وقفت أرمق العشوائية أمامي..
ذلك المسكن الذي آلت إليه نفسي.. بعيداً عن الناس.. بعيداً عن فارس
الصحفي الغني.. أفف، أستند على سور السطح بكلتا يدي.. أفكر في أشخاص
كانوا في قصتي.. لم أجهل مصائرهم حتى أشعر أن قصتي مكتملة..
ملك عادت لفيلا أمين بيه بعد أن أصيبت بنوبة صرع حادة لما فعلته
بها.. الآن تكرهني وتشفق علي في آن واحد..

عمر يحاول أن يتواصل معي.. يرن هاتفني ثلاثين مرة في اليوم لكني لا
أملك الثقة لأسمع نبراته المهذدة أو كلمات الانتقام..
مايكل ترك نشاطاته وحاول أن يترهبين.. الحقيقة لا أعلم الكثير عن كيف
يحدث الأمر ولكنه أبي أن يظل كذلك..

أما رشاد فما زال كما هو.. الموبوء بالشهرة وحب المجد.. ما زال رشاد
المهووس بالجاه.. أراه مرات على شاشة التلفاز.. يتصنع ولم يتغير فيه شيء..
لا يشعر بأي ذنب..

أما شمس فأشعر به دائماً في تلك الكوايس التي تغزو عقلي.. كلاب
وأشلاء ودماء وكل أمارات الخوف..
وحيد علمت بخبر موته منذ أربعة أيام.. إنها نهاية كل شيء له.. لم
يستطع أن يتخلص من لعنته..
أما أنا...

فأنا الناجي الوحيد ممن طالهم تلك اللعنة.. أحيا همريد العشيرة ولكن..
كما قال إبراهيم أدق التفاصيل..
أما أنا...

أقول إن هناك دائماً دواء..
تقدمت بثقة ناحية غرفتي القابعة بركن على السطح.. غرفة صغيرة
بحجم ستة أمتار.. فتحت الباب برفق..
الغرفة من الداخل فوضوية.. سرير ملاصق للحائط.. ودولاب صغير
أمامه.. ومرآة معلقة على الحائط.. الأرضية بلا فراش.. والحائط إسمنتي بلا
دهان.. تقدمت من المرآة ثم وقفت أمامها.. شردت بقسمات وجهي.. ثم
حركت يميني ببطء ولامست الندبة على رقبتني..
تناولت حقنة على كومود صغير بالقرب مني ثم حقنت رقبتني موضع
الندبة...

ابتسمت..

ضحكت..

صرخت بنشوة..

أعادي البشر أم عشائر الجن..

لا يهم...

دائماً ما كان هناك دواء.

تمت..



